

**IOANNIS DE
GUEUARA ... IN
ARISTOTELIS
MECHANICAS
COMMENTARIJ:...**

Giovanni : di Guevara, Nicolò
Leonico Tomeo, Aristoteles





M

Ex Bibliotheca
majori Coll. Rom.
Societ. Jesu

~~55.6.37~~

~~55~~
~~52~~
~~42~~

~~55~~
~~57~~
~~54~~

14-25-B-39



IOANNIS
DE GVEVARA
CLER. REG. MIN.

IN ARISTOTELIS MECHANICAS



Commentarij:

VNA CVM ADDITIONIBVS QVIBVSDAM
Ad eandem materiam pertinentibus.



ROMAE, Apud Iacobum Mascardum, MDCXXVII.

SVPERIORVM PERMISSV.

Imprimatur si videbitur Reuerendiss. P. Mag. Sac. Pal. Apost.

A. Episc. Hieracen. Vicesg.

Imprimatur

Fr. Paulus Palumbara Socius Reuerendiss. P. Fr. Nicolai Rodulfi Sac. Pal. Apost. Mag. Ord. Prædic.



ILLVSTRISS.^{MO} PRINCIPI
FRANCISCO
BARBERINO
S. R. E. CARDINALI
AMPLISSIMO

IOANNES DE GVEVARA.



*Q*UOD olimopus in Aristotelis Mechanicas, dum Philosophiæ, & Mathematicis vacarem intermittere coegit nouæ contemplationis occasio, hoc ipsum præteritis diebus (Illustrissime Princeps) dum publicis negotijs, grauioribusq. studijs implicatus, ægrè aut vix, vi decet aggredi potuissem, breuiter utcunque perficere, ac prælis mandare, tua me compulit amplissima gratia. Cum enim te primò Magni Patruī, Summīq. Pontificis Legatum amplissimum, in Galliam nauigantiem, ac nuper ex Hispania redeuntem ad afferen-

dam pacem animis, profligandumque maximorum Regum auctoritate exortum in Italia bellum, quo poteram obsequio, atque opera eiusdem Pontificis iussu prosequer; nobilissimo in comitatu innumera excitabantur quaestiones, tum circa rem nauticam, tum circa machinariam, atque vectoriam in uniuersum; quarum solutiones è mechanicis principiis petere operæpretium erat. Cumq. hinc orta fuisset mentio de meis hisce lucubrationibus eodem in genere partis, gratum fore cognoui, si ultimam ipsis manum imponens legendas eas tibi litterarum amantissimo pro animi refectio-
ne obtulissem. Infatigabiles namque animi eorum qui in rebus maximis occupantur, non ocio, sed varietate reficiuntur, & oblectantur: præsertim cum à grauioribus ad leuiores (digna tamen, & aliquo in genere præstantia) vel ab agilibus ad speculabilia, & è contra, opportuna quadam vicissitudine conuertuntur. Sed nec semper leuiores, aut minoris ex se conditionis dixerim, quæ in contemplationem mechanicam cadunt, utpotè quæ non modò ad res per magni momenti, ac necessarium humanæ uitæ usum, splendoremque ordinantur: quæque proinde apud Reges, ac Principes ex quo ge-
nus

nus hominum capit, incomparabilem obtinuerunt
 extimationem; verum quæ speciali quadam
 ratione, in aliam ampliorem, diuiniorēq.
 contemplationem, summi videlicet rerum ma-
 chinatoris nos conducant. Quippe qui talia hu-
 mano ingenio excogitare dedit molimina, qui-
 bus multaq; supra naturam sunt, naturam ip-
 sam emulando perficeret, arte superando ea à
 quibus natura vincimur, (ut Antipho scribit Apud Aris-
tot. in-
quæst. Mec.
 Poeta) & celestem machinam eiusque mul-
 tiplicem, ac inuariabilem motum, orbisque to-
 tius molem imitaretur: ut Archimedes alij-
 que permulti insignes Mechanici opere præ-
 stiterunt, & Cambray publico in foro li-
 cet videre. Nimirum arte manum dirigente
 tamquam potentiam executiuam, & instru-
 mentariam, effectricemque omnium excogi-
 tabilium machinarum. Quæ solis homini-
 bus iccirco data est. ut perhibet Philosophus, Iib. 4. de
part. ani-
mal. cap.
10. & ma-
gn. Mo-
ral. c. 33.
 quia soli inter omnia animalia summa pru-
 dentia, in qua ars tota fundatur præditi sunt.
 Unde sicut mens ipsa humana imaginem
 diuinæ sapientiæ, ac providentiæ refert dum
 cuncta rectè disponit; ita, & manus homi-
 nis, omnipotentiam quodammodo exprimit
 Creatoris, dum tam varia, ac mira, Me-
 cha-

chanica cognitione duce patraur. Quæ si
curetis ob sui generis excellentiam maximo
cum animarum prouentu, atque decore con-
sideranda se offerunt: quàm dignè interdum
hac in contemplatione morabitur, quem fru-
ctum non ex ea iucundè decerpet, qui diuina-
rum rerum meditationibus assuetus, piū-
que in Deum affectum exercens ipsum sum-
mum moderatorem veneratur, ac iugiter in
mundi regimine imitatur; dum non modo
firmum se Ecclesiæ Cardinem præbet, in
quo eius circumueritur, ac fulcitur machi-
na gubernationis. Sed ei qui ipsius uniuersa-
lis Ecclesiæ nauem summo imperio Christi
vice moderatur, ac regit tanta obseruantia,
atque virtute ministrat, tali ope atque consi-
lio adest, ut unica veluti utriusque manu mi-
sticæ huius nauis gubernaculum censeatur
inflecti? Tibi igitur Cardinalis Amplissi-
me dum talia iuum erga Sanctissimum
Patrum ter optimum Pontificem agis, mu-
neraque penè diuina persoluis, non mediocris
prouentus simul, ac iucunditatis offertur
occasio in his, quos dicam præstantissimæ
scientiæ Commentarijs. Nam, et motus
orbis, vel cuiusque globi circa cardines, ac
cir-

circuli circa centrum; admirabilesque eius
proprietates in ipsis patebunt; & modus quo
paruo gubernaculo ingenia circumferuntur
navigia: quod etiam Iacobus Apostolus mi-
ratus est, & ad mortalia transulit. In' epist.
cap. 3. Insuper
& quo pacto vela dare liceat, ac remigio vii
contingat ad navis progressum: Quod Petri
navim quam in altum ducere Saluator præ-
cepit ob oculis ponit: Et qua denique ratione Luc. cap.
5.
exiguo pondere ingenia leventur onera, ut
universalius discamus cum Paulo, quan- 1. Cor. 4.
tumuis magnum, ac diuturnum in se sit,
quod pro Christi nomine patimur in hac vi-
ta, momentaneum tamen, ac leue in fide-
lium statera inueniri, solo pondere eius quam
speramus futuræ gloriæ, ac retributionis:
Aliaque permulta id genus licebit spectare,
non minus fortasse ad mortalem, ac politi-
cam instructionem, quam ad vilem in reli-
quis, iucundamque Principis exercitatio-
nem. Quod si Amplitudini tuæ inter has tem-
porum angustias, non satis digna obiulerim,
mentisque propositum haud plenè affecutus
fuerim, obsequentissimum, grauisimumque
saltem in eis aspice votum, dum vix è Tri-
remibus post longam nauigationem tecum
egres-

egressus, multis, & ac varijs honoribus au-
ctus, ut quò poteram pacto obsequium erga
te meum illicò præstarem, perpetuoque ani-
mo inseruirem, ea deiuli prout iacent, morem
putans gerere tuæ voluntati.



IOANNIS
DE GVEVARA
CLER. REG. MIN.

IN ARISTOTELIS MECHANICAS

Commentarij:

VNA CVM ADDITIONIBVS QVIBVS DAM

Ad eandem materiam pertinentibus.

OPERIS ARGVMENTVM.



NOTA hæc Aristotelis Mechanica tractatio in duas partes diuiditur, in quarum prima, vniuersalis quædam doctrina traditur de natura & obiecto ipsius facultatis Mechanicæ, tum de causis & principijs earum operationū ad quas facultas ipsa ordinatur in vniuersum; quæ sanè principia vt præcognita, sunt etiam speciales rationes assentiēdi conclusionibus in suis demonstrationibus, præter vniuersaliora illa Geometrica elementa, ac theoremata, quibus passim quoque vtitur in eisdem demonstrationibus. Huiusmodi autem causæ atque principia, sunt quæ de natura & admirandis proprietatibus circuli ab ipso Aristotele afferuntur. Siquidem in resolutione, ad ea reducuntur & in ipsis fundantur quæcunque de mechanicis instrumentis, eorumq. motionibus in progressu demonstrantur, vel quæcunque ad artificiosam motionem, aut detentionem grauium & leuium hic ostenduntur. Proindeq.

2 OPERIS ARGUMENTVM.

deq. ex ipsis totam artem mechanicam tanquam ex proprijs principijs intelligemus consurgere. Quamvis huc etiam spectent, & inter eadem principia computari debeant, quæ Archimedes; Hero, ac Pappus cum alijs tradiderunt de centro grauitatis, in quibus pariter varix, ac per plures demonstrationes mechanicæ fundantur: quæ que propterea à nobis breuissimè colliguntur, & ad complementum doctrinæ inferius in Additionibus afferuntur.

In secunda vero parte huius Mechanicæ tractationis trigintaquinque Aristoteles quæstiones veluti problemata quædam proponit, in quarum solutionibus, singulis experimentis obseruatis ac ritè perspectis, singulisq. difficultatibus occurrendo, vniuersam applicat doctrinam in priori parte traditam.

Rursus autem primam partem huius libri seu tractationis in duo tantum veluti capita sub duobus titulis Aristoteles distribuit. In quorum primo agitur de artis mechanicæ obiecto ac facultate. In secundo verò de proprietatibus circuli in quibus mechanicæ demonstrationes penè omnes fundantur. Quoniam verò doctrina quæ in ipso secundo capite continetur, non modò fusior est, sed etiam obscurior, vt commodius nostris commentarijs dilucidetur, eam vltèriùs in textus diuidendam esse censuimus, iuxta numerum proprietatum circuli, de quibus ipse philosophus tractat; primumq. caput prædictum, etiam sub textus nomine & inscriptione ad vniuersitatem sermonis, ac diuisionis comprehendere placuit.

Translationem denique Leonici elegimus tanquam communiorè, licet in quibusdam deficiat, quoniam adhuc grecus textus mendis est plenus. Et quidem mirandum, dolendumq. valde est, aureum hoc opus Philosophi, diuinis propè speculationibus refertum, tot verborum transpositionibus & corruptionibus deprauari. Quæ de causa fortasse permulti illud exponere neglexerunt, ac difficile iuxta verum sensum Auctoris intellexerunt. Est enim in quibusdam partibus diminutum in alijs verò redundans, ac in multis confusum. Quapropter nonnullæ nobis permittendæ erunt transpositionum reductiones, verborumq. rescæctiones, aut additiones

circa

OPERIS ARGVMENTVM.

circa litteram ipsius textus, quam penitus & in rigore semper sectari nequaquam liceret, ob præfatam corruptionem. Pro viribus tamen eam sectabimur, sensum enucleando, ac exponendo, nunc per modum parafrasis, nunc vero per modum interpretationis & extensionis. Multa in quibusdam locis addendo, prout opus fuerit ad complementum doctrinæ, multaq. pariter sub Additionum titulo, seorsum extra commentarios annectendo, vt siggillatim quæ scitu digna sunt, & ad mechanicam contemplationem pertinent plenius elucescant.



4
PRIMA PARS
MECHANICES

ARISTOTELIS STAGIRITAE
IN QVA EA CONTINENTVR,
quæ ad naturam Mechanicæ facultatis,
& principia operationum ipsius
pertinent.

Quæ sit artis Mechanicæ facultas.

Textus Primus.



MIRACVLO sunt ea quidem quæ
natura contingunt, quorum ignoran-
tur causa: illa verò quæ præter natu-
ram quacunque ad hominum utilita-
tem arte fiunt. In multis enim natu-
ra ei, quod nobis vsui esse potest, con-
trarium facit. Natura etenim eun-
dem semper habet modum, & simpli-
siter: utile autem multifariam commutatur. Quando igitur
quippiam præter naturam oportuerit facere, difficultate sua
hesitationem præstat, arteq. indiget: quomobrem eam artis
partem, quæ huiusmodi succurrit difficultatibus mechanicam
appellamus. Quemadmodum enim Antipho scribit Poeta, sic
se res habet; arte enim superamus ea à quibus natura vinci-
mur. Huiusmodi autem sunt, in quibus & minora superant
maiora: & quacunque momentum paruum habentia, magna
mouent pondera; & omnia ferè illa, quæ mechanica nuncupa-
mus & problemata. Sunt autem hæc neque naturalibus om-
nino quæstionibus eadem, neque seiugata valde: verum ma-
thematicarum contemplationum, naturaliumq. communia.

COMMENTARIUS.

AD colligendum quæ nam sit artis mechanicæ facultas quantum sit eius dignitas, & excellentia ex magnis ac mirabilibus, quæ operatur; illud in primis Aristoteles præmittit, eorum quæ miraculo habentur, alia quidem natura contingere, ut insueta & peregrina, quorum ignorantur causæ: alia verò præter naturam, ut quæ artificio aliquo adhibito supra vires patrantur atque ad propriam hominum utilitatem ordinantur. Siquidem natura nonnunquam deficit in quibusdam, quæ vñ nobis esse possunt, imò contrarium facit, quia eundem semper, ac simpliciter seruat modum in suis operationibus; vtile autem ad vñ hominum diuersimodè accommodatur, ac multifariam commutatur, iuxta scilicet varias exigentias, & opportunitates. Quando igitur quippiam præter naturam nos facere oportuerit, ob difficultatem quam plerunque in se id, quod faciendum est continet, hæsitare, & cogitare nos cogit quomodo faciamus, artemq. aliquam propterea quærere quæ difficultati succurrat, ac nos ad finem consequendum opportunis, aptisq. medijs dirigat atque perducatur. Cum verum sit quod Antipho scribit Poeta, arte nos superare ea, in quibus vincimur à natura. Quamobrem concludit Aristoteles, eam artem, seu artis vniuersæ partem, quæ huiusmodi succurrit difficultatibus, nosq. adiuvat ad operandum & consequendū ea, quæ sunt præter naturam, Mechanicam appellamus. Hac enim vtimur in his in quibus minora superant maiora, & quæcunque paruam vim habentia, magna mouent pondera; insuper & in omnibus ijs, quæ cadunt sub problemata, quæ communiter vocantur mechanica. Sunt autem (inquit) problemata mechanica, neque naturalibus quæstionibus omnino eadem, neque seiuncta valde: verum mathematicarū contemplationum, naturaliumq. communia. Quia scilicet non eodem modo nec eadem ratione procedunt problemata mechanica, ac naturalia seu physica. Siquidem diuersis vtun-

tur principijs, vt fufius infra explicabitur; diuerfasq. omnino demonstrationes efficiunt. Quoniam verò ea, circa quæ mechanica facultas verfatur nempe pondus & vis, qua illud mouetur, sub obiecto adequato phyfices materialiter continentur, ac non folum geometricis, fed naturalibus quoque rationibus nonnulla de ipsis demonftrantur; hinc eft, vt mechanica problemata à phyficis non dicantur valde feiuncta, nec admodum diftinguantur. Quare concludit Philofophus, mechanica problemata effe naturalium, mathematicarumq. contemplationum communia, hoc eft ratione fubiekti materialis quod commune eft phyficæ ac mathematicæ, & ratione quarundam conclufionum quæ quidem vtrarumq. fcientiarum principijs demonftrantur.

Verum vt hæc omnia diftinctius elucefcant, nihilq. ad huius textus Aristotelis, naturæq. artis mechanicæ intelligentiâ in vniuerfum quoad fieri potèft defideretur, nonnullas additiones hic fubnectere opere pretium putauimus, in quibus eadem feorfum, ac luculentius, aliâq. perinulta ad complementum doctrinæ exponere conabimur.

De Nomine, & Origine facultatis Mechanicæ.

ADDITIO PRIMA.

Nomen hoc mechanicæ facultatis, machinale artē aut fcientiam fignificat; fupra etymologia à machina, feu inuentione qua aliquid molitur, & quæft adiectiuum mechanicus, vel mechanica deriuetur à græca voce *μηχανικός*, & hæc *μηχανή*, vel à *μηχανίζω*, quæ inuentionem, & machinamentum fignificat. Vnde etiam apud latinos machina, tam animi quoddam inuentum aut molimen, quam inftrumentum aliquod artificiofum quo moles leuantur, aut quocunque modo pelluntur denotare vt plurimum confuebit, iuxta illud Taciti; Nihil tam ignarum barbaris quam machinamenta, & altus oppugnationum. Illudq. Liuji, Turres contabulatas, machi-

machinamentaq. alia quatiendis muris portabant. Nam siue loquendo de machinis bellicis, siue de machinis nauticis, aut architectonicis, semper machina vtrumque significatum inuoluit, aut saltem admittit.

Ars igitur vel scientia, quæ ad huiusmodi machinas spectat à Plinio dicitur machinalis, quasi machinandi scientia, vel peritia: Ab alijs vero communiter appellatur mechanica. Quò sensu Archimedes, eo quòd ad debellandos hostes plura adinuenerit machinamenta, apud Firmicum dicitur Romanos exercitus mechanicis artibus saepe prostrasse. Vsurpata autem vel extensa significatione, ars quoque mechanica vulgo nuncupatur omnis illa quæ circa fabrilia versatur, & distinguitur ab arte liberali. Nam & mechanicus dicitur quilibet faber vel opifex eorum, quæ ingenio simul ac manibus fiunt. Et machinator bellicorum instrumentorum appellatur non solum qui bellicas machinas excogitauit, sed is quoque qui conficit: vnde est apud Liuium, & alios auctores. Quamobrem Hero mechanicus, vt apud Pappum Alexandrinum lib. 8. suarum collectionum refertur, mechanicam facultatem in rationalem ac manualetn distinxit, vtpote quæ in genere sumpta, vtramque rationem seu naturam videatur amplecti.

*Plin. lib. 7.
cap. 37.*

*Firmic. lib.
6. cap. 31.*

*Lin. de bello
Punico.*

Proprie tamen hic apud Aristotelem sicut apud ceteros omnes Philosophos, ac Geometras, mechanica facultas tantum significat artem siue scientiam, quæ Geometricis principijs cum ea statum & lationem graduum & leuium versatur, hoc est circa graua & leuia prout artificiosè moueri, aut quiescere debent, vt clariùs infra ex Pappo, & ex tradenda definitione constabit.

*Papp. lib. 8.
collectionum.*

Iam verò si originem huius facultatis secundum latissimam eius significationem spectare consideremus, eam non nisi cum ipsa natura humana ortum habuisse comperiemus. Quandoquidem nec in ipsis mundi primordijs defuerunt machinamenta quibus arte quadam innata, vel infusa primis parentibus, ipsi sese, & à contrarijs defenderent, & commoda confectarentur ad vitam incolumitatemque tuendam. Nam & corpora

tegere, & domos construere, & agros arare, & commeatus vehere, aliaue onera per aquas ac terras longius asportare; aquamq. ipsam ex imis haurire, oleum exprimere, triticum terere, ligna cedere, ferrum acuere, aliaq. huiusmodi peragere ad varios vsus ex necessitate, vel ab initio cœperunt; quæ cum instrumenta nonnulla mechanica, tum artem ipsam machinandi supponunt.

Quòd si secundum propriam acceptionem loquamur de facultate mechanica, quatenus vt diximus ars quædam est, vel scientia, quæ geometricis nixa principijs peculiari quadâ ratione circa suum obiectum per demonstrationes versatur, ac præcepta tradit, quibus homo in vsu ac motione grauium, & leuium dirigitur ac iuuatur; sic nullum extat monumentum quo ante tempora Eudoxij Architæ, ac Platonis illam cepisse assereremus. Eudoxius enim Gnidijs, & Archita Tarentinus primò geometrica principia ad vsum mechanicum, seu mechanicam contemplationem transtulerunt. Sed Archita eo quòd ligneam columbam volentem exhibuerit, aliaq. præclara, & admiranda mechanicæ artis adminiculo patrauerit, ipsiusmet artis inuentor est habitus, vt extat apud Eutocium; nisi Democritum Melesium qui iam antea opus quoddam ferè mechanicum Certamen Clepsydre inscriptum ediderat, inter mechanicæ facultatis Auctores computare velimus. Post Architam verò Tarentinum, vnum inuenimus Aristotelem Stageritam non modo verioris, ac solidioris philosophiæ auctorem maximum, sed & mathematicarum disciplinarum instructissimum qui mechanicæ artis modo scientifico fundamenta iecerit, hunc quem exponimus libellum edens, in quo præter subtilissimas quæstiones quas acutissimè diluit, firmissima, & vniuersalissima tradit principia quibus mechanici omnes tractatus ac demonstrationes eorum nituntur. Exinde igitur mechanica facultas propagari cœpit, nam Aristotelem secuti, vel imitati sunt multi, præsertim, qui sequenti seculo maximè claruerunt, vt Archimedes Siracusanus, cuius doctrina, ac summo ingenio huiusmodi facultas maxima incrementa suscepit. Item Ctesibus machinator præstantissimus
qui

qui spiritalia & hydraulicas machinas primus inuenit. Deinde vero Philo Bizantius, cuius mechanica peritia ab Herone commemoratur. Hero ipse Alexandrinus Philosophus Ctesibij discipulus; qui multa ac eruditissima monumenta mechanica protulit. Hinc Athenæus, cuius duo extant fragmenta græca de Machinis apud Vitruuium in fine. Vitruuius etiā ipse celeberrimus Architectus. Ptolemæus Alexandrinus astronomorum Princeps, qui libros mechanicos præclarissimos edidit. Pappus denique Alexandrinus, mechanicæ facultatis propagator egregius, & Hero mechanicus, qui de Geodæsia ac de machinis bellicis disertissime scripsit. Quos authores enumerasse sufficiat ad existentiam, & originem huius facultatis innuendam, cœteris recensioribus, breuitatis gratia prætermisiss, qui ad hæc vsque tempora eam magnoperè illustrarunt, micantq. adhuc ipsi, operum ac ingeniorum splendore.

De obiecto circa quod Mechanica facultas versatur:

ADDITIO SECVNDA.

VT autē Mechanicæ facultatis natura ex proprio obiecto, quemadmodum commune est omnibus artibus, atque scientijs in doctrina Aristotelis 2. de anima text. 33. præcipuè dignoscatur, Obseruandum in primis est, id quod per mechanicam facultatem intendimus, & ad quod tanquam ad finem consequendum omnis mechanica contemplatio ordinatur, aliud non esse, quàm grauis aut levis cuiusque corporis motionem, vel quietem, quæ parua vt plurimum virtute, arte ipsa mirabiliter comparatur, siue motio sit secundum naturam, siue sit præter aut contra naturam ipsius corporis grauis aut levis. Porro inductione constat, mechanicum omnem conatum, omnemq. tractatum in admirabilem lationem, aut statum corporum ordinari ex ipsius artis proprio instituto, vt ad leuanda, vel deijcenda etiam exigua virtute quæcunque

cunque pondera, ad aerem vel aquam artificiosè pellendam, attrahendam, aut continendam, ad missilia proijcienda, aliaque, secundum varias positiones locanda, vel de loco ad locum, diuersimodè transferenda, & similia, quæ per se nota erunt mechanicamenta omnia ad id præstandum accomodata, ac speculationes mechanicas recensenti.

Deinde obseruandum est, ad prædictam motionem, aut quietem arte consequendam, duo potissimum considerari à Mechanico; nimirum & quantitatem ponderis ex parte corporis mouendi, & quantitatem virtutis ex parte mouentis, siue immediatè ipse moueat per virtutem intrinsecam, siue per impressionem impetus, aut per instrumenta. In hoc enim ars ipsa mechanica sita est, vt habita ratione ponderis, aut leuitatis corporis mouendi aut detinendi, proportionalis vis ad id præstandum adhibeatur, congruaque applicentur machinamenta, ad supplendum quod deest naturali virtuti. Quod nequaquam fieri posset sine consideratione quantitatis vtriusque, nempe ponderis mouendi, & virtutis motiue vbi tota fundari debet proportio vnius ad alteram.

Denique obseruandum etiam erit, prædictam quantitatem ponderis, tum grauitatem, tum leuitatem respectu diuersorū à Mechanicis appellari. Maior enim quantitas ponderis respectu minoris, ab ipsis dicitur grauitas; minor vero comparatione maioris, dicitur leuitas. Sicut illud corpus ab ipsis dicitur leue, quod minus habet pondus respectu alterius; illud vero graue, quod maius; etiam si per se simpliciter loquendo vtrumque graue sit. Non enim Mechanicus accipit graue aut leue simpliciter & secundum se, quemadmodum vt plurimum accipit Physicus (nempe per graue intelligendo, quod nullam habet in se leuitatem, per leue autem quod nullam habet in se grauitatem;) sed semper vtrumque accipit respectiue; ita vt idem dicatur graue & leue respectu diuersorum, vt habetur etiam apud Aristotelem lib. 4. de cælo tex. 27. vbi aer & aqua respectu terræ dicuntur leuia, respectu vero ignis, grauia.

His ergo præmissis facile primo intelligetur, subiectum materiale

teriale adæquatum facultatis mechanicæ esse graua & leuia, seu quantitatem ponderis ipsorum, ac virtutis qua moueri debent aut detineri. Ratio autem est, quia in scientijs, illud dicitur subiectum materiale adæquatum, quod complectitur omnia de quibus in scientia tractatur; omne autem de quo in hac scientia tractatur, reducitur ad corpus aliquod graue, aut leue mouendum aut detinendum, siue ad quantitatem virtutis qua moueri debet aut detineri; Proindeq. ipsa graua & leuia vt sic, simulq. virtus motiua ac detentiua illorum, merito huius facultatis mechanicæ materiale subiectum adæquatum designatur.

Secundo vero non minus facile constabit, obiectum formale eiusdem facultatis esse admirabilem, & artificiosam mobilitatem, aut quietem ipsorum grauium, & leuium, abstrahendo à motione & quiete naturali aut violenta, vt quæ per impetum impressum, aut detentionem fieri consuevit. Constat autem ex eo quod obiectum formale cuiusque facultatis, aut scientiæ, est ipsa ratio sub qua de proprio subiecto materiali agitur in tali scientia: ratio autem sub qua in mechanica facultate agitur de graui & leui, virtuteq. motiua aut detentiua eorum, est ipsa artificiosa mobilitas secundum locum, & quies consequenda ipsorum, mediantibus præceptis tradendis in eadem scientia, vt per se patet ex sine explicato, ad quem tota hæc scientia dirigitur, & ordinatur. Ea ergo admirabilis, artificiosaq. mobilitas, iure censeretur formale obiectum huius facultatis mechanicæ.

Quo tandem sit tertio, vt obiectum totale, & adæquatum mechanicæ facultatis in vniuersum, sint ipsa graua & leuia prout artificiosè mobilia, & vt ita dicam quiescibilia, simulq. omnia quæ de ipsis demonstrantur in hac eadem scientia. Quod vetre non obscurè sumitur ex Pappo Alexandrino lib. 8. suarum Collectionum, vbi mechanicam contemplationem docet versari circa statum & lationem corporum, motumq. secundum locum in vniuerso, vt eorum quæ natura sunt, causas reddat; eorum vero quæ à natura sua discedere coguntur extra propria loca, in contrarios motus per sua theorematâ,

trans-

transferat. Ratio vero est manifesta, nam huiusmodi obiectū totale & adæquatum in qualibet scientia coalescere debet tū ex subiecto materiali etiam adæquato, ac formalitate sub qua de illo agitur; tum etiam ex omnibus ijs quæ de ipso demonstrantur in scientia. Explicatum ergo subiectum materiale sub illa formalitate cum omnibus quæ de illo demonstrantur per theoremata ac problemata mechanica, constituetur totale & adæquatum huius facultatis obiectum, in ordine ad quod tota eius essentia, ac ratio specifica desumenda est, ac paulatim inferius explicanda.

*Qua ratione facultas Mechanica constituatur
Ars & Scientia.*

A D D I T I O T E R T I A.

HUicque ad significandum habitum intellectualem contemplationis mechanicae, vt plurimum vsi sumus nomine facultatis mechanicae, eo quod nomen facultas abstrahat à propria significatione artis, aut scientiae, latiusq. pateat secundum communem omnium conceptionem. Quare determinandum nunc est, vtrum talis habitus vel facultas, sit verè in se, ac propriè vocari possit tum ars, tum scientia. Quod sanè auspicari debet à communi ratione artis atque scientiae ab Aristotele sæpius explicata, aptèq. passim licet non semper distincta. Nam 6 Ethicorum cap. 4. artem docet esse habitum quendam vera cum ratione effectiuū circa id quod aliter esse atque aliter potest; & cuius principium sit in eo quod efficitur. Vnde eorum quæ ex necessitate sunt, vel fiunt secundum naturam, nullam ait esse artem, cum hæc in se principium habeant. Ac proinde sequenti capite distinguit artem à scientia, eo quod scientia sit de rebus quæ non possunt aliter se habere. Nihilominus 1. Metaphisices cap. 1. idem Philosophus artem videtur confundere cum scientia saltem practica; ait enim, artem esse de vniuersalibus, ac propter causam ea quæ fiunt cognoscere, exemplum adhibens tum medi-

medicinæ, tum architecturæ; imò ipsas mathematicas disciplinas indefinitè loquendo, quas constat esse scientias, artes appellat.

Ex quibus primò dicendum erit, mechanicam facultatem verè & propriè esse artem, prout in hoc libello, & in explicato textu assumitur ab Aristotele. Nam proculdubio huiusmodi facultas est habitus intellectualis vera cum ratione effectivus; qui nimirum pro ratiocinationem versatur circa factibilia, ut sunt gravia & levia, quæ aliter atque aliter se possunt habere secundum artificiosam motionem, aut quietem illis tribuendam ab eodem principio in quo est ipse habitus intellectualis, ac directivus mechanicæ operationis.

Secundò dicendum est, eandem facultatem mechanicam verè etiam ac propriè esse ac vocari posse scientiam. Id quod implicitè docet Aristoteles loco citato metaphisices, dum eodem pacto sub nomine artis, de hac facultate ac de medicina loquitur, eisq. competere ait rationem scientiæ; & in specie Architectos (qui sanè mechanici sunt) honorabiliores, & doctiores esse ait ijs qui manibus propter solam cōsuetudinem & experientiam operantur: quoniam (inquit) causas eorum quæ fiunt, sciunt; & signum scientis est posse docere.

Vnde Pappus Mechanicam scientiā simul & artem appellat.

*Papp. Alex.
lib. 6. math.
cellat.*

Ratio autem est eadem quam citatis verbis indicavit Aristoteles; quia nempe si scire non est aliud nisi rem per causam cognoscere propter quam res ipsa est, & non potest aliter se habere, ut alibi ipsemet Philosophus definit 1. Poster. cap. 2. iure & quidem optimo mechanica facultas seu notitia, scientia esse debet, ac dici: quandoquidem hæ omnes conditiones illi propriissimè conveniunt. In primis enim est intellectualis cognitio eorum quæ circa motionem localem, aut quietem gravium ac levium contingunt, orta ex præexistenti alia cognitione principiorum, quæ siue sint per se nota, siue demonstrantur in alia superiori scientia, ut infra dicetur, omnino tamen sunt causa eius quod asseritur in conclusione. Ideo namq. dicimus in motu circulari, partem diametri, quæ magis distat à centro circuli, velocius moveri; quia hæc ma-

gis participat de motu recto, ac naturali à quo prouenit ipsa maior velocitas tanquam à causa intrinseca, & hoc ita se habere demonstratur ex principijs geometricis. Similiter non ex alio dicimus rotunda corpora super planum, facilius moveri, nisi quia parua vel minima sui parte planum contingunt, ac minus offendant. Idq. probatur eo quod circulus tangat in puncto, ac magis à plano semotum efficiat angulum. Quæ desumuntur ex geometricis, suntq. veræ causæ ipsius mobilitatis facilioris quæ de rotundis corporibus asseueratur. Quod cum in omnibus conclusionibus mechanicis obseruetur, vt per se constat, palàm conuincitur, eas constituere notitiam quandam rerum siue effectuum procedentem ex cognitione causæ illorum, ac proinde per discursum & illationem virtute medij, nempe ipsius causæ præcognitæ, ex notitia antecedentis deueniendo in notitiam consequentis, quod est secundum hanc conditionem participare propriam rationem scientiæ.

Deinde probatur, nam ea quæ per mechanicam notitiam ex causis proprijs cognoscuntur, tam necessario ab ipsis causis procedunt, vt non possint aliter se habere, quæ erat altera conditio propriæ scientiæ. Neque enim contingenter pondus libræ aut vestis magis grauitat in parte remotiori à fulcramento ex eo quod pars diametri, quæ plus à centro circuli discesse, magis ab eadem virtute moueri suapte natura præualeat: sed necessario ac ineffabiliter, cum necessario libra aut vestis in suo proprio motu constituatur veluti diameter circuli; & hoc quod est pondus in parte distantiori à fulcramento quod est centrum, magis grauitare seu efficacius deorsum impellere essentialiter dependeat ab eo, quod est partem illam distantiore à centro aptiorem esse ad motum, vt apertissimè ex geometricis principijs demonstrabitur. Nec per accidens est, longius ferri missilia funda, quàm manu missa, quia in motu circulari qui fit per emissionem, seu projectionem, magis illa distant à centro per fundæ vsum, quàm si sola manu proijcerentur, vt per se constat; sed necessario ex tali causa talis procedit effectus, qui proinde aliter non potest se habere propter eandem rationem, vt in cæteris quoque
facile

facile erit inductione probare. Cumque ipsæ causæ ex quibus mechanica facultas suas elicit conclusiones, vel sint per se notæ, vt citius ferri, quod facilius mouetur; Aequalia ab æqualibus non moueri, & similia; vel fundentur in principijs demonstratis in alia superiori scientia, de quibus habetur vera certitudo, & euidencia, hinc vltcrius fit, vt ipsa pariter cognitio mechanicarum conclusionum, eandem participet, ac fortiatur euidenciam, vt commune est omnibus scientijs, quæ nimirum euidenciam non nisi ex principijs obtinent per resolutionem vsque ad elementa, vt sæpè docet Philosophus in Analiticis.

Quòd si mechanica facultas simul à nobis cõstituatur ars, & hæc iuxta doctrinam allegatam Aristotelis 6. Ethic. cap. 4. semper versetur circa aliquid quod aliter esse atque aliter potest; Id sanè non obstat; nam ibi apud Philosophum sermo est de arte sumpta pro arte seruili, quæ versatur circa singulalia, ac varia corporum accidentia, vt circa fabrilia, hoc est varias corporum formas manibus effingendas, & artificiosè introducendas, quæ certè aliter atque aliter se possunt habere, ac proinde de illis dari non potest vera scientia. Alioquin cū diximus huiusmodi facultatem esse pariter artem, artem sumptimus cum Aristotele 1. Metaphisices cap. 1. pro habitu intellectuali qui versatur circa vniuersalia factibilia, & ex causis ea dignoscendo, ac tradendo modum quo fieri debent; quo sensu diximus, artem cum scientia quasi confundere, saltem loquendo de scientia practica. Quamobrem.

Tertio dicendum est, mechanicam facultatem non esse scientiam speculatiuam, sed practicam. In quo nulla potest esse difficultas præsertim in doctrina Aristotelis, nam vt ipse docet lib. 1. Met. cap. 1. Scientia speculatiua est illa cuius finis est veritas, quæq. in seipsa sistit, nullum includens ordinem ad aliud præter veritatem ipsius obiecti scibilis. Practica verò scientia est, cuius finis est opus; nempè quæ ex se ordinatur ad opus, vel operationem aliquam exercendam præter ipsam scientiam. Mechanica autem facultas nullo modo abstrahere potest ab ordine quem essentialiter dicit ad motum
loca-

localem, aut quietem mobilibus impertiendam, & ad modū quo moueri debent vel quiescere. Nam licet nonnullæ propositiones mechanicæ, si per se sumantur, sint speculatiuæ, eo quod præcise sistere possent in sola veritate, nihilominus propter connexionem quam habent cum alijs practicis, & ordinem quem simul includunt ad praxim, verè constituunt vnā scientiam totalem practicam. Quod confirmari etiam potest ex eo: nam verè ac propriè huiusmodi scientia cadit sub illa diuisione generica scientiæ practicæ, cum Philosophus 6. Metaph. cap. 1. eam diuidit in actiuam & factiuam. Quoniā sub actiua optimè intelligitur contineri scientias, quæ versantur circa actus immanentes intellectus ac voluntatis, prout dirigibiles per ipsas mēt scientias; cuiusmodi sunt Logica, & Philosophia moralis, quarum finis & opus, est ipsa rectitudo actionis internæ, seu actuum immanentium intellectus & voluntatis, siuè in genere moris in ordine ad honestatem, siuè in genere cognitionis in ordine ad veritatem: sub factiua verò contineri omnes illas artes, siuè scientias, quæ versantur circa factionem aliquam seu opus extrinsecus faciendum, nempe genere distinctum ab ipso actu scientifico per quem opus fit aut dirigitur, vt quælibet operatio corporea, vel opus ex tali operatione relictum, vt perspicuè docet idem Aristoteles 9. Met. tex. 16. & 1. magn. moral. cap. 33. Et huiusmodi dicimus esse facultatem mechanici, cum verè pro fine habeat opus externum, vt diximus, nempe motum localem & artificiosum, vel quietem grauib. & leuib. impertiendam, non secus ac medicina constituitur scientia practica,

eo quod eius finis, ad quem ordinatur

tanquam ad proprium opus

sit sanitas anima-

lis ho-

minibus im-

pertien-

da.

*Mechanicam facultatem verè ac propriè esse
scientiam Mathematicam.*

A D D I T I O Q V A R T A.

Vtrum autem Mechanica facultas pertineat ad scientiam physicam, an ad mathematicam, vel potius dicenda sit partim physica, partim mathematica, non leuem habet difficultatem. Etenim esse scientiam physicam, illud primo loco suadet, quia nimirum eius subiectum est physicum, ut graue, & leue, virtusq; motiua, ac detentiu, quæ secundum locum ipsa continentur aut detinentur. Secundo quoniam de huiusmodi subiecto agitur sub ratione physica, prout scilicet est mobile secundum locum natura sua aut violentia; quæ certè fit per impressionem impetus, leuationem, vel tractionem, aut projectionem, quæ sunt operationes physicae. Tercio, quia sistendo in piris principijs physicis, satis videtur demonstrari omnia quæ pertractantur in ipsa mechanica scientia quoad propositiones vniuersales, ac propriè scientificas. Ut exempli gratia, graua æqualia ex æqualibus distantijs æquè ponderare, nec vnum posse in libra aliud vincere; nam ratio huius est, quia actio debet esse ab inæquali proportionem, ut ex Arist. habetur in physicis 1. de Generat. tex. 48. Similiter, graua faciliùs tolli beneficio trocleæ, aut vestis, quàm solâ manu; & id genus alia, reducuntur ad principium physicum de maiori facilitate motus circularis, maioreq; velocitate partium, quæ magis distant à centro circuli, eo quod maius spatium percurrant in æquali tempore ac minus fulciantur. Quapropter ipsemet Aristoteles physicè hic videtur tractare quidquid ad vniuersalem doctrinam mechanicam pertinet, nec adhibere principia mathematica, nisi aliquando ad clariùs & euidentiùs demonstrandum, non secus ac in alijs quoque tractationibus physicis consuevit. Nilil enim prohibet, idem diuersis principijs plurium scientiarum ostendi.

Quarto, nam licet mechanica facultas, ut ab alijs traditur,

passim vtatur demonstrationibus mathematicis, id tamen fit, vt descendat ad particularia, & adaptetur ad praxim, vel vt clarius innotescat veritas abstractè considerata, cum per figuras obijcitur sensibus, ac metiri possumus magnitudinem & distantiam, vt appareat proportio requisita ad motum ipsorum grauium.

Quinto, nam estò Mechanica scientia pluries indigeat auxilio mathematico; nec possit multa probare, nisi mutuetur aliqua ex principijs geometricis, imò & arithmeticis; non tamen per hoc sequitur, Mathematicis subalternari, sicut nec Physica, & Theologia subalternantur Metaphysicæ, quamuis multa petant ex Metaphysica.

Ex alio verò capite, cum Philosophi ac Mathematici omnes, qui de hac facultate scripserunt, eam ex Physica, & Geometria ortam constituent, vt videre est apud Heronem, Pappum Alexandrinum, & alios qui eos sequuntur; potius ipsam quasi mixtam ex vtraque, ac tertiam quandam scientiam per se esse videbitur; sicut nonnullis hac tempestate visum fuisse affirmat Guidus Vbaldus in præfatione suorum mechanicorum. Et confirmari posset ex verbis illis Aristotelis iam expositis in fine huius textus, cum loquendo de mechanicis problematibus ait: Sunt autem hæc neque naturalibus omnino quæstionibus eadem, neque seiuncta valde, verum mathematicarum contemplationum, naturaliumq. communia. Quandoquidem quod commune duobus est, vtriusque naturam participat;

Pro solutione tamen quæstionis, notandum est, adhuc vt vna scientia alteri subalterneretur, duo præcipuè requiri, ad quæ reducuntur omnia quæ Aristoteles tradit 2. poster. tex. 58. & sequentibus.

Primum est, vt quæ tractantur in scientia subalternata, non possint euidenter cognosci, nisi ex ijs quæ traduntur ac demonstrantur in scientia subalternante, à qua propterea ipsa scientia subalternata dicitur intrinsecè & essentialiter dependere. Ratio autem est, quia scientia subalternata cum non habeat principia per se nota, & immediata, sicut illa quæ immediatè
pendet

pendet ab habitu principiorum, loco illorum nititur conclusionibus demonstratis in superiori scientia. Et hac ratione nihil demonstratur in Perspectiua, quod nō inferatur ex conclusionibus Geometriæ cui ipsa subalternatur; nihilq. in Musica, quod non nitatur conclusionibus ac principijs Arithmeticæ cui similiter ipsa subalternatur.

Secundum requisitum est, ut idem sit obiectum subalternata, ac subalternantis secundum aliquam rationem formalem. Quandoquidem si subiecta essent essentialiter diuersa, secundum formalitatem qua cadunt sub scientiam, non daretur transitus à scientia subalternata ad subalternantē, ut docet Aristoteles; hoc est accipiendo ex illa propria principia ac media ad probandum suas conclusiones; quia tam passionēs demonstrandæ de subiecto, quàm principia quæ sunt causæ intrinsecæ ipsarum passionū, debent esse maximè propria & connexa cum ipso subiecto: nihil autem potest esse maxime proprium duobus subiectis essentialiter diuersis; ac proinde ex connexionione cum principijs vnius, inferri non potest connexio alterius ad conficiendas demonstrationes. Eadem ergo essentialiter debent esse subiecta subalternantis, ac subalternatæ, saltem secundum aliquam rationem formalem, quamuis alia ratione differant inter se. Semper enim ratio illa formalis sub qua agitur de aliquo in scientia, vniuersaliori ac simpliciori modo consideratur in subalternante, quàm in subalternata, in qua semper contrahitur ab aliqua differentia accidentali superaddita, ut constat in Musica respectu Arithmeticæ, & in Perspectiua respectu Geometriæ. Siquidem in Arithmetica simpliciter consideratur numerus secundum se, in Musica vero consideratur numerus in sono. Similiterq. in Geometria solum considerantur lineæ; in Perspectiua vero considerantur in visu, quæ differentiæ putantur accidentales; nam ut docet Aristoteles locis citatis, & 3. metaph. sum. 1. cap. 3. Musica & Perspectiua non versantur formaliter circa sonum & visum, sed circa numerum & lineam de quibus agitur absolutè in Arithmetica, & Geometria.

Quibus positis, dicendum est, Mechanicam facultatē ab-

solutè ac totaliter non subalternari Philosophiæ naturalī, sed Mathematicæ; Ita sensit expressè Aristoteles in principio iam explicato huius opusculi, cum ait, subiectum quidem huius facultatis esse Physicū, considerationem verò esse mathematicam. Quod postea omnes Philosophi, ac Mathematici vniuersaliter supponunt in distributione, ac subalternatione Mathematicarum disciplinarum, subordinando hanc scientiam Geometricæ.

Ratione verò probatur, nam qualibet scientia subalterna, illi scientiæ dicitur subalternari, cuius idem subiectum secundum aliquam rationem formalem considerat, cuiusque conclusionibus utitur tanquam principijs ad conficiendas proprias demonstrationes; sed scientia Mechanica circa idem subiectum secundum aliquam rationem formalem versatur ac Geometria, ex eaq. ut plurimum sumit sua principia ad demonstrandas mechanicas conclusiones: Ergo Mechanica facultas subalternatur Geometriæ & non alteri scientiæ. Maior patet ex supra notatis. Minor in qua est difficultas, probatur quoad priorem partem, ex eo; Nam certum est, ipsum corpus mobile graue, aut leue; quod constituitur subiectum huius scientiæ, non considerari nisi secundum quantitatem ponderis quam habet, & prout moueri aut detineri potest tanta vel tanta virtute, ac mediante aliquo artificio. Quò fit ut proxima ratio secundum quam de illo agitur, sit tum quantitas ponderis illius, abstrahendo à materia ponderante, tum quantitas virtutis mouentis aut detinentis, prout scilicet vtraque quantitas coaptari, ac proportionari debet in ordine ad motionem aut quietem artificiosam: seu prout quantitas ponderis substat motioni, aut quieti artificiosæ, quam propterea diximus, vltimò complere, & cōstituere obiectum formale huius scientiæ. At huiusmodi ratio formalis sic explicata, manifestè inuoluit quantitatem abstractam à materia, ac specialiter passionem quandam quantitatis continuæ ac permanentis, quæ est obiectum Geometriæ; nempe artificiosam mobilitatem & quietem; imò talis mobilitas attenditur iuxta dimensionem quantitatiuam ipsius mobilis, ac pro-
portio-

portionem quam habet cum mouente; in tanta propinquitate vel distantia; ac persape fundatur in ipsa figura quantitatis mobilis aut mouendæ. Ergo ratio formalis sub qua Mechanica facultas circa proprium subiectum versatur; eandem essentialiter rationem subiecti Geometriæ participat.

Quod autem Mechanica facultas utatur principiis probatis in Geometria, palam ostendunt ipsæ demonstrationes mechanicæ, quæ ferè omnes immediate nituntur propositionibus, ac theorematibus demonstratis in illa; deinde resoluntur in eadem principia geometrica; siquidè præcipuè fundantur in proprietatibus, ac passionibus circuli quæ sanè demonstrantur principiis geometricis, ut præsertim patet ex tertio ac sexto elementorū Euclidis. Rursus principia Mechanica, quæ traduntur ab Archimede, alijsq. Mechanicis, vel sunt omnino geometrica, vel sumuntur ex geometricis. Ut grauium æqualia ex æqualibus distantijs æquè ponderare. Aequalia verò grauium ex inæqualibus distantijs, non æquè ponderare; sed præponderare ad graue ex maiori distantia. Et æqualibus similibusq. figuris planis inter se coaptatis, centra quoque grauitatum inter se coaptari oportere. Et similia ut videre est apud ipsum Archimedem, Pappum, & alios Auctores.

Ad primum igitur argumentum in contrarium Respondetur, subiectum Mechanicæ facultatis esse quidem physicum in genere entis, non tamen in genere scibilis, nempe sub ratione qua de illo agitur in hac scientia. Quare licet subiectum materiale huius facultatis, quod est graue, & leue, seu quantitas ponderis cuiusque corporis mobilis secundum locum, connotet passionem quamdam corporis naturalis, quod constituitur subiectum adæquatum Physicæ; cum tamen non consideretur hic per habitudinem ad illud; pertinere non potest ad scientiam physicam; sicut nec ipsa quantitas, quæ constituitur subiectum adæquatum totius facultatis mathematicæ, quamuis in se sit affectio corporis naturalis; & passio substantiæ corporeæ, de illaq. abundè etiam tractetur in Physica. Idemq. exemplificari potest in Musica & Perspectiua, quarum

subiecta materialia non minus sunt physica, consideratione quoque mathematica. Ac tandem apertissime constare potest inductione partium eiusdem facultatis Mechanicæ. Nam licet Centrobarica verbi gratia, vel Machinaria, non agat nisi de subiectis physicis; tota tamen eorum consideratio est mathematica, geometricè procedendi ad demonstrandas dimensiones, figuras, distantias, pondetositatem, vires, ac motum ipsorum. Similiter spiritalis tractatio quantum agat de aere, ac de coniunctione aeris cum alijs elementis ad multos vitæ nostræ usus, quæ res physice in se sunt, nihilominus ad mathematicam contemplationem pertinet, & ab Herone mathematicè cum suis demonstrationibus traditur, contemplando proportionem, numerum, magnitudinem, distantiam, ordinem, figuram, & causas effectuum, quæ ex incluso aere profisciscuntur. Quorum omnium ratio est, quia in his non attenditur subiectum materialiter sumptum in esse rei, sed formalitas qua cadit sub scientiam, seu ratio sub qua agitur de illo, quæ dicitur subiectum, vel obiectum formale; cumque hoc in proposito pertineat ad Mathematicam, sequitur facultatem ipsam siue scientiam mechanicam, esse verè mathematicam.

Ad secundum Respondetur, motionem & quietem grauium & leuium, siue ex natura sua, siue ex aliqua violentia utraque profisciscatur, esse quidem passiones physicas eorum prout corpora naturalia sunt, non tamen considerari à Mechanicis ut tales passiones sunt, sed prout obtineri possunt ab illis tanquam finis intentus, mediante aliquo artificio. Vnde ratio formalis sub qua grauium & leuium constituuntur obiecta huius scientiæ, non est prout mobilia sunt secundum locum, aut quiescere possunt, absolute loquendo, sed prout artificiosè moueri aut quiescere possunt, inuolupendo modum quo inuoluenda sunt, vel detinenda, & circa quem formaliter ars ipsa versatur ad finem intentum.

Ad tertium Respondetur, nec omnia, nec satis demonstrari posse ex principijs physicis in hac scientia. Porro licet nonnulla de graui & leui supponantur, vel etiam probentur ex illis, cetera tamen ut plurimum & exactè non demonstrantur nisi

nisi ex principiis geometricis, quare sicut de Iride multa pertractantur in Physica, quod tamen non tollit omnimodam eius cognitionem ad Perspectivam referri; ita quamvis multa de graui & leui sumantur ex physicis, hoc non obstat quominus prout artificiosè mobilia sunt, ex professo & omninò solum cognoscantur in hac scientia ex principiis mathematicis. Et sic, grauia æqualia ex æqualibus distantijs æquè ponderare, vnunq. in libra non posse aliud vincere, non satis probatur ex illo principio physico, quod actio debeat esse ab inæquali proportionē. Quandoquidem inæqualitas distantie non tollit æqualitatem ponderis, nec proportionem illius ad alterum, si secundum se ac physicè consideretur; tollit autem si mathematicè demonstretur, maiorem distantiam à centro, vbi grauia fulciuntur, grauitatem, vel potius effectum illius; actumq. ponderandi in ipsis grauibz augere. Item maior velocitas, ac facilitas quam experimur in motu circulari earum partium, quæ magis distant à centro, non probatur à priori, nec demonstratur ex eo quod maius spacium percurrant in æquali tempore, nam hoc est idem per diuersa explicare. Demonstratur autem per causam, & à priori, ex illo principio mathematico, quod quanto magis lineæ à centro discefferint, magis participant de motu recto ac naturali, minusq. retrahuntur in circumuolutione circuli, vt suo loco explicabitur ex Aristotele; qui sanè in hoc alijsq. dogmatibus mechanicis non vtitur demonstrationibus geometricis ad exemplum, vt in logica vel physica, neque ad confirmationem veritatis probatæ; sed vt absolute probet quod assumpserat, quodq. aliter omninò probare nequirit.

Ex quibus facile apparet quid respondendum sit ad quartum & quintum argumentum; nempe principia mathematica non modo in mechanica scientia deferuire ad maiorem claritatem doctrinæ, & vt hæc aptetur ad praxim circa particularia, sed absolute ad demonstrandas suas conclusiones in vniuersum, quas quippe aliter non posset omninò probare. Id quod non solum verificatur in vna vel altera conclusione, sed ferè in omnibus, vt in progressu constabit.

Quod tandē afferebatur de ortu Mechanicæ ex Physica & Mathematica ad probandum esse scientiam ex vtraque conflata, si rectè consideretur, nullius est momenti; nam vere dicitur ex Physica sumpsisse subiectum, & ex Geometria principia quibus in suis demonstrationibus procederet; ex quo tamen non sequitur, ipsam veluti mixtam quandam resultare scientiam, partim scilicet Physicam, partim verò Mathematicam; tum quia specificatio scientiarum vt diximus non attenditur ex subiecto materiali, sed ex obiecto formali; tum etiam, quia nequit vna eademque scientia, pluribus scientijs omnino diuersis subalternari, cum vnitas ipsius attendatur penes vnitatem eiusdem obiecti formalis, quod mutuari debet vel ex vna, vel ex altera superiori scientia. Quare cum Aristoteles ait, Mechanica problemata esse Mathematicarum quæstionum, naturaliumque communia, non intellexit esse veluti aggregata & cōflata ex illis vtrisque. Non enim cōmunia constantur ex particularibus, sed particularia ex cōmuni-
nibus ac vniuersalibus. Vnde potius sensit Philosophus, Mechanicam facultatem de his rebus agere, quæ communes sunt naturalibus ac Mathematicis quæstionibus (quamuis sub diuersa ratione formali) cuiusmodi sunt quantitas ponderis, seu ipsa ponderantia, quæ dicuntur grauiā & leuiā, ac virtus qua ipsa mouentur aut detinentur. Siquidem de his omnibus multa quæruntur in physicis, prout sunt affectiones corporis naturalis, vel corpora quædam naturalia; multaq. pariter in mathematicis, prout dimensionem habent quantitatiuam, aut virtutis, abstrahendo
ab hac vel illa materia; peculiāresq. fortuntur passiones in ordine ad motum artificiosum.

Quæ nam descriptio quidditativa huius facultatis colligatur ex dictis, & quo pacto ab alijs scientijs distinguatur.

ADDITIO QUINTA.

QUæ dicta sunt recapitulantes, hanc huius facultatis descriptionem colligere possumus ad explicandam totam quidditatem ipsius. Mechanica facultas, est practica scientia, quæ geometricis demonstrationibus nixa, versatur circa quantitatem ponderis grauium & leuium, virtutisq. qua artificiosè ac mirabiliter moueri debent, aut quiescere ad finem intentum ab Artifice. In qua descriptione ponitur (practica scientia) loco generis, in quo conuenit cum Philosophia morali, cum Logica, ac Medicina; per idemque distinguitur à scientijs speculatiuis, quæ sane non ordinantur ad praxim, & à seruilibus artibus, quæ nullam includunt rationem scientiæ, vt supra explicuimus. Per particulam verò (geometricis demonstrationibus nixa) explicatur quædam differentia, qua talis scientia conuenit quidem cum scientijs Mathematicis subalternatis Geometriæ, vt Perspectiua, Geodesia, & Astronomia; distinguitur autem ab illis quæ vel non subalternantur Geometriæ, vt Musica & Arithmetica, vel nullo modo sunt Mathematicæ, vt Metaphysica, Philosophia naturalis aut moralis, Medicina ac Logica. Denique per cæteras particulas explicatur vltima differentia, ex proprio obiecto ac fine desumpta, qua certè huiusmodi scientia optimè distinguitur ab illis quæ non versantur circa quantitatem aliquam; tum ab illa contemplatione Logica, aut Metaphysica, quæ tantum versatur circa quantitatem prædicamentalem; item à Physica quæ circa quantitatem solum, versatur in quantum est affectus corporis naturalis, & in ordine ad principium motus & quietis naturalis. Rursus non minus distinguitur, eadem differentia, à reliquis disciplinis Mathematicis, nam licet conueniat cum illis in hoc quod est versari

versari circa quantitatem modo quodam abstracto à materia, illam tamen contrahit ad quantitatem ponderis grauium; & leuium, ac virtutis qua debent moueri, licet non determinet materiam ponderantem, aut virtutis mouentis. Per quod sanè primo distinguitur ab Arithmetica & Musica, quæ versatur circa quantitatem discretam, non autem continuam sicut grauium ac leuium; deinde à Geometria propriè dicta, & à Stereometria quæ versantur circa quantitatem cōtinuam planorum ac solidorum, abstrahendo à grauitate aut leuitate, & à quocunque motu illorum. Denique distinguitur à Perspectiua quæ sanè quantitatem considerat in lineis visualibus, & à Geodesia quæ illam considerat in acerbis tanquam conis, vel in puteis tanquam cylindris; tandem ab Astronomia, quæ illam considerat in corporibus celestibus eorumque distantijs, ac motibus à natura præscriptis. Cum igitur per idem res cōstituatur in esse sui, per quod distinguitur ab alijs, vt receptissimum est in doctrina Peripatetica, satis videtur explicata constitutio & essentia huius scientiæ per traditam definitionem seu quidditatiuam descriptionem, cum per eam constet sufficienter ab alijs scientijs ac facultatibus distingui.

*De vnitae scientiæ Mechanicæ
eiusque partibus.*

ADDITIO SEXTA.

EXpeditis ijs quæ ad quæstionem, an sit, & quid sit hæc scientia, pertinere videbantur, sequitur inquirendum, quotuplex sit; vtrum scilicet sit vna vel multiplex, & quas habeat partes. Qua in re supponimus primò, sermonem esse de scientia totali, prout est aggregatum quoddam ex omnibus scientijs partialibus, siue actualibus, siue habitualibus, nempe ex omnibus conclusionibus demonstratis de subiecto adæquato, circa quod huiusmodi facultas versatur. Deinde supponimus vnitatem scientiæ totalis desumi, cum ex vnitae ordinis quo conclusiones ac partes illius coaptantur inter se,

ad

ad componendam integram scientiam de eodem subiecto materiali ac passionibus illius; tum ex unitate obiecti formalis circa quod omnes scientiæ partiales conueniunt.

Quibus positis dicendum est, Mechanicam facultatem esse unicam scientiam totalem unitate ordinis, ac obiecti formalis, sub quâ scientia totalitatem quam sub specie atoma continentur omnes conclusiones, vel scientiæ partiales Mechanicæ. Id quod facile probatur ex eo, quia omnis Mechanica cognitio versatur circa eandem rationem formalem obiecti adequati, nempe quantitatem ponderis artificiosè mouendi, aut detinendi, licet non de eodem pondere, vel de eisdem ponderantibus in qualibet parte huius scientiæ per se agatur. Deinde probatur, quia omnes conclusiones demonstratæ in hac scientia, ordinantur ad plenam cognitionem obiecti explicati; siue per contemplationem partium illius; agendo de hoc, vel illo graui; aut leui quod moueri debet, aut quiescere, siue per contemplationem plurium passionum quas idem subiectum patitur, quatenus cadit sub artificiosam motionem aut quietem. Rursus plurimæ conclusiones in ea demonstratæ, deseruiunt tanquam principia in demonstrationibus reliquarum; unde talis apparet ordo & connexio inter illas ad inuicem, ut indubitanter ad eandem omnino scientiam totalem in specie sumptam pertinere ab omnibus dicantur.

Diuiditur autem hæc scientia totalis in plures partes veluti integrantes, ratione subiecti. Porro cum eius subiectum non sit vnâ & eadem indiuisibilis entitas, sed multiplex sub ratione illâ communi iam explicata corporis artificiosè mobilis; tot erunt partes huius scientiæ; quot sunt partes ipsius adequati subiecti de quo demonstrat quâ ratione moueri debeat aut quiescere. Et licet partes ipsæ adequati subiecti comparari possent ad illud tanquam species ad genus, sub quo continentur, ut singula elementa; aut mixta respectu corporis in vniuersum quod artificiosè moueri potest, aut quiescere; nihilominus com ratio specificans scientiam, in præsentem non attendatur penes propriam differentiam subiecti materialis, sed penes rationem formalem sub qua consideratur in ipsa

ipsa scientia; hinc est, vt commodius ac magis propriè species ipsæ corporum grauium, ac leuium comparentur ad graue & leue in communi, tanquam partes integrantes ad totum quod constituunt; præsertim cum etiam genus dicat totum, confusè in compositione Metaphysica vt est communis doctrina sumpta ex Aristotele lib. 5. Met. cap. 20.

Iuxta hæc igitur Mechanica scientia primò diuiditur in Centrobaticam quæ quidem centrum grauitatis in quolibet corpore speculatur, & in Machinariam quæ versatur circa machinamenta quibus ipsa corpora mouentur, aut detinentur, siue graua sint, siue leuia. Rursus Centrobaticam comitatur, ab eaq. dependet Sphæropœia, quæ motum circa centrum sphericorum corporum contemplatur, modumq. quod ipsa conficienda sunt exhibet ad imitationem corporum celestium, prout Archimedes confecisse traditur; quem etiam librum de Sphæropœia edidisse refert Carpus Antiochenis apud Pappum Alexandrinum. Machinaria verò diuiditur in Manganariam, cuius ope, exigua virtute, ingentia transferuntur pondera; & in Organopeticam, quæ instrumenta omnia ad corporum motionem, aut detentionem accomodata ac fabrefacta considerat, modumq. quo fieri debent rationabiliter tradit. Sub Manganaria continetur Mechanopœtica, quæ aquam ex imis facillè haurire ac in altū tollere docet, & siqua est alia speculatio quæ ad corpus aliquod leuandum aut transferendum ordinatur. Sub Organopœtica verò continetur Poliorcetica, quæ versatur circa bellicas machinas, vt Arietes ad quatientos muros, vel Catapultas & alias quibus sagittæ, lapides, ac tela, in longissima viæ spatia emittuntur; & videre est apud Athenæum, Heronem mechanicum, & Apollidorum; & in Thaumaturgicam, de qua Hero Alexandrinus, quæque tandem diuiditur in tres partes, quarum prima versatur circa clepsydras, fistulas, variosque ductus, quibus ex vno vase in aliud aqua transfunditur, aut foris emittitur ad constituendas fontes artificiales, aliasque commoditates præstandas. Secunda verò docet quo pacto rotis, neruis, tympanis, alijsq. instrumentis motus veluti animatus præstetur in sen-

insensibilibus, vt fertur de statua Dedali ac Vulcani, de Architar columba, ac similibus. Tertia modum tradit, quod ex incluso aere varij emittantur sonitus ad motum vel percussionem aquæ, vt de serpentum sibilis, ac volucrum cantibus, humanisq. vocibus imitatis, à pluribus enarratur: deque armonia quam reddebant argentei remi celeberrimi illius nauigij Cleopatrar Aegypti Regina cum aquam offenderent, ob spiritum inter thecas eorum reueratum, qui agitatione remigum, aquarumq. percussione per varia artificiosaq. foramina exire cogebatur. Et hæc de diuisione seu partibus Mechanicæ facultatis attigisse sufficiat, vt omittamus alias, quæ non tam propriè partes illius, quàm annexæ, aut mixtæ facultates, videntur, vt Architectonica, quæ licet multum occupetur in consideratione artificiosæ motionis, aut quietis grauium & leuium, vltèrius tamen huiusmodi considerationem ordinat ad opus construendum ex illis, tanquam ad proprium finem, & obiectum primarium: Vnde Vitruuius potius ipsam Machinariam facultatem, partem seu portionem facit Architectonicæ. Item Nautica quæ licet contempletur artificiosam motionem, aut quietem nauigij eiusque membrorum, quæ certè grauias aut leuias sunt; quia tamen hæc considerat in ordine ad incolumem transuersionem, inter Mechanicas absolutè, & communiter non connumeratur. Verum cum talis differentia valde accidentaria sit, & ab extrinseco sine desumpta, non minus fortasse inter Mechanicas facultates propriè poterit cõputari. Non enim apparet in quo essentialiter differat artificiosa transuersion quæ per nauim fit, ab ea, quæ per plaustrum, aut currum; neque interest si per aquas, an per aera, moles aut pondera transferantur.

Quem

Quem gradum perfectionis, aut dignitatis facultas Mechanica obtineat inter scientias.

ADDITIO SEPTIMA.

SVperest vt qualis hæc facultas sit, quamque dignitatem inter cæteras, artes ac scientias obtineat, videamus. Et quidem si receptissimam Philosophi doctrinam spectemus, triplici ex capite explorandum id esse cõperiemus. Nempe ex fine ad quem scientia ex se ordinatur, & obiecto circa quod versatur; & ex certitudine aut euidencia qua procedit. Nam primò Met. cap. 7. Scientiarum, illam, quæ gratia sui ipsius est, & propter ipsum scire, vt omnis scientia speculatiua, præferendam esse, ait, illi, quæ aliorum gratia eligitur, vt est omnis scientia practica. Deinde ibidem & clarius lib. 1. de anima cap. 1. Notitiarum vel scientiarum, alteram altera ait, esse præstantiorem, aut secundum certitudinem, aut ex eo quod meliorum aut mirabiliõrum sit, quod etiam docuerat lib. 8. Topic. cap. 2. Inquiens, scientiam scientia esse meliorem, aut eo quod exactior est, aut quod meliorum. Per meliora autem intelligit tum per se nobiliora, tum etiam superiora, quæ sunt viuuerfalia, ac simpliciora.

Ex quo triplici capite facile intelligemus, Mechanicâ facultatē inferiorē gradū perfectionis obtinere inter Mathematicas disciplinas, ac scientias omnes merè speculatiuas secundum eam partem, quā merè speculatiuæ, ac demonstratiuæ scientiæ sunt, vt Physica ac Metaphysica: perfectiorem tamen esse multis scientijs practicis, vt Agricultura, Architectura, Nautica, si modo ab illa distinguitur, & alijs huiusmodi.

Id quod planum fieri potest sigillatim discurrendo per singulas scientias enumeratas. Nam quod attinet ad Mathematicas, Arithmetica, Geometria, Astrologia, Musica, ac Perspectiuam, & si quæ sunt aliæ huiusmodi; nulli dubium est, eas omnes præstantiores esse scientia Mechanica; tum quia sunt gratia sui, hoc est merè speculatiuæ, ac de nobilioribus,

ribus, seu amplioribus, ac simplicioribus subiectis pertractant, ut per se patet; tum etiam quia vel parem, vel maiorem certitudinem, & euidenciam habent, præsertim illæ, quibus ipsa Mechanica subalternatur, & à quibus accipit sua principia, ut Geometria ac Stereometria. Quandoquidem immediatius attingunt primam rationem assentiendi, in qua fundatur tota euidencia. Vnde vniuersaliter colligit Aristoteles primo Metaphysices cap. 2. Omnem scientiam subalternantem, perfectiorem esse scientia subalternata.

Quod verò attinet ad Physicam, ac Metaphysicam, idem similiter constat ex longe maiori nobilitate obiecti, modoque indagandi speculatiuo, quo ipsæ circa illud versantur, etiamsi non semper parem obtineant certitudinem, & euidenciam. Quod nihil utique obstat, cum in sententia Aristotelis lib. 1. de par. animal. cap. 5. hoc quod est, res illas superiores leuiter tantum nos posse attingere, non tollat eius cognoscendi generis excellentiam, qua certè amplius oblectamur, quam cum hæc nobis iuncta omnia tenemus. Et ratio est, quia excellentia cognitionis, quæ attenditur ex parte obiecti, sumitur ex propria differentia, proindeque essentialiter illā sibi vindicat ipsa sciētia, ut talis cognitio est ex proprio suo genere. Perfectio verò cognitionis, quæ attenditur ex maiori certitudine, aut euidencia; licet maxima sit, non est tamen essentialis, cum supponat scientiam ipsam constitutā in esse talis scientiæ cum sufficienti certitudine, aut euidencia.

Quod si comparemus Mechanicam facultatem cum partibus quibusdam, ac subalternatis scientijs Physicæ, præsertim practicis, ut Medicina, & Agricultura, alijsque annexis, mixtis, vel subalternatis etiam Mathematicis, ut Architectura, & Nautica; diuersa omnino ratio est. Nam vel subiectum illarum secundum suam rationem specificam ignobilius est graui, & leui, virtuteque eorum motrici in vniuersum, ut multa de quibus tanquam de subiectis partialibus agitur in Medicina, & Agricultura: Vel tanta est incertitudo, & imperfectio inferendi conclusiones in talibus scientijs, ut ex genere suo vix scientiæ nūcupari possint, potiusque ex probabilibus, quā

ex demonstratis constare videatur magna saltē ex parte. Vnde licet de rebus præstantioribus agant secundū rationē obiecti totalis, vt est corpus animale sanabile; aut vegetatiuū germinabile; nullatenus tamen Mechanicā facultatē, quæ de familiarioribus omnimoda cū euidētia tractat, antecellere putabūtur.

Enimvero, vt Aristoteles adnotauit primo de partibus animal. cap. 5. etiam nobis propiora, & natura familiariora aliquid cum rerum diuinarum studio rependunt, atque compensant, modò causas perspicere valeamus; cum in omnibus naturæ numen, & honestum, pulchrumq. insit ingenium.

Accedit, quod sæpe utilitas refunditur in dignitatem obiecti; utilitas enim attenditur ex fine, ad quem ordinatur scientia; qui profectò in scientijs practicis coincidit cum obiecto formali. Eadem namque sanitas animalis, est finis medicinæ, & ratio, sub qua Medicina agit de suis subiectis. Eademque directio operationum intellectus, est finis Logicæ scientiæ; & ratio sub qua de ipsis operationibus agitur in illa. Cum igitur talis, ac tanta sit utilitas Mechanicæ scientiæ ad fines præstantissimos admirabili cum artificio consequendos, vt ad leuanda ingentia pondera, parua, & exigua virtute, ad commoditates tam plurimas, vrbiumq. ornatum tam varium: ad subministrandas tot machinas, & instrumenta in bello, vt belligere potius Mechanica, quam armis ipsis, homines videantur: ad aptius mouenda Nauigia; ingentes paruo momento excitandas inoles, immaniaq. euertenda ædificia: ad aquas artificiosissimè sublimandas, aeremq. perpetuis follibus emittendum; voces tam varias effingendas, concentum æquabiliter efformandum, motum quasi animale in insensibilibus imperiendum, & similia; ingenue fatendum est nec esse artem, quæ se Mechanicæ arti in dignitate valeat comparari, nec esse scientiam practicam, quam ipsa ex certitudine, & euidētia, qua procedit, & ex dignitate, ac præstantia finis, non antecellat; ita vt in quo superatur ex parte subiecti nobilioris à Medicina, vel Logica, compensetur, aut vincatur ex parte dignissimi finis, & obiecti formalis, dum admirabili artificio intendit ipsos naturæ fines Naturam emulando superare.

*De Dignitatibus, admirandisq. circuli
proprietatibus.*

Textus Secundus.

DE numero autem eorum qua hoc in genere dubitantur, illa esse dicuntur, qua circa vectem sunt: Absurdum enim esse videtur, magnum moueri pondus ab exigua virtute cum pluri praesertim pondere. Quod enim una vecte quispiam mouere non potest, id ipsum ponderis citius mouet, vectis ad illud pondus adiungens. Omnium autem huiusmodi causa principium habet circulus. Istud verò ratione contingit. Ex admirabili etenim, mirandum accidere quippiam, non est absurdum.

COMMENTARIUS.

QUaecunque maxima omnium admiratione praeter naturam à Mechanicis patrantur, ea quippe non nisi instrumentorum ac machinarum beneficio consequi, in praesentibus supponit Aristoteles, atque inter ipsa instrumenta praecipue hic vectem commemorat. Praemittit autem exemplum de magno pondere quod ab exigua virtute admirandum in modum, ipsius vectis adminiculo constat moueri. Rationemq. admirationis ac dubitationis annectit: Quia scilicet potius oppositum ex eo sequi deberet, cum vectis adminiculo, pondus ponderi adiungatur, inquires. Quod enim sine vecte quispiam mouere non potest, id ipsum citius mouet, vectis ad illud pondus adiungens. Verumenimvero huius ac similium miraculorum omnium causas refert ad naturam circuli. Nam ut inferius docet, quae circa libram sunt, ad circulum rediguntur, quae vero circa vectem, ad ipsam libram; alia autem fere omnia quae circa Mechanicas sunt

sunt motiones, ad vestem. Interim ex admiralibi (inquiens) mirandum accidere quippiam non esse absurdum. Subintelligendo, admirabilem profecto esse ipsam naturam circuli ex qua tot admiranda procedunt, ut statim probare aggreditur in sequentibus.

De Prima Circuli admiranda Proprietate.

Textus Tertius.



MAXIME autem est admirandum simul contraria fieri; Circulus vero ex huiusmodi est constitutus: statim enim ex commoto effectus est & manente, quorum natura ad se invicem est contraria. Quamobrem isthaec cernentes minus admirari convenit contingentes in illo contrarietates.

COMMENTARIUS.

EX quatuor igitur conditionibus seu proprietatibus colligit, admirabilem esse naturam circuli. Ac primo quod in fieri ex contrariis constituatur, nempe ex commoto & manente. Quandoquidem in descriptione circuli, alterum semidiametri extremum movetur in gyrum, alterum vero quiescit, quod centrum denominatur. Imò manente ipso altero extremo, quod dicitur centrum, quod reliquum est eiusdem semidiametri, circumvehitur totum.

Nec obstat quod nonnulli obijciunt, centrum in rigore loquendo non esse partem semidiametri, ac proinde nec circuli, nam sufficit esse illius terminum intussecum, siue extremum, quo immoto, si tota longitudo semidiametri circumducatur, circulus constituatur. Cum igitur admirandum valde sit, simul contraria fieri, aut aliquid effici ex contrariis, & hoc contingat in ipsa constitutione circuli; minus admirandum esse

velinquitur (concludit Aristoteles) si ex ipso circulo constituto; alia postea oriantur contrarietates; vel alia contraria in ipso considerentur, ut mox ex dicendis patebit.

De secunda circuli proprietate.

Textus Quartus.

IN primis enim lineæ illi, quæ circuli orbem amplectitur, nullam habent latitudinem contrariam, quodammodo inesse apparenti concavum scilicet, & curvum. Hæc autem in se invicem distant quædam, quæ magnum, & parvum; illorum etenim medium est æquale: bonum vero rectum; quæ propter eum ad se invicem commutantur, illa quidam prius æqualia fieri necesse est, quam extremorum utrumlibet lineam vero rectam, quando est curvum, & concavum, aut ex his in modum huiusmodi curvum fieri, & circularis. Unum quidem igitur absurdum inest circulo.

C O M M E N T A R I I M S.

SECONDÒ admirabilem se naturam circuli ostendit, si sumatur intacto esse, quod cum in primis (inquit Aristoteles) linea, quæ ipsius circuli orbem complectitur, ac peripheria, seu circumferentia nuncupatur, sit per se quoad latitudinem, & profunditatem indivisibilis, simul tamen tanquam ex duobus contrariis inter se coniunctis constituatur concava, & curva, siue contixa. Etenim est verè terminus extremus, & connexus ipsius circuli, ac nulli ambiens, & complectens in sua concavitate ipsam superficiem circuli: Concavum autem, & connexus se habent sicut magnum, & parvum. Horum enim medium est æquale, illorum verò rectum. Quare sicut cum magnum, & parvum invicem commutabunt, prius perveniunt ad æquale, quam ad hoc ut magnum constituatur parvum, & parvum constituatur ma-

gnum: ita quælibet linea curua, seu conuexa antequam fiat concaua, prius debet fieri recta: absurdum igitur apparet, eandem omnino circuli periferiam, simul constitui concauam, & conuexam.

Nec difficultatem euadunt, qui dicunt, concauum, & conuexum realiter non esse idem in circulo, seu curuitatem, & concauitatem non reperiri in eadem linea, sed in diuersis, ita ut in circumferentia sit tantum curuitas, seu conuexum, concauitas verò sit potius in corpore extrinseco ambiente per lineam illi correspondentem. Etenim cum linea corporis continentis ambiens circulum, penetretur in eodem spacio cum circumferentia ipsius circuli, considereturq. sola quantitas abstracta, & figura vtriusque lineæ coincidentis, eadem semper difficultas obstat; nempe quo pacto fieri possit, ut eadē longitudo latitudinis expers, circulum terminans, seu circulariter extensa, simul sit concaua, & conuexa. Sed nihil prohibet eandem circumferentiam indiuisibilem quoad latitudinem, & profunditatem, simul esse concauam, & conuexam respectu diuersorum, ut in alijs etiam linearum figuris, ac superficiebus poterit exemplificari: & ut eadem via dicitur aclinis, & declinibus, idemque magnū, & parū respectu diuersorum, quæ cum illo comparantur. Quo fit, ut admirandam quidem esse huiusmodi proprietatem circuli iure dicamus, nullam tamen in se repugantiā inuoluere admittamus.

De tertia Circuli proprietate:

Textus Quintus.



ALTERVM autem, quod simul contrarijs mouetur motionibus: simul enim ad anteriorem mouetur locum, & ad posteriorem. Et ea, quæ circulum describit, linea eodem se habet modo: Ex quo enim incipit loco, illius extremum, ad eundem rursus redit: Illa enim continuo commota, extremum rursus efficitur primum.

Quam-

Quamobrem manifestum, quod inde mutatum est. Quapropter (ut dictum est prius) non est inconueniens, ipsum miraculorum omnium esse principium. ,,
 - in Exigitar, quæ circa libram sunt, ad circulum referantur. ,,
 quæ uero circa uellem, ad ipsam libram; alia autem fere omnia, quæ circa Mechanicas sunt motiones, ad uellem. ,,
 - terea etiam quædam unica existente, quæ ex centro est linea, Verba re-
 nullum aliud alijs, quæ in illa sunt, punctorum aqua uelocitate fecanda.
 feratur, sed citius semper, quod à manente termino est remotius; pleraque miraculorum accidunt in circuli motionibus: de ,,
 quibus in ijs, quæ præstibac adducentur, questionibus erit manifestum. ,,

Quoniam autem secundum contrarias simul motiones mouetur circulus; & alterum quidem diametri extremum, ubi A, in ante mouetur, alterum uero ubi B, ad retro; efficiunt non nulli, ut ab unica motione multi contrario simul moueantur circuli: quemadmodum sunt illi, quos in locis proponunt sacris, aueos, & ferreas fabricantes orbiculis. Si enim AB, circulum aliter contingerit, circulus in quo CD, mota circuli, in quo AB, diametro in ante, mouebitur CD, ad retro diametro circuli, ubi est A, circa idem mota. In contrarium igitur mouebitur circulus ubi CD, ad illum, ubi AB. Et rursus ipse contrarium ubi EF, in contrarium sibi ipsa mouebitur propter eandem causam: Eodem etiam modo si plures fuerint, idem facient, uno solo commoto. Hæc igitur in circulo existentem animaduertens naturam Architecti, instrumentum fabricant; celantes principium, ut machina solum manifestum sit illud, quod admirationem præstat, causa uero lateat.

C O M M E N T A R I V S.

Tertio illud quoque admiratione dignum sese offert in circulo, quod, inquit Aristoteles, contrarijs simul feratur motionibus, antrosum uidelicet, ac retrorsum, sursum, ac deorsum. Dum enim pars circuli superior descendit, ac mouetur antrosum, v. g. ad dexteram, altera pars illi

opposita, quæ est inferior, ascendit, ac mouetur retrorsum ad leuam. Quod si huiusmodi positiones formaliter non constituentur nisi in quadam relatione, ac respectu vnus partis ad alteram, hoc parum refert, cum fundamentaliter semper importent realem oppositionem, ac diuersitatem loci, in quo ipse partes relatæ constituuntur, vel ad quem tendunt tanquã ad terminum sui motus. Quapropter idem Philosophus subiungit ex hac contra-



rietate fieri, vt vnus circuli motione, alij circuli in contrarium moueantur. Vt si constituatur circulus, qui primò moueri debeat inter alios quatuor, sintq. omnes denticulati, quemadmodum videre est in horologijs, alijsq. similibus machinis, vt in hac figura: Nam pars superior medij circuli, quæ descendit, impellit partem inferiorem superioris circuli, facitque eam ascendere. Et pars inferior eiusdem medij circuli, ascendendo facit descendere partem superiorem circuli inferioris. Deinde similiter idem circulus medius dum dextrorsum mouetur, mouet circulum dexterum sinistrorsum, & sinistrum dextrorsum.

Eodemque modo se habet, subiungit Aristoteles, linea illa quæ in vno extremo manens, altero circumlata, circulum describit; nempe semidiameter. Quandoquidem contraria similiter admittit; nimirum primum & extremum simul; seu principium ac terminum sui motus in eodem loco. Ex quo enim puncto incipit circûduci, ad idem postremo reuertitur tanquam ad terminum sui motus. Et sic extremum rursus efficitur primum. Quapropter concludit: Non est inconueniens ex ipsa semidiametro descriptum, miraculorum phænomenon esse principium.

Quæ

Quæ autem de libra ac varia punctorum semidiametri velocitate hic docet Aristoteles, frustra interposita sunt ac præter Auctoris intentum, cum ad rem de qua agitur non pertineant, ac alibi proprijs in locis repetantur. Quare ex hoc textu refecanda essent, incipiendo à particula (Ea igitur) usque ad (erit manifestum) inclusivæ, prout lineis consignavimus.

De Quarta Circuli Proprietate.

Textus Sextus.



IN primis igitur quæ accidunt circa libram dubitare faciunt, quam nam ob causam exactiores minoribus maiores sunt libra. Illius autem rei principium est, quæmobrem in ipso circulo, quæ plus à centro distat linea eadem vi commota, citius fertur, quàm illa quæ minus distat. Citius enim bifariam dicitur: siue enim in minori tempore æqualem pertransit locum, citius fecisse dicimus: seu in æquali maiorem. Maior autem in æquali tempore, maiorem describit circum: qui enim extra est, maior eo qui intus est. Horum autem causa, quoniam duas fertur lationes ea quæ circum describit linea. Quandoquidem igitur in proportionem fertur aliqua id quod fertur, super rectam ferri necesse: Et hæc diameter efficitur figura quam faciunt illa quæ in huiusmodi proportionem coaptantur linea: Sit enim proportio secundum quam latum fertur, quam habet AB ad AC : & A quidem fertur versus B : AB vero subtransferatur versus MC : latum autem sit A quidem ad D , Vbi autem est AB versus E : quoniam igitur lationis erat proportio, quam AB habet ad AC , necesse est & AD ad AE hanc habere proportionem. Simile igitur est proportionem paruum quadrilaterum maiori: quæmobrem & eadem illorum est diameter, & A erit ad F . Eodem etiam ostendetur modo, ubicunque latio deprehendatur sem-

per enim supra diametrum erit. Manifestum igitur, quod id quod secundum diametrum duabus fertur lationibus, necessario secundum laterum proportionem fertur. Si enim secundum aliam quampiam, non fertur secundum diametrum. Si autem in nulla feratur proportione secundum duas lationes nullo in tempore, rectam esse lationem, est impossibile. Sit enim recta. Posita igitur hac pro diametro, & circumrepleti lateribus, illud quod fertur, secundum laterum proportionem ferri necesse est; hoc enim demonstratum est prius. Non igitur rectam efficiet id quod secundum nullam proportionem, in nullo fertur tempore. Si autem secundum quampiam feratur proportione, & in tempore quipiam, hoc necesse est tempus rectam esse lationem, per ea quæ retro sunt dicta. Quamobrem circulare est id, quod secundum nullam proportionem nullo in tempore duas fertur lationes.

C O M M E N T A R I U S.

Quarto denique occasione sumpta ex eo, cur maiores libræ exactiores sint minoribus, ut huius rei principium vel causa innotescat, aliam circuli proprietatem non minus admirandam Aristoteles proponit, quam in superiori etiam textu interpositè insinuerat: Nempe in una eademq. linea quæ est à centro ad circumferentiam, nullum esse punctum, quod æquali velocitate moueatur respectu aliorum, quæ sunt in eadem linea; sed citius semper feratur punctum quod à manente termino, scilicet centro, est remotius. Quamobrem ait in ipso circulo quæ plus à centro distat linea, eadem vi commota, citius fertur, quàm illa, quæ minus distat &c. Quod ita se habere ostendit ex eo, quia dupliciter aliquid intelligimus velocius alio moueri; nempe, vel quia in minori tempore, æquale spatium pertransit; vel quia eodem tempore, maius intervalum percurrit. Et hoc pacto inquit in descriptione circuli contingere ut puncta quæ magis à centro distant, velocius moueantur. Siquidem eodem tempore maiorem describunt ambi-

ambium. Maior enim est circumferentia circuli continentis, quam contenti. Si autem circa idem centrum plures circuli ducantur, semper ille qui coeteros continet, à remotiori puncto semidiametri describetur, proindeq. quò remotiora erunt ipsa puncta semidiametri à centro, eò velocius mouebuntur.


Horum autem causam esse inquit Aristoteles, quoniam semidiameter circulum describens mouetur motu quodam mixto ex duabus lationibus, nempe naturali, ac præternaturali, vt infra sequenti textu probabitur; quam duplicem lationem partes semidiametri non æquè participant, hoc est non participant secundum eandem proportionem. Quandoquidem, vt infra pariter ipse Philosophus ostendit, partes quæ remotiores sunt à centro, magis participant de latione naturali; contra verò quæ centro sunt viciniore, magis participant de motione præternaturali. Si enim secundum eandem aliquam proportionem, duplicem illam lationem omnes ipse participarent, non vtique mouerentur motu circulari, sed recto, vt statim ipse demonstrat. Quare supposito quòd mobile tanto velocius mouetur, quanto magis participat de motu naturali, vt ex dicendis etiam tex. 8. constabit, à primo ad vltimum conuincitur, puncta vel partes semidiametri quò plus à centro distauerint in descriptione circuli, eò coelerius moueri, quò vero minus, eò tardius.

Et confirmari potest argumento quòd idem Philosophus, alijs interpositis, sequenti textu adiecit; nimirum; quia si duobus (inquit) ab eadem potentia latis, hoc quidem plus repellatur vel impediatur ab aliquo, illud verò minus, rationi consentaneum est, tardius moueri id quòd plus præpeditur, aut repellitur: Sed lineæ circumductæ in circulo, vel puncta quæ sunt in eius diametro, quò magis appropinquantur centro, eò magis repelluntur in motu circulari ac impediuntur ab ipso centro; ergo tardius mouentur. Minor propositio huius argumenti probatur; quia cum centrum sit fixum & immotum, elq. colligatæ sint omnes partes diametri per longitudinem extensæ, illæ quæ magis ei appropinquantur, magis vincuntur ac detinentur nè moueantur: quæ verò magis

ab eo distant, magis relaxantur, magisq. soluuntur à principio detinente, ac propterea minus impediuntur nè ad impulsum vel motum alterius moueantur, & sic velocius feruntur.

Verum enimvero, vt primum ac principale Aristotelis argumentum omnino concludat id quod intendit, examinanda ac probanda sunt nonnulla quæ in eo assumuntur, ac difficultatem non parua inuoluunt. Quorum vnum hic, reliqua verò in sequentibus ipse pertractat. Illud igitur hic statim aggreditur probandum, quod de proportionem duarum lationum docuerat, eam scilicet solum dari in eo quod fertur motu recto. Quod quippe antequam probetur, sano modo intelligendum est. Etenim in partibus etiam circuli, dum vni-formiter difformiter, geminata ac mixta quadam latione ducuntur in gyrum, semper aliqua seruetur vtriusque lationis proportio; vt scilicet magis vel minus participant de motu naturali, aut præternaturali, iuxta distantiam vel propinquitatem quam partes ipsæ habent cum centro. Quare explicandus est Aristoteles, vt loquatur de proportionem eadem, non vero de quacunque. Nam reuera, vt etiam Baldus demonstrat, licet circulus fiat, proportionibus quidem duarum lationum seruatis; nunquam tamen eadem erit proportio vnius lationis ad alteram respectu cuiusque partis ipsius circuli vel semidiametri, sicut cum quippiam duabus lationibus fertur super rectam; & hoc solum probat Aristoteles, vt statim videbimus; illud vtiq. intendens, quod si eadem semper proportio vtriusque lationis seruaretur in descriptione circuli, motus ille esset rectus, & non circularis de quo agitur.

Rursus antequam ad exactam eius probationem ex Geometricis principiis accedamus, idem prælibare licebit exemplo huius figuræ, quod non parum ad dilucidationem textus, doctrinæq. Aristotelis conducet. Sit enim corpus seu pondus quod moueri debeat constitutum super planum vbi A, mouentia verò vbi B, C. Deinde supponamus æquali virtute & æquali simul tempore vtrumque mouens ad se pondus ipsum




ipsum trahere; quod est, eandem semper proportionem ad
in vicem seruare, vt beneficio trochlearum vel alterius instru-
menti. Tunc enim dicimus primo, corpus ipsum mobile A
moueri motu quodam mixto ex duabus lationibus, nempe
qua appropinquatur ad B, & qua appropinquatur ad C.
Quia durante huiusmodi motu, non datur instans in quo non
magis ipsum pondus A appropinquetur ad B, ac simul ad C.
Præterea dicimus, huiusmodi motum necessariò esse rectum,
non verò circularem, seu pondus non nisi super rectam tunc
semper moueri. Et enim seruata eadem proportionem, pon-
dus ipsum, & quælibet eius pars æqualiter vtrique mouenti in
æquali tempore deberet appropinquari: quia non esset maior
ratio cur magis aut citius appropinquaretur ad B, quàm ad C.
At non posset æqualiter vtrique appropinquari, nisi feratur
per

per diametram quadranguli $ABCD$, quæ est recta AD ; siquidem in nulla alia parte interiecti spacij, distantia esset æqualis, vt sensu constat: Ergo seruata eadem proportionem in ipsa duplici latione respectu mobilis & cuiusque partis ipsius, motus necessario erit rectus, seu pòdus & qualibet eius pars, non nisi per rectam lineam poterit moueri.

Deinde quod infert Aristoteles, circulare esse id quod secundum nullam proportionem, nullo in tempore duas patitur lationes; falsum esset etiam iuxta præfatam explicationem proportionis: nisi per circulare intelligeremus lato modo, id quod est curuum. quia nimirum non sequitur, aliquid esse circulare, in rigore loquendo, aut moueri per lineam circularem, eo quod moueri non possit per lineam rectam; cum plures sint figuræ ac lineæ non rectæ, nec circulares, vt figura ellipsis, sectiones parabolicæ, ac lineæ spirales, aliæq. irregulares permultæ. Quæ omnia prænotasse, ipsa verborum ambiguitas postulabat, vt clarius ad probationem doctrinæ procederemus.

Iam vero vt Geometricis principijs quæ dicta sunt pateat, sic probat Aristoteles, quidquid fertur duabus lationibus ad inuicem proportionatis, super rectam necessario ferri, ac proinde non circulariter. Sit inquit proportio ipsarum lationum




quam habent inter se latera AB & AC in dato rectangulo $ABCD$. Et A quidē duplici motu feratur; vno equo tēdat versus B , quæ si ex se incēdendo super lineam AB altero verò, quo simul cum ipsa lineam AB subterferatur versus C , seu versus lineam CD cum eadem semper proportionem. Tunc dicimus punctum A motu ipso mixto, necessario ferri per rectam AD , quæ est diameter eiusdem quadrilateri $ABCD$. Etenim si constituitur rectangulus minor $A E F G$

pro-

proportionalis maiori $ABCD$, ac per motum proprium
versus B , ipsum punctum A peragrauerit quantum est vsque
ad E ; & per motum totius lineæ AB , versus lineam CD ,
peragrauerit quantum est ab A , vsque ad F , seruata eadem
proportione ipsorum laterum; certe punctum A reperiri non
posset in E , neque in F ; siquidem non fuisset latum duabus
lationibus, nec pergrasset spacium secundum vtramque po-
sitionem, simul accedendo quantum fieri potest ad B & ad
 C ; sed vna tantum latione, alterum solum spacium percur-
risset. Reperietur ergo ipsum punctum A vbi vtraque pro-
gressio potest verificari, vt in puncto G . Quia nimirum FG
est æqualis ipsi AE , & EG æqualis ipsi AF , cum sint latera
opposita eiusdem rectanguli, vt patet per 34. primi Elemen-
torum Euclidis. Sed punctum G non potest esse nisi in recta
 AD , quæ est vtriusque rectanguli diameter, vt patet per 26.
sexti, & eodem modo quodlibet aliud punctum, in quo vtra-
que latio ac latera depræhendantur eadem proportionem pro-
portionalia, vt in H , respectu I & K : igitur punctum A , dua-
bus lationibus proportionalibus latum, necessariò mouebi-
tur super rectam AD , quod erat probandum.

Quod quidem clarius adhuc probari posset exemplo hu-
ius quadrati $ABCD$, cuius latera diuisa sint in quatuor par-
tes æquales, efficiantq. ex illis minora quadrata contenta in
maiore. Nam si sup-
ponatur punctum A ex
se moueri tanquam na-
turali ac proprio motu
versus B , super rectam
 AB , & eodem tempo-
re simul cum ipsa AB ,
quasi motu alieno de-
scendere versus CD ,
ac seruata eadem pro-
portionem vtriusque mo-
tus, quæ sit æqualita-
tis: absque dubio, eo-



dein tempore quo A, peragrauerit spaciū AE, simul peragrabat spaciū AF, & reperietur in G, quandoquidem sunt latera eiusdem quadrati AG, ac proinde æqualia. Et sicut tota linea AB, coincideret cum linea FH, ita punctum E, coincideret cum puncto G. Similiterque cum A, peruenerit in I, simul reperietur in K, propter eandem rationem, & sic de singulis. Ex quibus constabit, ipsum A, moueri per rectam diagonalem seu diametrum AD, quod erat ostendendum.

Quo pacto linea circulum describens, duabus feratur lationibus.

Textus Septimus.



QUOD quidem igitur ea quæ circulum describit, duas simul feratur lationes, manifestum est cum ex istis, tum quia secundum rectum lata ad perpendiculum peruenit, ut sit rursus ipsa à centro perpendiculū. Sit circulus ABCD, extremum autem ubi est B, feratur ad ipsum D, peruenit sane aliquando ad ipsum C. Siquidem igitur in proportionem feratur, quam habet BE, EC, fertur uique secundum diametrum BC. Nunc autem, quoniam in nulla proportionem, in circumferentia ceriè fertur ubi BEC. Si autem ductus ab eadē potentia latis, hoc quidē plus repellatur, illud uero minus, rationi consentaneū est, tardius moueri id quod plus repellitur, eo quod repellitur minus. Quod uidetur accidere, maiori & minori illarum quæ ex centro circulos describunt. Quoniam enim propius est manenti, eius quæ minor est, extremū, quam id quod est maioris, ueluti rectum in contrarium, ad medium, tardius fertur minoris extremum. Omne quidem igitur circulum describenti istud accidit: ferturq. eam quæ secundum naturam est lationem, secundum circumferentiam; illam uero quæ preter naturam, in transuersum & secundum centrum. Maio-

rem autem semper eam que præter naturam est ipsa minor fertur: quia enim centro est vicinior quod trahit, vincitur magis.


C O M M E N T A R I V S.

Quamuis Philosophus superiori textu semel atque iterum assumpserit, semidiametrum, seu lineam circulum describentem, duabus ferri lationibus, prout explicuimus; huc tamen illud probandum reliquit, & ex dictis etiam de motu antrosum & retrorsum manifestum esse docet. Id igitur hic probat ex eo. Nam si in descriptione circuli, semidiameter vnâ tantum lationem pateretur, vt verbi gratia naturalem, qua rectâ tenderet versus, vnâ aliquam differentiam situs, nunquam ad ipsius diametri perpendicularum. perueniret. Implicat enim vnica latione, aliquid simul rectâ tendere, ac in transuersum, quemadmodum se habet perpendicularum ad diametrum à qua propendit: At semidiameter circulum. describendo, aliquando peruenit ad suum perpendicularum; ita vt coincidat cum illo: Ergo non vnica, sed duplici latione conuincitur ferri.

Sit enim circulus describendus ABCD, circa centrum E. Sitque diameter AC, semidiameter vero circulum describens AE. Si igitur ipsa recta AE, altero eius extremo manente in centro E, altero vero nempe A, circumferatur, aliquando absque dubio erit in ED, quæ est perpendicularis diametro AC.

Per motum autem naturalem ipsa AE, descendisset in FD, vel aliò rectè translata fuisset. Non ergo linea circulum describens fertur,

vnico



vnico tantummodo motu versus vnica differentiam situs, sed duplici motu, nempe mixto ex naturali & præternaturali; versus duplicem differentiam situs. Naturali quippe, quo in proposita figura fertur versus latus F D, præternaturali verò, quo retrahitur in transuersum versus latus E D, eo quòd alterum eius extremum detineatur in centro E, vt clarius infra patebit.

Quibus ita constitutis, reuertitur Aristoteles ad probandis, partes vel puncta semidiametri, eò velocius moueri, quò plus à centro distauerint; eò verò tardius, quò magis ad centrum accesserint. Quod cum ad doctrinam in superiori textu traditam spectet, illucq. propterea à nobis translatum sit, ac satis expositum, non est cur hic rursus idem repetatur ac denuo exponatur. Acceptionem autem & explicationem motus naturalis ac præternaturalis, qua vsi sumus, sumpsimus ex eodem Philosopho textu sequenti, & lib. I. Meteororum c. 5. Vbi discurrentium syderum ac fulminum motum quem in sublimi aere obliquè fieri conspiciamus, ex duabus pariter lationibus docet constare. Vna quidem naturali, qua prout accensa ac leuia corpora, sursum rectà tendere debent:

altera verò præternaturali, qua prout à constipan-

te frigore extruduntur ac propelluntur (in-

spissata scilicet ac grauitante magis eo-

rum exhalationis materia) deor-

sum inclinant. Ex his enim

duabus lationibus

medius qui-

dam mo-

tus

resultat, quo vt ipse inquit, sydera

videntur volare, & obliquè

tanquam proiecta

per aera

ferri,

Qua ratione partes diametri à centro remotiores magis participant de motu naturali, propinquiores verò magis de præternaturali.

Textus Octauus




QUOD autem magis quod præter naturam est mouetur ipsa minor, quam maior illarum, quæ ex centro circulos describunt, ex ijs est manifestum. Sit circulus ubi $B C D E$, & alter in hoc minor, ubi $M N O P$, circa idem centrum A , & projiciantur diametri in magno quidem, in quibus $C D$, $B E$, in minori verò ipse $M O$, $N P$: & altera parte longius quadratum suppleatur $D K R C$: siquidem $A B$ circulum describens ad id perueniet, unde est egressa; manifestum est, quod ad ipsam fertur $A B$. Similiter etiam $A M$ ad ipsam $A M$ perueniet. Tardius autem fertur $A M$, quam $A B$ quemadmodum dictum est: quia maior sit repulso, & magis retrahitur $A M$. Ducatur igitur ipsa $A L F$, & ab ipso L perpendicularum ad ipsam $A B$, ipsa $L Q$ in minore circulo: & rursum ab L ducatur iuxta $A B L S$, & $S T$ ad ipsam $A B$ perpendicularum, & ipsa $F X$: ipsa igitur ubi sunt $S T$, & $L Q$, æquales: ipsa ergò $B T$ minor est, quam $M Q$. Æquales enim rectæ lineæ in æqualibus coniectæ circulis perpendiculares à diametro, minorem diametri ressecant sectionem in maioribus circulis. Est autem ipsa $S T$ æqualis ipse $L Q$. In quanto autem tempore ipsa $A L$ ipsam $M L$ lata est, in tanto temporis spatio in maiori circulo, maiorem, quam sit $B S$, latum erit extremum ipsis $A B$. Latio quidem igitur secundum naturam æqualis: Ea autem, quæ præter naturam est minor, videlicet $B T$, quam $M Q$. Oportet autem proportiona-

biliter esse, sicut quod est secundum naturam, ita quod est præter naturam, ad id, quod est præter naturam; maiorem igitur circumferentiam pertransiit, quam sit ipsa ΔB . Necesse autem est ipsam FB in hoc tempore pertransisse: hic enim erit, quando proportionabiliter utrinque accidit, quod est præter naturam, ad id quod est secundum naturam. Si igitur maius est, quod secundum naturam in maiori, & quod est præter naturam, magis utique hic coincidit uno modo: ita quod B sit latum per ipsam BF in tanto tempore, in quo M punctum per ipsam ML . Hic enim secundum naturam quidem signo B sit XF : est enim ab ipso F perpendiculum: præter naturam verò ad ipsam XB . Est autem quemadmodum FX ad XB , sic LQ ad MQ . Manifestum autem si coniunguntur ab ipsa BM ad FL . Si autem minor, aut maior, quam sit FB erit illa, quam latum est B , non similiter erit, neque proportionale in utrisque quod est secundum naturam ad id quod est præter naturam. Quam igitur ob causam ab eadem potentia celerius fertur id quod plus à centro distat punctum ex ijs, quæ dicta sunt est manifestum.

C O M M E N T A R I V S.

EX assumptis ab Aristotele in illo priori argumento iam supra textu 6. à nobis exposito ad ostendendum in ipso circulo, quæ plus à centro distat linea eadem vi commota citius ferri quàm illa, quæ minus distat; illud dumtaxat ei probandum remanserat, videlicet partes lineæ circulum describentis, quò viciniore centro sunt, eò magis detrahi à motu naturali, magisque participare de motu præternaturali; E contra verò quo remotiores sunt à centro, magis participare de motu naturali. ut inde inferatur velocius moveri. Probat autem hoc modo; sit enim, inquit, Circulus $BCDE$; & alter in hoc minor ubi $MNOP$ circà idem centrum A . Sintq. Diametri maioris quidem CD , & BE ; minoris verò MO , & NP . Deinde compleat



tur quadrangulum rectangulum DKRC nempe ducendo lineam KR parallellam, & æqualem ipsi DC. per punctum B, & claudendo ipsas KR & DC per lineas DK & CR Cum igitur motus naturalis cuiuslibet lineæ dicatur ille, quo recti fertur versus eam partem in quam tendit, si linea AB stantis circuli descripti deorsum tenderet simplici motu naturali, absque dubio rectè, ac perpendiculariter tota simul caderet, & coincideret cum CR. Quoniam, verò non potest ita ferri simplici motu naturali, eò quod alterum eius extremum detineatur in centro, illæ partes ipsius dicentur magis participare de motu naturali, quæ rectius tenent in ipsam CR; hoc est per lineam magis appropinquantem ad perpendicularum; sicut è contrà illæ dicentur magis detrahi à motu naturali, quæ magis incurvantur tendendo versus lineam CD. Itaque progressus perpendicularis versus CR erit motus naturalis, versus autem CD erit præternaturalis Quod certè videtur supponere Aristoteles. Nunc autem sic procedit ad ostendendum propositum, nempe partem diametri propinquiorem centro, ut AM

magis detrahi à motu naturali, ac tardiùs moueri, quàm M B quæ magis distat ab illo. Ducatur inquit à centro linea A L F; & à puncto L perpendicularis ipsi A B quæ sit L Q, & rursus ab eodem L ducatur L S parallela eidem A B. Deinde à puncto S excitetur alia perpendicularis eidem A B. Sitq. S T; & ab F item eidem perpendicularis F X. His positis linea Q L erit æqualis lineæ T S, vt pater ex 34. primi Euclidis, cum sint latera opposita rectanguli T L. Cumque spacium, quod naturali motu transcurrunt puncta M, & B mensuretur ipsis perpendicularibus. Q L. & T S, vt dictum est, motus naturalis per lationem ipsius B vsque ad S æqualis erit motui naturali per lationem ipsius M vsque ad L. At motus præternaturales eorundem punctorum M, & B tunc erunt inæquales. Nam spacium, quod præternaturaliter percurrit punctum M esset ipsa M Q; & spatium, quod præternaturaliter percurrit punctum B esset ipsa B T. Maior autem est M Q, quàm sit B T. Siquidem ex æqualibus rectis lineis perpendiculariter cadentibus à communi diametro ad circumferentias totidem circulorum inæqualium, ea, quæ est in minori circulo maiorem refecat diametri portionem, vt constat ex doctrina de Sinibus, & patere potest in perpendicularibus Q L T S, & H I; quæ cum sint æquales. inter duas parallelas, inæquales refecant portiones diametri E G; nempe tanto maiorem, quanto in minori circulo, vt est Q M respectu T B, & ipsa T B respectu H G. Igitur punctum M quod sanè propinquius est centro, magis mouetur motu præternaturali, quàm punctum B, quod remotius est ab illo. Id quod primo loco erat probandum.

Vtèrius verò quod punctum B magis moueatur motu secundum naturam, quam ipsum punctum M probatur ex eo; Nam quo tempore punctum M latum fuerit vsque ad L; punctum B eodem tempore perueniet vsque ad F. Etenim cum ita se habere debeat motus naturalis ipsius B ad motum præter naturam eiusdem B quemadmodum se habet motus naturalis ipsius M ad motum præter naturam eius.

eiusdem M talis proportio solum verificari potest in F, nam proportio, quam habet linea FX referens spatium transactum secundum naturam ad BX, quod ab eodem puncto B transactum est præter naturam in maiori circulo, eadem est, ac proportio lineæ QL transactæ secundum naturam ad lineam MQ transactam præter naturam in minori circulo. Quod inde patere potest, nam si ducantur rectæ BF, & ML efficiuntur duo triangula æquiangula BXF, & MQL quæ per 4. sexti habebunt latera proportionalia circa æquales angulos: Vnde sicut se habet FX ad XB circa angulum rectum X, ita se habet LQ ad QM circa angulum rectum Q. Et permutando, sicut se habet FX ad LQ ita XB ad QM per 16. Quinti. Itaque proportionabiliter punctum B, vel quodlibet aliud, quanto magis distat à centro, tanto magis mouebitur motu naturali; siquidem FX maior est, quam LQ, proindeq. velocius feretur, seu maius spatium in eodem tempore percurrer, quam punctum M, vel aliud, quod propinquius sit centro; Et hoc erat probandum, vt omnino constaret quidquid assumptum fuerat ex eodem Aristotele in explicatione quartæ proprietatis circuli, & assignatione causæ illius, vt ibidem commonuimus.

De Instrumentis, ac Machinis naturam circuli in motione participantibus.

ADDITIONO PRIMA.

Attenta natura circuli cum suis proprietatibus modò explicatis ad hoc acumen humani ingenij iam pridem peruenit, vt machinas quasdam excogitaret, quæ naturam ipsius circuli participantes motricem potentiam in motu grauium ac leuium iuuarent. Huiusmodi autem machinas instrumenta mechanica communiter appellamus, vtpotè quæ mechanica speculatione adinuenta sunt, eademq. arte

adhibentur tanquam instrumenta. ad leuanda pondera, vel quomodolibet mouenda grana, quæ respectiue dicuntur etiam leuia. Sunt autem hæc instrumenta præcipua sex; ad quæ cætera omnia reducuntur: nempe Libra. Vectis, Trochlea, Axis in Peritrochio, Cuneus, & Cochlea. Et licet Aristoteles distinctionem eorum tractationem prætermiserit, ac nonnisi quatuor ex ipsis hic, vel in sequentibus quæstionibus pro opportunitate meminerit, supponit nihilominus. tanquam certum, illa omnia ac similia participare naturam. circuli, eorumque vim. qua motricem augment potentiam. in hoc ipso consistere, vt circuli proprietatem sapiendo, facilius & mouerentur, & motum præstarent oneribus ac ponderibus mouendis; cum circularis siue orbicularis figura sit omnium mouentissima. Ait enim supra. tex. 5. Ea igitur quæ circa libram sunt, ad circulum referuntur: quæ verò circa vectem, ad ipsam libram: alia autem ferè omnia, quæ circa mechanicas sunt motiones, ad vectem. Ex quibus inferitur siue immediatè, siue mediante; alia quadam abstracta ratione quam ipsa participant, mechanica penè omnia instrumenta in suis motionibus ad circuli naturam referri. Quod vt clarius reaneatur, pauca saltem de singulis ipsis instrumentis hic adijcere operepreium putauimus, ea scilicet tantummodo, quæ ad institutam textus dilucidationem no- uerimus pertinere; Cum exacta huiusmodi instrumentum tractatio habeatur apud

Heronem, Pappum, & alios veteres, nouissimè verò & accuratissimè apud

Guidum Vbal-

dum.

et Marchionibus Montis, qui si-

gillatim de illis præcia-

rum librum in-

stituit.


DE LIBRA.




LIBRA, quæ inter mechanica instrumenta iure primum sibi vindicat locum, eo quod immediatius, ac magis participet naturam circuli in suis motionibus, est iugum quoddam ex medio liberè suspensum, axeque suffultum, ac plano horizontis parallelum, ex cuius utraque extremitate gemina lanx pendet, cuiusque conuersione circa ipsum axem, dum altera eleuatur, altera deprimitur, pondus vel excessus ponderis cuiuslibet, deprehenditur, ac mensuratur. Qua in descriptione supponitur iugum ex medio, tratina, seu axe suspensum, constitutum, ac marcere parallelum plano horizontis propter æquiponderantiã utriusque medietatis: motumque circularem, seu conuersionem circa fulcimentum tanquam circa centrum immotum, nonnisi ratione inæqualium ponderum in gemina lance utrinque pendentium illi competere: unde si pondera sint æqualia, libra semper maneat, & in æquilibrio constituat, seu æquidistans à plano horizontis. Deinde ita supponitur, pondera in lancibus imposita, ex utraque iugi extremitate pèdere, ut hoc non sit necessarium, neque essentialiter pertineat ad constitutionem libræ, sed potius ad commoditatẽ ponderandi, cum satis intelligatur libra essentialiter constituta, etiam absque lancibus, ponderibus in ipsis iugi extremitatibus adiacentibus, ut cernere est in sequentibus figuris.

Quo autem pacto libra in sui motione participet naturam circuli per se constat consideranti, iugum, diametri vicem gerere, axem verò seu trutinam, aut fulcimentum quodlibet, centri locum tenere, circa quod immotum, ipsa diameter vertitur dum circulum describit; siquidem immoto axe, seu fulcimento ipsius libræ, iugum, alterius extremitatis depressione ob exuperantiam ponderis, alterius verò eleuatione, circumagitur, non secus ac diameter circulum conficiendo. Quod si partes iugi utrinque à centro productæ, non sint inter se longitudine æquales, quamuis æquiponderantes, tunc quidem in ipsis iugi conuersione, ac circum-

latione duo circuli describentur alter altero maior, tanquā à duplici semidiametro circumlato, vt hic erit inspicere.



DE VECTE.




VECTIS simplex quoddā instrumentū est ligneum, vel ferreū satis oblongum veluti palus, aut fustis grandior, ad promouenda pondera; cuius vt plurimū altera extremitas pōderi eleuando subijcitur, altera verò manu, seu potētia præmitur, substrato inter vtramq; aliquo fulcramento, cui innitatur, quòd græcè hypomochlion appellatur, quodq; quāto propinquius ponderi locatur, tanto facilius ipso vecte leuatur. Aliquando verò altera extremitas nō ponderi, sed fulcramento subijcitur, vel ei quoquomodo innititur tanquā manenti valido, pondusq;

duosq. eleuatur, aut deprimitur per vectis partē mediam, quæ est inter vtramq. extremitatē iuxta eleuationē, aut depressionē alterius extremitatis vbi applicatur potētia : vel certē pōdus eleuatur per alterā extremitatem, si in illa locetur, manusq. aut potentia in medio adhibeatur. Vnde tres nonnulli species vectiū distinguunt, quas iuxta prædicta figuris etiā hic studuimus exprimere; Illud interim admonendo, eas omnes faciliē in suis motionibus ad circulū referri, cum ipsæ non nisi diametrū, vel semidiametrū circulū circa immotū fulcimentū describentē referant, vt per se patet, ac prima quæ sanē vtilior & frequentius in vſu est, ad librā à fulcimēto inæquales vtrinque partes habentē euentissimē reducatur, vt amplius deinceps cōstabit. Nā hoc quod est fulciri per suspensionē beneficio trutinæ, vel per subiectionē alterius corporis, quod non minus axis, ac centri vicē subeat, est differentia valde accidentalis.



DE TROCHLEA.


TROCHLEA est instrumentum veluti conceptaculum quoddam, aut capsula, vnum, vel plures striatos orbiculos, seu rotulas in se continens, axiculis per rotulas traiectis, circa quos illæ vertuntur, quibus admoto fune ductario eleuantur, aut remittuntur onera. Constare autem solet Trochlea ex vno, vel pluribus orbiculis tanquam inter thecas insertis, non quidem æqualibus, sed maioribus super minores adiectis, ne vnius supis circumductus funem alterius impediat. Insuper ipsi orbiculo, modò bini super binos locari consueuerunt, ita vt in trochlea quatuor, vel sex orbiculi, duplici, vel triplici ordine reperiâtur dispositi; modo verò non nisi singuli super singulos, totidem ordinibus continentur, vt quo potuimus modò hic figuris expressimus.



Reducitur autem Trochlea ad Vectem, & consequenter ad libram, quia vnusquisque orbiculus illius per diametrum nititur proprio axiculo tanquam fulcimento, quod inter onus leuandum, aut sustinendum, & potentiam eleuantem locatur, ita vt ad depressionem vnius extremitatis diametri,

DE AXE IN PERITROCHIO.

AXIS in Peritrochio est oblongus quidam, cylindrus Peritrochio firmiter infixus, ac parallelus horizontis plano locatus, cuius extrema in rotundis foraminibus immoti pegmatis expedite vertuntur. Peritrochium vero, est machina rotunda, ad rotæ seu tympani similitudinem efformata, in cuius conuexa peripheria stipites qui & Scytalæ vocantur, tanquam radij insiguntur, quibus admotâ manu tota machina simul cum axe versatur, ac funibus circa axem conuolutis, trahuntur pondera illis alligata; ut hic licebit inspicere.



Reducitur autem tota huiusmodi machina, seu instrumentum ad vectile. Nam si consideremus constitutum ex diametro axis, ac semidiametro Peritrochij coincidente cum illa non aliter in circumuolutione se habere cõperimus, ac Vectile, qui circa suum fulcimentum vertitur, tanquam circa proprium centrum.

Esto enim Axis simul, ac Peritrochij immobile centrum A, circa quod vtriusque circumferentia descripta sit, nempe tam Axis, quàm Tympani ipsius Peritrochij cum scytallis; Diameter verò Axis sit linea BC; ac semidiameter Peritrochij AD, constituentes integram lineam BD. Tum


ex Axe per funem BE propendeat onus F; virtusq. mo-
uentis applicetur in scytala vbi est ipsum D. Admotum
igitur deorsum ipsius D, linea BD, non aliter se potest
habere, ac vectis firmiter innixa immobili centro A, tan-
quam fulcimento; ac dum pars AD deprimitur, altera
nempe AB, eleuabitur simulque cum puncto B, pondus
F, quod ab eodem puncto extremo dependet.



DE CVNEO.

CVNEVS est simplex quoddam instrumen-
tum ad findenda, seu scindēda corpora aptif-
simum accedente percussione. Est enim soli-
dum, quod ex quadrangulāri base confurgēs,
quatuor superficiebus in peracutam aciem
terminantibus, clauditur. Duabus videlicet sibi oppositis
quadrangulāribus, ac altera parte longioribus; duabus verò
similiter oppositis, sed triangularibus in prædictam acutam,
& oblongam aciem terminantibus. Quæ sanè acies cum in
simulā quamlibet scindēdæ molis se inseruare præualeat,
adne-

adueniente valida percussione, vt quæ per malleû super basim adactum fieri consuevit, facilè totum cuneum cogit admittere, proindeq. parres molis ab inuicem secedere, quod est molem ipsam scindi, ac diuidi. Cunei ergo figura sic delineanda censuimus ex quadrata basi ABCD, excitando superficiem quadrangularem DBEF, ac aliam triangularem CDE, quæ simul cum suis oppositis omnes quatuor desinant, ac terminentur in aciem EF.



Refertur autè hoc quoque instrumentum ad vectè, eo quod ex duplici vecte videatur constare, vt infra quæst. 17. ex Aristotele magis ex professo probabitur. Etenim si considerentur duo eius latera, quæ ex basi in aciem terminantur, vt CE, & DE non secus ac duo vectes sibi inuicem obuersi, & cõtra conantes reperientur, quorum utiq; fulcimenta sunt partes scindendi corporis vtrinque constitutæ vt

GH, quibus intrando cuneus innititur. Onera verò sunt reliquæ eiusdem corporis partes successiuè dimouendæ, & adinuicem separandæ per aciem intrantem vbi E, vt in proposita figura est I, & K. Nam pars vbi K est onus respectu vectis CE innixæ in G; & pars vbi I, est onus respectu vectis DE innixæ in H. Et extrema in quibus applicatur potentia sunt initia ipsorum laterum ex parte basis vbi fit tota percussio, nempe vbi C & D, quæ omnia apertissimè citata quæstione amplius constabunt.



DE COCHLEA.

COCICLEA instrumentum est veluti compositum ex cuneo, & cylindro, seu est striatus quidam cylindrus. strigas habens admodum helices spirulatiū circumuolutas, cuius vertigine pondera helici congruē applicata, facillimē mouentur. Exemplum sit erectus cylindrus A B, cuius helices, vel strigæ circumuolutæ, sint C D, E F; manubrium verò cylindri G. Etenim si in principio helicis vbi C, onus congruē applicetur, vt pila supersignata H; ita tamen vt ex aduerso non possit moueri, nisi super rectam I K, quasi intercepta inter cylindrum & planum quoddam parallelum cylindro; absque dubio, ad circumuolutionem manubrij totiusque cylindri, pondus H paulatim ascendet ex C ad D, deinde ad E. & F, & sic deinceps.



Idemque potest exemplificari in alia ipsius cochleæ figura æquidistantis ab horizonte, vt A B, si apponatur illi onus C D, tanquam cylindri concaui ac striati, qui & Tylum à Pappo, & alijs Mechanicis,



& Cochleæ fœmina vulgò appellatur. Nam ad conuersionem inanubrij totiùsque cylindri super proprium axem, mouebitur etiam ipsum Tylum CD. Quæ omnia fusè Guidus Vbaldus demonstrat. Ex cuius doctrina illud tandem hic relinquitur adnotandum, ac simul in proposito concludendum, Cochleæ helices, aliud non esse, quàm latus cunei circa idem cylindrum iterum atque iterum circumuolutum. Vnde apparet quomodo etiam cochlea reducatur ad vectem; nimirum eodem prorsus pacto, quo cuneus, vt latius ipse prosequitur.

*De Centro grauitatis naturaliq. mobilitate
grauium, & leuium.*

ADDITIO SECVNDA.

Post considerationem instrumentorum, ac machinarum circuli naturam participantium, vt aptam ac debitam eorum applicationem ad motum grauiũ, & leuium cognoscamus, considerata nobis erit mobilitas ipsa tam naturalis, quàm præternaturalis, & artificiosa illorum, cui adaptari debent instrumenta, & ad quam ex instituto ordinantur. Cumque naturalis mobilitas grauium sit penes centrum grauitatis illorum, aliquid primò dicendum occurrit de centro grauitatis in communi, vt quàm breuissimè quæ necessaria sunt ad intelligentiam præfatæ motionis expediantur.

Lib. 8. Mechan.
them. col.
lection.

Centrum igitur grauitatis vniscuiusque corporis iuxta doctrinam Heronis, ac Pappi Alexandrini, est punctum illud intra positum, à quo si ipsum corpus graue suspendatur, vel etiam suspensum feratur, eadem semper suarum partium seruat positionem: quippe quæ in ipsa suspensione, aut latatione corporis minimè circumuertuntur, cum vndique sint æqualium momentorum. Quod præclare explicat Federicus Commandinus. Si enim, inquit, per tale centrum ducatur


Lib. de Cē-
tro grauit.
solidorum.

etur planum, figuram ipsius corporis quomocunque se-
cans, semper in partes æqueponderantes ipsam diuidet,
quamuis aliquando sint inæqualis dimentionis. Porro in
diuisione corporis per eius centrum grauitatis, partes diui-
sæ non semper sunt eiusdem magnitudinis, seu dimentionis,
sunt tamen eiusdem ponderis, & grauitatis, vt Guidas Vbal-
dus satis demonstrat. Quod sanè, vt idem animaduertit, in-
telligendum est de partibus mente tantum diuisis, non au-
tem re, ac seorsum constitutis, vt quæ abinuicem seiunctæ
ponderantur in libra: Cum alia tunc sit ratio grauitandi,
iuxta scilicet propriam magnitudinem maiorem, aut mino-
rem, quæ in proposito quando partes coniunctæ sunt com-
pensatur à positione, ac situ vnius respectu alterius iuxta di-
stantiam à centro, à quo totum corpus suspenditur.

In primum
lib. Aequi-
poder. Ar-
chimed. s.
prop. ult.

Quapropter si punctum

A fuerit centrum grauita-
tis corporis BCD quomocumque, diuisi per pla-
nā EF transeuntem per ip-
summet centrum, atque
idem corpus ex eodem
puncto suspenderetur, cer-
tè quo ad positionem ac
dispositionem suarum par-




rii inuariatum omnino maneret; ita vt nullo pacto ipsum
B, ac D verterentur circa punctum A tanquam circa cen-
trum, sed eadem qua prius positione manerent, siue pars
BEFC æqualis dimentionis inueniretur parti EDF, siue
inæqualis: semper enim sic coniunctæ æqueponderaret, es-
sentque æqualium momentorum. Cumque in his, quæ su-
spenduntur ex aliquo puncto, vel etiam sic suspensæ ferun-
tur non detur motus circumuolutionis absque exuperantia
alterius partis eorum, nec vna possit aliam superare nisi per
excessum ponderis ipsius; hinc est, vt immotæ ambæ ipsæ
partes perseverarent tanquam in æquilibrio constitutæ.
Idemque contingeret quocumque alio modo ipsum corpus

E suspens-

suspensum, aut etiam latum à principio constitueretur.

Quod si contra definitionem, seu descriptionem traditam afferatur, multa dari posse corpora talis figuræ, vt centrum grauitatis illorum non sit intra, sed extra, quemadmodum exempli gratia in rota AB cuius quidem centrum esset in C. Sicut etiam in corpore irregulari DE cuius



centrum esset in F. Occurrit Guidus Vbaldus dicens, etiam prædicta centra intra figuram esse quatenus verè continentur ab ambitu eiusdem figuræ ipsorum corporum.

His autem sic stabilitis de centro grauitatis, dicendum est naturalem mobilitatem grauium, & leuium respectiue (hoc est corporum magis, aut minus grauium, vt explicuimus) esse innatam quandam aptitudinem, ac propensionem ad motum deorsum ex principio intrinseco tum actiuo, tum passiuo per rectam lineam, quæ centrum grauitatis ipsius grauis, centrumq. mundi connectit. Id quod apertissime constabit consideranti graue quodcumque secluso omni impedimento, ac detentione, statim suo pondere, & ex se centrum vniuersi expetere, nec vnquam quiescere donec ad illud si neri posset, perueniat.

Diximus autem huiusmodi aptitudinem esse ex principio intrinseco tum actiuo tum passiuo; nam id per quod graua formaliter constituuntur apta, & in actu primo ad motum localem deorsum, non modò est potentia passiuæ, ipsis innata, sicut cuilibet corpori ad recipiendum talem motum, siue producatur à seipso siue ab alio: sed præcipue est

est intrinseca ipsa grauitas, quæ tanquam proprium operandi principium est illis ratio, vt moueantur deorsum, seu formæ qua in se seclusis impedimentis, talem motum producant. Quod optimè expressit Aristoteles lib. 8. *Physic.* tex. 3. 2. & lib. 1. de Cœlo, tex. 17. & lib. 4. tex. 6. Ratio autem est manifesta, quia sensu constat, efficaciam, ac celeritatem in motu deorsum crescere crescente grauitate corporis, ac minui ad diminutionem illius (vt idem Philosophus obseruauit 1. de Cœlo tex. 89.) quod non posset contingere si in ipso corpore graui grauitas non esset propria causa effectiua ipsius motus, quæ simul cum effectu cresceret, ac decrederet. Sicut calor, qui dum intenditur, aut remittitur, efficacius aut remissius operatur, maioremq. aut minorem calefactionis motum producit, eo quod similiter est ratio formalis calefaciendi, sicut grauitas se deorsum mouendi. Nullumq. est inconueniens, idem corpus esse posse mouens & motum, cum in corpore graui sit potentia receptiua motus, & grauitas, quæ est potètia effectiua illius.

Diximus verò grauiam moueri deorsum per rectam lineam, quæ centrum grauitatis ipsorum, centrumq. mundi connectit: Nam sensu pariter constat, illa non tendere ad ipsum mundi centrum per lineam aliquam obliquam, neque per lineam rectam, quæ ab extremo quoddam, vel quauis alia parte ipsius ad mundi centrum extendatur, sed per eam, quam diximus lineam, quæ ab eius centro grauitatis rectam ad mundi centrum propendet. Omnis enim grauitas cuiusque grauis ita in ipso grauitatis centro colligitur, & coaceruatur, vt extra ipsum nihil grauitare propemodum in corporibus videatur: proindeq. non nisi ipsomet centro rectam deorsum eadem corpora ferri conspiciamus naturali propensione. Quo pariter fit, vt si aliundè quàm ab ipsius grauitatis centro graue aliquod suspendatur, statim grauitatis centro deorsum tendente conuertatur, nec manere vnquam possit donec ipsum grauitatis centrum sub puncto suspensionis per lineam horisonti perpendicularem constituatur. Quandoquidem tunc idem est, ac si corpus per ipsummet grauita-

tis centrum suspenderetur, cum per eandem lineam ei liceat grauitare, vt latius ac rectè prosequitur Guidus Vbal-
 dus loco citato.

*De præternaturali, & artificiosa mobilitate
 grauium, & leuium.*

A D D I T I O T E R T I A.

IAm verò præternaturalis mobilitas grauium, & leuium in eo relinquitur consistere, quòd est, ipsa grauium, & leuium secundum quamcumque positionem, etiam repugnantibus naturæ legibus, moueri posse arte ac violentia, à principio extrinseco: ita tamen vt quandoq. eadem grauitas intrinseca, quæ superatur à violentia, non parum ad seipsam euincendam, & ad sui motionem præternaturalem, & artificiosam augendam concurret.

Constat enim hoc cum aperta deductione ex dictis de mobilitate naturali, tum clara ac patenti experientia, ita vt nulla ferè indigeat probatione, aut explicatione, præsertim in doctrina Aristotelis, qui quantum attinet ad principium extrinsecum, à quo prouenire diximus præternaturalem motionem, cum 8. Physicor. tex. 33. dixisset: Omnia, quæ mouentur, aut natura moueri, aut præter naturam, ac violentia; mox addit: Et quæ vi & præter naturam, omnia à quodam, & ab alio. Iuxta commune illud pronunciatum à se prius traditum, & ab omnibus receptum nimirum, omne quod mouetur, ab alio moueri. Quod quippè loquendo saltem de motu præternaturali in rebus inanimatis, est irrefragabile.

Illud tamen apud nonnullos adhuc non est omnino exploratum, ac non paruam habet difficultatem, quo videlicet pacto violentia ipsa corporibus ab extrinseco inferatur; quauè ratione, eadem corpora postquam ab impulsore, vel projiciente recesserint, ex se præternaturaliter moueantur.

Quod

Quod cum partim ad merè physicam speculationem pertineat in 7. & 8. de physico auditu; partim verò infra cum Aristotele quæst. 32. & 33. explicandum sit, hîc non erit discutiendum, sed tantum ex dicendis, ac probandis supponere oportet, nullam vnquam inferri posse violentiam per motum localem absque productione, ac impressione qualitatis cuiusdam in ipso mobili, quæ communiter appellari solet impetus siue impulsus, ac de qua sæpe nobis redibit sermo in ijs quæstionibus.

Diximus autem grauitatem quandoq. ad sui motionem violentam concurrere, quia cum deorsum magna vi pondera extruduntur, vis illata, & impetus incussus, grauitate mobilis intenditur, & augetur, vt quæst. 32. probabitur. Vnde licet quoad velocitatem, & modum tunc motus ipse deorsum cõstituatur præternaturalis, ad eum tamen grauitas ipsa non minus, ac impetus concurrat. Quod contra se habet eum sursum, vel ad latera graue transfertur; quia grauitas sicut semper tendit deorsum, ita cuiusq. alio motui semper obsistit, quamuis propriè non contrarietur virtuti, à qua talis motus procedit, nec sit impossibilis cum illa in eodem subiecto, vt ibidem explicabitur.

Deinde moueri posse diximus ipsa graua secundū quamcumque positionem arte, ac violentia; quia nec violentiæ præscripta est positio secundum quam duntaxat mouere valeat, non verò secundum aliam, nec arti deficiunt præcepta, & instrumenta, quibus ita vis eis applicetur; vt quocquē versum, etiam contra naturæ leges graua transferantur. Vnde pluribus, ac innumeris penè modis arte comparatis violentia potest inferri. Quos tamen Aristoteles 7. Physic. text. 10. ad quatuor tantum reducit, iuxta quos totidem species motus violenti constituit: Quadrifariam, inquit, moueri quidquid ab alio per violentiam secundum locum mouetur. Nimirum vel per Pulsionem, vel per Tractionem, vel per Vectionem, vel per Vertiginem. Pulsionem autem distinguit in Impulsionem, & Expulsionem. Impulsionem ait esse cum pellens ita pellit, vt pulsus non deserat, sed comite-

tur: Expulsionem verò, cum vbi pepulit, pulsum ipsum relinquit, de quo genere est proiectio. Tractionem deinde ait esse motum trahentis non separatum à motu eius, quod trahitur: ideoq. esse motum ad seipsum, & ad alterum. Vectiōem verò esse motum per accidens; nam id quod vehitur ex eo mouetur, quia est in eo, quod mouetur. Quoniam verò id quod vehit mouetur aut pulsum, aut tractum, aut vertigine actum, ex hoc infert, vt & Vectio tripliciter fieri possit, iuxta triplicem motum prædictum. Denique Vertiginem ait esse motum compositum ex tractione, & pulsione. Ad quas quippe quatuor species. reuocari possunt aliæ: quamplures motiones præternaturales, ac violentæ, quibus accommodata sunt instrumenta, ac machinamenta, de quibus Additione prima egimus, cunctaque alia, quæ ex illis constantur, vel ad ea reducuntur.

Quamobrem præternaturalis mobilitas grauium, ac leuium pluries vocatur etiam artificiosa. Nam licet interdum à causis naturalibus, nulla interueniente hominum industria aut violentia; vis aliqua corporibus inferatur, qua præternaturaliter ipsa compelluntur moueri, vt cum ignitos lapides. è montibus quibusdam videmus erumpere, & in altum sustolli; vel ferrea corpora à magnete sursum attrahi, ac pendentia sustineri. Sæpius tamen corpora non nisi artificiosa violentia ex industria. ipsis illata præternaturaliter, vt dicebamus. constat moueri. Ita vt etiam motus eorum præternaturales, qui ab aliqua causa naturali oriuntur, aliosq. similes, ad imitationem naturæ, ars ipsa violentiam applicando, augendo, minuendo, ac distinguendo producat. Vt perspicuè obseruare est in motibus violentis sulfurei pulueris. virtute, ac artis magisterio productis ad euertendas moles, explodendas ingentes pilas, ac diruendas portas, vrbum, ac munitionum: nec non ~~et~~ in motibus, qui aëris, vel aquæ beneficio multimoda cum arte disposito fiunt, ad nauium admirabilem lationem, earumq. cursus moderationem; & ad tam varios machinarum se mouentium, seu. spiritalium vsus, de quibus scripsit Hero, cum in ijs omnibus ars natu-

ram æmulando, vel eam comitando magnopere eluceat, nec minus ad ipsam vim præternaturaliter inferendam conducatur.

Ad hanc igitur motionem artificiosam, ac præternaturalem vniuersa facultas Mechanica ordinatur, vt supra explicuimus: quatenus mirabili suo magisterio rationabiliter per causas procedendo, docet quo pacto grauius cuncta, aut leuius possint secundum omnem positionem moueri, & cuius virtute, quauè proportionem illius ad pondus; in qua distantia, quibusq. adminiculis, machinis, & instrumentis, & id genus alia; quæ non parua ex parte constabunt ex ijs, quæ Aristoteles vltra superius allata, & à nobis exposita, in sequentibus quæstionibus tradit. Cum aliàs exacta, & peculiaris vniuscuiusque grauis, aut levis prout artificiosè moueri debeat consideratio, ad distinctas Mechanicæ facultatis partes iam enumeratas, quas ipse Philosophus non est aggressus; quippe qui vniuersalia duntaxat principia huius admirabilis disciplinæ in hac prima parte afferre statuerit, causas postea in secunda parte allaturus eorum, quæ in sequentibus quæstionibus proponuntur ad maiorem explanationem, & applicationem eorundem principiorum, ex quibus aliæ infinitæ penè conclusiones possunt deduci.

Sed illud hic summopere animaduertendum putauimus Archimedē, quem iure inter huius disciplinæ parentes optimos literæ omnes maxima cum laude commemorant, non diuersa ab ijs, quæ Aristoteles tradidit principia assumpsisse, ac in suis de æqueponderantibus libris protulisse, vt falsò nonnulli comminiscuntur; quinimò tradita ab ipso Philosopho supposuisse, & amplius, ad particularia descendendo, extendisse, ac planiora reddidisse, vt ingenuè fatetur Guidus Vbaldus in Præfatione primi de æqueponderantibus libri eiusdē Archimedis. Aristoteles enim (vt vel vno vtar exemplo) loquendo de motionem circulari, ad quam reducuntur penè omnes motiones, quæ mechanicis instrumentis, atque artibus fiunt, præstantissimum illud constituit principium, quæ sunt in maiori à centro distantia, maiorem quoque ha-

Lib. 1.
Acquipod.
proposit. 6.

bere virtutem ad motum, velociusq. moueri, vt supra vidimus tex. 6. Quod sanè principium non solum admittit Archimedes, atque supponit, sed consequenter ad illud ulterius inquit, tradiditq. quanto maior sit virtus, quæ habetur in maiori illa distantia, eamq. ab ipsius distantia proportionem indagando, receptissimum aliud fundamentum mechanicum statuit, nimirum, ita se habere pondus ad pondus, vt distantia ad distantiam à puncto vnde pondera suspenduntur, permutata videlicet ratione, vt infra quæst. 3. explicabitur. Cui fundamento tota Archimedis doctrina, veraq. mechanica innititur contemplatio. Illud tamen antea patefecerat Aristoteles in suis mechanicis, quæst. 3. illis verbis, quod igitur motum pondus ad mouens, longitudo patitur ad longitudinem. Quem locum miror non animaduertisse Guidum Vbaldum in confirmationem suæ veræq. sententiæ; cum planè animaduertisset Archimedem in constituendis suis mechanicis postulatis supposuisse ea, quæ de mechanicis principijs Philosophus tradiderat. Sed iam ad exponendas ipsius Philosophi quæstiones accedamus.



SECUNDA PARS MECHANICES

ARISTOTELIS STAGIRITAE

IN QVA PLVRES QVAESTIONES
continentur, ac soluuntur iuxta principia in
priori parte tradita.

*Explicata vniuersali doctrina principiorum,
ex quibus tanquam ex iactis fundamen-
tis in conficiendis demonstrationibus omnis
mechanica structura confurgit, particulares
quaestiones Philosophus proponit, in qua-
rum solutionibus ipsa vniuersalis doctrina,
vt praemonuimus, applicatur.*

Quaestio Prima.



*VR autem maiores librae exactio-
res sunt minoribus, palam est ex ijs.
Spartum enim fit centrum, id namq-
manet. Quod autem librae utrinque
est, exeuntes à centro.*

*Ab eodem igitur pondere citius mo-
ueri necesse est extremum librae, quo
plus à sparto discesserit. Et nonnulla
quidem in paruis libris imposita non manifesta sensui sunt
pondera: in magnis autem manifesta. Nihil enim prohibet
minorem moueri magnitudinem, quàm vt visioni fit mani-
festa. In magna autem libra idem pondus visibile efficit ma-
gnitu-*

gnitudo. Quadam verò manifesta quidem sunt in utrisque, sed multò magis in maioribus, quoniam multò maior inclinationis fit magnitudo ab eodem pondere in maioribus. Quamobrem machinantur ij, qui purpuram vendunt, ut pendendo defraudent, tum ad medium spartum non ponentes, tum plumbum in alterutram libræ partem infundentes, aut ligni, quod ad radicem vergebat, in eam, quam deferri volunt partem, constituentes: aut si nodum habuerit. Ligni enim grauior illa est pars, in qua est radix. Nodus verò radix quædam est.

COMMENTARIUS.


TAnquam exploratissimum supponitur hic ab Aristotele experimentum, maiores libras, exactiores esse minoribus: hoc est exactè magis ostendere pondus grauium, quæ ponderantur, eiusq. differentias per motum sursum, ac deorsum, aut statum suarum lancium. Causamq. ipse statim afferens, docet spartum, quo suspenditur libra, seu trutinam quamlibet, secundum eam partem, scilicet quæ intra foramen bilancis existens in medio iugi, axis vicem gerit, se habere tanquam centrum in circulo, quod per motum circularem eiusdem circuli non mouetur: partes autem ipsius iugi vtrinque productas, quæ & brachia nuncupantur, è quorum extremis lances propendunt, constitui tanquam lineas à centro in peripheriam deductas, quæ circa idem centrum conuertantur, & aliquantulum per eleuationem vnius, ac depressionem alterius circumferantur, ut videre est in sequenti figura. At, inquit, quò plus lineæ à centro circuli discefferint, eo magis, quamuis ab eadem vel æquali virtute, valent moueri, maius nempe spacium eodem tempore percurrento, ut idemmet Aristoteles probauerat. Ergo idem pondus ab extremo libræ propendens eò magis illam conuertyere, aut mouere valebit, quò maior fuerit ipsa libra, seu quò longioribus brachijs constabit. Si quidem extremum vbi appenditur pondus, magis distabit à centro, maioremq. proinde portionem circuli eodem

tem-

tempore, eademq. vi peraget, vt perspicuum est in hac figura si brachia libræ AB protrahantur vsque ad CD. Quia

nimirum, sicut maiorem efficerent circum-
lum, videlicet conti-
nentem, maioremque
diametrum; ita maio-
rem arcum eorum ex-
trema percurrerent.

Nam quo tempore
ac vi A moueretur vs-
que ad F, ipsum C
moueretur vsq; ad E.
Maior autem est CE
quàm AF, eo quod
sicut diameter ad dia-
metrum, ita portio ad
portionem circuli se
habeat. Cum igitur
facilius sit cernere, ac



discernere, quod maius est, quàm quod minus; sequitur, eò
euentius apparere motum libræ, quò maior fuerit ipsa li-
bra: ac propterea per motum ipsum maioris libræ exactius
præponderantiam grauium, seu differentiam ponderis in-
dicari.

Atq; hinc euenire, ait Aristoteles, vt in paruis libris non-
nulla pondera sensum omnino ferè lateant, quæ in magnis,
illi apertissimè innotescunt. Non quidem ex eo, quod ipsa
pondera moueant magnas libras, non autem paruas; sed
quia motus ab ipsis productus, cum maior sit in maioribus,
facilius, ac euentius à sensu percipitur. Vnde quæ mani-
festa sunt in vtriusque libris, multo magis (vt idem inquit)
manifesta se præbent in maioribus, quoniam in illis multo
maior inclinatio causatur ab eodem pondere. Id quod in
omnibus instrumentis verificatur, quæ ad mensurandum de-
ser-

seruiunt : Nam quo ampliora eò minus obtutum fallunt, & euidentius mensuratorum differentias manifestant .

Denique ex ijs animaduertit Aristoteles modum , quo nonnulli vendentes purpuram, vel crocum, aut aliud huiusmodi, emptores defraudant . Ita namque (vt ipse ait) construunt libram, vt spartum quo illa suspenditur, seu axis circa quem illa conuertitur , non sit prorsus in medio iugi, ac proinde vnum brachium illius, sit longius altero , æquè tamen grauiet, vt tegatur deceptio . Infundunt enim plumbum in brachium , quod minorem habet longitudinem, vel illud ex grauiori ligno conficiunt, vt puta nodoso, aut ad radicem vergente : & sic minorem habens longitudinem, æqueponderat habenti maiorem, libraq. ipsa haudquaquam apparet vitiosa siue iniusta . Deinde verò mercem in eam lancem imponunt, quæ ex longiori brachio pendet; vbi certè quodlibet pondus magis grauitare necesse est, quàm in opposita lance . Siquidem brachij extremum ex quo pendet, magis distat a centro; ideoq. quamuis adulterinæ non sint ponderū notæ, merces maioris ponderis putatur, quàm reuera sit, ac tanti ex fraude venditur . Vnde etiā si libra lancibus vacuis æquilibrium demonstret, & æqualibus in pondere, æqualia addantur, æquè illa ponderare non sequitur, dum æquè à centro libræ non distant . Nàm ratione situs quælibet additio ponderis postea in ipsis lancibus facta, semper eandem seruare debet proportionem, vt magis grauiet in loco distantiori, quàm in propinquiori; vt exactius adhuc constare potest ex Archimede in primo lib. Aequiponderan. postulat. 2. & explicatione Guidi Vbaldi è Marchionibus Montis ibidem ac tra&. de libra prop. 6.

Illud tamen hic minimè prætereundum est, non rectè Blancanum , hunc Aristotelis locum exposuisse, cū ex mente illius ait, purpurarios fraudulentos, plumbum in lancem illam infundere in quam merces imponitur. Quãdoquidem si ita esset, lanx illa maiorem longitudinem brachij non requireret ad magis grauitandum. Quod si vtroque ex capi-

te ma-

re magis grauitaret, nempe ex plumbo adiuncto, & ex maiori longitudine brachij, nunquam libra ponderibus, ac mercibus vacua, in æquilibrio posset constitui, sed satis apertè huiusmodi lanx semper deorsum tenderet, altera verò sursum; ideoq. nulla ex hoc oriretur decèptio, nullaq. fraus, quæ ex deceptione consequitur. Quando igitur Aristoteles ait, purpurarios plumbum, vel quid simile in eam, quam deferri volunt partem constituere, intelligendus est de parte, seu de brachio libræ minori, quod certè sursum ascenderet ad descensum maioris, ac deferri non posset ad constituendum Aequilibrium, nisi similibus adiumentis quantum opus est deprimeretur; vt rectè etiam notat Gardanus lib. 1. de principijs prope finem.

Quæstio Secunda.



VR. siquidem cursum fuerit spatium, quando deorsum lato pondere quispiam id amouet, rursus ascendit libra: si autem deorsum constitutum fuerit, non ascendit, sed manet. An quia sursum quidem spatia existente, plus libra extra perpendicularum sit: quare necesse est deorsum ferri id quod plus est, donec ascendat, quia bifariam libram diuidit, ad ipsius perpendicularum, cum onus incumbat ad libræ partem sursum raptum.

Sit libra recta, ubi BC, spatium autem AD. Hoc igitur deorsum proiecto perpendicularum erit, ubi ADM. Si igitur in ipso B ponatur onus, B quidem erit, ubi E, C autem ubi H; quoniam breuè ea, quæ bifariam libram secant, primò quidem erit DM. ipsius perpendiculari; incumbente autem onere DG, quare libræ ipsius ubi EH, quod extra perpendicularum est AM, ubi est PQ, maius est dimidio. Si igitur amoueat onus ab ipso E, necesse est deorsum ferri. H minus enim est E. Si quidem igitur sursum habuerit spatium,

rursum propter hoc ascendit libra. Si autem deorsum fuerit in quod substat, contrarium facit. Plus enim dimidio fit libra, quæ deorsum est pars, quàm quod per pendiculam secet: quapropter non ascendit. Eleuata enim pars leuior est.

Sit libra recta: ubi NG: perpendiculum autem KLM. Bisariam igitur secatur KG. Impositio autem onere in ipso N, erit quidem N ubi O, ipsum autem G, ubi R, KL autem ubi LP. Quare maius est KO, quàm LR, ipso PKL. Et ablato igitur onere, necesse est manere; incumbit enim ceu onus excessus medietatis eius ubi est F.

COMMENTARIUS.


Cum axis vel spartum, quod gerit vicem axis, & quo suspenditur libra, locari possit tum supra, tum infra iugum ipsius libræ, quærit modo Aristoteles quid causæ sit, vt si locetur supra, apposito in alteram lancem pondere, descendat quippe illa, sed eo amoto ex se iterum in pristinum locum ascendat: si verò axis locetur infra, lanx illa maneat, & non reuertatur.

Porro prima hius quæstionis pars si physicè consideretur, non paruam videtur inuoluerè difficultatem. Etenim nullum apparet agens, à quo talis ascensus de pressæ lancis procedat. Cum enim quodlibet graue tendat deorsum, causa huiusmodi eleuationis, & ascensionis non potest esse forma aliqua intrinseca; nec pro extrinseca assignari potest alia, nisi grauitas alterius lancis, qua scilicet illa descendendo, hanc faciat ascendere. Verum cum vtraque lanx æqualis molis, & grauitatis constituatur, nequit altera alteri præponderare, descensuq. proprio eam eleuare. Simile namq. in intensione per eandem qualitatem agere non potest in simile; cum omnis actio procedere debeat ab inæquali proportionem, vt cum Aristotele sentiunt omnes Philosophi 1. de generat. tex. 48.

Nihilo-

Nihilominus etiā physicis principijs inharendo ex ijs, quæ Aristoteles in præsentibus docet, optimè huic difficultati potest occurrì, primaq. pars quæstionis resolui. Nam supposito, quod pars iugi, quæ eleuatur distinguatur à parte, quæ deprimitur per lineam perpendicularem cadentem à centro circa quod conuertitur libra, seu ab axe, vel sparto ad centrum terræ, vt sensu conitabit in sequenti figura: siquidem quidquid libræ est ad leuam, v.g. talis lineæ, rapitur deorsum; quidquid verò est ad dexteram attollitur sursum: hoc inquam supposito, ait Aristoteles, quod si libra, axem, seu centrum habeat supra iugum, ac per depressio- nem alterius partis illius, altera eleuetur, plus quippè libræ esset ex parte eleuata, quàm ex parte depressa: proindeq. pars eleuata necesseriò descenderet, & ad descensum illius, sequitur depressam ascendere, quousque vtraque constitua- tur æqualis, ac reuertatur ad æquilibrium. Id quod ita se habere sic probat. Nam si iugum libræ sit BC in æquilibrio constitutum: spartum

autem quo suspèditur, AD, ita videlicet, vt axis sit ipsum D, quod est punctum supra lati- tudinem iugi. Dein- de spartum proijciatur deorsum, efficiatq. per- pendicularem ADM.



Tunc si in ipso B ponatur onus, B quidem descendet in E, C autem ascendet vbi H. Quamobrem lineæ, quæ in priori situ libram diuidebat bifariam, est ipsa perpendicu- laris DM. Illa verò quæ postea eodem pacto diuidit in, posteriori situ propter onus, quod incumbit in E, erit DG. Quare ea pars libræ, seu iugi EH, quæ est extra perpendiculum AM versus H maior erit diuisione, nempe quantum importat triangulus DGM, quod spatium Aristoteles signauit PQ. Si igitur amoueatur onus, quod de-
depri-

deprimit in E, necesse est deorsum ferri partem ubi H. Siquidē pars illa maior est quam hæc ubi E, quæ per consequens sursum ascendet, & sic rursus libra constituetur in æquilibrio quod erat probandum. Secunda verò pars huius quæstionis facilius ab eodem Aristotele probatur. Quoniam si spartum, seu axis infra iugum locetur, maior pars libræ esset illa, quæ deorsum ex imposito pondere reperiretur depressa, quam quæ sursum esset elata. Porro plus dimidio contineret, proindeq. etiam ablato pondere adhuc magis grauitaret, ac propterea ad æquilibrium redire minime posset. Id quod sic ostendit Aristoteles sit libra in æquilibrio constituta NG



perpendiculū verò bifariam libram ipsam secans, ac tendens ad centrum mundi, sit cadens KLM. Axis verò infra iugū locatus ubi L. Imposito post hæc onere in ipso N, descendet plane ipsum

N, eritq. exempli gratia, ubi O. Et per consequens ipsum G ascendet ad R. Linea verò KL, quæ bifariam diuidebat libram in situ NG declinabit in PL. Cumq. maius sit KO, quam KR eo quod ultra dimidium continéat etiam triangulum PKL; sequitur vt ablato onere, adhuc nequeat pars ista libræ sursum attolli. Quandoquidem excessus ille supra medietatem, tanquam onus quoddam ei semper incumbit.

Huic autem Aristotelis demonstrationi addi etiam potest

test alia sumpta ex centro grauitatis, vt proprium est mechanicarum speculationum. Porro libræ iam explicatæ centrum grauitatis est punctum in medio iugi intrapositum, vt patet ex definitione. Nam circa illud vndiq. partes æqualium sunt momentorum. Quando autem libra est in Aequilibrio constituta, huiusmodi centrum coincidit in eandem lineam perpendicularem, in qua est centrum circumuolutionis, seu axis ipsius libræ, ac centrum mundi; siue axis ponatur supra, siue infra iugū, vt videre est in descriptis figuris. Quo fit, vt libra in tali positione quiescat; nam centrum grauitatis per breuiorem lineam, qua fieri potest tendit ad centrum mundi; nulla autem breuior est recta in ipsum cadente. Quando verò libra per depressionem vnus, & eleuationem alterius partis ipsius, nō manet in æquilibrio, tunc centrum grauitatis constituitur extraperpendiculum, seu lineam prædictam cadentem ad centrum mundi per cētrum circumuolutionis ipsius libræ; ac propterea necessario ipsum centrum grauitatis si supra est in parte eleuata, ablato pondere partis oppositæ descendet, ac reuertetur in locum pristinum, vt magis centro mundi appropinquetur per viam, qua potest. Si verò infra est in parte depressa, etiam si pondus ab illa auferatur, manebit; quia in illo situ similiter & adhuc magis appropinquatur centro mundi quo tendit. Quæ omnia absque alia figura perspicua esse possunt ex descriptis, ac fusiùs, & exactiùs traduntur, cum à Guidone Vbaldo tractatu de libra, tum à Bernardino Baldò in hac quæstione, qui tantam in centro grauitatis vim esse animaduertit ad præponderandum, vt hinc colligat, libras quæ axem habent supra iugum, non à quouis paruo pondere moueri, vel penitus declinare, sed ab eo tantū, quod superet resistentiā centri grauitatis, quæ resistentia proportionaliter eo maior experitur, quo minus grauitatis cētrū distat ab axe, seu centro circa quod ipsa libra conuertitur, vt ibidē ipse demonstrat.

Verum quamuis prædicta omnia vera sint, adhuc tamen aliquod desideratur ad adæquatam omnino rationem tradendam, cur axe existente supra iugum, si eleuetur vna pars


illius ad depressionem alterius, causaq. depressionis remouetur, statim pars illa eleuata præcipiti cursu descendat; redeatq. in pristinum locum. Siquidem excessus ille partis eleuatæ, quem ex Aristotele explicuimus, rursusq. ratio centri grauitatis prædicta non videntur sufficere, nec tantum esse momenti, vt tantam motionem tamquam præcipitem descensum causare præualeant. Cum & centrum grauitatis parum, aut imperceptibiliter remoueatur à linea illa cadente ab axe ad centrum mundi; & excessus partis eleuatæ non modo paruus sit, sed paruum etiam ab eadem linea distet vbi minus præponderantia experitur. Etenim si huiusmodi excessus appenderetur tanquam onus in libra, quæ in æquilibrio sit constituta, ac prope axem in simili situ, ac est ille, quem in casu nostro retinet, absque dubio parum, aut nihil præponderaret brachium in quo appenderetur.

Dicendum ergo est vltra causas prædictas præcipuè descensionem illam causari à maiori grauitate, quam eleuatæ, ac pondus lancis ab illo pendentis obtinere videtur in eo loco. Nam licet in æquilibrio lances constitutæ, supponantur in grauitate æquales: non tamen in quocumque situ, & positione, æque possunt grauitare. Quodlibet enim librandum pondus alias inuariatum, quanto magis elongatur à linea perpendiculari, quæ per punctum axis instrumenti cadit ad centrum terræ (quam lineam Geometrici vocant cathetum) tanto magis grauitat, vt cernere est in statera, vel in alio simili ad ponderandum apto instrumento. Non quia ratione situs re vera maiorem, aut minorem grauitatem acquirat, sed quia magis, vel minus sustinetur ab instrumento in illo situ iuxta maiorem, aut minorem propinquitatem, quam situs habet cum linea explicata, vt Guido Vbaldus animaduertit, tractatu de Libra, prop. 4. ante med. Cum igitur pondus superioris lancis in eo loco magis distet aliena perpendiculari prædicta quam pondus inferioris, sequitur magis grauitare superiorem lancem, quam grauitet inferior, atque adeo hæc ab illa tanquam ab inæquali portione virtutis moueri, & sursum ferri vsquequo ad æqualem.

amplius distantia GF, eo quod in F ipsa linea DE bifariam diuisa sit, proindeq. latus GD sit minus dimidio, ad quod deest spatium GF. Ex hoc inquam fit, vt alterum latus eiusdem anguli E sit etiam maius altero latere equalis anguli D, nempe vt AE, maius sit quam BD. Iam ergo per longiorem perpendicularem superior latus, quam inferior à cathetu distabit, quod erat demonstrandum, vt hanc magis quam illam in eo situ grauitare asseramus.

Vnum tandem hic superest explicandum, de quo non meminit Aristoteles; Cur nimirum si axis non constituatur supra, nec infra, sed prorsus in puncto medio longitudinis, ac magnitudinis iugi, vt in puncto A propositæ libræ BC in æquilibrio constitutæ; & alterum extremum illius manu, vel pondere deorsum trahatur, ablato pondere, vel cessante detentione, rursus ad æquilibrium ipsa libra non reuertatur, sed maneat quomodocumque relinquantur.

Id quod ex eo prouenire comperiemus, quoniam in huiusmodi constitutione libræ, centrum grauitatis coincidit cum centro circumuolutionis, seu axis ipsius libræ, proindeq. habere non potest, quo declinet, aut vergat etiam si libra quomodolibet situetur, aut moueatur, sed manebit



semper in illo tanquam in suo fulcramento, à quo sustentatur. Idem enim punctum A est centrum grauitatis cum sit in medio iugi BC; & est ceterum axis ex constructionis suppositione. Quare si in illo iugum diui-

datur per lineam perpendicularem DE, in quocumque situ po-

tu ponatur, siue in equilibrio, ut ubi BC, siue alibi ut in FG semper diuidetur bifariam, atque adeo in duas partes equiponderantes, quarum altera, alteram mouere non potest, cum propter equiponderantiam, tum propter æquidistantiam quam semper retineret à perpendiculo, seu linea cathetus.

Quæstio Tertia.



CVR exigua vires (quemadmodum à principio dictum est) vecte, magna mouent pondera, vectis insuper onus accipientes? cum facilius sit minorem mouere grauitatem: minor autem est sine vecte. An quoniam ipse vectis est in causa libra existens, spartum inferre habens, in inaequalia diuisa. Hypomochlion enim est spartum: ambo namque stant ut centrum. Quoniam autem ab aequali pondere celerius mouetur maior earum, quæ à centro sunt: duo verò pondera, quod mouet, & quod mouetur: quod igitur motum pondus ad mouens, longitudo patitur ad longitudinem. Semper autem quanto ab hypomochlio distabit magis, tantò facilius mouebit. Causa autem est, quæ retrò commemorata est: quoniam quæ plus à centro distat, maiorem describit circulum: quare ab eadem potentia plus separabitur mouens illud, quod plus ab hypomochlio distabit. Sit vectis ubi AB, pondus ubi C, quod mouet autem, ubi D, hypomochlion ubi E, quod autem ubi est D, mouens ubi F. motum autem ubi G. pondus ubi G.

COMMENTARIUS.

QUOD Aristoteles tanquam admirandum, ac vnum de numero eorum, quæ præter naturam accidunt in principio huius libri textu 2. proposuerat, hic modo ad inuestigandam eius causam, iterum proponit, querens

cur exiguę vires adhibito vecte, magna moueant pondera, quę absque vecte mouere minimę possent, cum tamen ipsum quoque onus vectis dimouendum suscipiant? Facilius enim est, minorem quàm maiorem superare grauitatem ponderis; minor autem est grauitas ponderis absque vecte, quàm cum vecte. Vnde contrarium fortasse videtur debere contingere ab eo, quod de facto contingit.

At statim Aristoteles quæstioni respondet dicens, vectem quippe habere rationem librę, cuius axis, seu trutina sit infra iugum, vt explicuimus, brachia verò sint inæqualia. Hypomochlion enim, seu fulcimentum vectis, axis vicem gerit. Similiter namque circa ipsum conuertitur vectis, similiterque semper manet immotum. Longitudo autem vectis vtrinq; ex fulcimento protensa, iugum refert librę, in brachia, seu partes inæquales diuisum; quarum illa, quę ad pondus leuandum applicatur, sit breuior, illa verò in cuius extremitate virtus adhibetur potentię motricis sit longior, vt cernere est in hac figura, quam tamen Aristoteles exhibuit in fine. Sit enim vectis AB, pondus verò vbi C, & potentia mouens vbi D; inter quę mediet fulcimentum in E. Tunc si consideretur, eadem erit



ratio



ratio ac de libra, cuius iugum sit AB, lances verò C, D, & axis, seu fulcimentum E. Siquidem ipsum D pendens ex longiori brachio libræ, præponderat ipsi C. Quemadmodum potentia applicata in vecte vbi D, superat gravitatem ponderis C. Axis verò cū ponatur infra iugum, siue ipsum iugum sit suspensum per trutinam, aut spartum, siue innixum sit alteri corpori immobili, idem semper præstat, ac fulcimentum vectis vbi E.

Quoniam autem (prosequitur Aristoteles) ab æquali pondere celerius, siue facilius mouetur brachium libræ, quod magis à centro discesserit, vt explicatum est de libra, quæ alterum brachium longius obtinet, eam ad circulum reducendo: hinc fit, vt cum duo sint, quæ in ambis extremitatibus vectis præmunt, vel ponderant, nempe mouens in vna, & motum in alia; illud magis præponderet, quod longiorem vectis extremitatem præsserit; seu quanto magis à fulcimento discesserit, quamuis aliàs ipsa ponderantia in se sint æqualia, hoc est virtus mouentis æqualis sit moto ponderi, & longior pars vectis æquè grauitet, ac breuior. Quod totum, vt ipsemet Aristoteles inquit, desumitur ab

explicato illo principio; quoniam scilicet, quæ plus à centro distat linea, seu extremitas semidiametri, maiorem describit circumferentiam, quæ sanè cum magis ad rectam lineam accedat, facilius, ac velocius per ipsam fertur semidiameter, tanquam per viam magis connaturalem, vt ibidem explicuimus.

Illud autem, quod Aristoteles interposuit, nempe: Quod igitur motum pondus admouens, longitudo patitur ad longitudinem eadem est, ac dicere, eandem proportionem habere motricem potentiam ad pondus leuandum, quam habet eius longitudo, seu distantia à centro vectis ad longitudinem, seu distantiam ponderis ab eodem centro vbi est fulcimentum. Quare subiungit: Semper autem quanto ab hypomochlio, id est fulcimento, distabit magis, tanto facilius mouebit. Hæc ille, quæ postea exactius tradita sunt ab Archimede in suo primo libro æqueponderantium propositione sexta; & acutissimè probantur à Guido, Vbaldo & Marchionibus Montis in suis Mechanicis tractatu de libra, propositione sexta; ac de vecte propositione quarta. Demonstrant enim in æquilibrijs, tam vectis, quàm libra, ita se habere pondus ad pondus, vt brachium ad brachium ex commutata proportionem. Sit enim vectis, aut libra AB, suffulta, aut suspensa in C. Brachium autem CA sit, verbi



gratia vnus palmi. Brachium verò CB sit quatuor palmorum. Deinde appēdatur in A pōdus D, quod pōderet, vt quatuor e; & in B appen-

datur pondus E, ponderans vt vnus; ita vt ipsum pondus

E se

E se habeat ad pondus D eadem proportionē, qua brachium CA se habet ad brachium CB. Tunc quippe dicimus vectem, aut libram mansuram in æquilibrio propter cōmutatam proportionē. Etenim quadruplum ponderis D commutatur cum quadruplo longitudinis CB. Et pondus E compensatur à longitudine CA, quæ est quarta pars longitudinis CB: sicut pondus E est quarta pars ponderis D. Quare promiscue sumendo partes ipsas ponderantes siue ratione propriæ gravitatis, siue ratione distantie quam habent à fulcramento, quinque erunt partes ad leuam, & quinque ad dexteram, vtræq. vtrisque in pondere æquales, vel æquæ simul grauitantes: Siquidem nec pondus D, quod est vt quatuor: nec pondus E, quod est vt vnum, superare potest longitudinem CA, quæ pariter est vt vnum. Et sic vnum supra quatuor ex vtraque parte constituunt quinquenarium æquale ex commutata proportionē longitudinis, & gravitatis.

Cæterum cum Aristoteles totam vim sui argumenti sumpsit ex eo, quod ab æquali pondere celerius mouetur brachium, seu partem libræ; quæ magis à centro distenditur; causam ipsam cur exiguæ vires adhibito vecte magna moueant pondera constituere videtur in velocitate, quæ brachij longitudinem consequitur, vt ait Baldus. Quod quidem ipse minime approbat. Quæ enim, ait, velocitas in resistente? Stant autem vectis, & libra dum manent in æquilibrio, & nihilominus parua potentia ingens sustinet pondus.

Veruntamen si verba Aristotelis exactius pensentur non id significant, nec ille talem causam formaliter in maiori velocitate, sed in maiori gravitate, aut virtute constituit, quæ brachij maiorem longitudinem consequitur. Etenim cum dixit: *Quoniam autem ab æquali pondere celerius mouetur maior earum, quæ à centro sunt.* Idem per celerius ac per facilius intellexit. Quandoquidem paulò post id ipsum repetens, ait. *Semper autem quanto ab hypomochlio distabit magis, tanto facilius mouebit.* Et quidem in motu locali velocitas semper facilitatem inuoluit, aut supponit, ipsaq. maior

maior velocitas, ac facilitas motus, maiorem grauitatem, aut maiorem virtutem motiuam necessario indicat, vt palam est in motibus tam naturalibus, quàm violentis. Nam corpus quò grauius, eò velocius descendit, si non detineatur; & proiecta, eò velocius inter medium percurrunt, quo maiorem impulsus à proiiciente recipiunt. Ipsaq. animalia tanto progrediuntur velocius, citiusq. per incussionem impulsus grauiamouent, quanto maiorem virtutem motiuam adepti fuerit cum pari dispositione instrumentorum. Itaque in proposito, hoc ipso quod extremum longiorib. brachij velocius mouetur, magis grauitat in illo situ, seu maiorem indicat se ibi adipisci virtutem motiuam, maiusque pondus praualet sustinere etiam si non moueatur.

Quæstio Quarta.



VR ij, qui in naui medio sunt remiges, maximè nauem mouent? an quia remus vcllè est, hypomochlion autem fit scalmus? Stat enim ille: pondus verò mare est, quod propellit remus: vcllem autem mouens est ipse remex. Semper autem plus mouet ponderis, quantò magis ab hypomochlio distabit quicumque id mouet. Maior enim ita fit, quàm ex centro. Scalmus autem hypomochlion existens centrum est. In medio autem naui plurimum remi intus est: illa enim parte lassissima est naui: quare maior utrinque remi pars utrorumque naui parietum intrinsecus est. Mouetur autem naui, quoniam appellente ad mare remo, extremum illius, quod intus est, in ante promouetur: nauem verò scalmò alligatam simul promoueri contingit, quo remi extremum. Vbi enim plurimum maris diuidit remus, eò maximè propelli necesse est. Plurimum autem diuidit, ubi pars plurima remi à scalmò est. Et eam ob causam remiges qui in media sunt naui, mouent illam maximè. Maxima enim remi pars à scalmò in naui medio intus est.

C O M M E N T A R I V S.

SUppponit hic Aristoteles ab experientia, quod nos infra ratione probabimus, remiges in naus medio remigantes, magis nauem mouere, quàm si in prora, vel puppi remigarent, siue quàm alij, qui æquali conatu, ac virtute simul remigant in alio situ. Causamq. problematice sciscitando, vt solet præmittit, Remum vectem esse, scalum verò fulcimentum, & mare constitui pondus, quod per remum propellitur à remige tanquam à vectem mouente. Deinde sic argumentatur: Tanto magis mouens adhibito vecte pondus mouet, quanto magis extremum vectis vbi virtutem applicat distat à centro, seu fulcimento: At in medio naus, remi manubrium siue extremum, in quo virtus remigis applicatur, magis distat à scalmo, qui constituitur fulcimentum: Ergo magis pariter nauem mouebit remiger in illo situ, quàm in alio, vt in prora, vel puppi. Quod autem manubrium remi existentis in medio naus, magis distet à scalmo, probat ex eo, quòd naus in medio, latior est, quàm versus proram, vel puppim; proindeq. pars remi, quæ intus est, siue vbi manubrium, longior pariter est iuxta proportionem, quam habere debet cum situ.

Ex quo Aristoteles aliam quoque rationem desumit, quam cum priori (perobscure tamen) connectit: Quia nimirum adhuc foris pars remi in medio naus constituti, longior est iuxta proportionem prædictam, quæ ad commoditatem remigationis semper seruatur in usu. Longior autem remi pars externa, seu palmula, maiorem aquæ portionem diuidit, ac propellit, magisque propterea nauem promouet, quàm quæ breuior est ratione proportionis, ac situs. Quare obseruandum est, eam esse debitam remorum proportionem inter se, quæ est inter situm, & situm naus vbi constituuntur, ita vt vbi latior fuerit naus, ibi productiores remi constituantur ex vtraque parte ipsorum, quæ est vtrinque à scalmo. Hoc est tam intus ex parte manubrij, quàm foris ex par-

ex parte palmulæ. Et sic qui in medio sunt remi, eo quod ibi latissima sit nauis, longissimi sunt, maximèq. proinde nauim promouent; qui verò puppim versus, aliquantulum breuiiores, ac breuissimi, qui constituuntur ad proram, propter eandem rationem; ideoq. minus, ac minus proportionaliter nauem ipsam valent mouere, seu vniformiter difformiter.

Exploratissimum est hoc experimentum, ratioq. vt vidimus manifesta. Sed contra Aristotelem obijciunt Blancanus, & Baldus, quòd mare potius, quàm scalmus rationem habere videatur fulcimenti. Siquidem scalmus eo quod affixus sit naui, non manet, vt propriū est fulcimenti, sed fertur cum illa. Quare in ipsorum sententia, ita remus constituitur vectis, vt centrū habeat in extremitate palmulæ, qua mari adhæret, atque innititur tanquam fulcimento; pondus autē sit nauis, & potētia mouentis applicetur in manubrio.

Veruntamen non video cur mobilitas ac latio nauis cum scalmo, obstat quominus ipse scalmus habeat rationem fulcimenti, eaq. concedatur mari, quod non minus mouetur per impulsū acceptum à palmula. Quapropter vel neutrum horum dicendū est, habere posse rationem fulcimenti, hoc est nec mare, nec scalmum; vel dicendum est vtrumque illorum participare huiusmodi rationem, vt exempli gratia, si ponamus vectem AB interpositam esse inter



duos lapides CD, quorum C sit versus extremitatem B retrorsum, D verò circa medium ipsius vectis antrorsum; & potentia applicetur in extremitate A. Etenim si extremum A impellatur antrorsum versus E, D quidem simul feretur in F & C retrocedet in G, vt cuilibet experiri fas est. Quapropter nulla esset maior ratio cur potius lapis


lapis C. quàm lapis D constitueretur fulcimentum in hac latione vectis. Ideoque vtrumque aliquo modo, illam participare dicendum erit. Cum igitur obijcit Baldus, quod tunc Philosophi ratio procederet si stante naui immobili, remiges in ipso remigandi actu, mare pulsarent, quia tunc verè scalmus fieret fulcimentum, mare autem pondus. Respondetur retorquendo illi argumentum: quod tunc procederet ratio ab ipso adducta, si stante mare immobili sicut terra, remiges appulsa palmula, nauem scalmi alligatam, antrosum impellerent, vt cum Romani cōtra Carthaginenses nauales copias primo essent traducturi, ad remigium in arena exercebantur; quia tunc verè mare fieret fulcimentum, scalmus verò cum naui, pondus.

Quoniam verò tam mare, quàm scalinum diximus habere rationem fulcimenti aliquo modo, non autem simpliciter propter mobilitatem vtriusque; examinandum esset, quodnam ex his, minus moueatur, vt hoc potius quàm alterum, dicatur magis participare rationem fulcimenti. Sed fortasse difficile poterit hoc penitus determinari. Pendet enim, non modo à proportionem partium remi, nempe quomodo se habeat pars, quæ est à scalmi ad extremum manubrij ad eam, quæ est à scalmi ad extremum palmulæ; verùm etiam ab applicatione palmulæ in mare, vt si plus vel minus intro mittatur, maioremq. portionem aquæ depellat. Quandoquidem si profundè palmula immergatur, magnamq. portionem aquæ per illam remiger conetur depellere, tunc proculdubio, minus mouebitur aqua retrorsum, quàm nauis antrosum. Quod ex eo fit palam, nam si nauis in mare mediet inter duos scopulos, ad quos palmulæ possit pertingere, simili conatu remiges scopulos pulsando, ac aquam pulsare consueuerunt, magis profecto nauem ipsam mouebunt. Quod si alioquin palmulæ minimè immergantur; sed veluti solam superficiem aquæ depellant, certum etiam est, magis aquam illam depulsam totamq. ferè in spumam redactam abire, quam nauem vltius progredi, aut moueri.

Polyb. lib.
r. longe ante
med.

Tandem addit Baldus, falsum videri, quod asserit Aristoteles,

teles, eos qui in media naui sunt remiges, maximè nauim mouere, si per maximè denotet maximo spacio, aut velocius. Etenim (inquit) tardius mouent, & minori spacio, quod ita probat. Esto enim Remus AB, qui mari fulcitur



in B Scalmus remi, qui ad proram, puppimve C, qui in media naui D. Maior autem remi pars est à scalmo D ad A, quàm ipsius C ad A. Pellantur re-


mi, & stante ceu centro B; feratur ipsum A in E. Eodem igitur tempore C erit in F, & D in G; sed maius est spatium CF spatio DG: ergo vnica impulsione plus mouit scalmum, hoc est nauim, potentia ad puppim proramve remigans, quàm ea, quæ operatur in media naui. Hæc ille.

Sed hoc schemate nihil demonstratur contra Aristotelē. Nam si quid ex eo concluderetur, esset de motu circulari, quo naus duceretur circa punctum B per arcus CF & DG. Aristoteles autem loquitur de motu recto. Deinde non ex eo, quod punctum C eodem tempore maius spatium percurrat, quàm punctum D vtpotè magis distans à centro B, iccirco sequitur, magis mouere nauim remiges, qui ibi scalmum habent affixum. Etenim alia, per quam plura sunt puncta in ipsa naui, quæ maius adhuc spatium percurrunt, quàm C, tanquam à centro remotiora; in quibus tamen si constitueretur scalmus, minus nauem remiges valerent mouere, vt in cuspide puppis, vel proræ. Quare motus ipsius C, & cuiuslibet alterius puncti remotionis à centro, quamuis velocior sit, quàm motus ipsius D, procedere potest magis ab impulsu impresso in ipso D, quàm ab impulsu impresso in eodem C, & sic magis mouere nauim eos, qui in naui medio sunt remiges, etiam loquendo de motu circulari.

Rursus ex ipsa Baldi probatione, atque conclusione sequeretur, scalmum vnius remi, magis distare à scalmo alterius

rius post lationem nauis, quàm antea. Quod sic potest ex proprijs distinctius expositis ostendi. Sint duo remi ante motionem duæ


æquales parallelæ, nempe ADB in medio nauis; & ACB versus proram. Quorû manubriû sit A, palmula verò B. Sitque scalmus vnus in D, alterius verò in C, magis distans à B. Deinde post lationem cõstituantur iidem remi



ADB in EGB, & ACB in EFB, vtrorumque extremis, siue palmulis manentibus in eodem puncto B, & vtrorumque manubrijs æqualiter à priori loco distantibus per æquales arcus AE vtriusque remi. Scalmus verò D constituitur in G, & scalmus C in F; sitque maius spatium CF, quam DG, vt rectè Baldus assumebat.

Dico igitur punctum G magis distare à puncto F (quæ est distantia vnus scalmi ab altero post lationem) quàm punctum D distet à puncto C, quæ erat distantia eorundem ante motionem. Ducantur enim rectæ CD & FG signantes vtramque distantiam. Et à puncto D, vbi prius erat scalmus remi existentis in medio nauis, excutetur alia recta linea vsque ad G, vbi idem scalmus constituitur postmodum, atque super ipsa latera CD, & DG fiat parallelogrammum CDGH. Tunc quippe latus GH erit æquale lateri CD & latus GD æquale erit lateri HC, eo quod sint opposita, vt patet per 34. primi Euclidis. Quoniam
verò

verò spatium DG positum est minus, quam spatium CF, sequitur lineam CH pertingere non posse vsque ad punctum F, cum ipsa sit æqualis ad DG. Cumque ip-



sus extremum vbi H, sit pariter terminus lineæ, seu lateris GH, sequitur vltcrius, vt neque linea GH pertingere possit vsq; ad punctum F. Erit igitur maior linea GF quàm sit linea GH, & linea CD, quæ est illi æqualis, quod erat probandum.

Itè hinc manifestè apparet falsum quoq; esse, manubrium remi ad proram, vel puppim existentis, æquale spatium pertransire, ac manubrium alterius remi in nauis medio constituti, palmulis vtriusque remi in eodem situ, seu puncto manentibus, vt à Baldo assumebatur ad probandam suam conclusionem. Quod ita faciliè ostenditur ex hucusque demonstratis. Nam si eo tempore quo scalmus D fertur in G, scalmus C fertur in H ad æqualem distantiam, vt probatum est, vtique manubrium ipsius remi ad proram constituti, non erit in E, sed in I, vbi desinit recta ducta à centro B, per punctum H ad arcum AE. Cumque AI differat ab AE tanquam pars à toto, & vterque arcus AE sit alter alteri æqualis ex constructione, palam sit, maius spatium percurrere manubrium A remi ADB in medio nauis constituti, dum fertur vsque ad E, quàm manubrium alterius remi, quod fertur vsque ad I.

Præterea contra experientiam supponitur à Baldo, remi palmulam ceu centrum manere immotam in ipsa remigatione, qua nauis fertur antrorsum. Nam licet in vno casu, vt quando remi manubrium motu proprio circa scalmum nauigium per impulsum acceptum in anteriora progrediens æqualia spatia pertransierint, id verè possit contingere, vt optimè demonstrat Petrus Nonius proposit. 2. in sequen. problem. Aristotelis; nullo tamen modo potest verificari virtute eiusdem tantum remigationis, de qua est nobis sermo; sed virtute alterius etiam commotionis, aut impulsus, vt sequenti quæstione patebit. Quare nihil ex eo colligi potest in proposito contra Aristotelem.

Demum nec minus contra experientiam est, per appulsum palmulæ in B ad dexteram scilicet nauigij, scalmum D ferri in G, & scalmum C in F declinando totum ipsum nauigium dextrorsum per ipsos arcus DG, & CF. Siquidem oppositum de facto contingit, etiam si palmula vbi B in scopulum appellat, vel immoto alteri corpori adhæreat. Videmus enim per impulsum remigum incussum in parte dextera scalmum, ac nauigium moueri ad sinistram. Et ratio ipsa suadet, quia cum nauis ita supernatet in aqua, vt quoquoersuta dimoueri valeat, quando nouam positionem acquirit, per impulsum in vno tantum latere acceptum necessariò intelligitur conuerti circa centrum suæ gravitatis. Illisa igitur palmula in aquam in parte dextera, ab eaq. ob resistantiam repulsa, non secus ac semidiametri extremum, nauim tanquam circulum ad sinistram mouebit. Idem enim efficit aqua remigationi obsistens, ac si quis palmulam repelleret in contrariam partem. Cumque talis remigatio fiat per modum circuli circa scalmum procedendo dextrorsum, sequitur repulsum accipi, ac fieri per oppositum procedendo sinistrorsum. Quamobrem ad hoc, vt nauigium rectà antrorsum procedat, ex vtraque parte simul remiges conantur impellere, vt ex vtroque motu circulari, & contrario, resultet vnus rectus, ac mixtus. Vt cer-
nere est in hac figura, in qua sit remus AB, cuius manu-

brium A; palmula B, scalmus. verò C; ac spatium,



quod percurrit palmula per motum proprium ipsius remi circa scalmum, tanquā circa centrum sit arcus BD. Dico igitur per impulsū incussū in arcu BD palmulam necessariò re-

PELLI in oppositum per arcum BE, ac per consequens virtute huiusmodi remigationis, scalmum C, non ferri in F, sed in G; ita vt arcus. CG. respondeat ipsi BE: Alioquin repulsus non opponeretur impulsui. Iam ergo per impulsū incussū ex parte dextera, scalmus C, & vnā cum illo nauigium mouebitur ad sinistram. Quod cum similiter verificetur è contra, vt per impetum incussū ex parte sinistra, nauigium moueatur ad dexteram: hinc fit, vt ex contrarijs motionibus. vtrinque procedentibus. componatur vnus motus rectus, quo nauigium fertur antrorsum, vt per lineam mediam, ac rectam CH. Quod valde diuersum est ab eo, quod assumebatur à Baldo.

Quæstio Quinta.



CVR paruum existens gubernaculum, & in extremo nauigio. tantas habet vires, vt ab exiguo remone: & ab hominis vnus viribus. alioqui modicè videntis, magna nauigiorum moueantur moles? An quoniam gubernaculum vectis est, onus autem mare, gubernator verò mouens est? Non autem secundum latitudinem, veluti remus, mare accipit gubernaculum: non enim in ante nauigium mouet, sed ipsum commotum mare accipiens inclinat.

nat obliquè. Quoniam enim pondus est mare, contrario inni-
xum modo naucm inclinat. Hypomochlion enim in contra-
rium versatur: mare verò anteriùs, & illud exterius: illud
autem sequitur navis, quoniam illi est alligata. Et remus
quidem secundum latitudinem onus propellens, & ab eodem
repulsus, in rectum propellit: gubernaculum autem ut obli-
quum iacet, hinc inde in obliquum motionem facit. In ex-
tremo autem, & non in medio iacet, quoniam mouenti facilli-
mum est ab extremo motum mouere. Prima enim pars celer-
rimè fertur, & quoniam quemadmodum in ijs, quæ ferun-
tur, in fine deficit latio, sic ipsius continui, in fine imbecillis-
sima est latio. Imbecillissima autem ad expellendum est fa-
cilis. Propter hæc igitur in puppi gubernaculum ponitur:
nec minus, quoniam parua ibi motione facta, multò maius
interuallum fit in ultimo. Quia equalis angulus semper
maiolem spectat, tantuq. magis, quando maiores fuerint il-
la, quæ continent. Ex ijs etiam manifestum est, quam ob
causam magis in contrarium procedit nauigium, quàm re-
mi ipsius palmula: eadem magnitudo ijsdem mota viribus,
in aère plus, quàm in aqua progreditur. Sit enim AB remus,
C verò scalmus. A autem in nauigio sit remi principium, B
verò in mari palmula. Si igitur A ubi D translatu est, nò erit
B ubi E; equalis enim BE ipsi AD; æquale igitur translatum
erit, sed erat minus. Erit igitur ubi est F, minor enim BF
ipsa AD, quare ipsa GF, ipsa DG. Similes enim sunt trian-
guli. Stans autem erit medium, ubi est C. In contrarium
enim ipsi quod in mari est, extremo videlicet B procedit, ubi
extremum in nauigio est A. Non procederet autem ubi est
D, nisi commoueretur nauigium, & ab eo transferretur, ubi
remi est principium. Id ipsum etiam facit gubernaculum, ni-
si quod (ut dictum est retrò) nihil nauigio ad id, quod in ante
est, confert, sed solum puppim in obliquum pellit, ubicumque
fuerit: in contrarium enim & modo vergit prora. Vbi igitur
applicatum est gubernaculum, id oportet rei mota ceu quoddam
intelligere medium, & quemadmodum scalmus remo. Me-
dium autem procedit secundum quod gubernaculum trans-

fertur. Siquidem introrsus agit, & puppis eò transfertur, prora verò ad contrarium vergit. In eodem enim existente prora, totum transfertur nauigium.

COMMENTARIUS.

Celebris est hæc quæstio tum propter communem admirationem ortam ex paruitate gubernaculi, ac temonis respectu magnæ molis nauigij, quæ illius beneficio circumfertur: tum propter difficultatem, quæ circa solutionem eiusdem quæstionis, ac doctrinam Philo-
sophi hic sese offert. Quare vt luculentius in expositione procedamus, distinguendum prius nobis erit inter ipsum temonem, seu clauum, & gubernaculum, quamuis ambo ad vnicum pertineant instrumentum, ac sæpe vnum pro alio vsurpetur. Temonem itaque in præsentī vocamus cum Aristotele alam illam ligneam, seu tabulam ad alæ veluti similitudinem efformatam, quæ duplici cardine liberè in dorso puppis affigitur, mariq. ex parte immergitur, & pro opportunitate huc atque illuc ad directionem nauis conuertitur. Gubernaculum verò appellamus ansam, qua temo ipse manu cietur; cuius videlicet alterum extremum lato foramine excipit caput temonis; alterum intra nauim se extendit tanquam manubrium ad vsum Gubernatoris.

Deinde duplex consideranda erit motio nauis mediante huiuscemodi instrumento, quod ex gubernaculo, ac temone construitur. Vna est, quæ à gubernatore procedit per motum ipsius gubernaculi, ac temonis, siue nauis aliunde etiam moueatur, siue quiescat. Quandoquidem dum temo, qui rectà manebat mouetur in transuersum puta ad dexteram, vel sinistram, necessariò, maris portionē propellit versus eam partem, in quam inclinatur, necessariòq. ab ea propter resistantiam repellitur in contrarium: & sic temo cum puppi, cui est affixus, repulso accepto in dextera, mouebitur ad sinistram, vel è conuerso. Non enim aliter se habet gubernaculum simul cum temone in hac motione, quàm remus constitutus in cuspide puppis per longum iuxta re-

ctitu.

ditudinem carinæ, ita ut scalmus sit in ipsa cuspide, manubrium intra puppim, & palmula foris mari immerfa. Quia nimirum eodem pacto si remi palmula mare propelleret ad dexteram, ab eo utique per resistentiam repulsa, simul cum toto remo, scalmus, ac puppi pergeret ad sinistram prora manente immota, vel quasi immota. Et hoc pacto magna nauigia absque remis solo remone conuerti solent in portu.

Altera verò motio naui, quæ fit mediante gubernaculo, ac remone, est illa, quæ non procedit ab ipso gubernatore, tanquam à mouente, sed tanquam à sustinente remonem in obliqua positione ad excipiendum impetum maris occurrentis, quo naui ipsa aliquantulum inclinatur. Oblique namque constituto remone, nauigioq. ad anteriora progrediente, necessariò mare obuians remonem in ea parte, quæ transuersum est, offendit, ipsumq. repellit. Per quem repulsum remo ipse cum recta in contrarium ferri non possit, videlicet retrorsum, eo quod puppi sit affixus procedenti antrotrorsum, oblique saltem ab itinere dimouetur, & cum eo rota naui à latere aliquantulum circumuertitur, ut mox infra latius explicabitur. Illud interim adnotando, eandem esse rationem de aqua in contrarium fluente, remonemque cum naui stantem feriente, ac de aqua stante, inquam remo oblique constitutus dum fertur cum naui offendet. Non minus enim vim patitur solidum manens à fluido currente, quod excipit, ut velum à vento, quàm solidum currens à fluido manente; ut verticilla ex papiro, quæ dum gestantur à pueris currentibus, circumaguntur ab aere quiescente, vel tenuiter obuiente.


His ergo prænotatis facilè vim solutionis Aristotelis in hac quæstione percipiemus. Ait enim ex eo gubernaculum, ac remonem tantas vires habere in motione naui, quod utrunque se habeat tanquam vestis, mare autem tanquam onus, & gubernator, tanquam potentia. Etenim si loquamur de prima motione supra explicata, non minus in illa habet rationem vestis gubernaculum cum remone, quàm

remus; Nec minus constituitur mouens gubernator, quàm remiger, vt per se patet. Si verò loquamur de secunda motione, adhuc idem instrumentum in illa constituitur vectis ad sustinendum impetum maris; innixum scilicet fulcimentum, seu cardini, quo puppi coniungitur: Non secus, ac quodlibet lignum alteri quomodolibet innixum ad sustinendum onus impositum. Gubernator autem constituitur potentia, nam adhibendo gubernaculum, temonem ipsum sustentat obliquum contra fluctus maris, veluti qui veste pondus quodcumque sustinet, etiam si non moueatur. Mare denique in vtraque motione constituitur onus; quoniam vel est id quod propellitur, vel id quod sustinetur per temonem, transuersum ne directè in oppositum fluat.

Quamobrem immeritò nonnulli Aristotelem redarguunt, dicentes, mare habere potius rationem potentia mouentis totam puppim cum temone; Nam sicut saxum, vestem cui imponitur semper premit appetendo descensum ad ima, & tamen est onus respectu potentia, quæ vestem sustinet in illo situ, ita mare, licet successiue temonem impellat, rationem habet oneris respectu potentia manutinentis temonem in illo situ contra ictus eiusdem maris. Quod si ipse temo cum puppi, cui adhæret verè simul moueatur à mare, per accidens est, proceditq. à fluxibilitate aquæ, in qua diu permanere non potest puppis omnino immota ad sustinendum in suo cardine ipsum temonem. Motus enim fulcimenti per accidens se habet ad motum, vel operationem propriam vectis; vt motus scalmi cum naui, cui est affixus ad motionem remi, qui tanquam vectis fulcitur in illo; vel motus cuiuslibet fulcimenti, quod asportatur cum curru, ad motionem vectis eidem innixi. Vnde potentia respectu vectis dicitur illa, quæ vestem adhibet, onus mouendo, vel sustentando, non autem illa, quæ mouet fulcimentum. Quare tunc rectè mare diceretur potentia, cum mediante impetu incusso in temonem, ipso tanquam veste adhibito, moueret manū gubernatoris. Cū igitur contra accidar, nempe, vt potius gubernator adhibito temone mare ad latus depellat,
vel

vel saltē excipiat resistendo, iure & quidē optimo gubernator ab Aristotele constituitur potentia; mare aut em onus.

Sic autem explicato principio, ac instrumento vtriusque motionis, explicat Aristoteles modum, quo procedit secunda motio à nobis proposita, quæ potissima est, & maioris longè momenti quam prima: aitq. remonem (quem cum gubernaculo sæpè confundit) non accipere mare secundum latitudinem nauis, seu quod ad latera nauis est, eo modo quo accipit remus, depellendo illud retrorsum, vt per repulsum inde acceptum, nauigium feratur antrorsum, quia nihil temo nauigio confert, quo ad motum antrorsum, vt in fine etiam quæstionis idem Philosophus animaduertit: Sed accipere mare commotum, quod illi obuiat secundum longitudinem nauis à prora in puppim. Nam qua parte temo vergit foris, mariq. eius ala obuertitur ad alterum latus nauigij, mare secundum longitudinem nauis ei obuians excipit intra angulū, quem cum naui constituit. Excipiendo autem illud vim patitur in contrariū, tollereturq. nisi fulciretur in cardine. Cum igitur nec auferri possit à puppi, nec retrocedere in directū cōtra cursum nauigij, hinc fit, vt cedendo saltē in parte quoad positionem, quā prius habebat, nauem ipsā inclinet obliquē; siquidem dimoto vno latere anguli à sua positione, alterū dimoueri necesse est, cuspidē manente in eodem situ. Quod sic potest amplius explicari. Esto nauis AB; cuius puppis A, prora B, temo verò AC obliquē constitutus ad sinistram, ac suffultus in A, vbi eius cardo ad puppim positus est, & vbi angulū efficiat cū lōgitudine nauis, qui sit BAC.



Deinde mare obuians incidat in ipsam AC. Tunc dicimus

punctum C fore, vt transferatur versus D; punctum verò B, quod proram designat, versus E, cardine manente impeto vbi A. Etenim cum mare solum impellat temonem in quantum oblique constituitur, & à naui rectitudine deciat, efficacius impellit extremum vbi C, quod magis elongatur ab ea, quam reliquas partes, quæ minus, ac minus distant. Proindeq; remissius, ac remissius agit in illas vniiformiter difformiter vsque ad punctum A, vbi sicut terminatur distantia, ac diuatiō, ita etiam deficit impulsus. Ex quo sequitur punctum A, per se non moueri ad talem impulsū, sed tantum lineam AC circa illud tanquam semidiametrum circa centrum conuerti, ac declinare versus D. Cumque longitudo naui angulum cum ipsa latitudine temonis efficiat, sequitur vltcrius, vt translato ipso latere AC, in AD, simul transferatur AB in AE, quod est nauem declinare à sua rectitudine, ad obliquam positionem temonis mare intra angulum excipienris. Diximus punctum A per se non moueri ob talem impulsū, nam per accidens, nempe propter maris inconstantiam, ac fluxibilitatem etiam ipsum puppis extremum aliquantulum dimouetur cum cardine, quo remo fulcitur, sicut quodlibet fulcimentum ad motum vectis ob inconstantiam soli.

Contrario autem modo temonem innixum, ait Aristoteles nauem inclinare, quoniam temo rationem habet vectis, vt dictum est cardini innixi tanquam fulcimento, mare autem se habet, vt onus: At omnis vectis mediat inter fulcimentum, & onus, nec aliter quam fulcimento tanquam centro inharendo, onus per modum circuli in contrarium mouet, aut certè sustinet in tali positione; Ergo dum temo sustinet mare cardini innixus tanquam fulcimento, & angulum cum naui efficit ad excipiendum mare interius, cardo manebit exterius tanquam ex alia parte ipsius vectis illi contraria, ad quam facit nauem inclinare.

Ad hæc Aristoteles rationem quandam affert cur in extremo nauigij, & non in medio temo, seu clauus locetur, aitq; eam esse, quoniam id quod fertur, facilius ab incepto


itinere, seu à rectitudine sui motus declinat, cum in postrema eius parte ex latere diuersum aliquem impulsu accepit, quàm si accipiat in alia parte anteriori. Prima enim seu anterior pars lati cōtinui, intensiori impetu fertur, quàm partes subsequentes, validiusq. propterea in suo motu persistit, contrarijsq. omnibus obsistit. E contra verò vltima pars, tanquam remissiores vim consecuta; imbecillius mouetur, ac facilius cædit. Id quod maximè in proiectis obseruare licebit. Impetus namque in ea à proijciente impressus, semper maior est in eorum parte anteriori, quàm in sequentibus: seu illa pars eorum constituitur anterior, cæterâsq. in latione præcedit, in qua maior impetus fuerit impressus. Vnde cum densitas materiæ, aut grauitas subiecti, intensioris impetus capax redat ipsum proiectum, hinc fit, vt etiam si in principio motus pars grauior, vel densior fuerit posterior in progressu euadat anterior. Quod apertè in proiectione baculi experimur quando antepositur extremum leuius, & postponitur grauius; nam ex se ipsa extrema permutantur in aere, priusq. grauius quàm leuius quo tendebant pertingit. Certum ergo relinquitur, vt quo anteriore fuerint partes ipsis lati continui, eo validius ferantur tanquam maiorem adeptæ, aut sortitæ imperum, quo verò posteriores, eo imbecillius, vnde etiam facilius vincantur. Hoc ipsum itaque applicando in latione nauis, ait Aristoteles, quod cum nauis rectâ fertur antrorsum, facilius est illam à cursu deflectere puppin à latere impellendo, quàm aliam eiusdem nauis partem mediam, aut proram. Siquidem in puppi tanquam in postrema lati corporis parte imbecillissima virtus est imperus impressi, in eaq. terminatur, ac deficit latio. Quare appositè clauus in puppi locatur ad excipiendo ibi maris impulsus, vt facilius à rectitudine itineris nauis ipsa deflectat.

Quæ profectò Aristotelis doctrina, eiusq. applicatio, sano modo intelligenda est. Nam licet quando nauigia unico velo in prora locato feruntur, præcipuus impetus per alium circa ipsam proram incutiatur; nihilominus quando


remis, vel pluribus velis nauigare contingit, puppisq. pariter obtinet suum; res aliter se habet, cum pari, aut maiori impetu, tunc puppis quàm prora feratur, quippe quæ illum refundere etiam valeat vterius in ipsam proram. Id quod patet cum ex maiori velocitate, qua mouetur nauigium, ac ipsa prora, adhibitis etiam velis, aut remis in puppi, seu prope illam; tum ex maiori conatu, quem adhibent remiges, quò magis prope puppim remigauerint; vt hinc in triremibus ad priores singulos remos promouendos constituantur remiges quini, aut seni, ad reliquos verò, proram versus procedendo, quaterni, ac tandem terni. Vbi autem maior conatus adhibetur, ibi maior imprimitur impetus. Rursumque obseruandum est impetum, quo per velificationem feruntur nauigia, non imprimi in sola parte, quam antrorsum promouet malus, sed in ijs quoque partibus vbi funes, quibus vela retrouersum tenduntur alligari solent. Etenim magna est vis, qua per funes, qui dicuntur opiferi, partes naui vbi prope puppim illi colligantur ab antennæ cornibus trahuntur. Vrgent enim antrorsum ipsa cornua non minus, ac sæpè magis quàm malus; nec alibi eorum impetus recipi potest, quàm vbi ipsi funes opiferi alligantur. Similiaq. dici possunt de funibus, qui dicuntur propedes, quique veli inferiora retrouersum pariter tendentes in posteriori parte naui ita colligantur, vt repentino superueniente turbine, vel quando opus fuerit relaxari protinus possint: Nam per hos quoque funes maximè partes ipsæ posteriores naui trahuntur. Ex quibus apparet non minus in puppi, quàm in prora impetum iugiter imprimi ad procedendum antrorsum. Quare Aristotelis doctrina de ijs, quæ feruntur, & in fine imbecillam obtinent lationem, non semper applicari potest in latione naui, vt ex ipso retulimus.

Aliam deinde, ac solidiorem rationem eiusdem situationis remonis Aristoteles subnectit. Quia nimirum parua motione per remonem facta in eo situ, multo maius interual- lum prora obliquè declinando percurrit, vt patere potest ex præcedenti figura tantoq. magis, quanto longior fuerit
ipsa

ipsa naus. Etenim idem, vel æqualis angulus, quo inter longiores lineas continetur, eo maiorem basim subten-
dit, seu spectat, vt constare etiam potest per quartam propo-
sitionem sexti Euclidis. Cum igitur longitudo naus consi-
derata in priori situ, deinde in posteriori post motionē cir-
cularē, immota ferè manente cuspide puppis, angulū quen-
dam efficiat, vt BAE, cuius basis EB: tanto maiorem ipsa
prora veluti basim transmittet ad motionem temonis quan-
to longior fuerit ipsa naus. Quod quippe non contingeret
si alibi temo constitutus
fuisset, indeq. talis motio
initium sumeret. Quam-
obrem consentanea idem
Aristoteles protulit lib. de
motu animal. cap. 5. cum
ad explicandum quomo-
do parua permutatio, quæ
fit in principio, magnas, &
multas efficiat differentias
procul; exemplum adhi-
bens ait, vt temone pau-
lulum quid transposito,
multa proræ sit transpo-
sitisio.



Ex ijs autem ad aliam quæstionem valde implexam.
Aristoteles pertransit, cuius solutionem hic inserit, vt po-
stea ex ea melius præfata confirmet. Ait igitur ex ijs etiam
manifestum esse, quam ob causam magis procedat naui-
gium antrorsum, quàm ipsius remi palinula mare reiiciens
cardat retrorsum. Eadem enim (inquit) magnitudo, ijs-
dem mota viribus, plus in aere progreditur, quàm in aqua;
eo scilicet, quod minorem in aere inueniat resistentiam.
Quod ipse quamuis obscurè propter defectum quorundam
verborum, ac falsitatem characterum, quibus figuram pro-
ponit, sic ferè explicat in proposito. Sit remus AB, sca-
mus



mus verò C, remi manubrium A, palmula in mari B. Si igitur manubrium A per aerem transferatur in D; utique palmula B transferri non poterit per aquam in E. Quandoquidem non posset cum maiori resistentia æquale spatium pertransire, quemadmodum est spatium BE ipsi AD. Quare palmula B retrocedet tantum vsque ad F, eritq. remus in DF, vbi spatium retrocessionis palmulæ constituitur minus. Nam si considerentur duo trianguli, AGD, & BGF; erunt similes ex quarta propositione sexti, ac propterea latera vnus, lateribus alterius erunt proportionalia: Cumque latus GF minus sit latere GD, etiam latus BF, minus erit latere AD.

Addit præterea Aristoteles, quod inter istos duos motus contrarios id quod stabit, seu manebit, erit medium punctum vbi C, nempe vbi constituitur scalmus circa quem remus conuertitur. Siquidem verè respectu manubrij, ac palmulæ, tanquam extremorum diametri circulariter ductæ, scalmus ipse tanquam cætrum manebit. Quare scalmus C nunquam procederet ad partes D, nempe antrorsum, nisi commoueretur nauigium, cui est affixus, & eo transferretur, vbi remi est principium, cum semper nauigium per impulsus in ipsa remigatione acceptum, sequatur motum principij mouentis nempe manubrij à quo fertur antrorsum, & sic imposito per motum manubrij ab A vsque ad D, scalmus, qui erat in C, constituetur in H, palmula retrocedente à B vsque ad F.

Hæc paucis mutatis, vel adiunctis Aristoteles profert, quæ sanè licet probent maius esse spatium AD, quod manubrium


manubrium conficit antrorsum; quam spatium BF, quod palmula transmittit retrorsum; non tamen probant prout opus erat, spatium quoque CH, quod à scalmo cum naui percurritur, maius esse, quàm spatium, quod in contrarium præterit palmula, ut BF, vel aliud simile. Quare occasionem nobis tribuunt explicandi, num semper hoc accidat, ut magis in anteriora progrediatur nauigium, quàm ipsius remi palmula retrocedat, an verò quandoque tantum, & quâ ratione fiat.

Dicendum ergo est, aliquâdo nauigiū in anteriōra moueri absque eo, quod palmula retrocedat, aliquando verò tantum prouehi nauigium, quantum palmula retrocesserit; sed ut plurimum, magis procedi nauigium, quàm palmula in contrarium cædat.

Prima pars huius assertionis in duobus casibus verificatur. Prior est, cum æquale spatium pertransierit nauigium, ac remi manubrium motu proprio, quo scilicet circa scalmum conuertitur: tunc eorum palmula manet immota. Nam si exempli gratia nauigium pertranseat palmum spatij, manubrium verò simul suo motu proprio alterum, iam in fine ipsius remigationis ipsum manubrium per duos palmos distabit à loco priori vnde discesserat. At palmula cum per motum quidem nauigij antèius translata esset ad spatium vnus palmi, per motum verò manubrij simul retrocessisset ad alium palmum (siquidem tantum retrocedit palmula quantum antecedit manubrium motu proprio, supposito, quod æquè distent à scalmo) sequitur verè ac simpliciter ipsam palmulam dimotam non fuisse. Sicut homo qui pari passu graditur contra eursum nauigij à prora in puppim, simpliciter non mouetur, quia semper eandem seruat distantiam à punctis fixis, ut à terra, vel cælo.

Notandum tamen est in casu descripto, nauigium non moueri sola virtute eiusdem remigationis. Nam spatium, quod percurrit virtute illius, nec computari posset ultra illud, quod simul percurrit manubrium motu proprio; nec inquam esset illi æquale. Semper enim plus mouetur manubrium.

mibrium; quam scalmus eodem tempore ad impullum illius; naus autem mouetur ad motum scalmi. Quod clarius patebit in subiecta figura; in qua sit remus AB, cuius manubrium A, pal-



nubrium A, pal-
mula B, scalmus
verò sit in pun-
cto medio vbi C.

Deinde promo-
ueatur manubrium

A motu proprio
vsque ad D; palmula manente in B. Scalmus verò C,
eodem tempore pertranseat spatium CE, quod sit æquale
ipfi AD; subtendanturq. æquales rectæ ipsis arcubus AD,
& CE, & constituatur parallelogrammum DECA, sup-
per ipsum AB. Tunc dico scalmum C vnà cum nauigio
translatum non fuisse vsque ad E virtute sola eiusdem re-
migationis, seu proprii motus manubrij ab A vsque ad D,
palmula manente in B. Siquidem hoc solo motu remus
AB constitueretur in recta DB, cuius punctum medium
vbi scalmus positus est esset in F, non autem in E, qua
pertransire non potest recta DB. Coincideret enim cum
linea DE parallela ipsi AC; proindeq. per 35. definitio-
nem primi nunquam concurreret cum illa in punctum B,
vbi supponitur palmula. Cum autem linea CF minor sit,
quàm CE, vel AD, quæ sunt æquales: (Nam respectu
vnius se habet tanquam pars ad totum, respectu verò alte-
rius, constituitur basis anguli B, quæ per quartam propo-
sitionem sexti minor est quam basis AD, quæ longioribus
lineis continentibus subtenditur eidem angulo B) sequitur
per motum, quo manubrium ab A transfertur in D, scalmum cum naui pertransire non posse ad æquale spatium
vsque ad E. Quod si illuc vsque pertingat, id certè contingere debet virtute alterius impulsus aliunde incussi in ipsū nauigium. Qua virtute eodē tempore simul ac manubrium motu proprio peruenisset vsque ad D, reperiatur in G; & scalmus qui esset in F, pertingat vsque ad E; quod est
vtrum-

utrumque, duplum spatium percurrere respectu illius, quod virtute solius praedictae remigationis percurrisset.

Posterior verò casus, in quo verificatur palmulam ad motum antrorsum nauigij, nō retrocedere, est cum celerius feratur nauigium, quàm remi manubrium. Siquidē cum in tantum palmula possit retrocedere, inquantum manubrium, motu proprio in anteriora amplius progreditur quàm nauigium, si celerius feratur nauigium quàm manubrium, maiusque proinde spatium percurrat, palmula nullo modo poterit retrocedere. Etenim posito, quod manubrium motu proprio decurrat spatium bipalmare, per totidem palmos palmula retrocederet, si nauigium maneret immotum: At si simul nauigium percurrat spatium quadripalmare, nihil palmula retrocedet. Nam quo tempore retrocederet vnū, duplum progrediretur in contrarium.

Secunda verò pars conclusionis, videlicet tantum quandoq. palmulam retrocedere, quātum prouehitur nauigium; ex eo probatur. Nam si remi manubrium motu proprio, duplum confecerit spatium, quam nauigium; vt verbi gratia, quadripalmare respectu bipalmaris, palmula quidem per totidem spatij palmos retrocessisset, nisi obstarēt motus nauigij in contrarium: At non obstat, nisi per dimidium, nempe secundum spatium bipalmare, quod certē nauigium simul cum toto remo in anteriora percurrit: ergo per æquale spatium bipalmare palmula retrocedet.


Tertia denique assertionis pars, nempe magis, vt plurimum progredi nauigium, quàm palmulam in contrarium, ex dictis ferè ostenditur apertissimè. Quia licet maius spatium decurrat remi manubrium, quàm nauigium, quando ipsum nauigium mouetur solum in virtute eiusdem remigationis, vt frequentius accidit: rarò tamen excessus ad dimidium videtur pertingere, ita vt manubrium motu proprio duplum conficiat spatium, quàm nauigium. Cum autem huiusmodi excessus ad dimidium non pertingit, neque palmula per æquale spatium retrocedet, sed minus. Vnde si manubrium progrediatur vt tria; nauigium verò vt duo, palmula

mula retrocedet vt vnum : tantum scilicet quantum est spatium , quo excedit illud , quod conficitur per motum contrarium .

Quæ omnia Geometricè atque exactius constare possunt ex his , quæ Petrus Nonius acutissimè demonstrat in sua Annotatione super hunc ipsum locum Aristotelis . Quamuis non rectè videatur supponere , ipsum Philosophum , vniuersaliter assumpsisse tantum spatium conficere nauigium , quantum remi manubrium . Fortasse propter illa verba ipsius Philosophi : Non procederet autem vbi ex D , nisi commoueretur nauigium , & eò transferretur , vbi remi est principium . Quæ tamen verba in diuersum , ac veriorè prolata sunt sensum , vt supra exposuimus . Solum enim per ea intendit Philosophus , quod non præcederet scalmus antrorsum ad partes D , quo tantum peruenit manubrium A ; nisi commoueretur nauigium versus eandem partem , sequendo remi principium , à quo trahitur , vel à quo illuc fuit impulsus .

His tandem ita constitutis de motione remi , applicando Aristoteles eandem obseruationem , non absimile esse docet , quod contingit in motione gubernaculi , ac temonis , vt scilicet sicut scalmus , qui constituitur medium inter extrema ipsius remi , quæ mouentur in contrarium , illuc transfertur vbi remi est principium , nempe antrorsum , quo remi manubrium pergit , ac nauem propellit : ita locus vbi applicatur gubernaculum , ac primo attingit temonem (qui certè locus est in linea cadenti , qua temo puppi adhæret in cuspide , & vbi constituitur etiam cardo) cum se habeat tanquam medium inter duo extrema , quæ mouentur in contrarium , videlicet manubrium gubernaculi , & alam temonis , qua mare propellitur , illuc intelligitur transferri , quo ipsum gubernaculi manubrium erat . Quemadmodum enim scalmus , temo , ait Aristoteles , nempe secundum prædictam lineam circa quam quasi immotam , conuertitur latitudo ipsius temonis ex vna parte , & gubernaculi manubrium ex alia , vt patet in hac prima figura ; in qua cadens


AB, lineã ostendit circa cuius principium gubernaculum applicatur, ac primo attingit remonem, quæ lineæ in motione gubernaculi manet immota, sicut scalmus in motione remi. Pars verò AC signat faciem dexteram remonis; & AD manubrium gubernaculi. Quod si extremum manubrij D, intelligatur transferri in E, vt cernere est in secunda figura: tunc ait Aristoteles, illuc transferri etiam centrum A.



Nam D translato in E, simul C transferretur in F; ac per impulsus acceptum in latitudine AF necessariò A transferri deberet ad partes G. Cumque simul nauigium, cui temo est alligatus, procedat antrorsum, ipsum A non constitueretur in G, sed in E, vbi prius erat manubrium gubernaculi. Quare gubernaculum nihil nauigio ad id, quod in ante progredi est, conferre ait Aristoteles, sed solum puppim in obliquum pellere, aliquantulum scilicet ad latus, qua parua motione puppis, pro-
ra in contrarium vergit, nempe ad latus oppositum, vt ipsemet Philosophus docet, & considerare licebit in hac

declinaret in I; Quare nauis à situ AD constituta in EI, eandem quippe seruaret positionem, ac directionem, translata tamen esset inferius versus partem vento oppositam, sicque ulterius incedendo quamuis ab initio destinatum sibi locum per proram inspiceret, illuc tamen peruenire nequiret, nisi altius, seu magis ad partem vnde ventus valide spirat, proram direxerit, vt spatium, quod coacta declinatione deperdit, compensetur anticipata situs positione, ac directione.

Demum illud, quod Aristoteles vltimo loco adiecit. In eodem existente prora, totum transferri nauigium, (nisi librariorum error irrepserit, vt potius consequenter ad superius dicta legendum sit, in eodem existente puppi, eo quod parua eius dimotio pro nihilo reputetur) ne cum doctrina eiusdem Philosophi haecenus tradita pugnet, intelligendum est, tum si quando per motum solius temonis tanquam remi in cuspide puppis, tota nauis conuerteretur, vt explicuimus in principio: tum etiam quando idipsum contingit ad obliquam tantummodo positionem temonis contra fluctus aduenientes, posito scilicet quod nauigium, nec velis, nec remis, nec alio pacto feratur. Etenim si temo per sui conuersionem, vel obliquam positionem fluctus maris à dextris excipiat, absque dubio puppis ad sinistram declinabit, prora manente ferè immota, eo quod impetus obliquè sit impressus, & illuc vsque pertingere nequeat, vel ob suam imbecillitatem ibi tandem languescat. Quod facilè contemplari est in subiecta, quam delineauimus nauicula, cuius linea AB refert gubernaculum cum temone affixo in ipsa cuspide puppis vbi C, ac prora constituitur in G. Nam dato quod extremum temonis B, mare dextrorsum excipiens, aut propellens transferatur in D per motum gubernaculi ab A in E, vtique cuspis puppis, quæ est in C transferetur sinistrorsum vnà cum tota nauicula versus F, prora ipsa in eodem puncto manente, vel parum inde dimota, vt vsque ad punctum H; ita vt nauicula, quæ erat



in CG, constituatur in FG, vel in FH. Licet hoc non semper verificetur cum sapius impetus per remonem incussus à mare in huiusmodi casu superare, ac transferre nequeat centrum grauitatis totius nauis, quod est circa medium illius, proindeq. tota longitudo nauis conuerti non possit tanquam semidiameter circa terminum proraë, tanquam circa centrum, sed potius centrum huius conuersionis constituatur in ipso centro grauitatis totius nauis, vel in alio puncto lineæ per ipsum ad centrum mundi cadentis.

In prædictis ergo casibus, & cum explicata limitatione loquendo de nauigio, quod nullo pacto fertur antrorsum intelligitur verificari, quod docuit Aristoteles. In eodem existente prora, totum transferri nauigium; Alioquin si sermo fuisset de nauigio, quod plenis velis, aut remis mare transmittit, verificari certè non possèt; cum talis ac tanta sit vis eiusdem cursus, quo recta in anteriora citissimè fertur, vt non sinat ipsam puppim per occursum maris, quod incidit in temonem à suo recto tramite admodum saltem diuerti, sicut à puncto suæ quietis facilè ipsa dimouetur cum nauis quiescit. Licet enim promotò semel antrorsum nauigio, temo per obliquam sui constitutionem, & immediatum repulsum quem patitur, omnino resistere nequeat occurrentibus fluctibus, cogaturq. moueri, velut in gyrum circa ipsius puppis extremum; vim tamen quam patitur transfundit in longitudinem nauis, tanquam in alterum latus, cum quo efficit angulum, vt in principio cum sua figura expressimus: Vnde cum non solum ad motum vnus lateris in angulo, moueatur alterum, sed facilius fit, vtrumque latus circulariter moueri, cuspide anguli tanquam centro manente immo-

immota ob aliquod impedimentū, quàm totū angulū simul transferri; hinc est, vt resistentia naus orta ex impetu indirectum tendente, sufficiat vt cuspis prædicti anguli, quæ in proposito est vbi puppis extremum; minimè dimoueatur à tramite super quē fertur, nō autē sufficiat quin prora tanquā extremum alterius lateris moueatur ad motum lateris, quod constituitur à temone, ita vt temone ad leuam repulso longitudo naus cum prora ad dexteram vergat. Prouenit autem maior hæc facilitas motus lateris vtriusque, circa propriam cuspidem, tum ex facilitate motus circularis in vniuersum, tum ex ipsa resistentia, qua cuspis anguli, quem efficiunt detinetur ab impulso in directum nè moueatur obliquē in transuersum. Innititur enim ei tanquam fulcimento, ipsaque latera induunt rationem vectis cuiusdam angulosi in medio fulti, qui sanè facilius conuertitur circa fulcimentum ad motum alterius extremi, quàm simul secundum se totum aliò transferatur. Antrorsum ergo naui promota, ipse impetus promotionis, seu cursus impedit ne puppis extremum in transuersum dimoueatur, non autem obstat quin ad motionem obliquam temonis, conuertatur secum & prora, cum propter vim illatam, quæ vrgentibus fluctibus, in illam transfunditur; tum propter facilitatem conuersionis explicatam, consentaneè ad doctrinam supra traditam, mentemq. Aristotelis aientis parua motione facta per temonem in puppi, multo maius interuallum fieri in vltimo: Et alibi, temone paululum quid transposito, multam fieri transpositionem proræ, & ibidem commonuimus.

Sed prætermiffa Aristotelis doctrina, totius effectus quem per vsum temonis experimur in naui, causam satis, ac breuius explicari posse videtur si ad libram potius quàm ad vectem eam reuocauerimus. Etenim naus mari obuando, eiusque impulsus æquabiliter à dextris, & à sinistris recipiendo, non aliter se habet, quàm libra in æquilibrio constituta, in cuius brachijs æqualia pondera sustinentur. Idem enim est vtrinque æqualia pondera sustinere, ac impetus pariter æquales. Cum autem à dextris, vel à sinistris ex na-

ui lignum aliquod, vt temo, vel aliud non absimile promi-
nuerit, cui mare obuians, maiorem impetum incutiat, iam
non est amplius æqualis impetus vtrique incussus. Ac sicut
libram cum ipsa maius pondus altero brachio sustinet incli-
nari necesse est, ac cedere secundum illud brachium ex quo
maius pondus propendet: ita nauim inclinari oportet se-
cundum illam partem, in qua maiorem impetum excipit,
quod fit per circumuersionem totius longitudinis nauis ad
latus ipsum vnde magis percutitur, prout paulò ante descri-
psimus. Licet hic dicendi modus, ipsumq. fundamentum,
quo nititur verificari possit, tum si centrum motionis circu-
laris, quam experimur in naui constituatur in cuspide pup-
pis, tum si constituatur in prora, vt per se patet. Sed fortas-
se multo melius si constituatur in medio, seu in centro gra-
uitatis totius nauis, circa quod facilius est intelligere ipsam
nauis conuersionem, siue in quiete, siue in motu. Quo-
modo enim temo obliquè constitutus vim patiatur ab
aqua; Nimirum siue excipiendo illam fluentem, & obuian-
tem; siue impingendo in illam quiescentem, semper dimo-
tio illa circularis intelligetur pertingere vsque ad cen-
trum grauitatis totius nauis, cum quæ temo vnum corpus
efficitur. At in re tam occulta, quæ etiam dum ante ocu-
los versatur, adhuc imaginationem comprehensionemque
obseruantis fugit, consultius erit ab Aristotelis doctrina non
discedere.

Quæstio Sexta.



*VR quanto antenna sublimior fuerit, isdem
velis, & vento eodem calerius feruntur na-
uigia? An quia malus quidem fit velis, by-
pomochlion verò mali sedes, in qua colloca-
tur: pondus autem quod moueri debet, ipsum
nauigium; mouens verò is, qui vela tendit,
spiritus? Si igitur quando remotius fuerit bypomochlion,*
sa-

facilius eadem potentia, & citius idem mouet pondus, alius certe sublata antenna velum à mali sede, quæ hypomochlion est, remosius faciens, id efficiet.

COM M E N T A R I V S.

QUærit hic Aristoteles cur iisdem prorsus velis, eodẽq. vento perflante, celerius nauigia ferantur quando altius sublimatur antenna. Statimq. responderet, ex eo id prouenire, quod malus in ventorum impulsione constituitur vectis, cuius hypomochlion, seu fulcimentum est ipsa mali sedes in qua locatur; pondus autem quod moueri debet, ipsum nauigium, ac mouens ventum impellens. Etenim cum huiusmodi impulsus velis quidem exceptus verè totus refundatur in eam mali partem vbi alligatur antenna; quanto sublimius illa fuerit alligata, tantò remotius à fulcimento vis mouentis incutietur in malum, seu vectem. At virtus mouentis beneficio vectis, eo magis augetur, quo remotius ab eius fulcimento imprimitur: ergo cum sublimior fuerit antenna, maior fiet virtus à ventis incussa, validiusq. proinde mouebit nauigia. Diximus autem impetum velis exceptum ferè totum, non absolutè totum refundi in eam mali partem vbi alligatur antenna; quia adhuc antennæ cornua, ac veli pedes ex eodem impetu participant, dum per funes opiferos propedesq. nauim secum trahunt atque proripiunt.

Sed vt firmitus doctrina Aristotelis teneatur, ac difficultates omnes oppositæ soluantur, notandum est duplicem in malo considerari posse rationem vectis cum naus per velificationem fertur antrorsum; vnã quæ illi competit absolute prout cõdistinguitur à reliquis partibus nauis; Alteram verò quæ coniunctim ei conuenit simul cum nauis carina, secundum eam partem, qua carina versus puppim extenditur. Porro malus absolute consideratus in latione nauis, virtute ventorum, fulcimentum obtinet circa profundam sedem vbi locatur in nauis carina, eiq. innititur per sui extremum infimum, qua parte, seu facie vergit ad puppim. Onus autem seu nauem promouet per partem ipsius altio-

rem ex ijs, quæ intra foramen continentur, vnde ipse malus foris prodit in altum, tanquam arbor è terra; vrgetq. secundum eam ipsius partis faciem, quæ ad proram respicit vbi vltimo foramen desinit. Siquidem ibi tota ferè vis incutitur naui ad progrediendum antrorsum, vt videre est in hac figura, in qua extremum mali fundo innixum sit A, cuius



facies puppim respiciens B; pars verò ipsius mali, quæ flâtibus ventis à tergo nauigium præmit, vel vrget in ante, vbi C, è cōspectu proræ; & locus antennæ in ipso malo, sit D; vbi tota pennæ virtus impellentis spiritus refunditur, vt diximus ratione veli illū excipientis. Iâ igitur cōstat ex hoc, malum


per se sumptum propriè vectem constitui in ipsa ventorum impulsione, cum fulcimentum habeat in parte distincta ab ea, qua nauem promouet, & ab ea, qua mouetur à vento, vt in simili commune est omnibus vectibus; vnde quo altius constitueretur antenna, vt verbi gratia si eleuaretur vsque ad E, eo celerius moueretur nauigium, quia virtutem impellentem reciperet in parte à centro vectis distantiori.

Altera verò vectis ratio, quæ consideratur in malo coniunctim cum naui carina, est huiusmodi. Quoniam vt rectè præ-

prænotat Baldus, est quædam vectium species, cuius brachia in angulum desinunt, ipsiusq. anguli cuspis in operatione constituitur centrum, ac fulcimentum circa quod brachia conuertuntur. Ad quam speciem reducitur ferreus malleus prout eam partem continet, qua clauos reuellit. Etenim vt obseruari potest in hac figura, mallei manubrium constituit vnum brachium AB; alterum verò pars qua clauos reuellit, nempe BC. Et ex vtrisque fit angulus ABC, ipso malleo in extractione clauorum cuspidi innixio vbi B.



Similiter ergo malus in nauì considerari potest tanquam brachium vectis, quod alteri coniungatur, nempe illi parti carinæ, quæ vergit ad puppim, & cum qua constituit angulū in puncto vbi desinit altitudo ipsius mali. Nā impetu in alterū extremum ipsius mali incusso, nempe circa locum vbi vrget antenna velo agitata à ventis, ipsa summitas mali declinaret si posset ad proram, tanquam per conuersionem circa punctum explicatum, in quo constituitur angulus, simulq. eleuaretur si posset carina ex parte puppis. Quemadmodum in proposito angulo ABC; si latus AB declinaret in BD per impulsū acceptum in A; latus etiam BC eleuaretur in BE. Quoniam verò declinare non potest malus, nec pars illa carinæ per consequens eleuari absque immersione proræ, totus impetus incussus refunditur in lationem antroorsum, eo quod mare cum sit fluidum non



resistit.

resistat lationi, sicut ipsius proræ immersioni, quæ contra naturam ligni sequeretur ex declinatione mali. Accedit quia neque pars carinæ, quæ est à malo ad puppim posset eleuari; tum propter grauitatem puppis, quæ se habet tanquam onus in extremo vectis, ibiq. maximè præponderat impulsui contrario; tum propter naturalem resistantiam carinæ totiusq. fundi ne separetur ab aqua, cui connaturalius ligna præsertim plana adhærent; vt patet ex difficultate, qua supernatantes tabulæ extrahuntur ex aqua.

Secundum utramque igitur vectis rationem, quam malus participat, nauem promouet in anteriora, absque eo, quod versus proram inclinetur, sed tantum præmat, eo pacto, quo diximus, in situ vnde è foramine exit. Quare non rectè Baldus secundam vectis rationem in malo admittens, primam ab Aristotele allatam impugnat. Ex eo quod si malus talis vectis vim haberet, vento validè impellente, aut sequeretur fractio ipsius mali ad sedem, aut inclinatio versus proram, cum immersione ipsius proræ, & eleuatione puppis: Siquidem nec probat sequelam, nec idipsum, quod damnat deuitat iuxta secundam vectis rationem quam approbat, vt per se patet. Immo itaq. proinde simul recurrit ad maiorem infestationem ventorum, quam experimur in locis sublimioribus, vt causam afferat propter quam, cum sublimior fuerit antenna, citius nauigiū spiritu flante moueatur. Nam & causam quam Aristoteles tradit manifestam habemus; & non semper verum est, quod ipse de vento assumit, maximè in tam parua distantia, & loco non minus exposito.

Denique ex his expediri etiam potest alia quæstio, cur nimirum fluctuante aliquantulum mare, ac minimè velis munito, aut progrediente nauigio, quo altius sublimatur antenna, minus ipsum commoueatur; vt in statione nauium atque triremium extra portum solet contingere. Etenim iuxta prædicta facilè responderetur, tunc quoque malum, vectis rationem habere, altero in extremo suffulti prope nauis carinam: antennam verò oneris vicem subire, ac mare fluctuans, potentia mouentis, cuius virtus mediante nauigio

gio applicatur vecti inter fulcimentum, & onus; nempe vbi malus ipse vltimo intra corpus nauigij continetur, vt paulò ante descripsimus. Dum enim iactatur simul cum nauigio malus, ac propterea cogitur inclinari, obstat quantum potest antenna in superiori eius parte alligata tanquam onus incumbens, quod perpendiculariter ad mundi centrum grauitans, resistit inclinationi. ne contra propriam reſtitutionem, ac naturalem propensionem à perpendiculo deuians, oblique ad latera vergat.

Magis autem, aut minus valet resistere, iuxta maiorem, aut minorem distantiam, quam habet à sede mali, vbi constituitur centrum ipsius motus circularis, quem ad commotionem nauigij per varios arcus conficit malus. Quo enim plus à centro, seu fulcimento discesserit onus, eo difficilius dimouetur: distabit autem tanto magis à sede mali, ac fundo nauis antenna, quantò altius sublimatur. Accedit quia simul magis distabit à parte vbi vis incutitur malo in summo foramine nauis hinc inde illum impellentis: potentia verò remotius ab onere applicata, quàm à fulcimento vectis, minus illud mouere potest quando fulcimentum constituitur in altero vectis extremo: Vt si quispiam extremo farissæ alicubi obfirmato, ac manu prope ipsum extremum illi admota, aliquod pondus altero extremo dimouere conetur. Antenna ergo remotissimè à loco vbi virtus impulsua in malo refunditur collocata, difficillimè commouetur, proindeq. simul cum illa totum nauigium cuius commotioni magis valebit obſtare.

Quod sanè verificatur in mediocri, vel modica fluctuum eleuatione, vt consultò innuimus; alioquin nimis extuante mare, nimisq. obtumescens vndis, dum validè iactatur nauigium, oppositum experimur. Tunc enim si antenna in illo distantiore situ constituatur, ac semel cum nauigio admodum inclinetur malus, ad totalem potius euerſionem conduceret. Quandoquidem linea perpendicularis, qua onus antennæ mundi centrum petit ob talem inclinationem, non caderet intra nauigium, sed foris à latere, quò propensius

tendendo antenna ipsa non modo amplius inclinationi nihil obstarer, sed vicem subiret potentia inclinantis eundem malum tanquam vectem, & cum illo totum nauigium cui malus affigitur, eleuando scilicet alterum latus tanquam onus impositum, alterum comprimer, do veluti hypomochlion cui innicitur, ex quo sequeretur euersio, atque summersio.

Quaestio Septima.




VR quando ex puppi nauigare voluerint, non flante ex puppi vento, veli quidem partem, quæ ad gubernatorem vergit, constringunt: illam verò quæ proram versus est, pedem facientes relaxant? An quia retrahere quidem multò existente vento gubernaculum non potest: paucò autem potest, quem constringunt? Propellit quidem igitur ipse ventus: in puppim verò illum constituit gubernaculum retrahens, & mare compellens: simul & nautæ ipsi cum vento contendunt: in contrarium enim se reclinant partem.

COMMENTARIUS.

CAusam hic inquit Aristoteles cur nautæ ex puppi antrorsum velo nauigare cupientes non flante ex puppi vento, sed puta ex latere, seu ex transuerso, velo quidem in altero atque opposito nauis latere constituto, partem eius, quæ ad puppim vergit vbi gubernator ad clauum moderandum assistit, quantum fieri potest extendunt, ac fune reducto eius extrema constringunt: illam verò quæ proram versus est, ac tanquam inferiorem, pedem ipsius veli constituunt, altero fune producto relaxant, seu laxiorem esse sinunt. Docetq. ex eo id fieri, nam supposito quod gubernaculum cum remone, multum impellente ve-

leat obliquè, promouere tamen eam ipsam nequit, quo proram respicientem constituit, multoq. minus dum ventus inde validè spirat. Quare in casu proposito, hoc tantum præstat ala illa obuersa remonis, quod est, eandem naus positionē obliquam seruare contra impetum spiritus, quo certè prora nō minus quàm puppis ad latus retrocedere cogeretur, pariterq. in oppositam partē abire. Ex alio verò capite licet ventus æquè incidat in totum velū, ac vehementer pellat ex transuerso: nihilominus propter explicatam veli positionem totum ferè se confert in partem ad puppim vergentē, quæ sublimior, ac latior est, sinumq. maiorem efficit, ex quo impetus quasi retortus refunditur in latus versus proram, vt in LB, quo proinde latere naus fertur antrorsum super lineam EK.



Retorqueri autem impulsus prædictus ex eo contingit, quia tã infima veli ora ab E vsq; ad G, quàm antena à loco ubi malo alligatur vsque ad ceruchũ, seu cornu eius, quod in altũ extollitur, semper patitur magis à vento perflante, quàm pars tam veli; quàm antennæ, quæ est ab E in F versus prorã: nam inde potius fugit atq; elabitur ventus ob maiorem directionem, quam seruat

erga ipsum ventum, quem non ita in faciem excipit, sicut pars concaua, quæ ad puppim vergit. Dum autem patitur, ac percutitur magis cum velo, antennæ pars, quæ est à malo ad cornu, verbi gratia in sinistra, tanquam si moueretur circa ipsum malū veluti semidiameter circa centrum, vertere nititur nauigium in contrariū, hoc est dextrorsum, quia vim accipit à sinistra. Vnde impulsus quasi retortus aliquantulum in gyrum, nauem ipsam

non quidem sinistrorsum, sed antrorsum præualet commouere. Id quod clarius hic licebit inspicere in delineata figura eisdem fermè litteris, quibus superior consignata.

Cæterum ex his patet, quàm rectè Aristoteles docuerit ex eo nautas veli partem versus prorā pedem facere, ac relaxare, hoc est ex eo partem veli inferiorē tanquā pedem versus prorā collocare, ac funibus minus adducere; superiorem verò quæ longè maior est versus puppim retrahere, &



alligare, quia si vtramque partem veli equatam esse paterentur, malus vtrinque propulsus æquè etiam propelleretur. Cumque propulsus totus esset in directum à latere dextro, vel sinistro, nauis per illam pergere non posset antrorsum. Accedit quia, si æqualis, vel maior impetus incuteretur in proram, non tam facilè temo illam posset retrahere in contrarium. Siquidem magis distaret à fulcimento, ac centro, quod constituitur in cuspide puppis. Vnde quo magis velum appropinquatur puppi, eo magis temo præualet contra impulsu ventorum ad conuertendam nauim obliquè.

Quod autem ait Piccolomineus, in hac motione nauis carinam vectis vicem obtinere, quæ centro grauitatis ipsius nauis tanquam fulcimento innixa mare mouente, ac impellente temone, ventum in prora sustineat tanquam onus, valde ambiguum est. Tum quia non minus ventus per velum, quàm mare per temonem potest habere rationem potentiæ mouentis. Tum etiam quia ventus præcipuè non sustinetur in prora, sed potius in parte veli, quæ vergit ad puppim, vt dictum est.

Ex di-

Ex dictis etiam licebit duas alias veluti affines quæstiones diluere. Vna est, cur flante ex latere vento, veloq. cum malo ad latus oppositum inclinante, non sequatur naus submersio? Quamvis enim nautæ cum cæteris nauigantibus ideo in latus naus, quod versus ventum est, se conferant, vt proprio onere compensetur impetus veli, ac pondus mali in oppositum inclinantis: Nihilominus hoc non videtur sufficere, attenta vehementia spiritus impellentis, magnaq. vi quam exhibet malus dum se conuertit, tanquam vectis ad latus illud quod deprimit. Respondetur tamen iuxta prædicta, quod malus licet inclinetur ad latus præscriptum, non vrget secundum ipsam inclinationem versus idem latus directè, sed versus proram, vel oram Ili propinquam, propter rationem adductam; eo scilicet, quod finu veli obliquo non minus ex parte eiusdem lateris ventus ibi collectus impellat, modereturq. proinde impetus in pedem eiusdem antennæ ex alia parte, ne ad latus oppositum malus ipse omnino cogatur nauem inflectere.

Altera verò quæstio est, cur naus hunc prout descripsimus cursum seruando, securius incedat, minusq. submersioni sit obnoxia, quàm cum ex puppi flante vëto recta procedat? Id quod inexpertis mirū videri solet, cū quippe talis inclinatio, qua sæpè etiā mare intus excipitur, submersionē potius minetur, quā securitatē polliceatur. Contrà verò secundis ventis æquatisq. velis absq. vlla naus inclinatione progrediēdo, nullus appareat casus pertimescendus. Sed facilis est responsio; nā velo ad proram laxato, ventisq. secundis obrumescēti, plus quandoq. cōtingit se ad vnum, quam ad alterū latus inflectere, eo quod nequeat tam antenna, quàm velum exactè in duas partes equales vtrinque ad malum distribui. Cumque in hac latione qua naus recta ē puppi mouetur in proram, temo scindat quidem mare obuium eodem pacto in directū, sed illud non excipiat ad dexteram, aut sinistram, nec ideo vim alienam inferat naui circa cursum moderationē per proræ conuersionē: hinc fit, vt repentino superueniente impetu vehementi, atque in vnam magis quàm in alteram veli partem incusso, ob aptiorem positionem illius, aut magnitudinem maiorem; facilè totum nauigium à re-

ctitu-

Altitudine viæ deuiet, moxq. se vnâ cum malo ad latus, ad quod pars illa maior vergerit, omnino declinando demergat; nisi protinus obstauerit gubernator per conuersionem temonis, compellendo proram, ac reclinando illam versus eandem partem, in qua sequeretur submersio, ac vnde deflexerat, vt ventus à tergo spirans, ex æquo velum feriat in prora, propellatq. recta nauigium sicut prius.

Quæstio Octaua.



VR ex figurarum genere quæcunque rotunda sunt, & circinata, facilius mouentur. Trifariam autem circulum rotari contingit. Aut enim secundum absidem centro simul moto, quemadmodum plausfri vertitur rota: aut circa manens centrum, veluti trochlea stante centro, aut in pauimento manente centro, sicut figuli rota conuertitur: an celerrima quidem huiusmodi sunt, quoniam parua sui parte planum contingunt, veluti circulus secundum punctum, & quoniam non offensant. A terra enim semotus est angulus. Preterea etiam cui obuiam fiunt corpori, id rursus secundum pusillum tangunt. Si autem retilineum esset, retilitudine sua multum plani contingeret. Ad hæc quo nutat pondus, id motor mouet. Cum igitur ad rectum super plano circuli fuerit diameter, planum secundum punctum contingente circulo aequale utrinque pondus determinat diameter. Cum autem mouetur plus illico, ad quod mouetur, ceu inde nutans, ab impellente facilius in ante mouetur. Quo enim vnumquodque vergit, mouetur ex facili. Siquidem difficulter ad contrarium nutus sui mouetur motum. Preterea nonnulli autumant, quod circuli linea in perpetui versatur motu, quemadmodum manentia propter contrarium nixum manent: sicut maioribus contingit circulis ad minores. Celerius enim ab aequali mouentur potentia maiores circuli, mouentq. onera, quoniam circuli maioris angulus ad minoris angulum, circuli nutum habet quendam: & sicut diameter ad diametrum, ita maior circulus ad minorem. Infiniti autem sunt minores. Si autem ad alteram nutum habet circulus, similiter est bene mobilis. Et aliam sapere habet inclinationem circulus, & ta-

I

que

quæ à circulo mouentur, licet planitiem abside non contingat, sed aut iuxta planitiem, aut veluti trochlea. Etenim hoc se habentes modo facillimè mouentur, & onera commouent. An quia parua sui portione cum tangit, tum offensat circulus, sed aliam ob causam ea autem est, quæ dicta est prius, quod circulus scilicet ex duabus effectus est lationibus: quàmobrem illarum alteram pro nutu semper habet, & veluti continuò motum illum moueat quicumque mouent; quando secundum circumferentiam illum mouerint: latam enim ipsam mouent. Eam quidem igitur, quæ in obliquum est, motionem, ipsum impellit mouens: secundum verò illam, quæ super diametrum est, seipsum mouet circulus.

COM M E N T A R I V S.


VT quaestioni respondeat Aristoteles cur corpora, quæ rotundam, aut orbiculatam figuram obtinent, secundum illam facilius moueantur, triplicem modum distinguit, quo ipsa moueri rotando contingit. Primumq. esse docet, quo secundum absidem, seu extimam ipsorum curuaturam cientur, moto simul etiam centro, vt plaustrorum rotæ, quæ simul cum axe feruntur. Secundum verò modum, ait esse illum, quo circularia ipsa corpora recta quidem stantia, seu rectè ad horizontem constituta mouentur circa centrum immotum; veluti stantes trochlearum rotulæ, quæ circa manentem axem, seu centrum ad diuersos vsus conuertuntur. Tertium denique modum esse inquit, quo circa immotum pariter centrum mouentur, non tamen stando, sed quasi prostrata iuxta planitiem soli, aut pauimenti horisonti paralellam; sicut rota figuli, quæ ad impulsu pedis illius conuertitur, ac circumagitur supra axim pauimento perpendiculariter affixum, seruando semper eandem distantiam ab horizonte.

Loquendo itaque de primo modo, pluribus ex causis, ait Aristoteles præfata corpora celerius, ac facilius moueri quàm illa, quæ rectilineas adepta sunt figuras, seu rectilineis figuris terminantur, vt triangulari, vel quadrangulari, pyramides,

æquilibrium, quia non magis vna quam altera pars vtrinque à perpendiculo DC gravitare potest. Quod si impulsus quamvis perexiguus in ipsam rotam à motore incutiat, ut ex parte E versus F, statim pars ubi F nutabit ac propendet versus B; suoq. nutu, totam rotam secum trahet illuc. Nam qualibet vis potest æquiponderantia ab æquilibrio dimovere. Semel autem mota ipsa rota, nisi impediat, deinceps nutabit ad partem versus quam primò fuit incitata; ideoq. facillè ulterius atque ulterius mouebitur. Quo enim vnumquodque vergit, mouetur ex facili, subdit ipse Philosophus, sicut vice versà difficulter in contrarium; ut fusius constabit quæst. 31.

Atque hæc dicta intelliguntur de motu rotæ, aut sphæræ super planum horizonti parallelum. Nam super planum quodlibet declivè; evidentiùs idem constabit. Siquidem demissa tantum rota, vel sphæra super illud, suo semper nutu celerrimè deorsum rotando se conferet, imò in præceps quandoque decurret. Cum enim huiuscemodi corpora per eam lineam maximè grauitent, quæ perpendiculariter ab eorum centro tendit ad centrum mundi, si super declivè planum constituentur, nequibunt secundum eandem lineam fulciri, ac sustineri ab ipso plano. Nam punctum circumferentiæ per quod ipsa linea cadit ad centrum mundi; & cui totum ferè onus incumbit, semper manebit suspensum supra planum ex parte inferiori ipsius, nec vnquam planum ipsum declivè contingeret. Circulus enim vel globus non tangit planum, nisi in puncto in quod eius diameter incidit ad angulos rectos; quo sanè pacto cadere non potest perpendicularis tendens ad mundi centrum in planum, quod non est horizonti parallelum. Cumque prædictum punctum, cui potissimum onus incumbit, sustineri non possit ab eo, quod non contingit; hinc fit, ut semper versus inferiores partes declivè propendat, ac nutet, deferatque propterea ipsa orbiculata corpora quousque ab alio fulciatur. Ut perspicuè apparebit in proposita sphæra vel.

vel rota ABC, si declinet
planum DE contingat in
C ad angulos rectos ipsius
diametri BC: linea verò
cadens per centrum ipsius
sphaeræ ad centrum mundi,
sit AF. Nam sic totum fe-
rè onus incumberet in pun-
cto G, quod cum fulciri
nò possit in ipsa DE, quam
nullo modo tangit, necessa-
riò propèdet in F, rapietq.
secum ad partes E totum
globum, qui deinceps rur-
sus eadem ratione nutabit per aliud simile punctum, infe-
riusq. citissimo cursu descendet succedentibus sibi ad inui-
cem punctis, ac partibus.



Ex hac autem maxima aptitudine, quam rotæ, vel similia
orbiculata corpora habent ad motum, occasionem sumpsif-
se videntur nonnulli arbitrandi, circuli periferiam nunquam
quiescere, sed perpetuo motu cieri, vt hic subiungit Aristo-
teles. Quia scilicet circulus contrarium nixum non habet,
quo resistat motui, aut motori sicut corpora manentia, quæ
ex eo quiescunt, vel manent, quia habent, in quo contra ni-
tantur, & quo obsistant motui, ac mouenti. Vbi addendum
quippe fuisset ab Aristotele, falsò eos ita putare; nam licet
circuli periferia nixum non habeat, quo retardetur, aut im-
pediatur à proprio motu; non tamen semper habet in se
principium proximum, ac formale sui motus, quod certè
cum sit qualitas impetus impressi, hæc paulatim ex se re-
mittitur, ac tandem deficit, vt patet in proiectis, quæ iccirco
desistunt à motu.

Præterea Philosophus doctrinam de mobilitate prædi-
ctorum corporum prosequendo, docet maiores circulos,
mobiliores esse minoribus. Celerius enim (inquit) ab æqua-
li mouentur potentia, mouentq. onera. Causamq. eam esse

subneſcit ; quoniam ſemper angulus circuli maioris , nutum quendam habet ad angulum circuli minoris (in eo ſcilicet contenti circa idem centrum.) Et ſicut diamèter ad diametrum, ita maior circulus, ſeu potius circumferentia ad minorem : In quolibet autem circulo maiori, infiniti circuli minores continentur . Quo igitur maiores fuerint ipſi circuli, maioremq. proinde nutum , ſeu inclinationem ad minores contentos habuerint, eo facilius, ac celerius mouebuntur.

Sed vt clarius hic Philoſophi diſcurſus innoteſcat, obſeruandum eſt , per angulum circuli ſiue maioris, ſiue minoris, non rectè intelligi ſectorem , vt cum Piccolomineo interpretatur Baldus . Nam ſector circuli maioris eundem angulum conſtituit cum ſectore circuli minoris in eo contenti ; Ariſtoteles autem loquitur de angulo circuli maioris , ac de angulo circuli minoris tanquam de diuerſis, dum ait vnū habere nutum ad alterum ; alioquin perperam comparaffet idem ad idem formaliter . Quod ſi aliunde ſectores ipſi differant inter ſe , vt reuera differunt in linearum longitudine, ac ſpatio intercepto, ſecundum illam rationē qua differunt, & non ſecundum angulum, in quo conueniunt Ariſtoteles loquutus fuiſet ad probandam differentiam motus circuli maioris reſpectu minoris . Nec per angulum circuli interpretari poſſumus cū Blancano ipſius ſectoris arcum eo quod opponatur angulo , qui eſt in centro circuli . Siquidem fruſtra ſignificaretur oppoſitum per nomē eius, cui opponitur, cum vtrumque habeat ſuum vocabulum. Et eadem ratione per angulum trianguli, poſſet intelligi latus illi oppoſitum , quod eſſet inuertere omnem proprietatem terminorum de mente Ariſtotelis .

Potius ergo per angulum circuli, de quo hic loquitur Ariſtoteles, intelligi videtur angulus, qui ex diametro, vel ſemidiametro, ac portione circumferentiæ efficitur, quem angulum Euclides vocat etiam angulum ſemicirculi in 16. prop. tertij . Etenim iuxta hanc acceptionem angulus circuli maioris non eſt idem cum angulo circuli minoris, optimèque intelligitur ; & explicatur nutus , quem Philoſophus docet

docet habere istum ad illum. Hoc est propensio, quam angulus circuli maioris habet supra angulum circuli minoris circa idem centrum descripti, vt celerius, ac facilius cum illo, ac toto circulo secundum absidem moueatur.

Est enim circulus maior ABCD, minor verò EFGH, circa idem centrum I supra planum KL. Diameter autem maioris circuli sit AC, minoris EG. Angulus item maioris ACD; minoris verò EGH.

Dicimus ergo angulum ACD habere nutum quendam, & inclinationem supra angulum EGH, qua, & seipsum, & illum procliuiorem reddit ad motum secundum absidem super planum KL, si circulus ipse maior per impulsu[m] motoris versus L moueatur. Porro angulus



ACD, tam ex parte diametri, vel semidiametri, quam ex parte portionis circumferentiae, ex quibus tanquam ex duobus lateribus constat, velocius, ac facilius potest moueri, quam angulus EGH. Ex parte quidem semidiametri, seu lateris recti; quia extremum C magis elongatur à centro I quam G. Ex parte verò portionis circumferentiae, seu lateris curui; quia CD magis etiam distat ab eodem centro, ac minus curuatur, quam GH; minusq. proinde retrahitur nè moueatur motu naturali, ad rectum scilicet magis appropinquanti ideoque velocius ac facilius. Sed angulus C inclinari non potest versus L, quin secum rapiat angulum G, quem intra se continet. Igitur angulus ipse C, nutum, & propensionem habet ad angulum G, vt simul ac facilius moueantur modo quo diximus ad quemlibet impulsu[m] motoris. Cumque infiniti sint huiusmodi anguli in explicatis circulis, hinc fit, vt rectè ex illis concludat Aristoteles, mobiliore[s] esse circulos maiores, ac celerius moueri ab ea-


dem, vel æquali potentia; sicut celerius mouentur maiores libræ, quàm minores ab eodem, vel æquali pondere. Non enim aliter se habet circulus stans super planum, quàm libra supra fulcimentum in æquilibrio constituta.

At Aristotelem per angulos circuli intelligere angulos à nobis explicatos, illud confirmat, quod cum dixisset angulum circuli maioris habere nutum ad angulum circuli minoris, quasi id probans ait: Et sicut diameter ad diametrum, ita circumferentia ad circumferentiam. In quibus verbis vtrumque ipsorum angulorum latus comprehendit nempe rectum, & curuū. Idemq. est, ac dicere, quia cū prædicti anguli constent ex huiusmodi lateribus, sicut latera maiora, eo quod magis distent à centro, velocius mouentur; ita pariter angulus ex illis constitutus, velocius mouebitur; magis enim distat à centro extremum diametri maioris, quàm minoris, similiterque portio maioris circumferentiæ ab illo descripta, quàm minoris, vt per se patet.

Quod autem Baldus obijcit Aristoteli; prædictum nutum, quem ipse gratis explicat per angulos sectores, nullam arguere maiorem mobilitatem circuli maioris, eo quod quantum vnus sector adiuuat descensum ex vna parte, tantum alter oppositus retardet ascensum ex alia, nihil conuincit. Nam idem dici posset de extremitate diametri longius à centro distante, vt nihil conferat ad maiorem velocitatem, eo quod altera extremitas tantundem debeat retardare; Quod sanè falsum est, quoniam tam in illo, quàm in isto motu supponitur impetus aliquis impressus, virtute cuius motus ipse exerceatur, ac vna pars circuli, vel diametri superet aliam æqualem. Alioquin sicut sola maior distantia extremitatis diametri non sufficit ad motum illius; ita nec maior nutus circuli maioris. Vtrumque tamen confert ad velocitatem supposito motu. Nam virtus illa impressa nutu proprio ipsius circuli adiuta, efficacius operatur in ea parte vbi imprimitur, vel in quam prius impressa fuerit à motore.

Quod verò adducit ad probandum potius minores circulos


los videri ad motum faciliores, eo quod maior est angulus contingentiae ad planum, circumferentiae minoris, quam maioris circuli, vt in subiecta figura maior est angulus ABC, quam DBC: probat quidem minores circulos minus offensare propter maiorem eleuationem ipsius anguli à terra, vt supra explicuimus; sed non probat per se facilius moueri; imò oppositum. Nam quo curuior est linea, eo remotior à motu recto, ac naturali; ideoq. tardius mouetur, vt cum Aristotele pariter probauimus in principio. Nec recurrere fas est ad rotam materialem, quæ si maior sit, maiore sui parte tangit planum, cum id ipsum destruat eius assumptum, quod fundatur in eleuatione anguli contactus supra punctum B supponendo contactum, fieri in puncto ipso B, & non in parte diuisibili. Quod si dicatur reuera fieri in parte diuisibili tanto maiore, quanto maior fuerit circumferentia, tunc variatur suppositio antecedentis in consequenti, nihilq. propterea verè concluditur.



Iam verò loquendo Aristoteles de duobus reliquis modis, quibus dixerat rotunda, vel orbiculata corpora circulariter moueri absque eo, quod agitentur secundum absidem, seu abside planum contingant, ait, his etiam modis iam explicatis facillimè ipsa corpora moueri, ac alia ipsis adiuncta veluti onera commouere. Non quidem ex eo, quod parua sui portione planum attingant, vel offensent, vt dicebamus de primo modo: sed alia ex causa, quam in iio huius operis textu sexto exposuimus. Nimirum quia circulus cum ex duabus efficiatur lationibus, vel cum si moueatur secundum circumferentiam, duabus feratur motionibus: altera obliqua, ac præter naturam; altera verò recta, ac secundum naturam: ad hanc semper habet nutum, seu propensionem. Sicut verbi gratia quodlibet graue ad motum deorsum. Quamobrem qui mouent ipsum circulum secundum circumferen-

tiam, parum aut nihil conantur respectu huius lationis secundum naturam; sed mouent ipsum, veluti motum ab intrinseco propter explicatam propensionem, quam habet ad eandem lationem. Non secus ac si mouerent onus deorsum, quo ex se illud naturaliter tendit. Solum igitur impellentes circulum conantur, ac mouent illum secundum lationem obliquam, quæ est præter naturam, & ad quam ipse circulus non habet nutum siue inclinationem. Quod est facillimè circularia ipsa corpora à mouentibus moueri. Nam simpliciter loquendo de motione mista, quæ ex ijs duabus lationibus resultat, mouentur quasi à seipsis.

Vtitur autem Aristoteles illis verbis: secundum verò illam (scilicet motionem) quæ supra diametrum est, seipsum mouet circulus: ad connotandam ipsam motionem mistam, ac circularem resultantem ex duabus lationibus explicatis. Quam quidem super diametrum quadrilateri exemplificauerat in principio, non seruata tamen eadem proportione. Quod non abs re fuerit in hac figura palam exprimere.



Sit enim circulus ABCD circa centrum E, cuius semidiameter EC. A qua excutitur quadratum ECFD. Sitq. diameter quadrati recta CD. Dico igitur quod si punctum C, quod est extremum semidiametri, moueri debeat vsq; ad D, circa immotum centrū E, nullo ferè conatu mouentis mouebitur per arcum, cui subtenditur recta CD. Eodemq. tempore ipsum D transferetur in A; sicut etiam A in B, & B ubi nunc est punctum C: quod est, totum circulum nullo, aut paruo negotio, à mouente circulariter moueri. Cum enim punctum C per lationem secundum naturam, ad quam ex se habet nutum, & propensionem, qualibet exigua vi moueatur versus F; per lationem

nem

nem verò præter naturam retrahatur versus centrum E; impellente scilicet ipso mouente; vtique si pari proportionē ipsorum laterum CF, & CE deduceretur, ipsis duabus lationibus proculdubio moueretur per diametrum CD, vt cum Aristotele demonstrauius in principio. At cum non seruetur eadem proportio inter lationem secundum naturam, ac præter naturam, vt ibi etiam explicauimus; hinc fit, vt punctum C moueatur per arcum CD, cui diameter quadrati subrenditur, & in quo nulla est pars, super quam discedendo à puncto C, non moueatur vtraque latione, nunc magis, nunc minus se appropinquando puncto F, ac seruando semper eandem distantiam à centro E. Mouetur itaque punctum C vsque ad D, motione resultante ex duabus lationibus explicatis: atque adeo nulla alia adhibita vi, aut impulsu, qui correspondeat ei sicut illis, vt dictum est. Et sic verificatur, quod ait Aristoteles: secundum hanc motionem, quæ fit super diametrum; (nempe per arcum, cui illa subrenditur) seipsum mouere circulum.

Quæstio Nona.



VR ea, quæ per maiores circulos tolluntur, & trabuntur, facilius & citius moueri contingit, veluti maioribus troclicis, quàm minoribus, & scytalis similiter? An quoniam quantò maior fuerit illa, quæ à centro est, in aquali tempore maius mouetur spatium? Quamobrem aquali inexistente onere, idem faciet: quemadmodum diximus, maiores libras minoribus exactiores esse. Spartum enim in illis centrum est: libra autem utrinque parces, quæ ex centro sunt, existunt.

COMMENTARIUS.

MAior est difficultas, & controuersia circa experientiam hic suppositā ab Aristotele, dum quæstionem proponit, quam circa causam ipsius adductam in solu-

soluzione . Scribit enim facilius ac celerius tolli , ac trahi pondera per maiores circulos , quàm per minores . Constituitque exemplum de trochleis, ac scythalis, quæ si maiores sint, aptius onera mouent . Quod falsum omnino esse conatur ostendere Blancanus ex Guido Vbaldo . Nam simplex trochlea per rotulam cui funis supernè inditur nullas addit vires potentia mouenti, eo quod reducat ad vectem, cuius fultura est in medio ipsius. Vnde siue rotula illa magna fuerit siue parua, semper eadem ratione nullam augere potest facilitatem, aut velocitatem in hac motione. Subditque Blancanus, experientia quoque constare eodem labore, aquam hauriri, siue rotula illa magna fuerit siue parua.

Verum si hoc vniuersaliter demonstraret experientia, frustra passim adhiberentur trochleæ ad leuanda, ac trahenda pondera ; nec esset cur iuxta maiorem ponderum gravitatem, maioribus rotis, ac trochleis vteretur Architecti quando minoribus vti possent . Quamuis igitur simplex trochlea supernè appensa nullam addat vim potentia motrici, sicut nec vectis, cuius fulcimentum non sit propinquius oneri ; multam tamen affert commoditatem . Vnde eadem quippe vi, sed non eodem labore eleuatur onus beneficio trochleæ, aut vectis prædicti, quàm sine illis. Commoditas enim minuit laborem, ac si non auget potentiam, confert tamen, ad applicationem, & exercitium illius : id quod est augere facilitatem . Rursus quæcumque sit facilitas, qua rotis, vel trochleis pondera leuantur, certum est velocius ea leuari maioribus, quàm minoribus rotis ; sed hoc ipsum est facilius mouere, quia licet non omnis facilitas includat velocitatem, vt patet in pluribus machinis tractorijs, quæ facilius, sed tardius mouent ; nihilominus velocitas semper inuoluit facilitatem ; Ergo nihil contra experientiam assumpsit Aristoteles, vt Blancanus contendit .

Baldus item ait non esse simpliciter verum id ipsum, quod Philosophus asserit, vt scilicet quo maiores fuerint trochleæ, eò facilius moueant . Quia tam maior, quàm minor trochlea per eius centrum gravitatis diuiditur à perpendiculari cadente

dente ad centrum mundi in duas partes æquales, & æquè ponderantes, ac proinde semper est eadem illarum proportio inter se, & eadem ponderum ratio, ex qua prouenit motus. Faterur tamen hoc tantum procedere abstractè loquendo cum alioquin in trochleis, ac rotis materialibus negare non possit experientiam quam supponit Aristoteles. Quare totam maiorem facilitatem, quam experimur in ipsis trochleis, ac rotis maioribus, ipse ad maiorem proportionem, quam ut plurimum rota maior habet cum proprio axe reducit.

Sed quidquid sit de facilitate, aut difficultate simul proueniēte ex hoc capite, quam certè admittimus, ac infra etiā explicabimus: sistendo in sola ratione maioris, aut minoris ambitus rotæ prout hic supponit Aristoteles, cæteris scilicet paribus; exploratissimum est, ac negari minimè potest, quam facilius adhuc seruata eadem proportionem axis, seu crassitie illius ad ambitum rotæ, ferantur pōdera, si maioribus asportentur, eleuentur, aut trahantur rotis; sicut etiam scytalis, de quibus hic eadem est ratio. Loquitur autem Aristoteles de illo genere scytalarū, quæ similiter circa axim coniunctū ad eleuanda pondera conuertuntur, appposito in altera extremitate illarū ferreo quoddam manubrio, ut in specie est in subiecta figura. Scytala enim de se tantū significat lignum quoddam oblongū, ac teres tanquā cylindrū, cui quandoq. alijs adiunctis diuersæ machinæ, ac instrumenta vectoria, siue tractoria efficiuntur, quorum nonnulla adhuc scytalæ vocantur, ut hæc de qua loquimur, & alia de qua infra quæstione 11.



His itaque sic se habentibus breuiter ac perspicuè quæstionem diluit Aristoteles, inquit, maiorem hanc facilitatem, ac velocitatem motus procedere à maiori distantia, quam

quam à centro habet extremum diametri amplioris circuli, aut rotæ respectu minoris, ob principium illud sæpè repetitum, & à nobis pluries explicatum, quod iterum in libra hic exemplificat. Quoniam (inquit) sicut exactiores sunt maiores libræ, quam minores, magisq. aut facilius mouentur; ita maiores circuli, vel rotæ, æquali existente onere, cæterisq. paribus, vt dictum est: Cum rotæ, ex totidem libris, seu brachijs libræ videantur compactæ, quot sunt diametri ex quibus constant.

Diximus autem cæteris paribus; nam vt rectè Baldus admonuit, si rota maior corpulentiorē proportionaliter habeat axem, quàm minor, non mouetur velocius. Siquidem quo maior fuerit diameter rotæ respectu diametri sui axis, eò facilius mouebitur: quo verò minor, eò difficilius. Magis enim retardat, ac impedit axis crassior, quam subtilior. Quod adhuc (aliter tamen quàm ille) possumus probare; Nimirum quia ambitus subtilioris axis per minorem sui partem attingit rotam, quàm ambitus crassioris: & sic minus impedit circumuolutionem. Itemque post punctum, quod est in summitate circumferentiæ, & cui potissimum onus rotæ incumbit, partes vtrinque circulariter declinantes, decliuiores sunt in axe subtiliori; eo quod minor circumferentia, magis curuetur; sicut è contra quæ amplior est, rectius procedat, siue magis rectæ appropinquetur. Cumque partes decliuiores, minus valeant onus sustinere nè dilabatur, quàm partes, quæ minus declinant; hinc fit, vt subtilior axis ex decliuioribus constitutus, minus retardet, aut impediatur rotæ circumuolutionem.

Cæterum data axium paritate, præter causam ab Aristotele assignatam adhuc duplici ex capite reperiemus, maiores rotas citius, ac facilius quàm minores conuolui. Primum nimirum quia per maiores diametros tanquàm per longiores vectes aptius superatur impedimentum, quod experimur tam ex parte axis, quàm ex parte foraminis rotæ vbi inditur ipse axis, ad expeditum motum circumuolutionis illius, dum propter vtriusque corporis asperitatem adinuicem co-

guntur fricari, vnde non parum circumuolutio retardatur. Secundo quia quæ minor est rota, sicut pluries, quàm maior debet conuolui ad eleuandum, vel trahendum aliquod pondus, ita pluries est illi superanda huiusmodi resistentia, seu impedimentum fricationis; proindeq. difficilior id præstabit: sicut è contra facilius, quæ maior est, paucioribusq. circumuolutionibus indiget. Quo fit, vt ex quatuor rotis curruum, dux anteriores, vt quæ minores sint, ac sæpius circumuoluantur, sæpius etiam indigeant vnctione, ac facilius conterantur; vt Aurigis satis est notum. Cum enim simul eodem tempore æquale spatium percurrere debeant, ac rotæ maiores, quod ipsis deest extensionis ad coadæquandū se eidem spatio, compensatur per multiplicationem, ac repetitionem circumuolutionis earum; non secus ac qui breviori, sed frequentiori passu simul gradiuntur cum ijs, qui longiori, ac tardiori. Vt dicitur de Iulo cum Aenea patre, apud Maronem. Dextræ se paruus Iulus implicuit, sequiturq. patrem non passibus æquis.

Quæstio Decima.



VR facilius quando sine pondere est, mouetur libra, quàm cùm pondus habet? similiq. modo rota, & huiusmodi quippiam, quod grauius quidem est, maius autem minore, & leuiore? An quia non solum in contrarium, quod graue est, sed in obliquum etiam diffalter mouetur? In contrarium enim ei, ad quod vergit onus, mouere difficile est: quo autem vergit, est facile: in obliquum autem baud quaquam vergit.

COMMENTARIUS.

DVo in vnum collecta quærit hic Aristoteles, nempe cur facilius moueatur tam libra ponderibus vacua respectu sui ipsius cum pondera sustinet; quàm rota le-

ta leuior respectu grauioris, non solum æqualis magnitudinis, sed etiam maioris, quam aliàs quæstione præcedenti dixerat moueri facilius, ac velocius minore cæteris paribus. Causamq. sciscitandi eam esse videtur, quoniam libra in æquilibrio constituta, sicut etiam rota stans perpendiculariter super planum, aut in axe suffulta, quæ similem habet rationem, cuiuscunque grauitatis fuerit, statim atque ex aliqua parte impingatur, vel onus aliquod alteri eius extremo superaddatur; amplius manere non potest in illo situ, aut positione, eo quod necessariò æquilibrium auferatur per additionem ponderis, vel impetum incussum in alteram eius extremitatem; proindeq. siue ipsa libra sit ferrea, siue lignea grauior, aut leuior, æquè faciliè deberet moueri: idemque verificari de rota.

Quæstioni tamen respondet Aristoteles, grauiora corpora difficilius moueri non modo directè contra proprium nutum, quo tendunt deorsum, vt cum fursum eleuantur; sed etiam obliquè cum feruntur ad latera in transuersum, quo certè natura sua pondus non vergit. Quamobrem hoc ipso, quod libra, vel rota dimoueri non possit ab æquilibrio, quin obliquè circumferatur per motum mistum, ac præter naturalem circa proprium fulcimentum, vel axim, quo grauior fuerit, eo difficilius mouèbitur, magisq. huic motui repugnabit, grauior autem est libra ponderibus onusta, quàm vacua. Similiterq. rota ferrea, quàm lignea, vel ferrea, aut lignea quadripalmaris diametri, quàm alia eiusdem materiæ, sed bipalmaris.

Nec retorqueri potest hoc argumentum contra Aristotelem, vt Baldus contendit ex eo, quod cum grauius pondus violentius descendat, maiori nisu deorsum ferri deberet pars illa rotæ, vel libræ per additionem ponderis, vel impulsu aliquo mota. Nam licet grauius pondus si deorsum feratur, violentius quidem descendat, non tamen per hoc facilius à loco suo, vel quiete dimouetur. Deinde quia sicut maius pondus auget procliuatatem ad motum perpendicularem versus mundi centrum; ita difficultatem auget respectu

specu motus contrarij , vel obliqui , vt est motus circularis libræ, vel rotæ.

Rursumque nec subsistit contradictio , quam Blancanus Philosopho attribuit , quasi in præcedenti quæstione dixerit , maiores trochleas , ac scytalas , minoribus facilius moueri; hic autem asserat , maiorem rotam difficilius moueri , quam minorem . Quandoquidem Aristoteles apertè per minorem intelligit etiam leuiorem . Ait enim , maius autem minore , & leuiore . Quare sensus est , quod licet rotæ maiores ratione magnitudinis , sint mobiliores ; nihilominus quando grauiores sunt minoribus , difficilius commouentur .

Ex quibus patere etiam potest solutio ad rationem dubitanti in principio positã . Nam estò quolibet perexiguo pondere in alterã partẽ adiuncto , vel modico impetu in illã incusso , re vera tollatur æquilibriũ tam leuioris , quàm grauioris libræ , aut rotæ consideratæ in abstracto , vt Guidus Vbaldus demonstrat ex principijs Archimedis : id tamen sensibilibiter non apparet in facto , nec propterea libra ipsa , vel rota mouetur , nisi excessus ponderis , vel impulsus proportionem quandam habeat cum grauitate partis oppositæ , quam excedit ; itaut , quo grauior est libra , vel rota secundum vtranque partem in æquilibrio constitutam , eo maior sit ipse excessus superadditus in altera parte ad alteram superandam . Quod totum procedit ex eo ; nam hoc ipso , quod grauiora corpora ægrius præter , vel contra proprium nutum ferantur , maior pariter virtus requiritur ad ea circumferendã motu præternaturali , ac misto , prout est motus circularis . Sed ad concilianda principia Archimedis cum principijs Aristotelis in proposito discursu explicandum super est , cur quando libra , vel rota consideratur suspensa per centrum suæ grauitatis indiuisibiliter , non requiratur eadem proportio inter excessum partis præponderantis , & grauitatem maiorem , aut minorem alterius , sed sufficiat quilibet excessus . Siquidem etiam in isto casu abstracto maior grauitas partis

eleuandæ, maiorem excessum ponderis, aut virtutis videtur requirere in parte eleuante .

Dicimus ergo huiusmodi disparitatem desumendam esse ex propria conditione materiæ . Nam axis materialis circa quem vertitur, cum non sit indiuisibilis; necessario secundum plures sui partes , ac puncta correspondet partibus, ac punctis incumbentibus ipsius rotæ, vel libræ, quam sustinet . Quare ad eleuandam verbi gratia partem sinistram libræ, vel rotæ per depressionem dexteræ inter quas mediat centrum grauitatis , consequenter obstat pars illa axis correspondens ipsi dexteræ incumbenti, ac deprimendæ , eritque veluti fulcimentum vectis ad eleuandam non modo partem sinistram , sed etiam punctum medium, quod est centrum grauitatis tanquam præcipuum onus . Vnde licet propter maximam approximationem fulcimēti ad huiusmodi onus, facile onus ipsum, seu centrum grauitatis aliquantulum eleuetur ; non per hoc tollitur, quin eo difficilius iste motus exerceatur, quo maius fuerit pondus incumbens per ipsum centrum grauitatis ; ac proinde maior virtus requiratur ad superandam ipsam resistentiam, ac maiorem difficultatem . Quod non ita contingeret si libra, vel rota suspenderetur per axem indiuisibilem, ac centrum ipsum grauitatis . Nam hoc æquè semper sustineretur, siue in motu, siue in quiete ipsius libræ, vel rotæ . Imo semper quiesceret, nec vlla esset resistentia partium axis explicata, siue pondus incumbens esset grauius, siue leuius . Ideoque nullo negotio ad quem-

libet exiguum impulsus , vel modicam additio-

nem ponderis statim ab æquilibrio , & à

quiete dimoueretur omnis quan-

tumuis ingens , & grauissi-

ma libra , vel

rota .

Quæstio Vndecima.




VR super scytalas facilius portantur onera, quàm super currus, cùm tamen ij magnas habeant rotas, illæ verò pusillas? An quoniam in scytalis nulla est offensatio, in curribus autem axis est, ad quem offendant.

Desuper enim illum præmunt, & à lateribus. Quod autem est in scytalis, ad isthæc duo mouetur, & infernè substrato spatio, & onere superimposito. In virisque enim ijs reuoluitur locus circulus, & motus impellitur.

C O M M E N T A R I V S.

SCytalæ, de quibus hic loquitur Aristoteles non sunt eiusdem generis cum illis, quæ supra quæstione nona commemorauerat. Nam vltra communem formam cylindricam, sicut illæ axim, ac manubrium, sic istæ rotulas quasdam habent singulas in ambis extremitatibus ex eodem ligno compactas; prominentiores quidem, seu maioris ambitus, quàm sit reliquum corpus teres, quod intermediat, quodque axis vicem gerere videtur, sed non ab eo seiunctas, quippe cum ad vnum, & idem corpus continuatum pertineant, ac simul cum eo in latione super planum circumuoluantur secus ac illæ, quæ à proprio axe sunt seiunctæ. Maximo autem adiumento huiusmodi scytalæ esse solent cum binæ, vel ternæ æquidistantes oneribus supponuntur, vt ea facilius moueantur, præsertim super solum satis consistens, & æquatum, à quo nulla vnquam supereminetia, aut cauitate rotarum paruitas absorbeat. Licet non minus imò frequentius vtamur scytalis simplicibus, ac non rotatis, quarum memi-

nit Pappus lib. 8. Vtrarumque autem figuram hic erit inspicere delineatam.



Quærit igitur Aristoteles quid sit in causa, ut huiusmodi scytalis, quæ minores valde rotas obtinent, quàm currus, facilius quàm ipsi curribus onera asportentur cum quæstione nona constiterit, maiores rotas facilius, ac celerius onera mouere. Optimèque statim respondet, id ex eo contingere, quòd cum scytalarum rotæ vnitum sibi axem, non autem seiunctum, ut plaustrorum rotæ sortiantur, nulla inter ipsas, & axem offensio intercedit, sicut in curribus, aut plaustris. Axis enim currus duplici ex parte præmitur, nempe desuper ab oneribus incumbentibus, & ex latere dum ante, vel retro trahitur à mouentibus. Quare in duplici etiam & correspondenti parte præmit rotas intra ipsarum modiolum, vbi cum rotæ seiunctæ ab eo sint, ac dissimili modo moueantur, necessario sese ad inuicem secundum vtramque partem offendant atque collidunt, eo quod diuerso sibi
motu

motu atque impulsu occurrant . Quod non ita se habet in scyrtalis, in quibus cum non sit axis distinctus, nec motus diuersus, & ab eodem pondere, quod sustinent ipsæ antè super planum impellantur, nullus fit in rotatione occurfus nullaque offensio, secluso omni offendiculo extrinseco, de quo non loquimur . Ponderis enim licet de se semper graui-
tet, ac præmat per lineam perpendicularem cadentem ad mundi centrum; nihilominus positum super scyrtalas, tan-
quam super stantes circulos; dum antrorsum impingitur, totam præssionem, ac impulsu refundit in nutum, quem-
auget in circulis subiectis, & concitat, vt facilius mouean-
tur . Tollit namque explicatum æquilibrium illorum per magnam additionem ponderis, aut virtutis in eam partem, quam successiuè in illis deprimat, & ad rotandum impellit . Et sic corpus ipsum cylindricum, quod in scyrtalis axis vicem gerit, ac mediat inter duas vnitas sibi rotulas inter pondus, & planum substratum reuoluitur tanquam circulus inter duas superficies, mutando semper locum ex parte vtriusque . Nam & onus à motore impulsu per succedentes iugiter sui partes impingit, & substratum planum per nouas etiam partes correspondentes scyrtalas ipsas cum onere sustinet .

Quæstio Duodecima .



VR longius feruntur missilia funda, quàm manu missa, cùm alioqui projector manu magis pondus comprehendat, quàm cùm illud suspendit? Præterea sic quidem duo mouet pondera, funda videlicet, & missile: illo autem modo solum missile. An quia in funda quidem commotum missile funditor projicit? Fundam enim circulo, subinde rotans, id iaculatur: ex manu autem, à quiete est initium: omnia autem cùm in motu sunt, quàm cùm quiescunt, facilius mouentur. An & eam ob causam est, sed

nec minus etiam, quia in funda usu manus quidem fit centrum: funda verò, quod à centro exit? Quanto autem productius fuerit id, quod à centro est, tanto citius mouetur. Tactus autem, qui manu fit, funda respectu brevis est.

COMMENTARIUS.

D Vas hic Aristoteles rationes dubitandi proponit, vt explicet causam cur longius ferantur missilia funda, quàm manu missa. Prima est, quia proiector melius missilia ipsa manu comprehendit, quàm cum funda suspendit: Quod autem melius comprehenditur, validius iacitur ac propterea longius mittitur: Potius itaque manu missa, quàm funda proiecta missilia longius ferri deberent. Secunda verò ratio est, nam cū funda quis projicit; duo simul mouet pōdera; fundā nempe ipsā, & missile, quod projicit; absq; autem funda nō mouet nisi proiectum: At amplius quilibet mouere valet quando totā eius vim applicat in vnum, quàm cum distribuit in plura: Ergo magis ac remotius projector manu mittet, ac projiciet, quàm funda.

Duplicem deinde causam propositi experimēti assignat, vna est, quia per fundam agitatam atque commotum missile mittitur. Siquidem priusquam emittatur, ac è funda elabatur, eadem funda circumagitur, ac rotatur; manu autem non nisi quiescens projicitur: ita vt statim projectio post quietem sequatur, sumatq; initium à loco vbi manebat, nempe ab ipsa manu. Omnia autem cum in motu sunt, facilius vltcrius per nouum impulsu feruntur, quàm cum quiescunt, ac tunc primò moueri coguntur.

Quocirca vt hæc doctrina iuxta rei veritatem clarius elucescat, obseruandum est, proiecta in rigore loquendo non statim post quietem è manu iaculantis elabi; sed aliquantulum saltem prius manu ipsa comitante moueri antequam emittantur. Motus enim brachij iaculantis arcum quandam semper describit, in cuius fine, non autem in principio missilia projiciuntur; & quò longius projicienda sunt eo

maiolem arcum brachium ipsum efficit ; magis nimirum prius retrocedendo , magisque postea antrorsum se extendendo , atque in fine extensionis è manu missilia dimittendo . Alioqui nisi manus imò etiam brachium simul cum illis antea moueretur , nec impetum inferre , nec projicere ipsa valeret . Quare cum ait Aristoteles , nullam antecedere commotionem in proiectione , quæ sit sola manu , intelligendus non est de commotione immediata coniuncta , & quasi essentialiter pertinente ad eundem actum proiectionis : sed de commotione dispositiua accidentali , & quasi remota ad ipsum actum iaculandi , ut est præcedens illa irrotatio , & agitatio fundæ . Congruuntq. verba ipsius , nam ad probandum , commotum missile projici à funditore , ait : funda enim circulo subinde rotans id iaculatur .

Quod cerè vim argumenti ipsius Aristotelis non labefactat , tum quia etsi nunquam absque comitante aliquo motu proximo ipsius manus iaciantur projecta , sæpè tamen iaciuntur absque prævio motu remoto , quo nunquam carent missilia , quæ funda mittuntur : tum etiam , quia eadem saltem procedit ratio à minori ad maius , nimirum ut quo magis in motu est aliquid , eò facilius adhuc ulterius alio superaddito impulsu procuret . Quare cum magis in motu sit missile , quod funda rotatur , quàm quod manu unico , ac breviori arcu cietur , rectè concluditur longè facilius funda , quàm manu ulterius mitti . Nec obstat , funditores tardè potius quàm citò fundam irrotare , ac brachio circumferre ; Nam id faciunt , ut aptius erga destinatum situm ipsa irrotatio dirigatur , aptiusque brachium paulatim procedendo disponatur , antequam missile ab eo totis viribus projiciatur .

Altera verò causa propositi experimenti , quam Aristoteles assignat , eaque potior est , quia in fundæ usu manus (seu potius pars ubi brachium humero iungitur , ut optimè Baldus adnotavit) constituitur quasi centrum circuli descripti per eius motum , funda verò (scilicet simul cum brachio) se habet tanquam linea , quæ à centro ad peripheriam extenditur . Quanto autem productior , ac longior est linea ,

quæ à centro ad periferiam tendit, vt illa, quæ ex brachio, & funda constituitur in rotatione; tanto velocius mouetur. Cumque ex maiori velocitate istius motus, maior impetus producat; hinc fit, vt quod funda iacitur, tanquam per velociorem iaculationem, maiorem impetum à funditore recipiat, quàm si manu mittatur, longiusque valde proinde feratur. Iactus enim qui manu fit, inquit Aristoteles, brevis est respectu scilicet eius, qui funda efficitur.

Ad primam igitur rationem dubitandi responderi potest, maiorem, aut minorem comprehensionem proiecti, parum aut nihil conferre ad vltiorem eius emissionem, sed potius modum comprehendendi diuersum proportionatum, inquantum scilicet ipsa comprehensio ad commoditatem pertinet iaculandi quasi artificiosè. Vt si quis testam, vel complanatum lapillum eminus proijcere velit, inter pollicem, & indicem supra medium digitum collocat, vt ipso indice incusso impetu in latus posterius, ille per aera, eandem positionem seruando, feratur, qua cum facilius præeunte acie aerem scindat, vltius quoque pergere valeat. Alioquin ad absolutam proiecti emissionem, satis illud comprehenditur funda, ideoq. nihil minor comprehensio obstat, quominus funditor longius iaciat, cum hoc sibi vendiceret aliunde.

Ad secundam respondetur, gravitatem instrumenti nullam, vt plurimum augere difficultatem in latione, aut projectione ponderis dummodo proportionem quandam habeat cum potentia motrice, vt patere potest inductione, tam in vectibus plurimis, ac rotis curruum, quàm in machinis bellicis, aut venatorijs, quibus missilia iaciuntur. Quare cum grauitas fundæ, vel nullius momenti in se sit, vel ad summum sit grauitas instrumenti, nullam pariter supra pondus proiecti augere potest difficultatem, ad quam superandam maior conatus potentia requiratur, minusque propterea funda, quàm sola manu, projectum mittatur.

Vna tamen adhuc superest difficultas, quæ non mediocris est momenti; nimirum quo pacto motus circularis, quo
fun-

funda circumducitur missile, antequam proijciatur, ad motum rectum projectionis vim ac robur adijcere possit; ita vt impetus in circumlacione acquisitus, in impetum projectionis refundatur. Siquidem quilibet ex ijs duobus impulsibus, natura sua ad motū valde diuersū videtur ordinari.

Sed pro solutione stabiliendum prius est, qualitatem impetus corporibus impressam, varios quidem motus per accidens in illis posse causare; per se tamen ac natura sua non nisi ad motum rectum ordinari. Id quod obseruatione facile comprobatur; Nam si attentè animaduertere quis velit, nullum inueniet impetum per quem proiectum aliter quàm recta tendat in terminum sui motus: nisi fortasse aliqua ex parte reperiatur, aut impediatur. Vt cum proiecta pila, reperiatur à loco in quem impulerit, ac reddere cogitur, vel declinando à rectitudine propter impedimentum, obliquè vltèrius pergit. Aut certè cum corpori fune suspensio, & alicubi alligato incutitur impulsus, illudq. non rectà quò mittitur, sed in orbem mouetur, eo quod detineatur in centro ex quo per funem propendet. Nam si in eadem circumlacione rumpatur funis, aut soluatur, videmus idem corpus recta tendere, quò versùs per vltimum arcum suæ circumuolutionis respiciebat. Quod sanè apertum indicium est, absque impedimento per impulsū impressum corpora, nonnisi rectà moueri.

Quod si ignes missiles sulphureo puluere artificiosissimè compactos videamus huc illuc variis tortuosisq. itineribus discurrere; id ex eo fit, quia sulphureus puluis, ita est intracartaceos eorum anfractus artificiosè dispositus, vt accensus, diuersis ex lateribus vim inferat, ex quibus illi in opposita loca ferantur, ac veluti per obliquos calles serpendo discurrere videantur. Quod quippe tantum arguit mixtionem ipsius motus procedentem à varia situacione pulueris, seu causæ impellentis; cum alias etiam quilibet impetus ab accenso puluere productus directè tendat, ac moueat versùs eam partem in quam sese dilatando confert, & qua est illi additus, vt ex angustia elabatur, ac foris erumpat.

His.

His ergo sic stabilitis, facilè soluetur difficultas propo-
 sita, nam impetus missili incussus dum funda circumageretur
 non corrumpitur, nec desinit esse per aduentum noui impe-
 tus, quo recta illud proiicitur, cum neque natura sua, neque
 positione ei opponatur. Siquidem in fine cuiusdam rotatio-
 nis iacitur proiectum versus eam partem in quam vltimò
 vergebat, seu respiciebat vltimus arcus descriptus per cir-
 cumductionem illius; ita vt motus obliquus circuitionis sen-
 sim rectus euadat. Quamobrem ipse impetus quo circum-
 ducebatur facilè transit in impetum, quo recta illud rapitur,
 vel addit se ei, qui de nouo illi per actum proiectionis incu-
 titur.

Quæstio Decimatertia.




*V*R circa idem iugum maiores collopes faci-
 liùs, quàm minores mouentur: & item sucu-
 la, quæ graciliores sunt, ab eadem vi, quàm
 crassiores? An quia sucula quidem & iu-
 gum, centrum est: prominentes autem longi-
 tudines, ea quæ sunt à centro? Celerius au-
 tem & plus mouentur, quæ maiorum sunt circularum, ab ea-
 dem vi, quàm quæ minorum. Ab eadem enim vi plus trans-
 fertur id extremum, quod longius à centro distat. Quamob-
 rem ad iugum quidem instrumenta faciunt collopes, quibus
 facilius versant: in gracilibus autem suculis plus fit id, quod
 extra lignum est. Hoc autem id efficitur, quod à centro exit.

COMMENTARIUS.

CUm plura iugum de se possit significare, hoc loco su-
 mitur ab Aristotele pro instrumèto quodam ligneo,
 quo textores in machina textoria vtuntur, vt sta-
 men telasq. conuoluant. Oblongum itaque ac teres quod-
 dam lignum est super transversa ipsius textrixæ locatum,
 bina


bina circa
vtramq. ex-
tremitem
habēs fora
mina, qui-
bus tori-
dem collo-
pes, seu fu-
stes infigun-
tur, vt faci-



lius iugum ipsum eorum beneficio cum opus fuerit conuer-
tatur, vt præfert substrata figura.

Sucula item quamuis alia possit significare, hic tamen
machinam significat tractorij generis, quæ ex tereti ligno,
aut lignorum compagine constat, adiuncto axe suffulta
æquidistante à plano horizontis, duobus, vel pluribus col-
lopibus pari longitudine vtrinque immobiliter adstantibus
tanquam rotæ radijs circa modiolum, quibus admota ma-
nu, sucula ipsa circa proprium axem obuoluitur, funeq. cir-
cumducto, pondera subleuat, vt præ oculis hic est videre
in eius figura.

Quærit igitur Ari-
stoteles cur si lon-
giores fuerint collo-
pes facilius iugum
circumagatur, quam
si minores, ac bre-
uiiores extiterint.
Itemq. cur gracilio-
res succulæ facilius
pariter ab eadē po-



tentia circumuoluantur, quàm crassiores. Vtriusque subin-
de causam esse inquit, quod in vtraque machina quilibet
collops tanquam vectis se habet, cuius centrū, ac fulcimen-
tum est in medio iugi, vel succulæ, siue in intimo axe coniun-
cto, aut saltem in ipsius concepto: potentia verò in extremi-
tate,

tate, quæ extra ipsum iugum, vel fuculam prominet, vbi manus communiter adhibetur: ac onus constituitur in extrema ipsa vtriusque corporis superficie, quam fortiter præmendo vbi è foramine prodit, secum conuoluit, ac versat. Cuius quippe vectis similitudinem, & operationem hactenus etiam in malo expressimus loquendo de motione naui vento agitata. Cum itaque plus atque celerius transferatur ab eadem potentia extremum semidiametri, quod magis à centro distat in descriptione circuli, nec non plus, ac facilius mouere valeat extremum vectis, quod longius à fulcimento respectu oneris leuandi protenditur, quò longiores fuerint collopes, semidiametri, ac vectis rationem adepti, magisq. eorum extrema à fulcimento, seu centro in superficie conuoluenda distauerint, eò facilius iugum, aut fuculam contorquendo versabunt. Quoniam verò in omni vecte maior, aut minor distantia, quàm à centro, vel fulcimento habet extremum, in quo applicatur potentia, attenditur solummodo respectu distantiae, quam simul habet onus ab eodem centro, vel fulcimento; hinc fit, vt in gracilioribus fuculis, minore existente distantia à centro ad circumferentiam, seu extimam superficiem conuexam vbi constituitur onus, & vbi fit collepis præssio, maior distantia relinquatur vsque ad alterum extremum eiusdem collepis, quod est extra; ac iuxta maiorem hanc proportionem, magis pariter collops ipse mouere fuculam valeat.

Quod si contra hanc expositionem obijciatur, quòd Aristoteles palàm & absolutè docuerit, tam fuculam, quàm iugum cõstitui centrum in collopum motione; ex quo assumpto minus concluderentur, quæ de ipsius mente relata sunt; Occurrendum est, id sano modo esse intelligendum. Nam eodem pacto præcedenti quæstione apud ipsum Philosophum legimus, manum, non iuncturam brachij habere rationem centri in motu circulari, quo circumuerritur funda. Et tamen ibi vt vidimus sicut hic omnino diuersus est sensus, qui sanè potius ex contextu aliorum omniumque verborum, quàm ex vno tantum verbo fortè mendoso elici-

ciendus est. Cum igitur utrobique iuxta sensum explicatum consonent reliqua verba, visque argumenti non aliter appareat, quàm quo exposuimus modo, secluso omni contentionis pruritu, nullus ambigendi locus relinquitur de mente Aristotelis in his, quæ illum interpretando retulimus.

Quæstio Decimaquarta.



VR eiusdem magnitudinis lignum facilius genu frangitur, si quispiam aquè deductis manibus extrema comprehendens fregerit, quàm si iuxta genu: & si terra illud applicans pelle superimposito, manu longè diducta confregerit, quàm propè? An quia ibi quidèin genu centrum est, hic verò ipse pes. Quantò autem remotiùs à centro fuerit, faciliùs mouetur quodcunque. Moueri autem quòd frangitur, necesse est.

COMMENTARIUS.

QUoniam fracturus quispiam manibus, ac simul genu, aut pede aliquod lignum, dupliciter potest ad hoc præstandum se gerere; nempe vel aquè deductis manibus extrema ligni comprehendens, genuq. aut pede circa medium tanquam fulcimento adhibito, illa ad se retrahendo: vel manibus non nisi iuxta genu à prope medium utrinque admotis, vtrunque ipsius ligni dimidium inclinando: Quærit hic Aristoteles, cur facilius priori, quàm posteriori modo sequatur præruptio, etiam si eiusdem magnitudinis sit lignum, eademq. virtus in fractione adhibeatur. Idemq. contingat si humi lignum ipsum substernatur pedeque circa medium superimposito, manus ad tollendum sursumq. curuandum alterum, vel vtrumque eius extremum admoueatur, vt scilicet quò longius à pede lignum com-

prehen-

prehenderit, eo facilius tollat atque confringat.

Huius igitur causam eam esse, inquit Aristoteles. Nam explicatus motus, qui fit in fractione ligni, est motus circularis, cuius centrum constituitur genu vel pes, seu punctum ligni medium, quod suffultum illis quiescit. Dimidia verò ipsius ligni confringendi dum inclinantur se habent tanquam duo semidiametri circulariter ducti angulum efficientes in ipso centro circuli quem describunt. Quanto autem remotius à centro fuerit quodcumque circulariter moueri debet, tanto facilius mouetur. Facilius ergo manus dictum motum perficient si longius, quàm si propius genu, vel pedē, lignum apprehenderint. Cumq. ex hac motione, & inclinatione vtriusque dimidij procedat ipsa fractio ligni, sequitur etiam facilius longè quàm propè diductis manibus ipsum lignum confringi.

Cur autem non obstante prædicta disparitate in modo, quo frangitur lignum, cæteris paribus, difficilius frangatur si crassius ipsum sit, quàm si gracilius, non docet Aristoteles. Ex ipsa tamē rei natura quisque statim intelliget absque eo, quod recurat cum Baldo ad rationem illam angulati vectis, quam dicit habere vtrumq. dimidium ligni prærupti. Siquidem cum tota difficultas, quæ reperitur in fractione ligni oriatur ex resistentia partium separandarum, eo quod hæ inter se naturali nexu coniunctæ, necessariò obstant separationi ab inuicem: quo plures fuerint ipsæ partes, eo magis obstabunt, difficiliusq. proinde per earum diuisionem lignum quodlibet ex ipsis compositum confringetur.


Illud etiam hic quæri posset, quod Aristoteles prætermisit, cur prius ex parte superiori, ac extra angulum, quem efficiunt dimidia ligni inclinata, quàm ex parte inferiori in cuspide ipsius anguli vbi cætrum motionis constituitur, fractio ipsa ligni sequatur. Facilisque erit responsio si dicamus id fieri, quia illæ partes continui in fractione prius ab inuicem separantur, quæ & citius & longius coguntur discedere: In fractione autem ligni per inclinationem, & complicationem vtriusque dimidij, ex partibus crassitiei, quæ ab inuicem di-

uellun-

uelluntur, illæ citius ac longius ab inuicem coguntur discedere, quæ magis distant à puncto, quod constituitur centrum in hac motione; quia nimirum illæ discedendo, maiorem semper arcum describunt eodem tempore; quam quæ propinquiores sunt centro. Illæ igitur ipsæ partes crassitie distantiores à centro prius, ac citius ab inuicem separantur, ac proinde fractio non ab ipso centro, vel parte inferiori ubi fulcitur, sed à parte superiori, ac remotiori ab illo, initium sumere debet.

Quod ut planius constet, esto lignum; quod frangitur AB. Centrum ubi fulcitur C, sintq. fracta, vel frangenda dimidia AD, & EB semicirculum describentia AFB circa ipsum C. Partes

verò quæ ab inuicem separantur sint illæ, quæ existunt in lineis DC, & EC representantes latitudinem, vel crassitiem ligni. Dicimus ergo ex huiusmodi par-



tibus, quæ sunt in ipsis lineis DC, & EC, illas quæ magis distant à puncto C citius moueri, ac per maius interuallum ab inuicem separari: quod est prius confringi, quàm quæ propinquiores sunt puncto C. Siquidem ipsum C non modo constituitur centrum in hac motione respectu semicirculi AFB; sed etiam respectu semicirculi GDEH, qui efficitur à punctis DE, ut tandem DA post absolutam complicationem ligni reperiatur in GI; & EB in HK. Quapropter lineæ DC, & EC constituuntur tanquam duo semidiametri, cuius partes quo remotiores fuerint à centro C, eo velocius ab eadem potentia mouentur, maiusq. spatium in æquali tempore percurrunt, ut sæpius probatum est.

Diximus autem prius separari partes distantiores à pun-

cto C in ipsis lineis DC, & EC, loquendo de illis prout representant materialem crassitiem ligni, quæ non statim ac tota simul disrumpitur. Nam abstractè loquendo de ipsis lineis; quæ ante diuisionem coincidebant in vnam, non posset intelligi, prius separari vnam partem illarum, quàm aliam cum simul omnes, magis aut minus distando disiungi deberent constituendo angulum DCE. Alioquin non essent rectæ, vt per se patet.

Quæstio Decimaquinta.



VR ea, quæ circa littora appellantur, *crocæ*, rotunda sunt figura, cùm alioqui à principio ex magnis sint lapidibus, ostreis vè? An quia, ea, quæ plus recedunt à medio in motionibus: feruntur celerius? Medium enim fit centrum: interuallum verò ea, quæ à centro. Semper autem maior ab equali motione maiorem describit circulum. Quod autem maius in equali pertransit tempore, celerius fertur. Quæ autem celerius ex equali feruntur spatio, vehementius impetunt. Quæ autem magis impetunt, impetuntur & magis: quamobrem ea, quæ plus à medio distant, confringi necesse est: id autem cùm patiantur, rotunda fieri est necessarium. Crocæ autem propter maris motum, quoniam simul cum illo agitantur, in perpessi esse accidit motione, eòq. versatas modo semper offensare. Id autem ipsi maxime extremis contingere partibus est necesse.

COMMENTARIUS.

Crocæ apud Græcos idem significant, ac apud Latinos umbilici, quorum meminit Cicero 2. de Oratore; suntq. expoliti illi calculi, qui in littoribus reperiuntur continua maris agitatione attriti, ac in orbicularem, vel rotundam figuram redacti, vt qui in glarea arenis visuntur

ur admitti. De ijs igitur hic loquens Aristoteles, quærit qua de causa rotundam potius quam aliam figuram per attritionem, ac perpetuam illam agitationem adipiscantur, cum frequentius ex lapidibus, ac fragmentis alterius figuræ efficiantur. Quod enim secundum omnes sui partes paulatim conteritur, ac minuitur, vniformiter difformiter contundi debet, ac sensim attenuari, eadem partium proportionem seruata, eademq. proinde figura. Non igitur satis apparet cur ex tot tanquam ex diuersis figuris testarum ostreorum concarumq. ac lapidum angularium non nisi rotundam, & orbicularem formam eorum reliquæ videantur seruare, eiusdemq. figuræ penè omnes euadant cuius non erant.

Huic autem quæstioni Aristoteles respondet, partes, quæ magis à centro, seu puncto medio circumlati corporis recedunt, cum celerius in eius circumuolutione ferantur (maius videlicet in æquali tempore spatium in rotatione conficiendo) vehementius impetere, vicinaq. corpora rotando percutere, quàm partes centro propinquiores; velocitas enim augeat impulsus: Quæ autem partes vehemētius impetunt, atque impingunt, si fragiles in se sint, facilius etiam refranguntur. Cum igitur prominentiores partes crocearum sint huiusmodi, vt celerius in suos orbcs ruant, vehementiusque propterea illidant, sequitur facilius ipsas contundi, solumq. propterea relinqui partes à centro æquidistantes, ex quibus resultat orbicularis, ac rotunda figura, quam in ipsis croceis communiter cernimus.

Quod si ex hoc Aristotelis discursu sequatur maiores croceas rotundiores fieri, quàm minores propter maiorem à centro distantiam, qua in rotatione prominentes partes facilius contunduntur; id certè ab experientia non est omnino alienum, vt Baldus arbitratur; ficut nec ipsas croceas circa centrum conuerti, quamuis alijs, ac diuersis etiam motionibus agitentur. Si enim in pluribus littoribus attentius obseruasset, vidisset vtique fluctuum iactatione fluxu, ac refluxu, non modo glareas, paruosque lapillos circa centrum omnino conuolui, sed etiam maiores vmbilicos, & non me-

diocria saxa similiter in orbem ruere, seseq. collidere, quæ nisi magna valde sint, vt rotari minus commodè possint, mutua ipsorum collisione, orbiculata euadunt, vel ad orbicularem figuram accedunt magis quàm minores lapilli, vel testæ. Vnde latissimæ plagæ visuntur his tantum rotundis lapidibus strata, nulla ferè admista arena, parua testa, vel glarea. Quod verò non omnes lapides leuigatos, ac rotundos tanquam torno fabrefactos se videantur ostendere; id potius materiæ varietati tribuendum est, qua non omnes partes æquè fragiles constituuntur, vt pariter possint sua volubilitate contundi. Imò minores umbilicos, vt plurimum fragiliorem adeptos esse materiam argumento esse potest ipsa eorum paruitas. Non enim ex magnis parui facti essent, nisi materia, ex qua constant faciliè cederet, ac cedendo vni-formiter attenuaretur; ex quo prouenit leuitas.

Denique ratio, vel causa ab Aristotele adducta non tollit quin ex alia simul concausa id ipsum dicamus procedere, quam tetigit Piccolomineus ac Baldus. Quia nimirum vniuer saliter loquendo omnes eminentiæ, omnesq. anguli in corporibus, natura sua infirmiores sunt reliquis partibus intimioribus, quæ æquè distant à centro. Minus enim circumfulciuntur ab illis dum prominent, magisq. extrinsecis offensionibus sunt expositi atque obnoxij. Vnde faciliùs læduntur, ac retunduntur. Sicut nares, ac digiti manusque vel pedes in marmoreis statuís, quæ propterea sæpius mutilatæ reperiuntur effossæ. Cum igitur reliquæ lapidum,

ac ostrearum assidua maris agitatione in littoribus volutentur, atque inuicem illidantur, extremas eminentesq. earum partes retundi neces-

se est, ob idque eas in orbicularem

formam redigi, vel ad ip-

sam quantum fieri

potest acce-

dere.

Quæstio Decimasexta.




VR quantò longiora sunt ligna, tantò imbecilliora sunt: & si tollantur, inflectuntur magis, tametsi quod breue quidem est, ceu cubitum, fuerit tenue: quòd verò cubitorum centum, crassum? An quia & vectis, & onus, & hypomochlion, in leuando ipsa sit ligni proceritas? Prior namque illius pars ceu hypomochlion sit: quòd verò in extremo est, pondus. Quamobrem quantò extensus fuerit id, quod ab hypomochlio est, tantò inflecti necesse est magis. Quo enim plus ab hypomochlio distat, eò magis incuruari necesse est. Necessariò igitur extrema vectis eleuantur. Si igitur flexilis fuerit vectis, ipsum inflecti magis cum extollitur, necesse est, quod longis accidit lignis: in breuib; autem quod vltimum est, quiescenti hypomochlion deprope fit.

C O M M E N T A R I V S.

DVo quærit hic Aristoteles, quorum vnum pendet ex alio. Primum est cur quanto longiora sunt ligna, tanto imbecilliora fiant, etiam si sint pariter crassiora. Secundum verò est cur longiora ipsa ligna si ab aliquo extremo tollantur, magis inflectantur quàm breuiora, atque etiam simul graciliora, vt hastæ, vel sarissæ dum manu ab altero extremo apprehenduntur, atque à terra eleuantur ad lineam horizonti parallelam: Nam quo longiores extiterint, eò magis inclinantur, minusq; rectitudinem, quam in solo iacendo, vel stante habebant, seruare queunt in aere ita suspensæ.

Ex ijs autem duobus quæsitis, secundo tantum respōdet Aristoteles, cum ex eius solutione faciliè patere possit solutio primi. Ait igitur ex hoc procedere maiorem inflexio-

neni ligni procerioris, quod cum lignum ita suspensum, simul constituatur vectis, & onus, fulcimentum habens prope alterum extremum in manu à qua eleuatur; quanto extensius fuerit id quod à fulcimento est versus alteram extremitatem, quæ constituitur pondus; tanto magis ipsum inflecti necesse est, supposito quod vectis ipsa seu lignum, ex se flexibile sit; id quod non contingit in breuib. lignis, aut vectibus etiam si eadem seruetur proportio: Porro extremum, quod grauitat parum semper distat à fulcimento. Sit enim sarissa decem cubitorum longitudinis aliquantulum incli-



nata ipsa AB, cuius manubrium A, cuspis B, suffulta digitis ubi C, pollice præmente in A tanquam potentia eleuante. Eodemq. pacto constituatur gracilior surculus bicubitus DE fultus in F. Dico igitur sarissam magis inclinari quàm surculum, eo quod licet vtrumque habeat rationem vectis simul & oneris; pondus tamen constitutus in B magis distat à fulcimento C, quàm quod constituitur in E ab ipso F; magisq. propterea grauitat, & inclinat deorsum, paulatim recedendo à rectitudine, quam stans, vel in solo iacens habebat.

Quod non abs re fuerit aliundè etiam confirmare, ac vltius declarare, notando prius ad inflexionem cōtinui duo necessario requiri. Vnum est determinata, ac proportionata quædam virtus siue ponderis, siue motricis potentia, ita vt ab alia minori nulla causari possit talis inflexio. Quod certè cōmune est omnibus causis naturalibus respectu priorum effectuum, ad quos ordinantur. Alterum verò est

con-

constipatio quædam aliquarum partium, aliarumque laxatio in corporibus flexibilibus tanquam condensatio, ac rarefactio. Non enim posset continuum inflecti nisi partes illius, quæ concavam superficiem constituunt vicissim constiparentur; illæ verò quæ conuexam, laxarentur; seu quod fieri potest extenderentur. Cumque sensim natura ab vno ad aliud in omnibus gradum faciat; hinc est, vt non in qualibet longitudine siue distantia æquè fieri possit inflexio, sed longè facilius in ea, in qua paulatim procedendo, ita partes valent curuari, vt singulæ à rectitudine non videantur recedere. Vt obseruare est in portione, vel arcu alicuius magnæ circumferentiæ, qui videtur à linea recta differre.

His positis duplici etiam ex capite dicemus contingere, ligna quo longiora fuerint facilius inflecti. Primò namque hoc ipso, quod longiora sunt magis grauitant, maiorq. constituitur vis à quo procedit inflexio. E contra verò quo breuiora extiterint, eo minor est virtus huiusmodi; quæ tandem si minor sit minima, quæ sufficere possit ad motionem, nullo pacto valet inflectere, vt patet in furculis calamis ac paleis, quæ cum leuitate materiæ, tum breuitate corporis, grauitare non possunt quantum sufficiat ad motum inflexionis. Quod si breuitas ligni compensetur magna crassitie, obstat ex alio capite ipsamet eadem crassities propter maiorem multitudinem partium, quarum aliæ constipari, aliæ autem laxari debent cum sit ipsa inflexio. Secundo verò nam quanto maior est longitudo ipsius flexilis, tanto minor constituitur laxatio, & constipatio singularum partium, quæ arcum inflexionis efficiunt, meliusque valent sensim inflecti. Vice autem versa, quò breuior est longitudo illius, eò magis singulæ partes curuari debent, vt totius continui fiat inflexio. Ideoq. difficilius curuantur, & inflectuntur etiam si gracile sit ipsum lignum, quod debet inflecti.

Vtrum verò seruata eadem proportionem crassitie ad longitudinem, æquè facilè inclinetur magnum, ac paruum, seu longum, ac breue, non satis videtur constare. Probabiliter tamen dici potest, spectandum primò esse qualitatem, ac di-

positionem materiæ, vt si grauior, aut leuior; densior, aut rarior; fortior, aut imbecillior in se sit. Nam frequenter ex ijs pendet, vt nonnulla corpora plus facilitatis ad se inclinandum acquirant ex maiori longitudine, quàm difficultatis ex maiori crassitie: Alia verò contra. Deinde spectandam esse ipsam eandem proportionem crassitiei ad longitudinem considerando quænam illa sit. Etenim quamuis constitutur eadem proportio, in vno atque in altero, non tamen omnis proportio eundem effectum in illis producit. Eadem namque est proportio crassitiei vnus digiti ad longitudinem vnus cubiti atque quinquaginta digitorum ad quinquaginta cubitorum: & tamen virga ferrea, aut lignea si digitalis crassitiei fuerit longitudinisq. vnus cubiti, non tam facilè suo pondere flectetur, ac lignum, vel ferrum quinquaginta digitorum crassitiei, totidemq. cubitorum longitudinis. Quod si vnus palmæ fuerit crassitudo, longitudo verò vnus cubiti nihil difficilius videretur inflecti, quam si duarum palmarum constitueretur crassitudo in longitudine bicubita. Ad hæc proportio, quæ auget facilitatem, aut difficultatem inflexionis in vna specie ligni, non auget in alia sicut non æquè in ligno, ac ferro plumbo, aut calibe. Quare nihil determinari potest quo ad hoc nisi perspecta, vt diximus dispositione materiæ, variaq. proportionē, quæ diuersimodè iuxta maiorem, aut minorem corporum magnitudinem operatur.

Denique vt dictum est de eleuatione, ac suspensione ligni, vel alterius corporis oblongi sumpti ab altera tantum extremitate, vt exemplificauimus in sarissa, idem dicendum est de eleuatione, ac suspensione, quæ fit, vel ex ambabus extremitatibus; vel ex medio inter illas: Nam si vtrunque ab extremitatibus suspendatur aliquod lignum ad paralellum horizonti, duo quidem in illo vectes fient in ipsis extremitatibus sulti, ponderaq. in communi puncto intermedio grauitabunt tanquam in remotissimo situ ab vtriusque futura. Quapropter ibidem fiet vtriusque vectis, seu totius ligni inflexio, supposita vt diximus flexibilitate materiæ, ipsaq. ce-

dep.

dente suomet ponderi . Alioquin lignum ipsum, aut non recederet à sua rectitudine, aut frangeretur . Quod si suspendatur ex medio, in ipso medio fulcietur vtrumque dimidium, ceu duplex vestis vtrinque applicatus, extremitatibus vtrinque pariter grauitantibus, ac propendentibus tanquam in remotissimo loco à communi centro siue fulcramento . In quibus omnibus semper valet eadem ratio supra explicata.

Quæstio Decima septima.




*V*R à paruo existente cuneo magna scinduntur pondera, & corporum moles, validaq. fit impressio? An quia cuneus duo sunt vestes, sibi inuicem contrarij? vterque autem & pondus habet, & hypomochlion, quod diuellit, & comprimit. Plagæ quin etiam ipsius latio pondus, quod percutit, & mouet, magnum facit, & quoniam motum mouet, ipsa celeritate valentius fit. Paruo autem existente veste, magna illum consequuntur vires: quamobrem ultra magnitudinis decentiam latet mouens. Sit cuneus ubi ABC, quod verò cuneo scinditur DEFG. Vestis igitur fit ipsa AB, pondus verò ipsius B inferior pars, hypomochlion autem DG huic autem contrarius vestis BC. Percussa igitur AC, vitroque illorum vsitur veste scindit enim ipsum B.

COMMENTARIUS.

Celebrem non minus ac agitatam quæstionem tam parua in re hic instituit Aristoteles. Quippe cum eius solutioni aliàs præclaræ, & ingeniosæ, non omnes præsertim recentiores prorsus velint, aut valeant acquiescere. Quærit enim cur paruo existente cuneo, tam valida eius adminiculo fiat virtutis impressio, vt faciliè magna scindantur corpora, quæ alijs maioribusq. adhibitis instrumentis vix scindi aliquo modo possent. Soluitq. statim, quia in

cuneo, duo sunt vectes sibi inuicem aduersi, quorum vterque & pondus habet, & fulcimentum, quod comprimens diuellit; impulsu scilicet accepto ab ipso motore, qui dum cuneum malleo, vel alio corpore percutit, simul vtroque vititur vecte. Magna autem vis illi incutitur ex mallei percussione, eo quod malleus celerrimè motus moueat siue percutiat. Lationis enim celeritate validius ferit. Ob vectis igitur naturam, quam cuneus participat, & qua vires augentur, validamque mallei percussione, magnas contingit scindi, aut saltem findi corporum moles, paruo adhibito cuneo in rimula ipsius molis. Quod adhuc schemate declarans, hæc ferè subnectit idem Aristoteles.

Esto cuneus ABC, cuius apex, seu vertex B sit intra corpus scindendum DEFG. Vectis autem vna considerata in ipso cuneo sit AB, cuius pondus infra verticem B, nempe ad partes ED, vt vbi H. Fulcimentum verò I circa ingressum cunei, seu principium rimæ. Huic autem vecti alius



oppositus vectis constitutur BC, cuius pōdus supra verticem B ad partes FG vbi K, fulcimentum verò in L. Valde igitur percusso cuneo in

AC, vectis AB fulta in I simul fulcimentum præmens, mouebit versus G; onus autem H versus M. Vice autem versa vectis CB, fulcimentum L mouebit versus D: Onus verò K versus N. Quibus motibus dum partes molis ad opposita impelluntur, molem ipsam scindi necesse est.

Huic autem Aristotelis doctrinæ, ac solutioni duo obijcit Baldus. Primum est, quia si darentur explicati vectes in cuneo, eorum extremitates inuicem contendentes in puncto B altera alteri ne quidquam operarentur esset impedimento, vt late probat Guidus Vbaldus tractatu de cuneo. Se-

cun-

eundem verò est, quia in ipso scissionis actu, facta aliqua distractione partium molis adhuc non in totum discissæ, vertex cunei, quo pondera vtrinque diuelli, ac moueri deberent, nihil vt plurimum tangit in rimula dum ipsa vltius dilatatur.

Ad primum tamen respondetur, si concipiamus in cuneo vectes explicatos ex parte A vrgerè versus G, & ex parte C vrgerè versus D; verticem verò non transgredi punctum B; sed in eo quiescere: tunc quidem sequi, extrema ipsorum vectium sibi inuicem obstare in puncto B, nè in contrarium moueantur, moueantque adiacentia pondera modo descripto. At si concipiamus, vt re vera est apicem ipsam simul pergere ad partes EF: tunc in ipso motu optimè intelligemus, concurrentiam extremorum vtriusque vectis in vnicum illud punctum terminatiuum verticis, nihil obstare, quominus pars vectis, quæ sequitur post illud vbi K, impellat aliam sibi correspondentem in mole scindenda versus N: & pars vbi H, aliam similem versus M. Siquidem hoc ipso, quod vertex vltius pergit, partes illum vtrinque consequentes in proportionatum sibi locum succedere non possent, nisi prius inde expelleretur per scissionem partes molis, quæ eundem locum occupabant. Pars autem vbi K in mole scindenda non expellitur inde virtute vectis AB; sicut nec H virtute vectis CB; cum nullam vim vtrique pati possit à vecte nisi illa nitatur in contrariam partem. Ergo expulsio partis K fit virtute vectis CB, quæ contra nititur; & expulsio partis H, virtute vectis AB. Quod est ipsum verticem, seu apicem fungi officio extremorum vtriusque vectis ad remouendas vtrinque partes corporis scindendi tanquam ad leuanda pondera virtute impetus in contrarium impressi in alterutro extremo, vt in AC vbi applicatur potentia mouentis, seu percutientis. Non igitur res ita est concipienda quasi vertex B tanquam extremum duorum vectium contra nitentium simul moueretur ad opposita ad partes M, & N: Sed vt dum ipse vertex B mouetur super lineam BO, partes cunei vtrinque sequentes, ac paulatim

rim se dilatantes, & ab inuicem recedentes, necessariò impingant in partes molis, quas ab eodem loco determinant, vt ibidem ipsæ succedant. Non enim absque impulsu inde possent eas expellere, nec absque expulsionem in earum locum succedere. Cumque impulsus fiat virtute impetus in alterum vectis extremum impressi vbi adhibetur motoris potentia; sequitur verè extremitates ipsas KH, partes molis sibi correspondentes tanquam pondera scindendo distrahere, ac mouere, prout Aristoteles intendebat.

Ad secundum verò Baldi argumentum respondetur, concedendo sæpè cuspidem cunei, nihil in scissura contingere; negando tamen propterea nullam ibi vectis rationem intercedere. Porro extremum quo vectis pondera mouet, vt plurimum non est vltimum punctum terminatiuum illius, sed sufficit, vt sit circa illud, vel saltem post fulcimentum, quod intermediat inter pondus, & potentiam: Quare etiam si vltimæ, & extremæ partes cunei, quæ verticem consequuntur quandoque molem scindendam ob rimæ latitudinem nullo pacto attingant: adhuc tamen explicata ratio duplicis vectis in illo procedit applicando nimirum, quæ dicta sunt de vltimis partibus terminantibus in vertice, ad alias partes sequentes, vbi primo fit contactus inter molem, & cuneum.

Cæterum si quis vrgeat ex Guido Vbaldo, potius verticem cunei esse commune fulcimentum vtriusque vectis pondera verò mediare inter fulcimentum, ac potentiam, ita vt vectis AB fulta in ipso B moueat molis partem vbi est I, tanquam onus versus G. Similiterq. vectis CB ibidem fulta, partem L versus D. Occurrendum est, hoc cum alijs, quæ Guidus Vbaldus fusè prosequitur, probare quidem talem pariter vectis rationem competere ipsis AB & CB; prout constituuntur in cuneo: nihil tamen contra Aristotelem concludere; cuius propterea discursum referens Guidus Vbaldus minimè improbat. Nihil enim prohibet, quominus idem numero vectis secundum diuersas rationes ad duas, ac diuersas vectium species pertineat, vtriusque

que scilicet vices gerendo atque exercendo: idemq. corpus simul possit esse fulcimentum, & onus quod mouetur per vectem respectu diuerforum, vt in simili supra explicuimus quæst. 3. Optimè igitur secundum vtranque vectis rationem dicere possumus, cuncum virtutis incrementum sumere à duplici vecte, quam continet, & ab ictu percussionis, qua validius omni alio impulsu ipse adhibetur.

Quæstio Decimaoclaua.



VR si quispiam trochleas componens duas in signis duobus ad se inuicem iunctis contrario ad trochleas moto circulo funem circumdlexerit, cuius alterum quidem caput signorum appendatur alteri, alterum verò trochleis sit innixum, & à funis initio trahere cæperit, magna trahit pondera, licet imbecillium fuerit virium? An quia idem pondus à minori potentia si mouetur, vecte medio transfertur magis, quàm à manu? Trochlea autem idem vecti facit. Quamobrem si vna facilius trahet, & ab vnico tractu multò grauius trahet, quàm facere possit manus, id ipsum due trochleæ plus quàm in dupla velocitate leuabunt. Minus enim altera trahit, quàm si ipsa per seipsam traheret, quando circa alteram iniectus fuerit funis, illa namque minus etiam pondus effecit. Pariq. modo si ad plures iniectus fuerit funis in paucis trochleis, multa sit differentia, quamobrem à prima pondere quatuor minas trahente, ab vltima trahi multò minus. Et in re edificatoria facilliter magna mouent pondera, traducunt enim ab vna trochleâ ad aliam, & rursus ab illa ad fuculas, & vectes. Hoc autem idem est, ac si multas facerent trochleas.

COMMENTARIUS.

S Vpposita descriptione trochleæ, eiusq. multiplici distinctione quam supra prima parte tex. 8. Additione prima tradidimus, illud in presenti primò notandum

occur:

occurrit, Aristotelē hic non agere nisi de trochlea, quæ vni-
 eam, ac simplicem rotulam contineat, quam pariter eodem
 nomine trochleam appellat, ac distinguit à tigno, seu ligno,
 quod illam tanquam conceptaculum quoddam, aut capsu-
 la insertam continet; cum re vera communi acceptione
 trochlea, vt diximus vtrumque simul significet, nempe, &
 rotulam inditam siue orbiculum, & capsulam continentem.
 Nec audiendus est Piccolomineus dum ~~ait~~ tigna hic apud
 Aristotelē, non significare ligna prædicta, seu thecas ligneas,
 rotulas continentes, sed trabes ad se inuicem iunctas, qui-
 bus trochleæ cum pondere sustententur. Quandoquidem si
 hoc esset, Philosophus nō dixisset, alterum extremum funis
 ductarij, altero tignorū appendi. Cum certum sit, funem du-
 ctarium nullo modo ad trabem aliquam appendi, sed ad ip-
 sum extremum trochleæ superioris, seu ligai, quod rotulam
 tegit, ac per axiculum regit, vt statim patebit. Præterea vbi
 leonicus vertit in tignis duobus ad se inuicem iunctis, Græ-
 cus textus habet ἐν δὲ δύοις ξύλοις συμβαλόντων ἐαυτοῖς ἐναντίας,
 hoc est in duobus lignis concurrentibus ad inuicem ex op-
 posito, quod propriè designat ipsam situationem capsula-
 rum rotulas continentium, seu trochlearum, quæ ex oppo-
 sito se debent respicere, & quasi ad inuicem currere.

His ergo præmissis ad nominū dilucidationem, quæritur
 hic ab Aristotele, qua de causâ cōtingat, vt si quis duas tro-
 chleas ad inuicē ex opposito componat, & fune ad eorū ro-
 tulas circumducto, alterum eius caput alteri trochleæ, seu
 ligno rotulam continenti appendat, alterum verò manu tra-
 hat, magna eleuet pondera, quamuis imbecilla sit virtus tra-
 hentis. Causamq. mox reddit; quia nimirum facilius vel po-
 tius vectis adiumento quàm sola manu, mouentur pondera
 à minori potentia; rotula verò in trochlea vectis vicem obti-
 net, seu vectis habet virtutem. Cumque in trochleis prædi-
 cto modo applicatis, non tantum vna, sed duæ saltem rotu-
 læ tanquam totidem vectes adhibeantur, mirum non est si
 earū beneficio, celerius, ac facilius, maioraq. leuentur pon-
 dera quàm sit virtus trahētis. Imò si vnus rotulæ adiuimen-

to plus faciliusq. leuatur quàm sola manu, si duæ fuerint ro-
tulae, plus ac celerius leuabitur, quàm in dupla proportione,
& sic deinceps tanto magis, seu maius pondus, quantò plu-
res extiterint rotulae in ipsis duabus, vel pluribus trochleis
adhibitæ; ita vt ex multiplicatione rotularum, intelligatur au-
geri virtutem trahentis, ac pondus imminui, cum certè plu-
ribus impertiatur tanquam diuisum. Quare inquit Aristote-
les in re ædificatoria, multiplicatis trochleis fuculis, ac ve-
ctibus magna mouetur pôde-
ra non secus ac multiplicatis
tantummodo trochleis, quæ
vectis vicē gerūt vt diximus.

Sed vt prædicta ad oculos
etiam pateant, sint duæ tro-
chleæ ex opposito cõstitutæ,
vna supernè ac stabiliter ap-
penfa vbi A; altera verò in-
fernè locata vbi B, cui pon-
dus C sit religatū, habeatq.
vtraq; trochlea suū orbiculū
inditum, cui funis ductarius
circūducatur; alligeturq. al-
terum extremum ipsius funis
in parte inferiori superioris
trochleæ vbi D. Alterum ve-
rò relinquatur trahēti vbi E.
Tunc dicimus cum Aristote-
le, quòd si quis manu trahat
funis caput vbi E, facile au-
xilio ipsarum trōchlearum
eleuabit pondus C, eo quod
trochlearum orbiculi, vectis
vicem, ac virtutem subeant.

Quod vt palā omnino fiat,
distinguendū in primis est in-
ter orbiculos superioris, &



inferiori trochleæ, quandoquidē nō uterq. idem genus vectis exprimit, aut participat. Si igitur orbiculū trochleæ superioris, hoc est supernè appensæ consideremus, eam rationem vectis obtinere comperiemus, quam participat etiam libra æqualium brachiorum, nempe, cuius fulcrimentum inter pondus, & potentiam collocatur. Porro diameter orbiculi orizonti parallela FG longitudinem vectis refert, axiculus verò qui in centro est vbi H, fulcrimentum. Deinde diametri extremum F à quo pondus cum inferiori trochlea per funem propendet, vectis extremum exprimit, cui onus est alligatum. Alterum verò diametri extremum G, vectis extremum designat, cui virtus mouentis applicatur.



At si orbiculum inferioris trochleæ considerare velimus, aliam in eo vectis ratione deprehendemus; illam vtrique, cuius fulcrimentum constituitur in altero extremo, pondus verò in mediò, vt 1. par. tex. 8. Additione 1. explicuimus. Etenim ex duobus eius diametri extremis IK, alterum nempe K fulcitur à fune, cui veluti immobiliter innititur, eo quod ipsa sustineatur in D. Alterum verò extremum I sursum attollitur versus F per motum eiusdem funis ibi vim præcipuam imprimentis. Pondus denique C propendet ex medio vbi L, ibiq. propterea grauitat inter fulcrimentum, & potentiam attollentem. Ex quibus constat, vtriusq. trochleæ orbiculos vectis rationem habere, sed non eandem.

Quod si quæras quæ nam ex his duabus trochleis maius potentie mouenti auxilium præstet. Respondetur, superiorem trochleam non tam auxilium, quàm commoditatem, ac facilitatem ad trahendum illi præbere. Vt enim patet ex Guido Vbaldo de trochlea propositione prima, beneficio ipsius trochleæ superioris supernè videlicet appensæ quando potentia æqualis est ponderi inferius alligato, nullatenus eleuare illud poterit, cum ita se habeat, ac si aliud esset appensum pondus, æquale ponderi prædicto cum æquali distantia à centro, siue axiculo, circa quem diameter orbiculi non secus ac libra conuertitur, vt clarius videre est in hac figura, in qua linea AB diametrum referat orbiculi ABC
descri-


descripta circa axiculum C, nam si funis ex utroque diametri extremo à centro æquidistanti propendeat, & hinc pondus D, illinc potentia E æqualiter præmat, idem erit, ac si in libra æqualibus prædita brachijs æqualia pondera appendantur, quorum vnum, alterum per proprium descensum eleuare non posset, cum actio debeat esse ab inæquali proportionē, vt docet idem Arist.

Quare tota vis quæ adiungitur potentia, pondus aliquod eleuanti prædictarum trochlearum beneficio, petenda est ex trochlea inferiori. Etenim cum alterum extremū funis orbiculo huius trochleæ circumducti, in superiori ligno firmiter suspensio sit religatum; alterum verò à potentia sustineatur, vel trahatur, pondus quod ex ipsius trochlea pendet, quasi diuisum, partim à ligno superiori, ac partim à potentia trahente sustentatur, vt optimè demonstrat Guidus Vbaldus proposit. 2. & Baldus in hac quaest. videreq. est in sequenti figura.

Quoniam si trochlea ABC suspendatur per funem eius orbiculo circumductum, cuius vnum extremū sit in D stabiliter alligatum, alterum verò à potentia in E constituta sustineatur, ac pondus F ab ipsa inferiori parte trochleæ vbi B propendeat subligatum, pondus ipsum totū, non quidem à sola potentia E, nec à solo susten-



laculo D sustineri intelligitur, sed simul ab utroque, ita ut dimidium, alterutri respondeat virtuti. Quo fit ut cum potentia ad pondus attollendum, ipsa inferiori trochlea vitur tanquam vecte non paruum virtutem ab ipsa trochlea mutuetur, nō secus ac à vecte, cuius alterum extremum firmiter alicubi sit innixum, ad eleuandum pondus, quod ex eius medio pendeat, ut constare potest in descripto vecte.



ABC, cuius extremum C fulciatur in D, extremum verò A sit à potētia eleuandum, & ex puncto medio B propēdeat onus alligatū, quod sit ipsum E. Nam & si pondus

potentiæ vires excederet, duplamq. ferè proportionem haberet respectu earum, omnino tamen beneficio vectis tolleretur, cum dimidium tantum illius ipsi potentiæ responderet. Quod si plures orbiculi in ipsa inferiori trochlea contineantur, idem fiet, ac si totidem vectibus eiusdem rationis idem pondus ab eadem potentia moueatur. Nam cum singulis pariter onus leuandum impartiri debeat, quò plures fuerint rotulæ sicut vectes, eò minus potentiæ ad leuandum propria virtute relinquitur, ac propterea minor, ac minor virtus in trahente requiritur iuxta numerum rotularum.

Cæterum in qua sigillatim proportionem ad multiplicationem ipsarum rotularum in inferioribus trochleis, augeatur virtus mouentis, vel pondus imminuatur, sumendum est ex eodem Guido Vbaldo, & alijs, qui hac de re ex professo, ac fusiùs tractant; cum ad explicationem, & confirmationem doctrinæ Aristotelis, sufficiat ostendisse, qua ratione, & via id possit contingere. Et si quis multiplicatis trochleis, fuculis, ac vectibus, ut hic idem Philosophus ait, magna videat pondera eb exigua virtute moueri, aut eleuari, desinat admirari. Nam & ore tantum persflando vidi pondus tre-

centorum quinquaginta axium, & eius loco hominem stantem super tabulam dimoueri, trochleis, ac scyrtalis, axequae in paruo peritrochio adhibitis, quod idem vnciali pondere praeponderante contigerat, vt visumque cernere est in substrata figura.



Quaestio Decimanona.



VR si quis super lignum magnam imponat securim, desuperq. illi magnum adijciat pondus, ligni quippiam, quod curandum sit, non diuidit: si verò securim extollens percutiat, illud scindit, cum alioqui multò minus habeat ponderis id, quòd percutit, quàm id quòd superiacet, & premit? An quia omnia cum motu fiunt, & graue ipsum, grauitatis magis assumit motum dum mouetur, quàm dum quiescit. Incumbens igitur connatam graui motionem non mouetur, motum verò & secundum hanc mouetur, & secundum eam, quae est percutientis. Præterea se-

curis ipsa efficitur cuneus. Paruus autem existens cuneus magna diuidit, cum ex duobus sit uelutibus, contrario ad se inuicem modo constitutis.


C O M M E N T A R I V S.

TAm quæstionis propositio quàm dubitandi ratio per se est manifesta, ex quo nimirum contingat, ut si quis super lignum magnam imponat securim, de superq. ingens illi adiiciat pondus, nihil consideratione dignum, aut alicuius momenti diuidat; si verò securim ipsam extollens percutiat, illud scindat, etiam si multo minus illa habeat ponderis, quam id quod superiacet, ac præmit. Quod profecto ex eo euenire docet, quia cum omnia motu fiant, & graue ipsum maiorem grauitatem acquirat per motum, magis etiam mouet dum mouetur, quàm dum quiescit. Quare licet maior sit grauitas innata totius incumben- tis oneris quod præmit, nempe securis cum superadiec- to pondere, quàm sit solius motæ securis; nihilominus dum prius elata securis deiecitur, non modò operatur per innatam sibi grauitatem, sed per eam, quam in ipso motu acquirit, & per impetum à percutiente impressum. Vnde mirum non est, si sine efficacius percutiat, ac ita percutiendo scindat lignum, quod percutit. Præssio namque oneris ab vna tantum causa grauitante sine locali motu procedit; percussio verò securis à duplici, vel triplici causa impellente, à qua mixtus quidam, violentissimus efficitur motus.

Quod autem motus ponderi addat pondus, seu grauitas augeatur in motu, ac propterea efficacius operetur, exploratissimum est, non modo in ijs, quæ cadunt ex alto (nam quò magis à principio motus discesserint, eò velocius ipsa deorsum ferri conspiciamus, magisq. impellere non secus ac corpora grauiora;) sed in reliquis quoque motibus proiec- torum, quorum pondus magis operatur in motu, quam in-
quiete,

quiete, magisq. in velociori motu, quàm in tardiori. Quamuis in rigore loquendo virtus illa grauium, quæ augetur in motu, non sit eadem propriè ipsa grauitas per maiorem intentionem sui ipsius, seu acquisitionem aliorum graduum, eiusdem qualitatis in specie, sed potius sit impetus ipsorum, grauium, vel à proijciente impressus, vel per ipsam grauitatem descendantis oneris in eodem onere productus dum præceps fertur ad ima, ac successiue in se impetum auget. Quamobrem in motu securis tendentis deorsum ad scindendum aliquod lignum, vterque impetus prædictus concurrat, nempe & ille, qui à scindente fuit impressus, & is qui ab ipsa grauitate in descensu producitur, ac successiue semper augetur. Quod tamen non ita se habet dum ligna non scinduntur per motum deorsum, sed sursum admouendo, ac vibrando ipsam securim, vt ad amputandum ramum ex arbore; Nam tunc non intercedit nisi solus impetus admouentis; & ideo diximus huiusmodi motum securis à duplici, vel triplici causa procedere; cum grauitas innata semper ad ipsam percussione, aut incisionem concurrat sicut impetus impressus ab incidente; impetus verò à grauitate productus, vel auctus, tantummodo in descensu, hoc est cum ad scindendum tendit deorsum.

Omninò autem quilibet motus securis, prout mos est illam in scindendo adhibere, validissimus etiam constituitur ex ipsa circulatione quam efficit. Nam ex hac maior velocitas, & ex maiori velocitate efficacior ictus procedit. Tanto enim fortius corpus quodlibet in aliud impingit, quantò celerius fertur, ac magis eius moles agitur. Celerius autem fertur securis per motum circularem, magisque agitur, quàm quolibet alio motu; Alioquin si rectà, verbi gratia moueretur simul cum manu, tantum spacij percurreret eodem tempore, quantum ipsa manus; vt si securis ex loco A simul ac manus manubrio applicata ex loco B, rectà descenderent versus lineam CD



parallellam ipsi AB
ad percutiendum li-
gnum infra ipsam
lineam collocatum
in E. Mouerentur
enim per latera op-
posita eiusdē para-
llogrāmi ABCD,
quæ sunt æqualia.
At si securis non
rectā, sed circulari-
ter moueatur, vt
mos est illam à

scindentibus agitari, multò maius spatium in eodem tem-
pore percurret quàm manus, eo quod magis distaret à
centro, circa quod ambæ conuerterentur. Etenim siue
centrum huius motionis circularis constituatur in ver-
tebra ubi manus, seu palma iungitur cubito, siue in iunctura,
qua cubitus iungitur brachio, aut qua brachium iungitur
humero; semper tantum securis excedet distantiam manus
à centro, quanta fuerit longitudo manubrij, in cuius extre-
mo ipsa securis constituitur; proindeq. tantundem spatium,
quod percurrit securis, excedet spatium eodem tempore
peragratum à manu. Cum igitur quæ eadem vi commota
inæquali tēpore maius percurret spatiū, velocius moueātur,
apertè cōsequitur, securim ipsā velocius ferri motu circulari,
quàm recto ab eadem vi percutientis cōmotam: ac pro-
pterea ultra impetū ipsi à percutiente impressum, magnam
sibi ad scindendum ex tali velocitate efficaciam vindicare.

Accedit, quia ipsemet impetus aptius imprimitur per
motum circularem, magisq. conseruatur in illo, vt obserua-
re licet in rotis, quæ facilius mouentur, ac diu circumuol-
uuntur post impulsū acceptum; & in pilis, quæ longius
rotando feruntur, quàm corpora, quæ non mouentur in gy-
rum. Deinde aptius in particulari imprimitur impetus per
cir-

circularem motum securis, quia in tali motu eius manubrium, vectis vicem subit, cuius alterum extremum, quod latet in manu, fulcitur vbi complicantur digiti minores in ipsismet digitis minoribus; alterum verò mouet ipsam securim tanquam pondus ei alligatum, & pars quæ inter pollicem, & indicem continetur, suscipit impulsus ab eodem indice tanquam à potentia mouente. Vt videre est in descripto manubrio AB, cuius alterum extremum fulcitur



in A quasi tanquam in centro sui motus; alterum verò promouet securim in B: & pars vbi C, impulsus recipit à potentia motrice tendentem in D. Quo fit vt ipsum manubrium tanquam vectis, ac semidiameter circulariter moueatur, efficiatq. arcum, seu lineam BE. Quamuis contingat vltimum extremum A aliquantulum retrocedere versus F, eo quod fulcimentum non sit omnino stabile, nec possit ei tam exactè ipsum extremum manubrij applicari. Cum itaque omnia, quæ vectis vicem obtinent, ac circulariter suo innixa fulcimento cientur, aptissimè virtutem, seu impulsus à mouente recipiant, sequitur vt hac etiam ratione securis ipsa per motum circularem magnam vim ad scindendum adipiscatur.

Rursus accedit, quod intra latitudinem spatij, quò manus mouere potest securim, illud maximum erit spatium, quod circumeundo ab ipsa vnà cum securi complectitur. Cumque mobile quodlibet quanto maius spatium percurrit, tanto maiorem sibi vindicet efficaciam sui motus, vt probatum est, dummodo impetus illi impressus non desinat neque languescat; hinc fit, vt efficacius per motum circula-rem, quàm per alium securis mota impingat atque percuriat.

Caterum Aristoteles aliam subiungit causam scissionis, quæ fit per securim. Quia nimirum dum securis lignum scindit, constituitur veluti cuneus¹, vt ex propria eius figura, & ex modo, quo intimè sese insinuando diuidit, potest comprehendi. Est enim securis, vt ait Baldus, vel malleus cuneatus, vel cuneus malleatus manubrio insertus; operaturque sicut cuneus cum manubrio motus. Paruus autem existens cuneus magnam diuidit molem, cum ex duobus sit vestibus compactus, contrario ad sese inuicem modo constitutis, vt supra suo loco explicuimus quæst. 17.

Quæ autem dicta sunt de securi, eadem accommodari possunt ad malleum clauam ensẽ, bipennem runcam, cæteraque instrumenta, quæ impulso accepto percutiunt, diuidunt, scindunt, vel similia munera obeunt. Maximè autem omnium ad stipites loratos, quĩ communiter ad enucleandum triticum in area ab agriculis adhibentur. Hi enim impetu accepto per motum circula-rem incredibili vehementia ac virtute percutiunt. Porro cum alter ex alterius extremitate cui loris alligatur liberè pendeat, ac per ipsum tanquam per manubrium satis procerum circulariter agitetur, longè à centro, quod est in iunctura lacerti cum humero percutientis, suum quasi circulum perficit; proindeq. citissimè fertur, vnde & validissimè ferit, ac percutit. Iuxta quàm rationem colligitur, quod & experientia comprobatur prædicta omnia instrumenta maximam, ac præcipuam virtutem fortiri in extremo, quod magis distat à centro sui motus.

Nec obstat, quod Baldus adducit ad probandum ictum ex ense, efficaciorē esse à parte, quā est circa medium, ex eo quod ibi constituitur centrum gravitatis, ac propterea, cuspis non nisi dimidium ponderis habeat respectu illius. Nam licet pondus cuiuslibet instrumenti multum conducatur ad validiorem percussione, ut patet in malleo, & in clava, cuius caput propterea efficitur maius: Nihilominus præsertim in ense runca, & alijs procerioribus instrumentis, non tam attenditur pondus ipsius partis ferientis, quā distantia à centro sui motus, ex qua provenit maior velocitas, & efficacia ictus ipsius. Et planè si quæramus centrum gravitatis in ense, nec circa medium ensis illud reperire fas erit, sed potius prope capulum, vel manubrium, ut observanti patebit, ex qua parte evidentissimum est, non procedere ictum validiorem.

Quod si ensis ictus facilius euitetur, aut evadatur cum quis ensi obviet versus cuspidem, quā cum in medio; hoc provenit ex eo quod pars illa cum magis distet à centro, sicut facilius movetur, sic etiam facilius divertatur, tanquam vectis, cuius fulcrum centrum constituitur in manu gladiatoris. Deinde observandum est, non cedere secundū propriam contrarietatem, ita ut facile euitetur ictus descendens per ictum ascendentem, aut resistantiam illi ex directo oppositam; sed ex latere, remouendo ad latus ipsam cuspidem descendente, nempe dextrorsum, vel sinistrorsum. Quandoquidem impetus ita est determinatus ad unam positionem ex vi suæ impressiois, ut non suscipiat contrarietatem nisi ab opposita. Proindeq. idem ferè est, mouere dextrorsum, vel sinistrorsum ipsam cuspidem circumlati ensis descendente, & stantem, vel quiescentem, eo quod talis dimotio non apponatur directè ipsi descensui, ad quem impetus natura sua est determinatus.

Quæstio Vigesima.



VR *statera qua carnes ponderantur, paruo appendiculo magna trutinat onera cum aliqui tota dimidiata existat libra? ubi enim onus imponitur solum suspenditur lance: in altera vero parte sola est statera. An quia simul libra & veltis ipsam contingit esse stateram? libram quidem, ubi spartorum quodcumque statera fit centrum: in altera enim parte lancem. in altera autem pro lance equipondij appendiculum habet, quod libra incumbit, ceu si quis alteram apponeret lancem, & illi pondus imponeret. Manifestum enim quod tantundem trahit ponderis ei, quod in altera iacet lance. Quemadmodum autem si una libra multa sint libra, sic talia insunt sparta multa in eiusmodi libra, quorum uniuscuiusque quod intrinsecus est ad appendiculum, statera est dimidium: & omnino isthuc libra est, unam quidem habens lancem, in qua pondus appenditur: alteram vero ubi id statera equipondium. Quamobrem appendiculum ad alteram sui partem est statera. Huiusmodi autem existens multa sunt libra, totque quot fuerint sparta. Semper autem quod lanci propinquius est spartum, appensq. oneri, maius trahit pondus, quoniam fit quidem omnis statera inuersus veltis, hypomochlion namque unumquodque spartum supernè existens, pondus verò id quod lanci inest. Quanto autem productior veltis fuerit longitudo ab ipso hypomochlio, tanto ibi quidem facilius mouet, hic autem æquilibrium facit, pondusque statera trutinat, quod ad equipondij vergit appendiculam.*

C O M M E N T A R I V S.

Causam hic inquit Aristoteles, ob quam in statera paruo appendiculo magna leuentur, ac trutinentur pondera; Cum quippe statera nonnisi libra quædam esse videatur, licet quasi dimidiata, utpotè quæ ex altera tantum parte lancem pendentem habeat, ex altera verò discurrens quoddam appendiculum æquipondij. Ut vide-


videre est in descripta statera AB suspensa in C ex cuius extremo A pendet lanx D, & ex B appendiculum E. Etenim sicut libra æqualia duntaxat ponderibus onera le-



uat, ac trutinat; ita similiter statera, cum libra quædam sit, æqualia tantum appendiculo onera videtur posse leuare; quod secus experimur contingere. Nam parua molis appendiculo, magna videmus onera extolli, ac mensurari.

Mox deinde causam ipsam in eo docet consistere, quod statera, libræ simul ac vectis rationem induat, ac vtriusque vicem obtineat. Libræ nimirum, quia reuera est veluti iugum transversum, seu hasta bilanciis ex puncto quasi medio suspensa, atque vtrinque ponderibus pendentibus librata circa ipsum punctum intermediū, quo suspenditur tanquam circa centrum, vel axem. Quamuis enim statera constituitur ex inæqualibus brachijs, & ex altero tantum lanx vna propendeat; vel certè loco lanciis vnci nonnulli demittantur qui mercibus, aut rebus ponderandis compacti, eas non minus commodè sustinent, vt in subiecta figura. Ex altero verò

verò non nisi appendiculum æquipondij suspensum dependeat: Semper tamen ipsa statera libram refert, cum eius axis, ac fulcimentum sit inter onus, & æquipondium, ipsiusq.



æquipondij appendiculum, alterius lancis, vel vnci cum pondere vicem subeat; siue ipsum fulcimentum, aut spatium constituatur in puncto omnino medio, siue secus, vnde prouenit inæqualitas brachiorum, cum hæc libræ naturam non auferat, nec immutet, vt diximus suo loco.

Rursumq. vectis pariter naturam simul sortitur statera, quia fulcimentum habet vbi incumbit in axe, seu sparto, quod idem est, ac punctum vnde suspenditur, & circa quod ipsa conuertitur; pondusq. leuandum constituitur merces in lancem inuecta, vel vncis infixa; & potentia mouens, ipsum appendiculum æquipondij. Cum igitur ea sit vectis, ac libræ natura propriaq. conditio, vt cum alterum eius à fulcimento brachium longius protenditur, vt in statera contingit, paruo in ipsius extremitate adhibito pondere, magnam valeat molem ex altero breuiori brachio pendentem attollere, iuxta proportionem vtriusque distantie à centro, vt
alibi

alibi demonstrauius; planum profecto relinquitur, quæ ratione, paruo appendiculo in statera, magna leuari possint pondera, vt intendebat Philosophus.

Quoniam verò in præfato discursu semel atque iterum Aristoteles docuit, stateram esse veluti libram, in qua plures sint libræ, ac totidem quot fuerint sparta, hinc Blancanus conijcit, apud Priscos, stateram ex multis trutinis, seu spartis compactam fuisse, paribus interuallis per totam longitudinem ipsius stateræ disseminatis; Ex quibus singulis prout pondus postulabat, illa suspenderetur, appendiculo semper in extremitate sui brachij immoto manente; Itaut tantum mercis lanci imponeretur, quantum appendiculo æquiponderaret, iuxta situationē cuiuslibet trutinæ. Proindeq. singulæ trutinæ ad aliquod determinatum mercium pondus trutinandum fuerint constitutæ. Atque de hac veteri statera putat Aristotelem locutum fuisse, de eaque solum verificari, quod se habeat tanquam libra, quæ plures contineat libras. Nam tot erunt libræ quot sparta, quæ diuersas proportionēs libræ constituunt, atque adeo veluti diuersas omnino libras.

Verumenimverò non satis id colligitur ex Aristotele, nec videtur necessarium ad verificandum dictum illud eiusdem Philosophi. Quandoquidem etiam statera prout modò apud nostrates est in vsu, ex duplici saltem trutina solet constare, vna quæ loco vnde lanx pender est propior, altera verò quæ aliquantulum est remotior, & in opposito, seu inuerso stateræ latere locatur: Ac per propiorem vtique onera maiora, per remotiorem verò minora consueuerunt librari; libero semper manente appendiculo, vt per reliquum stateræ brachium iuxta exigentiam ponderis discurrere valeat. Quamobrem hac quoque in statera contineri videntur plures libræ, cum saltem duplex in ea trutina reperitur, quæ tanquam duplex libra deferuit ad maiora, vel minora onera aptius ponderanda, & vt eadem secundum maiores vel minores differentias ponderum quando opus fuerit innotent. Et quidem cum Aristoteles ait: ac si vna libra multæ sint

sint libræ, eo quod in ea insint sparta multa: fortasse idem intellexit per multa, vel multas, ac plura, vel plures; cum nomen Græcum πολλός, vtrumque significet, & à Cicerone πολλὰ in Timæo Platonis vertatur plures. Nisi etiam cum Baldo rectè dixerimus, stateram tot libras constitui, quot sunt translationes appendiculi de loco ad locum; quia toties variatur proportio, proindeq. etiam libra. Quare gratis ad exponenda verba Aristotelis putat Blancanus stateræ appendiculum apud veteres fuisse immobile, ipsamq. stateram ex tot spartis, seu trutinis constasse, quot erant metienda pondera: Quamuis alioquin id non fuerit impossibile, sed laboriosum duntaxat, & inutile.

Diximus, non impossibile: Nam quolibet in lance onere imposito, est adinuenire centrum gravitatis totius stateræ sic constitutæ, ex quo si ipsa per trutinam suspendatur, stabit æquiponderabitq. appendiculum immobile ipsi oneri in lance imposito. Vnde singula puncta longitudinis stateræ constitui possunt centra gravitatis respectu diuersorum onerum imponibilium, ac in quolibet illorum poterit trutina locari, quæ ad determinatum suum onus librandum deseruiat. Diximus tamen hoc esse laboriosum, & inutile, tum quia difficilius est multiplicare trutinas, ipsamq. totam stateram diuersis ex punctis suspendere ad quamlibet oneris differentiam dignoscendam, cum sola appendiculi mobilitate, atque discursu id consequi possit: tum etiam quia ad pauciora onera libranda, paucioresq. admodum ponderum differentias percipiendas deseruire posset ipsa huiusmodi statera. Cum certè multiplicari trutinæ non valeant ad numerum linearum, aut denticulorum, in quos modò diuersum est brachium stateræ, & in quos discurrens appendiculum pro opportunitate transfertur, vt singulis notis, seu lineis, singula onera trutinentur, ac determinatè quodlibet eorum pondus distinctissimè innotescat.

Addit autem Aristoteles quòd quantò propinquius oneri in lance, vel vncis appenso spartum constituitur, tanto magis onus ipsum, seu maius onus valet statera leuare. Id quod

quod experientia constat, & ea ratione ab eodem Philo-
pho probatur, quia cum spartū constituatur hypomochlion,
seu fulcimentum talis vectis, nempe statera; tantoq. faci-
lius vectis beneficio onera leuentur, quantò productior fue-
rit vectis longitudo à fulcimento; hinc fit, vt sparto magis
ad locū vnde onus dependet appropinquato, maior vectis
lōgitudo relinquatur vsq; ad appendiculū, faciliusq. propte-
rea ipsum appendiculū valeat in maiori distantia æquipode-
rare, maioraq. onera trutinare: permutata videlicet ponderū,
ac brachiorū proportionē, vt ex Archimede lib. 1. æquipon-
derantium proposit. 6. & sequenti; nec non ex eodē Aristo-
tele sup. quæst. 3. in vniuersum agendo de vecte retulimus.

Quæstio Vigesima prima.

CVR medici facilius dentes extrahunt denti-
forcipis onere adiecto, quàm si sola vtantur
manu? An quia ex manu magis, quàm ex denti-
forcipe lubricus elabitur dens? An ferro id
potius accidit, quàm digitis, quoniam vndique
dentem non comprehendunt, quod mollis di-
gitorum facit caro, adhæret enim & complectitur magis. An
quia dentiforces duo sunt contrarij vectes, vnicum habentes
hypomochlion, eius scilicet instrumenti connexionem? Hoc
igitur ad extractionem vtantur organo, vt facilius moueant.
Sit dentiforcipis alterum quidem extremum vbi est A, alterum
autem quod extrahit, B, vectis autem vbi A D F, alter verò
vectis vbi BCE, hypomochlion autem CGD, connexio verò
vbi G, dens autem pondus. Vtroque igitur B & F simul com-
prehendentes mouent: quomodo autem commotus fuerit, faci-
lius manu trahitur, quàm instrumento.

COMMENTARIUS.

QVaritur in præsentī ab Aristotele, ex quo nam pro-
ueniat, vt facilius dentes extrahantur dentiforcipis
adhibito instrumento, quàm sola manu, immediata
opera digitorum. Ac primò ex eo, inquit videri posse, id or-
tum

tum habere, quòd cum dens lubricus in se sit, magis forsàn è manu quæ levis, & mollis est, quàm ex rudi, ac tenaci forcipe elabatur. Statimq. hanc ipsam rationem impugnat, ac penitus evertit, inquires, potius ferro, quàm digitis contingere, vt dens ab illis apprehensus, propter sui lubricitatem aufugiat. Quandoquidem ferrum, seu ferrei dentiforci pes, minus quàm digiti vndiq. dentem valent comprehendere. Mollis enim digitorum caro cedendo, ac flectendo sese, adhæret, & complectitur magis quàm ferrum præ sua duritie, ac inflexibilitate. Vnde perperam huiusmodi Aristotelis verba intelligunt cum ij, qui ea tanquam in confirmationem prioris rationis, aut solutionis dicta exponunt: tum etiam qui ex opposito, ea ipsa propositam questionis suppositionem arbitrantur destruere. Etenim non suppositioni, & experientiæ assumptæ, sed priori duntaxat opponuntur solutioni, vt vidimus, rationemq. dubitandi non mediocriter augent, vt magis ea, quã traditurus est vera solutio elucescat.

Soluit igitur Aristoteles quæstionē dicens, id ex eo contingere, quòd in dentiforcipe duo continentur vectes sibi inuicem contrarij, videlicet ipsa dentiforcipis brachia, quorum vnicum est commune hypomochlion, nempe ipsa vtriusque connexio, pariq. alterius ad alterū inflexio, qua inuicē obuiantur. Proindeq. horū vectiū virtute arctius, ac validius, quàm digitis dentē perstringi, faciliusq. cōsequenter auelli.

Sit enim dentiforcipis instrumentum



AB, quod dentem quidē comprehendat, & constringat per sui extremum B. Vectis autem vnus sit brachium BC. Alter verò AD suffulti in connexione quasi axe vtriusq; vbi E Ionusque sit ipsum dens F. Vtroque igitur

igitur vecte simul admoto per extrema BD ipsum dentem tanquam onus in contrarium repellendo, validissimè constringent adhibita, scilicet manu in AC, qua extremum A compellatur versus C, & extremum C versus A. Dens autè ita constrictus faciliè dimouetur, ac dimotus extrahitur.

Hæc ferè Aristoteles, quæ tamen vt rectè Baldus obseruat, constrictionem potius, quam dimotionem, & abstractionem dentis demonstrant. Addendum ergo erit dentem dentiforcipe constrictum, vnà cum ipso instrumento alium quendam constituere vectem, ac si esset vnum continuum, cuius longitudo in præsentia erit ADF, vel CDF. Si enim attentè consideretur, præter constrictionem, non datur alius motus dentiforcipis ad dentem, seu respectu dentis, sed simul cum illo, nempe ambo tanquam vnicum corpus ad modum vectis mouentur. Cuius fulcimentum est in parte gingiuarum vbi dens primò ex illa emergit, & in sua conuersione innititur, vt in D. Ponderus verò constituitur gingiuarum pars resistens ex opposito circa dentis radicem vbi B. Cum igitur parua sit distantia à fulcimento D ad extremum F; magna verò ab eodem fulcimento D ad alterum eiusdem vectis extremum A, vel C: hinc fit, vt immoto manente puncto D faciliè ad motum circulares AC versus G; extremum F moueatur in oppositum etiam circulariter versus B. Et sic dimota dentis radice ex proprio loco, dens totus per dentiforcipem extrahatur. Quod difficile esset absque illo soli manu præstari. Quippe cum digiti nec tam tenaciter dentem apprehendere, nec ita vnum veluti corpus oblongum, ac tensum cum eo possint componere; quod totum vnus vectis rationem subeat.

Quocirca admittenda non erunt, quæ Baldus aliter Philosophus hac in re profert, quamuis acutè fuerint excogitata, cum ait, dentiforcipis partium, quibus dens apprehenditur, eam quæ longior est, potentia mouentis loco succedere, breuiorem verò fulcimentum constitui: Quandoquidem in vsu dentiforcipis ad extrahendum dentem etiam prout
ab ipso

ab ipso explicatur, fulcimentum non potest constitui in ipsa breuiori dentiforcipis parte, qua apprehenditur dens; tum quia hæc simul cum altera parte mouetur, licet per minorem circulationem, quæ sanè fit circa punctum illud gingiuæ, cui in abstractione conuertendo sese innititur dens, & à quo semper dentiforcipis extremum aliquantulum distat, eo quod nequeat ad illam vsque partem gingiuæ interiorem, ac solidam vbi huiusmodi fit nixus pertingere: tum etiam quia esto pars ipsa breuior per sui extremum non moueretur ad motum alterius, sed quiesceret, non propterea sequeretur constitui fulcimentum huius motionis. Nam punctum cuiuslibet vestis correspondens puncto fulcimenti cui innititur, penetratur cum illo, & simul cum illo quiescit in motione ipsiusmet vestis; & tamen non potest constitui fulcimentum suæ propriæ motionis. Nimirum quia, nihil in seipso potest fulciri, sed semper inter fulcimentum, & suffultum ea debet esse distinctio, quæ est inter mobile, & immobile, vel commotum, & immotum. Quare cum constitutum ex dente, ac forcipe se habeat per modum vnus vestis, non secus ac si esset vnicum corpus continuum, etiam si secundum punctum aliquod sibi intrinsecum quiesceret, ac circa illud secundum reliquas sui partes circulariter moueretur; Non propterea posset illi tanquam proprio fulcimento in sua ipsius motione inniti. Potius igitur fulcimentum constituendum est extrinsecum, in ea gingiuæ parte, quam descripsimus vbi dens ipse in auulsione fulcitur, ac præmit, doloremq. infert non minus, quam vbi ex opposito dimotæ eius radici resistitur.

In calce tandem huius quæstionis Aristoteles subnequit, dentem commotum facilius manu sola quam instrumento simul auferri. Quod sanè intellexerim habita ratione ad dolorem, quem in dentis abstractione quisque vitare, aut saltem minuere intendit; ita vt facilitas ad commoditatem patientis, non autem ad absolutam effectus consecutionem referatur. Quo sensu id ex eo videtur probari, quoniam si semel dens fuerit commotus, & à positione suæ sedis dimo-

tus, non modò solis digitis poterit simpliciter auelli, non minus ac simul adhibito instrumento; sed etiam commodius, ac facilius, dolorem scilicet penitus, vel maiori ex parte vitando, eo quod digiti sentire secus, ac dentiforcipis ferrum, & superare magis valeant pro opportunitate aliqualem dentis resistentiam. Alioquin absolutè loquendo nulla habita ratione ad dolorem, ipsum dentiforcipis instrumentum, sicut maiorem præualet superare dentis resistentiam firmiter inhærentis; ita & multo magis minorem, ut cum iam ille à propria sede dimotus debiliter tantum gingivæ inhæret.

Quæstio Vigesima secunda.



VR nuces absque ictu facilè confringuntur instrumentis, quæ ad eum fiunt usum. Multum enim aufertur virium, motionis scilicet & violentia. Præterea duro & graui comprimens instrumento citius confringet, quàm ligneo & leui. An quia sic utrunque à duobus comprimitur vèctibus ipsa nux, à vèctis autem facilè

diuelluntur onera? Id enim instrumentum ex duobus componitur vèctibus, idem habentibus hypomochlion, connexionem videlicet ipsam, ubi est *A*, quemadmodum igitur fuerit diducta secundum extrema molis *CD*, ipsa *FE* sic à parua facilliter potentia conducuntur, quod igitur cum percussione fecisset pondus id valentiores illa *EC*, & *FD* vèctes efficiunt. Eleuatione enim in contrarium elati, & comprimentes frangunt ubi est *K*. Hanc etiam ob causam quanto vicinius fuerit *K* ipsum *A*, confringitur celerius. Quàto enim ab hypomochlio plus distat vèctis, facilius & plus mouet ab eodem potentia Est igitur *A* quidem hypomochlion: ipsa autem *DAF* vèctis, & item ipsa *CAE*. Quàto igitur ipsum *K* vicinius fuerit angulo ipsius *A*, tantò vicinius sit connexioni, ubi est *A*, hoc autem est hypomochlion, ab eadem igitur potentia applicante *FE* plus extolli necesse est. Quamobrem quoniam ex contrario est eleuatio, necesse est magis comprimi, quod autem comprimitur magis, citius frangitur.

PRæfens quæstio circa simile admodum instrumentum versatur, ac præcedens, quamvis ad diuersum omnino effectum natura sua ordinatum. Quærit enim Philosophus quo fiat, ut nuces absque ictu, faciliè instrumento ad id opus fabricato, confringantur: quod sanè instrumentum forcipi simillimum, & ex ligneis regulis compactum ipse videtur supponere. Eamque mox rationem dubitandi affert; quia absque ictu ac violenta aliqua percussione, remissius absolutè quam cum illa corpus comprimitur; impetus namque ictus aut percussione vires maximè auget in ipsamet motione, ad comprimendum acrius quod percutitur, ut hætenus explicuimus. Quare non tam faciliè præfato instrumeto absque ictu nuces confringi posse viderentur, sicut cum malleo adacto impetu confringuntur. Id quod præterea ex eo confirmat, quia graui ac duro instrumento, ut est ferreus malleus, citius, consentaneum est, fieri confractionem, quàm ligneo ac leui, quale hoc de quo agimus in præsentī supponitur.

Attamen ipse Philosophus huiusmodi difficultatem ac dubitationem ex eodem principio, quo præcedentem quæstionem soluerat, aptissimè ac breuissimè diluit, inquiens, explicatum instrumentum duobus brachijs tanquam duobus vectibus contrarijs, ad sese inuicem conuersis constare, vnico fulcimento innixis, quod est vtriusque conexio ac veluti axis: duorum autem vectium compressione, ut potè qui magnam vim habeant comprimendi, æquè facile nuces amygdalas, vel id genus alia confringi, ac ictu vel percussione cum impetu. Quod ut ad oculos etiam pateat, constitutur primo instrumentum ABCD, cuius brachia sint AD & CB suffulta in connexionē vtriusque vbi E. Nux verò confringēda locetur inter A & C vbi F, nempe inter extremā brachiorum ea parte qua minus distant à fulcimento. Potentia verò confringentis applicetur in extremis eorundem brachiorum ea parte, qua magis distant a fulcimento,

tan-




tanquam in manubrijs , nimirū in BD . Consideretur deinde utrumque brachium tanquam duplicem vectem moueri circa immotum fulcimentum E ; ita vt ad motum B versus D , alterum extremum nempe C appropinquetur ad A ; & è conuerso , ad motum D versus B , ipsum A appropinquetur ad C . Tunc dicimus nucem , quæ quidem tanquam pondus ab utroque extremo duplicis vectis AC pellitur ac repellitur , faciliè comprimi , ac tandem nimia compressione confringi , siquidem dum magis ac magis ipsa extrema AC ad inuicem appropinquantur , necessariò quæ inter ipsa intercipitur , nucem comprimunt , & comprimendo confringunt .

Addit autem primò Aristoteles , quo lōgiora fuerint brachia huius instrumenti à connexionē ipsorum seu fulcimentō ad extrema , quibus applicatur potentia : & ex alia parte , quo breuiora eadem brachia fuerint à cōnexionē seu fulcimentō ad nucem , eo facilius contrafractionem fieri ; ac proinde à minori potentia , ita vt id ipsum quod cum percussione fecisset pondus , præstetur à binis explicatis vectibus in contrarium sese conantibus , & comprimentibus ipsam nucem ; cuius resistentia gerit vicem ponderis .

Secundo verò addit Aristoteles , eò maiore fieri vectium seu brachiorum dilatationem , quò propinquius fulcimento , seu angulo connexionis eorum nux confringenda constituitur , quia nimirum vterque angulus ad verticem ab illis cōstitutus , per talem appropinquationem dilatatur (nempe AEC . & BED .) & cum angulo ipsa quoque brachia , quæ angulum constituunt , ita vt magis tunc distare oporteat inter se extrema AC , sicut & DB , cū maius sit latus , quod sub

maiori angulo subtenditur, vt constat ex 18. primi element. Dilatatur autem magis ipse angulus AEC, & consequenter alius ad verticem BED; Nam quò propinquius ei accesserit nucis magnitudo, cum qua constituit veluti triangulū AEC, eò minora seu breuiora euadūt duo latera, quibus ipse angulus E continetur, prædictamque magnitudinem tanquam basim subtendit. Duo autem latera super eandem basim quanto minora sunt, tanto maiorē angulum cōstituunt, vt patet per vigesimam primā primi. Magis ergo dilatatis brachijs seu vëstibus cum angulo cōnexionis eorū, propter maiorē approximationē nucis ad ipsum validius, ac facilius, vt docet Aristot. potētia quę in extremis manubrijs adhibetur, comprimere, atque adeò cōfringere intelligetur.

Quæ quidem consequentia duplici ex capite potest probari. Primo quia dilatatis brachijs, distantioribusque extremis eorum ab inuicem constitutis, ob maiorem propinquitatem nucis ad centrum, velocior postea consequitur motus compressionis eorum. Siquidem maiorem arcum in eodem tempore eadem potentia per talem motū describet. Licet enim eadem sit extensio, quæ deperditur per compressionem ex parte corporis compressi, aut contracti ubi-
cunque fiat ipsa compressio, semper tamen quò proprius centro fit, & amplius brachia dilatata supponit, eo maiorem arcum extrema brachiorum, in quibus applicatur potentia comprimendo percurrunt.



Sint namq; tanquam brachia dilatata duæ diametri AD, & CB in circulo ABCD sese inuicem bifariā intersectantes, & connectentes in cētro E. Extensio verò corporis cōfringēdi, quæ per compressionē deperditur, sit spatium AF, quod pri-

primò constitutur inter extrema AC eorundem brachiorum. Et à puncto F per centrum E ducatur recta FG, quæ locum, vel situm designat, in quo constituendum est brachium AD post ipsam compressionem, ita vt extremum A transferatur in F, & extremum D transferatur in G. Tunc certè ipsum extremum D per huiusmodi translationem, æqualem arcum, aut lineam describeret ipsi spatio AF. Siquidem æquales anguli ad centrum circuli, æqualibus arcibus insistant, vt patet per 26. tertij. Anguli autem constituti ad centrum E per ipsas rectas AD, & FG, nempe AEF, & GED, sunt æquales per 15. primi, eo quod sint ad verticem. Quando igitur corpus confringendū collocatur inter extrema brachiorū præfati instrumenti longissimè a centro, tantū spatium in fractione percurrunt ipsa extrema, quantū alia opposita in quibus applicatur potentia.

Quod si corpus confringendum collocetur propinquius centro, seu connexioni brachiorum E, ita vt extensio eius AF, quæ per contractionem deperditur, constitutur exempli gratia in HI, A translato in H super eandem lineam AD, & F in I versus lineam CB; & per ipsum punctum I, & centrum E excitetur alia diagonalis KL, quæ pariter designet locum, ac situm quo transferri debet idem brachium AD post contractionem: Tunc maiorem arcum inueniemus describitura in ipsa compressione extrema DA, quam sit spatium HI, quod deperditur per illam. Quandoquidem A transferetur in K, & D in L: Spatium autem DL continet spatium DG, sicut spatium AK continet spatium AF æquale ipsi HI, quo propterea maius est ipsum AK, & DL, quæ per rationem suprafactam sunt æqualia. Rursus verò si excitetur linea recta à puncto A ad punctum K, & considerentur ista duo triangula, nempe HEI, & AEK, inuenientur habere latera proportionalia, circa eundem angulum E, basesq. similis rationis per quartam propos. sexti. Cumque basis AK longioribus lineis subtendatur ipsi angulo E, maior erit, quàm basis HI eidem angulo subtensa breuioribus lineis EH, & EI.

Quod autem exemplificauimus in brachio, seu vecte AD, idem etiam procedit de brachio CB. Et quod de brachijs in medio ad inuicem connexis, ac bifariam sese interfecantibus dictum est, accommodari potest in alijs non ita se habentibus, seu alibi connexis. Nam semper verificabitur ad maiorem approximationem corporis confringendi ad centrum connexionis eorum, seu fulcimentum, magis ipsa brachia dilatari, maiusque deinde spatium eodem tempore, comprimendo percurrere, quod est velocius agere, vnde & validius colligitur frangere, vt dicebamus ex Aristotele.

Alia verò ex capite eadem consequentia probatur, quia cum vectis beneficio eandem proportionem habeat potentia ad pondus leuandum, aut deprimendum, quam habet eius distantia à fulcimento ad distantiam ponderis ab eodem fulcimento. vt quæst. 3. ex Aristotele, & Archimede probauimus: quanto magis corpus confringendum ad punctum connexionis, seu axem E, quo vterque vectis huius instrumenti fulcitur, appropinquabitur; tanto maior erit excessus distantiae ipsius potentiae motricis digitorum in extremis BD applicatis, respectu distantiae ipsius nucis, aut alterius corporis confringendi ab eodem puncto E. Proindeq. tanto maior pariter erit vis eiusdem potentiae ad deprimendum, vel confringendum in tali situs proportionem, præsertim cum duo concurrant vectes duplicantes suas vires, quod erat Philosophi intentum.

Quæstio Vigesima tertia.



VR si duo extrema in rhombo puncta duabus ferantur lationibus, baudquaquam æquale utrumque eorum pertransit rectam, sed multò plus alterum? Idem autem est sermo, cur quod super latus fertur, minus pertransit quam ipsum latus? Illud enim diametrum minorem hoc vero maius latus. Et hoc quidem vnica illud verò duabus fertur lationibus. Feratur enim ex ipsa AB, A qui.

quidem ad ipsū B, B verò ad ipsū D eadem celeritate. Feratur autē & ipsa AB in ipsa AC iuxta CD eadē celeritate cū illis. Necessē igitur est A quidem in ipsa AD diametro ferri, B verò in ipsa BC, & utranque simul pertransisse, & ipsam AB ipsū latus AC: latum enim sit ipsum A ipsam AE, AB autem ipsam AF, & proiecta sit FG iuxta ipsum AB, & ab ipso E similiter repleatur. Similiter igitur sit quod repletū est, ipsi toti: equalis igitur AF ipsi AE. Ipsa autem AB ipsam AF lata erit: in diametro igitur erit secundum K, & semper necesse est ipsum ferri secundum diametrum, & simul AB latus pertransit latus AC, & ipsum A diametrum pertransit AD. Similiter etiam demonstrabitur & ipsum B in ipsa BC diametrum lato, equalis enim est ipsa BE ipsi BG. Repleto igitur ab ipso G quod intus est, toti est simile, & ipsum B in ipsa diametro erit secundum laterum connexionem. Et simul latus pertransit latus, & B ipsum BC diametrum. Simul igitur A multo plus ipsa AB pertransit, & ipsum latus minus latus eadem lata celeritate: & ipsum latus maiorem quàm B pertransiuit una latū latatione. Quāto enim acutior fuerit rhombus, diameter quidem minor sit, AC autem maior, latus verò ipsius BC minus. Absurdum est enim (ut dictum est) id quod duabus fertur latationibus, aliquando ferri tardius illo, quo fertur unica, & utrisque positis equali velocitate punctis, alterum pertransire maiorem. Causa autem est quoniam ei, quod ab obtuso fertur angulo, amba ferè contraria fiunt latationes, & illa secundum quam ipsum fertur, & illa secundum quam ipsum à latere defertur. Ei autem quod ab acuto fertur, accidit ut ad idem feratur. Coadiuuat enim quæ ipsius est lateris, illam quæ est super diametrum. Et quāto hunc quidem acutorem feceris, illum verò obtusum magis: hac quidem tardior erit, illa verò celerior. Ha quidem igitur magis contraria fiunt, quoniam obtusior sit angulus: illa verò ad idem magis, quoniam lineæ coarctantur. Ipsum enim A ferè ad idem fertur secundum ambas latationes. Coadiuuatur igitur altera & quāto sanè acutior fuerit angulus, tantò magis ipsum A ad contrarium, ipsum enim ad B fertur, latus autem defert ipsum ad D. Et quāto sanè obtusior fuerit angulus, magis contrariae fiunt latationes, rectior enim efficitur linea. Si autem omnino recta fieret penitus utique essent contrariae. Latus verò secundum unicam latam latationem à nullo prapeditur, rationabiliter igitur maiorem pertransit.

C O M M E N T A R I V S :

DVas hic peracutas difficultates proponit Aristoteles examinandas, easq. ingeniosissimas, quas accuratè admodum contemplari, ac diligentissimè ponderare operepretium est, cum non parum confert ad mistotum motuum naturam, variamq. proportionè internoscendam prout mechanicos maximè docet.

Prima difficultas est, cur si duo puncta extrema vnius lateris in rhombo duabus simul ferantur lationibus cum eadem velocitate, vnum maius, alterum minus spatium percurrit. Ad cuius rei explicationem supponimus ex. 31. definitione primi Euclidis Rhombum esse figuram quadrilateram quidem, & æquilateram, sed non rectangulam; quippe quæ duos angulos habet acutos, duos verò obtusos. Si



igitur in Rhombo ABCD, cuius acuti anguli sint A & D, obtusi verò B & C, duo extrema puncta lateris AB, nempe ipsum A, & ipsum B, æqua velocitate duabus ferantur lationibus, vna qua punctum A super idem latus feratur versus B, & B feratur versus A: altera verò qua dū ipsa duo puncta sibi obuiam procedunt, simul cum toto latere AB, moueantur versus latus CD, ita vt semper latus, seu linea AB, ipsi CD sit parallela, descendatque per latera AC, & BD quousque coincadat

cum eadem CD: Cum ex duabus lationibus, eadem semper laterum proportionem seruata, recta quædam linea producatur, vt supra demonstratum est ex eodem Aristotele. 1. par. tex. 6. vtraque puncta prædicta eandem laterum ipsius rhombi proportionem in suo motu seruando, propriam rectam

rectam lineam describent: A quidem lineam AD, B verò BC: quæ nimirum erunt diametri eiusdem rhombi. Cumq. in rhombo diametri non sint æquales, sed quæ obtusis angulis opponitur, vt AD maior sit ea, quæ opponitur acutis, vt BC: siquidem maius latus maiorem angulum subtendit per 18. primi; hinc est, vt ex ipsis duobus punctis AB, duabus lationibus eodem tempore, eademq. velocitate promotis, vnum quippe maius spatium, nempe maiorem diametrum, alterum verò minus, seu minorem diametrum percurrat. Quod mirum proculdubio omnibus causam ignorantibus videri solet.

Verùm quod linea recta, quam describere diximus punctum A, sit ipsa diameter AD; quam verò punctum B, sit diameter BC, facile demonstratur ex eo. Nam si punctum A, proprio motu delatum fuerit exempli gratia vsque ad punctum E medium ipsius lineæ AB, & linea tota AB eodem tempore, æquale spatium pertransierit versus CD, ita vt alterum eius extremum peruenerit ad punctum F, medium lateris AC; alterum verò ad punctum G, medium lateris BD: quoniam AF æqualis est ipsi AE, si compleatur figura similis toti, productis lineis EH, & FG per punctum medium K, nempe rhombus AEKF, similis rhombo maiori ABCD per 24. sexti elementorum; erit recta FK æqualis oppositæ AE, & AF ipsi EK; proindeque punctum A cum duabus translatus sit lationibus semper proportionalibus iuxta rationem æqualitatis; quam latera rhomborum habent inter se, vtique translatus erit super rectam AK in ipsum K, quod est punctum medium diametri AD; Cuius reliquum dimidium conficiet, tum ex motu suo ab E vsque ad B, tum ex alieno ab F vsque ad C, ita vt tandem perueniat ad punctum D.

Eodem pacto, quod dictum est de puncto A, applicari potest in puncto B. Nam si hoc cum eadem velocitate moueatur versus A, sicut linea AB versus CD, quo tempore per proprium motum percurrisset vsque ad E, alieno motu peruenisset vsque ad G; æqualesq. forent lineæ BE, & BG;

& BG; productisque lateribus, EH, & GF, rhombus EBGK per illa constitutus, similis esset rhombo continenti ABCD: Ideoque GK æqualis oppositæ BE, & BG æqualis EK. Quare punctum B utroque motu translatum cum eadem proportionem æqualitatis, movebitur motu mixto super diametrum ipsius rhombi, & quo tempore transferri deberet in E & in G, transfertur in K, quod est punctum medium diametri HC; cuius reliquum dimidium conficiet per motum proprium ab E usque ad A, & alio à G usque ad D; ita ut tandem reperiatur in C. Cum igitur spatium BC, ut dicebamus, minus sit quam spatium AD eodem tempore peragratum à puncto A, difficile videtur qua ratione id possit contingere, postquam ita rem se habere constiterit.

Huius tamen euentus causam soluendo primam partem quæstionis, primamq. difficultatem, eam esse inquit Aristoteles, quia cum in rhombo duo sint obtusi anguli, duo verò acuti, lationes illæ, quibus fertur punctum, quod ab obtuso angulo discedit, ut in proposita figura est punctum B, sunt inter se omnino ferè contrariæ, cum una, verbi gratia sursum penè tendat versus A, altera verò deorsum versus D: Quo fit ut mutuo præpediantur, ac retardentur. Lationes verò quibus fertur punctum, quod ab acuto angulo discedit ut A; quamvis diuersæ in se sint, nullo tamen modo constituuntur contrariæ, cum ad eandem ferè partem pergere teneantur, parumq. aut minus semper dissent inter se termini ad quos tendunt. Quare potius ipsæ ad inuicem iuvantur, quàm aliquo modo impediuntur. Rationi autem consentaneum est, ut punctum contrarijs ferè lationibus sese impredientibus latum, minori interuallo in eodem tempore feratur, quàm punctum, quod duabus lationibus sese mutuo adiuuantibus asportatur; mirumque propterea non esse si hoc maiorem diametrum, illud verò minorem eodem tempore percurrat. Vnde etiam sequitur, ut quò acutiores constituentur anguli A, & D, proindeq. obtusiores B, & C; tardius ac minori interuallo feratur ipsum B; cele-

rius verò ac maiori spatio ipsum A. Quandoquidem ex maiori angustia angulorum magis vniuntur latera, magisq. ad vnum, & idem terminum appropinquantur.

Quam Aristotelis solutionem pluribus euertere conatur Baldus, quæ summatim in hoc tantum redigi possunt, quòd ex ea sequeretur, idem similiter dicendum esse de duobus punctis vnius lateris in quadrato, si duabus simul lationibus mouerentur eo pacto quo in rhombo Philosophus descripsit; vt scilicet punctum, quod duabus lationibus fertur, ambabus deorsum tendentibus super descendentem diametrum ipsius quadrati, velocius feratur, quàm punctum, quod duabus lationibus fertur, vna deorsum tendente, altera verò sursum super diametrum transuersam. Id quod per se falsum esse constat; cum æquali tempore, æquale spatium vtrumque punctum conficeret. Siquidem in quadrato vtraque diameter alteri ad inuicem semper est æqualis. Idemq. confirmat in rhombo inuerso. Nam sequeretur, punctum duabus lationibus latum deorsum per minorem diametrum, citius ferri, quàm punctum, quod duabus lationibus, vna sursum altera deorsum tendente pertransiret diametrum transuersam, nempe maiorem, Quod quippe absurdum esse liquet.

Verumenimverò Baldus in his propriam potius apprehensionem, quam Aristotelis solutionem evertit. Porro hæc non fundatur in eo, quod est sursum, aut deorsum puncta ipsa duabus lationibus ferri, vt ipse supponit, quamuis ad explicationem prædicti motus, doctrinæq. Aristotelis, omnes vtamur exemplo diuersarum positionum, vt sursum, aut deorsum: sed abstrahendo à quacumque positione, tota solutionis ratio ab Aristotele constituitur in maiori vnione, seu propinquitate laterum acuti anguli, & in maiori separatione, seu distantia laterum anguli obtusi. Nam per ipsa, latera anguli obtusi; punctum in diuersas longè partes rapitur, quasi omnino contrario motu: per latera verò anguli acuti, in vnam ferè partem, quasi per eundem motum, qui propterea velocior constituitur, vt dictum est.

Deinde

Deinde propria Baldi solutio, quam ex proprijs causis ipse ait esse desumptam, nullam causam affert propositi effectus ad diluendam difficultatem, seu rationem dubitandi, sed rursus noua duntaxat via id ipsum demonstrat, quod Aristotelis argumento demonstratum est de veritate ipsius effectus, nempe punctum A per longiorem diametrum AD, illis duabus lationibus ferri eodem tempore, quo punctum B fertur super minorem diametrum BC; quod est citius moueri: nihil attingens de causa cur id contingat, seu ob quam punctum A, eodem tempore maiorem valeat lineam pertransire, proindeq. velocius moueri; id quod optimè fecit Aristoteles vt vidimus.

Secunda autem difficultas, quam Philosophus hac in quaestione proponit, est, cur in eodem rhombo punctum B, quod vt diximus sua sponte fertur super latus BA, totamq. eius longitudinem percurrit; minus quippe pertranseat spatium, quàm totum ipsummet latus BA, in quo fertur versus CD; imò quàm sit ipsummet latus BA, quod percurrit. Quandoquidem punctum B non conficit nisi spatium BC: totum autem latus BA conficit spatium BD, seu AC, quod maius est quàm BC. Sicut ipsum latus BA maius constituitur, quàm diameter BC in rhombo proposito. Totaq. ratio difficultatis in eo sita est, quoniam punctum B, duplici fertur latione, latus verò AB, vnica, & vtrunque pari velocitate: Quamobrem potius punctum B, quàm latus BA, sequeretur maius spatium pertransire. Accedit quia punctum B verè totum latus BA, in quo fertur percurrit eodem tempore, quo vehitur cum ipsomet latere versus CD; ideoque satis arduum videtur, minus ipsum B spatium pertransire quàm sit latus BA, in quo fertur.

Sed vnde hæc dubitandi ratio desumpta est, inde pariter adest ratio difficultatem soluendi. Etenim hoc ipso, quod punctum B feratur duplici latione explicata super diametrum BC, latus verò BA vnica vel simplici motione vehatur versus CD, hoc quidem à nullo motu contrario præpe-

præpeditur, illud verò contrarijs ferè lationibus detinetur ne velocius eodem tempore moueatur, maiusque proinde spatium valeat peragrarè. Quod perspicuè ex dictis iam potest patere.

Quæstio Vigesimaquarta.



DUBITATUR, quam ob causam maior circulus aequalem minori circulo conuoluitur lineam, quando circa idem centrum fuerint positi: Scorsum autem reuoluti, quemadmodum alterius magnitudo ad magnitudinem se habet alterius, sic & illorum ad se inuicem fiunt lineæ. Præterea vno etiam & eodem utrisque existente centro, aliquando quidem tanta fit lineæ, quam conuoluuntur, quantum minor per se conuoluitur circulus, quandoq. verò quantam maior. Quod quidem igitur maiorem conuoluitur maior, manifestum est, angulus enim sensu videtur esse cuiusque circumferentia propriae diametri, maioris circuli maior, minoris minor, quamobrem eandem habebunt proportionem secundum sensum ad se lineæ, secundum quas fuerint conuoluti. Verumenimverò quod etiam aequalem conuoluuntur, quando circa idem fuerint positi centrum, manifestum est, & sic fiunt aliquando quidem æquales lineæ, secundum quam maior conuoluitur circulus, aliquando verò secundum quam minor. Sit enim circulus maior quidem, ubi DFC, minor verò ubi EGB, utriusque autem centrum A. Et quam quidem magnus per se conuoluitur, sit ubi FI, quam verò per se minor, ubi GK, æqualis AF. Si igitur minorem mouero, idem mouens centrum ubi A, maior autem sit annexus: quando igitur AB fuerit recta ad ipsam GK, simul & AC sit recta ad ipsam FI: quamobrem æqualem semper translata erit, ipsam quidem GK, ubi est GB circumferentia, ipsam verò FL, quæ est ubi FC. Si autem quarta pars æqualem conuoluitur, manifestum est, quod totus circulus toti circulo æqualem conuoluetur. Quare quando BG lineæ ad ipsum peruenerit K, & ipsa FC circumferentia erit in ipsa CL & vniuersus erit conuolutus circulus. Similique modo si magnum mouero, illi paruum annexens, eodem existente centro, simul cum AC ipsa AB perpendiculum & recta erit: hac quidem ad ipsam FI, il-

FL. illa verò ad GM. Quamobrem quando hac quidem ipsi GM pertransuerit, illa verò ipsi FL, & rursum facta fuerit recta ipsa FA ad ipsam FL, & ipsa AC rursum recta, velut à principio erant in ipsis MI. Hoc autem neque alia intercedente mora maioris ad minorem, ubi scilicet per aliquod temporis spatium staret in eodem puncto, neque transsiliante minore aliqua punctum, maiorem quidem aequalem minori pertransire, hunc autem maiori, absurdum est. Præterea unica etiam semper existente motione, centrorum motum interdum quidem magnam, nonnunquam verò minorem conuerti, admirandum est. Idem enim celeritate eadem latum aequalem natum hoc est pertransire: eadem autem celeritate utroque modo aequalem licet mouere. Principium autem sumendum est circa istorum causam, quod eadem potentia, & equalis hanc quidem tardius mouet magnitudinem, illam verò celerius. Si enim fuerit quippiam, quod à seipso moueri, natum non sit, si simul & illud mouerit, quod natum est moueri, tardius mouebitur, quam si ipsum per se moueretur. Et si quidem natum fuerit moueri, non simul autem moueatur, similiter se habebit. Et impossibile certè est, plus moueri quam mouens, non enim suam ipsis mouetur motionem. Sit igitur e reclus maior ubi A, minor autem ubi B, si minor maiorem impellet non reuolutum ex se, manifestum est, quod tantum ipsis recta maior pertransit, quantum est impulsus. Tantum autem est impulsus, quantum paruum est motus aequalem igitur ipsis recta pertransiuerunt. Necesse igitur est si reuolutus minor maiorem impellet, reuoluti simul cum impulsione; tantum autem, quantum minor reuolutus est, si nihil ipse sui ipsis motione mouetur. Quomodo enim & quantum mouit, tantum motum esse necesse est, quod mouetur ab illo. Sed profectò paruum circulus tantum seipsum circulariter mouit, quantum est pedalis quantitas (tantum enim sit id, quod motus est) & magnus igitur tantum motus erit. Similique modo si magnus paruum mouebit, motus erit paruum quemadmodum maior. Per se autem motus illorum utrumlibet, siue celeriter, seu tardè eadem velocitate, statim quando maior natus est circumferri lineam, quod difficultatem facit, quod non similiter faciunt quando fuerint connexi. Hoc autem est, si alter ab altero moueatur, non quam natus est, neque peculiarem motionem: nihil enim refert circumponere, & annexere, aut coniungere utrumlibet alteri. Similiter enim quando hic quidem mouet, ille verò mouetur ab illo, quantum utique mouerit, alter, tantum

alter mouebitur. Quandoquidem igitur adiacens mouerit, aut propensus, non semper conuoluitur, quando uerò circa idem positis fuerint centrum, alterum ab illo semper conuolui necesse est. Sed nibilominus non suam ipsius motionem mouetur alter, sed uelut nullam haberet motionem: & si habuerit, illa autem non utatur, tantundem accipit. Quandoquidem igitur magnus mouerit sibi alligatū paruum, paruus mouetur quantum ille: quando autem paruus, rursus magnus quantum iste, separatus autem uterque seipsum mouet. Quod autem eodem existente centro, & mouente eadem uelocitate, accidit inaequalem illos pertransire lineam, paralogismo sophisticè utitur is, qui dubitat: idem enim ambobus est centrum, uerū per accedens, ueluti musicum, & album. Esse enim utriusque circuli centro non eodem utitur. Quandoquidem igitur mouens fuerit paruus, ut illius centrum, & principium: quando uerò magnus, ut illius. Non igitur idem simpliciter mouet, sed est quo modo.

COMMENTARIUS.

Questio hæc admirabilem complectitur difficultatem, utpotè instituta circa rem, qua uix credi posset, nisi ante oculos obseruaretur: Vnde inter cæteras præcipua ac omnium difficillima existimatur, multumq. pariter sicut præcedens ad mixti motus naturam explorandam conducit. Causam igitur sciscitatur Aristoteles, cur duo circuli alter altero maior circa idem centrum simul annexi, & coaptati, si secundum absidem uoluentur (ut plaustrorum progredientium rotæ) ambo æquale pertransiant spatium: seorsum uerò separati, si eodem pacto circumuoluantur, non ita sed maior circulus maiorem lineam, minor uerò minorem percurrat iuxta proportionem circumferentiæ unius ad circumferentiam alterius? Quod ut distinctius obseruetur addit Aristoteles, circulos ipsos circa idem centrum coniunctos, quandoq. in circumuolutione tantam lineam spatij pertransire, quantam seorsum pertransiret circulus minor: quandoque uerò quantam eodem pacto percurreret circulus maior. Etenim, ut quisque experiri potest,

test, si ex ipsis duobus circulis simul circa idem centrum coniunctis volutetur minor secundum absidem suam super aliquod planum, ad motum ipsius conuoluetur simul & maior super aliud planum; sed vtrique linea ab ipsis descripta, æqualis erit ei quam describeret ipsemet circulus minor si solus per se ac seorsum volutaretur. E contra verò si super planum eodem pacto volutetur secundum absidem suam circulus maior, & ad motum ipsius circumuoluatur etiam circulus minor, vtrique linea recta ab ipsis descripta æqualis erit ei quam per se volutatus describeret idemmet circulus maior.

Manifestum autem esse, ait Aristoteles, circulum maiorem seorsum reuolutum, maius spaciū, seu maiorem lineam pertransire, quàm pertranseat circulus minor. Idque ex eo, nam sicut sensu constat, ambitum cuiusque circuli esse, atque constitui per ipsam circumferentiam, seu circumuolutionem propriæ diametri eiusdem circuli, maioris quidem maiorem, minoris verò minorem: ita sensu pariter dignoscitur eandem inter se proportionem habere lineas, quæ per circumuolutionem ipsorum circulorum describuntur in plano; ut scilicet linea descripta à maiori circumferentia sit maior, quæ verò à minori describitur, sit minor. Vbi autem vsi sumus nomine (ambitus) textus habet (angulus) cuius propria significatio difficile cohæret cum sensu ipsius orationis, proindeq. non paruam suspicionem præbuit erroris librariorum, qui fortasse angulum pro ambitu scripserunt: Cum alioquin vox ambitus contextui planè cohæreat, explicetq. magis ac breuius quod auctor intendit.

Veruntamen si sensum eiusdem textus prout sonat ipsa vox (angulus) explicare velimus, non incongrue ad hoc totus Aristotelis discursus potest reduci, ut dicat, sensu constare, angulum cuiusque circuli (constitutum scilicet ex circumferentia propriæ diametri, & ex ipsa diametro) esse quidem maiorem si circulus sit maior, minorem verò si circulus sit minor. Atque ex hoc fieri, ut ipsa circumferentia, seu ambitus circuli maioris sit pariter maior, minoris verò,

fit minor, iuxta maiorem, vel minorem remotionem ipsius ab altero latere nempe diametro, cum qua constituit angulum. Ac propterea in circumuolutione ipsorum circumulorum, etiam ad sensum constare, eandem inter se proportionem habere lineas, quas ipsi circuli super planum describunt, vt scilicet linea descripta à maiori iuxta maiorem circumferentiam sit maior, quæ verò à minori describitur iuxta propriam circumferentiam sit minor. Sumpsimus autem angulum circuli de mente Aristotelis secundum præfatam acceptionem, quam latius explicuimus quæst. 8. nè maxima ei tribuatur improprietas locutionis explicando angulum pro Sectore, vt Baldus, vel pro arcu qui subtenditur angulo, vt Blancanus: Cum vnumquodque istorum, proprium habeat vocabulum, quod Aristoteles non ignorabat, eoq. vsus fuisset, si id ipsum per illud significare voluisset.

Vt terius verò quod prædicti circuli quando sunt simul coniuncti circa idem centrum, æquale ambo pertranseant spatium, siue maius illud sit, vt rotando secundum absidem circuli maioris, siue minus secundum absidem minoris, hoc ferè pacto probat Philosophus.



Sint circa idem pūctum A ipsi duo circuli coniuncti, maior quidē BCDE, minor verò FGHI. Sintque diametri maioris BD, & EC; minoris verò FH, & IG sese

inuicem intersecantes ad angulos rectos in cenro A. Ideoque quadrans circuli maioris sit CD, minoris verò GH. Deinde constituamus virunque circulum ad dexteram simul moueri cum suo communi centro, rotando alterum

quidem per se super rectam lineam DK, alterum verò ad motum illius, describendo aliam rectam huic parallelam, quæ sit HL. Rursus constituamus, maiorem circulum per se moueri secundum absidem quadrantis CD super lineam DK, ita vt aliquando punctum C perueniat in M, percurrendo spatium DM æquale ipsi CD. Tunc semidiameter AC constitueretur perpendicularis ipsi DK, essetq. vbi NM, puncto C translato in M, & puncto A translato in N. Cumque punctum G, circuli minoris, sit in linea AC, necessariò post huiusmodi quadrantis rotationem constitueretur in loco vbi Q, ita vt semidiameter AG circuli minoris transferatur in NO. Ad reuolutionem igitur vtriusque circuli secundum absidem maioris, quadrans ipsius maioris circuli conficiet spatium DM; quadrans verò minoris circuli, quod simul cogitur conuolui, percurreret spatium HO, quod æquale est ipsi DM per 34. primi element. Idemque quod de quadrantibus dictum est verificari poterit de totis ipsis eorum circulis. Constat ergo minorem circulum eodem tempore ad motum maioris circa idem centrum conuolutum, æqualem lineam peragrarè ipsi rectæ quam maior circulus per se motus pertransit.

Sed nec minus constabit è contra ad rotationē propriam minoris circuli secundum absidem, maiorem circulum ei annexum, æquale pariter spatium, & non amplius percurrere. Rotetur enim motu proprio minoris circuli quadrans GH super rectam HL, ita vt punctum G aliquando perueniat in P, percurrendo spatium HP, æquale ipsi GH; & centrum A consequenter constituatur in Q, existente spatio AQ æquale ipsi HP. Tum excitetur linea QPR, perpendicularis ipsis planis HL, & DK; eritq. punctum C in R, sicut punctum G in P, & punctum A in Q. Siquidem hæc tria puncta sunt in eadem recta, vel semidiametro circuli maioris. Iam igitur post huiusmodi rotationem, quo tempore quadrans minoris circuli confecit spatium HP; quadrans maioris circuli conuoluti ad motum illius, confecit spatium DK, quod æquale est ipsi HP. per

HP. per eandem 34 primi. Quod & de tota circumferentia vtriusque circuli demonstrari potest, non absque magna omnium admiratione, quibus fortasse videretur, maiorem circum, semper maiorem lineam describere, quàm circulus minor in ipsa rotatione.

Admirationis autem ratio ex eo maximè augetur apud ipsum Philosophum, quòd cum circulus maior minorem lineam pertransit, quàm sit eius peripheria, nulla vel minima intercedit mora, in qua ipse quiescat. Ac vice versa, cum circulus minor maiorem lineam describit, nullam transiliat, vel modicam partem, quam percurrendo non attingat. Præterea quòd vnica existente motione vtriusque circuli connexi, centrum commune commotum, interdum quidem maiorem, interdum verò minorem lineam percurrat iuxta absidem, scilicet maioris, aut minoris circuli secundum quam mouetur: cum tamen idem eadem celeritate latum, æqualem lineam regulariter debeat pertransire.

Pro solutione igitur quæstionis ad explicandam causam tam mirifici effectus, duo supponit Aristoteles fundamenta. Vnum est eandem, vel æqualem potentiam, tardius quidem mouere vnā magnitudinem, quàm aliam. Licet enim illæ æquè ex se mobiles sint, si tamen vna simul cum alia ad motum inepta vel difficili reperiatur coniuncta, tardius mouebitur, quàm illa, quæ reperitur soluta, vel quàm ipsa met seorsum moueretur ab eadem potentia. Quod si magnitudo, quæ moueri debet ad motum alterius, cui reperitur connexa, mobilis quidem facilè ex se sit, nihil tamen ex se moueatur, vel ad motum alterius conferat, perinde est, ac si minimè apta esset ad motum: vnde & altera, quæ simul cum ipsa moueri debet, tardius non minus mouebitur.

Alterum verò fundamentum à Philosopho suppositum illud est, quòd impossibile profectò existimandum sit aliquid plus moueri, quàm mouens à quo mouetur; Siquidem non sua, sed illius motione ciatur, nullaq. propria vitur mobilitate intrinseca, & actiua, qua motus possit augeri.

Quibus positis Aristoteles quæstionem soluendo prædictum effectum ex eo inquit contingere. Nam si circulus maior non moueatur nisi ad motum minoris cui est annexus, tantum spatium poterit pertransire, quantum delatus fuerit ex impulsu illius: tantum autem deferri poterit quantum minor ipse circulus ex se motus impulerit, & non amplius. Quomodo enim & quantum ex se motus fuerit mouens, tantundem necesse est moueri, qui mouetur ab illo. Aequalis igitur viam vterque circulus rotando conficiet dum maior mouetur ad motum minoris. Idemq. infert contingere si minor circulus moueatur ad motum maioris sibi annexi, & eodem pacto secundum absidem lati. Nam tantum ipse minor circulus, & non minus moueri poterit, quantum à maiori deportabitur. *Rapitur enim iugiter ab illo in sua rotatione vique ad vltimum terminum, æqualemq. propterea lineam rectam cū illo describet, quamuis minorem peripheriam obtineat.* Quod si vtrumlibet ipsorum circulorum seorsum ex se secundum propriam absidem eadem velocitate moueatur, tunc maior circulus maiorem rectam, minor verò minorem sua volutatione conficiet iuxta mensuram secundum quam natus est circumferri.

Cæterum eam, ac profectò arduā difficultatem sibi obijcit Philosophus. Nam quæ dicta sunt, rectè ac facilè intelligerentur procedere, si circulus qui mouetur ad motum alterius, non esset cum illo concentricus, sed alio modo compactus, eiq. connexus. Siquidem moueri non posset circa proprium centrum, nec proinde peculiarem, ac proportionatam sibi motionem vendicare, sed tantum circa alienum centrum ipsius circuli deferentis conuerti. Non secus ac qualibet alia magnitudo adiacens eidem circulo deferenti, vel ei extra centrum quoquo modo appensa; tantum scilicet spatium transmittendo, quantum ipse circulus, ad cuius motum deferitur, pertransierit. Verùm cum hic sermo sit de duobus circulis concentricis, qui nimirum circa idem commune centrū simul conuertuntur, non videntur præfata, & ab ipso Philosopho adducta rectè procedere, aut con-

clu-

cludere. Quoniam sicut circulus delatus, non minus ac deferens conuoluitur circa proprium centrum, ac simul cum illo progreditur modo sibi connaturali; ita nec minus proportionatum sibi interuallum rotando videtur posse transmittere, describendo lineam rectam æqualem suæ peripheriæ seu absidi secundum quam conuoluitur.

Huic tamen difficultati occurrit Philosophus respondendo, quòd licet ipsi circuli supponantur concentrici, utpotè circa idem pariter centrum coniuncti, ac reuoluti, non propterea sequitur, quod ambo debeant connaturali modo sua propria motione moueri. Nam qui ab altero fertur, mouetur ad motionem illius, non secus ac si nullam ad talem motum, seu rotationem circa idem centrum propriam aptitudinem obtineret quemadmodum reuera obtinet; quippe cum illa non utatur: Vnde tantum poterit moueri, quantum mouebitur is, à quo fertur, & cui est alligatus. Ideoq. inquit rectè concludi, inæquales circulos circa idem centrum connexos æquale spatium in sua rotatione transmittere, si vnus moueatur ad motum alterius.

Postremò illud hic adnotat Aristoteles, quòd licet vterque circulus circa idem centrum reuoluatur, non tamen simpliciter idem est vtriusque circuli centrum; sed vnus quidem per se, nempe deferentis, alterius verò per accidens, nempe delati. Quandoquidem deferens ex se utitur proprio centro dum circa illud mouetur, ipsumq. secum rapit dum ad vltiora super planum rectà progreditur: delatus verò per accidens circa illud conuertitur; sicut per accidens etiam progreditur ad motum deferentis. Quamobrem sophisticè ac deceptiua ratiocinatione inquit argumentari eos, qui absolutè, idem ambobus circulis esse centrum docent, eo quod ambo circa idem reuoluantur, ac inde inferunt, vtrumlibet proportionato, & connaturali motu circumferri debere: Quod est vnumquemque illorum æqualem rectam suæ peripheriæ rotando describere; nempe maiorem circulum rectam maiorem, minorem verò minorem, secus quàm de facto accidit propter causas explicatas.

Hucusque ex mente, ac doctrina Aristotelis, qui tamen multorum iudicio non videtur obiectam sibi difficultatem satis infringere, ut quæ adhuc magna ex parte maneat in suo robore. Nam hoc quod est proprio, vel alieno motu cieri, centrumq. circuli deferentis per accidens esse etiam centrum circuli delati, non tollit, utrunque circumsecundum absidem eodem pacto rotari, ac propriam lineam rectam in suo plano describere: unde videtur inferri eodem etiam pacto utramque lineam descriptam propriæ peripheriæ à qua describitur debere commensurari. Parum enim refert, circumsecundum per se rotari circa proprium centrum ad impulsu axis immediatè, vel per accidens mediante alio circulo, dummodo eodem pacto per circumuolutionem sue absidis circa idem centrum *lineam describat*, cui illa debeat commensurari. Sphæra namque super planum rotando siue proprio nutu, siue alieno impulsu, tardius, aut velocius, sicut omnes plani partes, per quas transit debet attingere; ita per totidem partes suas illis debet correspondere, & ad æqualitatem in transitu adaptari. Ratio verò utriusque esse potest, quia non datur instans, in quo absis ipsa, vel peripheria siue maioris, siue minoris circuli per nouum punctum proprium, ulterius non attingat nouum punctum lineæ rectæ super quam fertur; nec tempus in quo noua eius pars nouæ parti illius non commensuretur. Quapropter cum peripheria minoris circuli, vel non habeat tot partes, quod habet recta super quam fertur motu maioris circuli; vel certè partes ipsæ, quas habet non sint æqualis dimensionis, sed proculdubio minoris; non videtur quomodo ad contactum partis post partem mediantibus punctis, possit maior linea, ut est recta, ipsi minori, ut est circumferentia minoris circuli adæquari, nisi alia via, ac ratione id comprobetur, & ostendatur. Idemq. è conuerso applicari potest in contactu peripheriæ maioris circuli cum recta breuiori, quam conficit ad motum minoris circuli super absidem per se lati.

Ad diluendam igitur omnino prædictam difficultatem, quæ multorum quippe vexauit ingenia, & pene insuperabilis

lis apud aliquos extimatur, liceat aliunde totum negotium auspicari, nouumque aliquid in medium asserre in eiusdem Aristotelis, ac veterum Philosophorum principijs fundatum. Ac primò quidem stabiliatur, motum cuiuslibet circuli secundum absidem, esse motum quendam mixtum ex duplici latione; vna qua circumuoluitur, seu circa proprium centrum fertur in gyrum; altera verò qua ad motum axis rectà fertur super planum quo versus tendit ipsemet axis. Etenim si circulus stans absque sui rotatione raperetur super planū, verè moueretur motu recto, ac per vnicum punctum totam plani longitudinem super quam fertur attingeret. Si verò circumuolueretur absque progressu, aut latione axis, verè moueretur circulariter ac per omnes partes, punctaq. suæ peripheriæ, eandem plani partem, vel punctum in quo sistebat attingeret. Cum itaque ad motum axis rectà super planum trahitur, ac simul rotatur, ex vtraque latione mixtus quidam motus producitur, per quem tota circumferentia toti longitudini super quam fertur adaptatur.

Deinde verò stabiliatur lineam, quæ à circulo, prædicto modo describitur super planum, abstrahendo à rotatione spontanea, vel coacta ad motum alterius, ex natura sua non describi iuxta mensuram lationis, seu motus recti, qui simul cum axe conficitur in anteriora, & cuius virtute describitur. Etenim ipsa describi posset ab eodem circulo etiam sine rotatione, per vnicum punctum vt diximus, non autem sine recta aliqua latione. Quamobrem in descriptione ipsius lineæ rectæ super planum, per se, & absolutè loquendo, non habetur ratio de motu circulari, nec de spatio circulariter peragrato ab ipso circulo, sed de motu recto, ac spatio, quod ipse circulus simul cū axe percurrit, & ad cuius semper mensuram ipsa recta linea excitatur. Quamuis per accidens contingat, circulum deferentem, vel alium ex se, ac seorsum rotando, tantum spatium simul cum axe recta transmittere, quantum ipsemet circulariter eodem tempore peragrarè valuerit. Quia scilicet cum tota progressio à sua ipsius ro-

tatione dependeat, sicut motus rectus progressionis necessario proportionatur motui circulari à quo pendet, ita etiam linea descripta per talem motum proportionari, & adæquari debet lineæ descriptæ, seu peragratae per circuitum.

His itaque sic stabilitis, atque suppositis tanquam certis, & evidentibus, ad primam partem quæstionis simul, ac difficultatis propositæ responderetur, circulum delatum semper æquale spatium, ac circulum deferentem super planum rotando, rectà transmittere, siue maior eo fuerit, siue minor; quia illud non transmittit ex vi suæ rotationis, ac iuxta mensuram suæ circumferentiæ, sed ex vi sui raptus, & asportationis. Siquidem tantum rectà progreditur, quantum à deferente rapitur, & asportatur, licet aliàs eodem tempore maiorem, aut minorem simul peragrat circuitum, de quo nulla per se haberi debet ratio, ut præmonuimus. Vnde nec requiritur, ut eius motus circumvolutionis sit æqualis motui recto, nec ut linea recta, quam percurrit sit æqualis circumferentiæ secundum quam rotando conuoluitur.

Ad secundam verò partem quæstionis responderetur, circulum deferentem, vel alium, qui seorsum per se super planum circumuoluatur, quò maior ipse fuerit, maius spatium rectà in sua reuolutione percurrere, quò verò minor, minus. Quia cum tota eius progressio fiat ex vi propriæ rotationis, non nisi æqualem suæ peripheriæ lineam in plano potest describere; tantum scilicet cum suo axe rectà progrediendo, quantum rotatur; ac tantundem spatium percurrendo, quantum fuerit circumuolurus. Quæ responsio ad utramque difficultatis, seu quæstionis partem, est omnino ad mentem Aristotelis, ut patere potest ex eius propria, cui hæc maxime congruit, licet aliunde vim, ac distinctionem obtinuerit.

Adhuc tamen ex eisdem principijs respondèri potest, præfata nos experiri, quia minor circulus quando mouetur ad motum alterius maioris motu mixto iam explicato, magis participat de latione recta, quàm circulari; citius videlicet progrediendo quàm rotando. Cogitur enim rectà progre-

di iuxta progressum axis, ac circuli maioris, simulq. tardius rotari quàm ille, minus spatium eodem tempore transmittendo in sua minori circumuolutione: proindeq. per talem rotationem, rectam quandam lineam describit maiorem, quam sit eius circumferentia propria. E contra verò, nam cum circulus maior mouetur ad motum minoris, magis participat de latione circulari; quàm recta. Siquidem cogitur citius moueri circulariter quàm recta, cum eodem tempore maiorem ambitum, quàm circulus minor, æqualemque rectam debeat percurrere: ideoq. minorem rectam in sua circumuolutione describit, quàm sit eiusmet circumferentia qua illam attingit. Demum quia si circulus ex se, & independenter ab alio duplici hac latione feratur, siue maior sit, siue minor, semper æquè de vtraque participat. Etenim tantum recta progreditur quantum rotatur, nec aliunde rapitur, aut detinetur, vt magis vna quàm altera latione dimoueatur. Quo fit vt linea quam super planum describit, æqualis sit propriæ circumferentiæ eique secundum omnes partes commensurata.

Verum vt non solum causa tam admirabilis effectus, sed etiam modus quo ipse ab illa procedit expressius innotescat, ac difficultas vltimò proposita ex directo penitus euadatur, vltius dicendum est, circulum delatum non minus ac deferentem, omnia ac singula puncta, quæ sunt in linea recta super quam fertur per totidem puncta propria successiue attingere; ita vt in quolibet instanti per nouum punctum suæ peripheriæ attingat nouum punctum plani. Etenim cum planum à circulo attingatur per puncta, quæ sunt extremitates diametrorum, & vterque circulus ex infinitis diametris constet; imò diametri circuli maioris includant diametros minoris; tot erunt puncta terminatiua diametrorum in circulo minori, quot sunt in maiori, siue delato per quæ similiter omnia puncta sui plani valebit attingere.

Rursus dicendum est tam circulum deferentem, quàm circulum delatum omnes, ac singulas partes diuisibiles, quæ sunt in eadem linea plani per totidem partes suas successiue attingere.

attingere: hoc tamen discrimine, quod circulus deferens illas attingit commensuratiuè, & adæquatè, circulus verò delatus nonnisi inadæquatè. Sicut enim circulus deferens siue maior sit, siue minor constat ex infinitis partibus indeterminatis, quæ mediant inter infinita puncta, ita etiam circulus delatus, per easque non minus attingere poterit infinitas partes, quæ sunt in plano. Diximus tamen attingere inadæquatè. Nam contactus adæquatus, & commensuratus duarum quantitatum, fit per æqualem applicationem partium æqualium vtriusque quantitatis ad coexistendum simul in eodem spatio loci: partes autem æqualiter applicari non possunt per lationes inæquales, nam ea est inæqualitas in applicatione, quæ est in ipsis lationibus, siue lationes cadant in vtramque quantitatem, siue in alteram tantum.

Quapropter cum tota applicatio partium circumferentiæ ad attingendas partes plani super quod rotatur, fiat tum ex vi ipsius rotationis, qua successiuè ipsæ partes inclinantur ad illas, tum ex vi motus recti quo successiuè etiam progrediendo ad easdem perueniunt: hinc fit, vt si lationes ipsæ æqualiter procedant, quemadmodum in motu mixto circuli deferentis, aut alterius per se seorsum rotantis, æqualiter etiam alterius quantitatis partes, ad partes alterius applicentur, ac se tangendo ad inuicem commensurentur, & adæquentur: E contra verò si non procedant æqualiter ipsæ lationes, sed vna alteram excedat in velocitate, aut tarditate, vt in motu mixto cuiuslibet circuli delati, inæqualiter etiam partes ipsius ad partes plani applicentur, ac inadæquatè ad inuicem commensurentur.

Quod si non possit coexistere in spatio, exempli gratia bipalmari cum linea recta bipalmari arcus circumferentiæ palmaris, vel tripalmaris, quacunque rotatione ad inuicem applicentur; hoc profectò intelligitur in quiete, atque in termino ipsius motus: alioquin in transitu, ac successiuè id nullo modo repugnat, sicut nec punctum globi recta super planum delati post punctum ipsius plani, attingere partem diuisibilem eiusdem plani, eique coexistendo inadæquatè


& suc-

& successiue commensurari, vt omnes penè Philosophi fatentur. Maior enim vel minor velocitas, atque successio in transitu, & in partium applicatione, ex vi alterius lationis æquipollet maiori, vel minori extensioni ipsius quantitatis ad replendum æquale spatium ei, quod occupatur ab alia quantitate in eodem tempore, qua ratione dicuntur coexistere, ac inter se coaptari.

Res itaque sic est concipienda, vt in reuolutione circuli minoris ad motum maioris semper pars minor ipsius attingat partem plani maiorem, quia velocius transit per illam motu recto, quàm rotando æqualem dimensionem propriam possit exponere, atque secundum ipsam se applicare. Vnde quod illi deest extensionis compensatur velociori successione, & applicatione secundum lationem rectam ad coaptandum se parti maiori. Quod certè non est intelligendum fieri per raptationem, quasi per vnicum delati circuli punctum plura plani puncta, vel per eandem omnino circuli partem, plures plani partes attingerentur; sed per propriam rotationem. Quia ita rapitur, ac fertur super illud motu recto, vt simul quamuis tardius feratur latione circulari per quam partes, ac puncta ipsius peripheriæ iugiter mutantur. Cumque numerus infinitus infinitus punctorum, ac indeterminatarum partium vtriusque circuli sufficiat ad mutationem ipsam continuam, & correspondentiam, quam præstare debet infinitis punctis, ac partibus plani, nullum relinquitur inconueniens, minorem cumferentiam maiori spatio, plani ob disparem lationem, & applicationem inadæquatè in transitu coaptari. Idemque è conuerso dici potest in reuolutione circuli maioris ad motum minoris, vt scilicet semper pars maior ipsius correspondeat parti minori in plano super quod fertur, quia tardius transit per illam motu recto, quàm rotando æqualem sibi dimensionem possit attingere. Siquidem velocius rotando, quàm progrediendo, nequit attingere tantam dimensionem in plano, quantam ipse exhibet per circumuolutionem. Vnde quod ei superest extensionis circularis compensatur tardiori successione, & applicatione.

cationem secundum lationem rectam ad proportionandum se parti minori. Atque hæc in re tam ambigua si minus demonstrasse, saltem indicasse, vel tentasse sufficiat.

Ad exactius denique percipiendam naturam mistorum motum, non abs re fuerit affinem aliam quæstionem diluere, quæ fortasse non minus admirabilem, ac ferè incredibilem supponit experientiam. Nimirum cur in prædicta latione duorum circularum circa idem centrum secundum absidem circuli maioris, aliqua puncta circumferentiæ maioris, minus progrediantur, quam correspondentia sibi puncta circumferentiæ minoris; aliqua verò magis. In maiori enim circulo puncta vnius semicirculi minus progrediuntur, quam puncta semicirculi correspondentis in circulo minori. Contra verò, puncta alterius semicirculi magis progrediuntur in circulo maiori, quàm in minori, vt de motu particulari Epicyclorum docere solent Astronomi. Quod maximè videtur admirandum cū vterque circulus simpliciter, ac secundum se totum ad motum axis progrediendo, æquale spatium percurrat, vt vidimus, ac probatum est in præcedentibus. Ita tamen rem se habere sic ostenditur.



Esto exempli gratia circulus maior ABCD, minor verò EFGH circa commune centrum I super planum KL. Sintq. duo diametri maioris ad angulos rectos sese intersecantes AC, & BD; minoris verò in ipsis contenti EG, & FH; ita vt BD

vt BD sit perpendicularis ipsi KL. Rotetur autem vterque circulus simul secundum absidē maioris dextrorsum quousque punctum C perueniat, verbi gratia in L, ac semidiameter IC constituatur in ML perpendicularis ipsi KL: ac per consequens IG in MN; ita vt punctum G reperiatur in N. Dicimus ergo punctum C in hac reuolutione minus dextrorsum promoueri, quàm punctum G. Demittatur enim à puncto C linea CO perpendicularis pariter ipsi KL, & à puncto G alia perpendicularis GP: & tunc apparebit punctum C dextrorsum peragrasse spatium CM, vel OL, quæ sunt latera opposita, ac proinde æqualia reſt anguli CMLO, vt patet per 34. proposit. primi. Punctum verò G constabit peragrasse spatium GM, seu PL æquale huic. At GM maior est, quàm CM, eo quod illam contineat, sicut PL maior est ipsa OL propter eandem rationem. Ergo per talem circumuolutionem minus dextrorsum progreditur punctum C, quod est extremum diametri circuli maioris, quàm punctum G extremum diametri contenti circuli minoris.

Rursus verò dicimus punctum D eiusdem circuli maioris, minus pariter dextrorsum progredi, quam punctum H, quod illi correspondet in circulo minori. Etenim post prædictam reuolutionem centro I translato in M, ac C in L, punctum D erit in linea AM ubi Q, (nempe in loco, qui tantum sanè distet à puncto M, quantum distat extremum D ipsius semidiametri DI ab ipso centro I,) punctum verò H similiter erit in R; ita vt semidiameter IHD reperiatur in MRQ. Quapropter si ex duobus punctis QR demittantur duæ perpendiculares in planum DI, quæ sint QS, & RT, spatium progressionis ipsius puncti D, erit linea IQ, æqualis ipsi DS: Spatium verò progressionis puncti H, erit linea IR, siue DT. Cum igitur minor sit linea DS ipsa DT, siquidem non continetur in illa, remanet vt punctum D circuli maioris, minus dextrorsum promoueat quàm punctum H sibi correspondens circuli minoris.

E contra tamen dicimus punctum A circuli maioris amplius

plius dextrorsum progredi, quàm punctum E circuli minoris quo illi correspondet. Posita namque eadem reuolutione, I existente in M, ac C in L, A erit in V: constitueretur enim tota diameter AIC in VML, in qua etiam linea esset punctum E, nempe in X. Quod si compleatur rectangulum AV, ac rectangulum EX, erit spatium peragratum à puncto A dextrorsum idem, quod linea AM, vt deducitur ex eadem 34. propositione primi. Spatium verò similiter peragratum à puncto E, erit EM, quod continetur in illo. Magis ergo progreditur A, quàm E.

Id ipsum tandem demonstratur de puncto B, quod certè magis progreditur quàm F. Quandoquidem in descripta reuolutione semidiameter IB constitueretur in MY in qua cum contineatur semidiameter IF, ipsum F constitueretur in Z: completisque rectangulis BY, & BZ, erit spatium dextrorsum peragratum à B quantum IY; peragratum verò ab F; quantum IZ contentum in ipso IY, quod propterea maius est. Erunt igitur duo puncta circuli maioris, quæ minus dextrorsum progrediuntur, quàm puncta sibi correspondentia circuli minoris: alia verò duo quæ magis. Quod etiam demonstrari poterit de reliquis punctis eiusdem semicirculi cum suo correspondenti in utroque circulo si uterque bifariam secetur per diametrum 3, 4, cuius extremitates nempe 3, & 4, in circulo maiori medient inter A, & D, ac inter B & C. Sicut in circulo minori extremitates 5, 6. medient inter E, & H, ac inter F, & G. Nam puncta omnia semicirculi inferioris 3 DC 4 in circulo maiori, minus progredi reperiètur, quàm puncta semicirculi inferioris 5 HG 6 sibi correspondentis in circulo minori. E contra verò omnia puncta semicirculi superioris 3 AB 4 magis progredi, quàm puncta correspondentis semicirculi 5 EF 6 in circulo minori. Ipsa tamen puncta extrema diametri 3, 4 in circulo maiori, nec magis, nec minus, sed æquè progredi conspiciuntur, ac extrema diametri 5, 6 in circulo minori. Sicut enim per quàm facillè id poterit eadem ratione qua supra demonstrari, ita hic demon-

monstrasse, inutile, ac prolixum extimaretur.

Eiusmodi ergo euentus causam reddere nullo negotio quisque poterit supposita expositione mixti motus, quam supra tradidimus: cum planè ex illa pateat, puncta CD, sicut & puncta GH duabus lationibus ferri, una dextrorsum, simul cum toto circulo ad motum rectum axis I versus M: altero verò sinistrorsum, ad proprium rotationis motum quo obliquè puncta omnia semicirculi inferioris CDA, sicut & GHE retrocedunt versus partes AK. Hinc namque fit, ut tantum de recta eorum latione dextrorsum subtrahatur, quantum per motum circularem obliquè retrocesserint. Cumque minus contingat retrocedere punctum G, sicut & punctum H, quàm ipsa puncta CD iuxta minorem suum motum, minoremq. semicirculum, quem per illum percurrunt; sequitur, ut ipsa puncta GH, magis quàm puncta CD participant de latione recta qua tendunt dextrorsum. At loquendo de punctis AB, ac de EF, contraria est ratio. Nam huiusmodi quatuor puncta sicut & ipsi toti semicirculi superiores, nempe ABC, & EFG, utraque latione feruntur dextrorsum. Quo fit, ut illud punctum magis progrediatur, quod celerius mouetur latione propria, seu maius spatium eodem tempore virtute circumuolutionis transmiserit. Cum igitur puncta AB, hoc ipso, quod sint puncta circuli maioris, velocius ferantur, maioremq. ambitum rotando percurrant, quàm puncta EF in circulo minori; magis etiam dextrorsum progredientur.

Quod si puncta, quæ sunt in arcibus 4 C, & 6 G dextrorsum utraque pariter latione ferantur, sicut reliqua puncta, quæ sunt in semicirculis ABC, & EFG; & tamen puncta inter 4 C circuli maioris minus progrediantur, quàm sibi correspondentia in 6 G circuli minoris; hoc quidem fit; nam cum ipsi arcus maximè declinent deorsum, parum ambo progrediuntur ad dexteram virtute suæ circumuolutionis; multumq. virtute motus recti, & asportantis ad motum axis. Cumque ratione situs, terminus à quo incipit moueri prædictus arcus circuli minoris, magis distet à termino, à quo

à quo incipit moueri arcus maioris, quàm sit excessus progressionis ipsius arcus maioris ratione termini, ad quem postea pertingit, sequitur absolutè loquendo, magis progredi dextrorsum prædictum arcum circuli minoris, quàm arcum circuli maioris. Idemq. è conuerso applicari potest in arcubus 3 A, 5 E ad ostendendum, cur puncta arcus 3 A circuli maioris, magis progrediantur quàm puncta arcus 5 E circuli minoris. Nam licet vterque arcus per motum circulearem retrocedat, ac retrocedendo velocius moueatur arcus maioris, quàm minoris; nihilominus ratione situs, ac termini à quo, cū minor sit excessus retrocessionis, quàm antecessionis virtute motus rect, eo quod à remotiori termino arcus maioris promoueatur; hinc pariter fit, vt maior sit progressus dextrorsum maioris, quàm minoris arcus prædicti, sicut & totius semicirculi 3 AB 4, quàm 5 EF 6, vt dicebamus.

Quæstio Vigesimaquinta.



VR lectulorum spondas secundum duplam faciunt proportionem, hanc quidem sex pedum, vel paulò ampliorem, illam verò trium. Curvè non secundum diametrum illos restibus extendunt. Antantot quidem magnitudine faciunt, vt corporibus sint proportionem habentes. fiunt enim sic secundum spondas dupli, longitudine quidem cubitorum, latitudine verò duorum. Extendunt autem illos non secundum diametrum, sed ex opposito, vt & ligna minus distrabantur. Celerrimè enim sciuntur secundum naturam diuisa, & eodem modo dissentia laborant maximè. Amplius quoniam opus est, vt restes ponas ferre possint, si certè pondere imposito minus laborabūt, si transversim, quā si oblique extendantur. Præterea hoc etiam modo minus absumitur restium. Sit enim lectulus AFGK, & bisariam diuidatur ipsa FG secundum B: aequalia certè foramina sunt in ipsa FA: latera enim sunt aequalia, nam totum FG duplex est. Extendunt autem, vt descriptum est, ab ipso A ad ipsum B: ita ubi est C ita est D, ita ubi H, postea ubi E, & eodè semper modo, do-

do, donec ad angulum peruenerint alii. Duo enim anguli recti
habent capita: aequales autem sunt rectes secundum curuatu-
ras, videlicet AB , & BC , ipsis CD , & DH : & alia simi-
li se habent modo, quoniam eadem demonstratio: ipsa enim
 AB aequalis est ipsi HE , aequalia enim sunt latera spatij BG ,
 MA , & foramina aequè distant. Ipsa autem BG aequalis est
ipsi MA . Angulus enim B aequalis est angulo G . In aquali-
bus enim hic quidem intus, ille verò extra, & B quidem est
semirectus. Est enim FB aequalis ipsi FA . Et angulus ubi
 F , rectus est, B autem angulus aequalis ei, ubi est G quo-
niam quadratum altera parte longius, duplum est: & ad me-
dium est curuatura, quamobrem AD ipsi EG est aequalis, huius
verò ipsa HM . Similiq. modo demonstrantur alia, quoniam
aequales sunt duæ, quæ secundum curuaturas sunt, duabus.
Quare manifestum est, quod tot sunt rectes in lectulo, quot
sunt quatuor, sicut AB . Quanta autem foraminum est mul-
tudo in ipso FG latere, & in eius dimidio FB est medietas.
Quamobrem in dimidiato lectulo tanta rectium magnitudines
erunt, quantum est AB , multitudine verò tot, quot in BG sunt
foramina. Hoc autem nihil refert dicere, quam quot sunt in
ipsis AF , & BF simul sumptis. Si autem secundum diame-
trum extendantur rectes, quemadmodum se habet in lectulo
 $ABCD$: dimidia non tot sunt, quot amborum latera $FAFG$,
aequalia autem quot in ipsis FB , FA , sunt foramina. Maio-
res autem sunt ipsa AF , BF , duæ existentes, quam AB . Qua-
re rectis in tantum maior, quantum ambo latera diametro sunt
maiora.

COMMENTARIUS.

VT ex re nullius difficultatis, atque momenti, inge-
niosam, ac perdifficilem apud multos excitet dubi-
tationem, quaerit hic primò Aristoteles, cur lectulo-
rum spondæ secundum duplam proportionem longitudinis
ad latitudinem eorum efficiantur, ita ut quæ lectulorum
longitudinem constituunt sex pedum existant, quæ verò la-
titudinem, trium. Statimq. id consueuisse docet, ut huma-
norum corporum ratio habeatur, lectuliq. illis proportio:

P nentur

nentur ad cubantium commoditatem. Loquitur autem Philosophus de lectulis minoribus cum qui ad vnum dumtaxat capiendum hominem cubantem efficiuntur, tum qui restibus, seu funibus quibusdam ad sustinendam culcitram super quam ille iaceat sunt intexti, quemadmodum adhuc in Italia licet rarò, frequentius tamen in Gallia, atque Hispania conspiciuntur in usum traducti.

Hinc itaque rursus quaerit cur in huiusmodi lectulis muniendis, restes per transversum, & ex opposito, non autem per diametrum extendantur. Aitq. triplici ex causa id fieri, vel pariter in consuetudinem abijisse. Primò nimirum, ut spondarum ligna ab ipsis restibus minus distraherentur atque scindantur; quandoquidem scissioni magis obnoxia sunt cum per diametrum in eis funes inditi fuerint, ac distenti. Nam tunc quasi per longum iuxta naturales venulas, ac rimulas, quibus obsequendo facilè sequitur scissio, ligna ipsa vim paterentur, ac veluti secarentur; secus ac si per transversum, ac secundum latitudinem terebrata sint, funesq. per ipsa foramina traducantur. Quia semper lignorum tramites transversi funium pressioni magis resistunt.

Secundo id fieri docet ex eo quod sic funes traducti, minus laborant, pondus superimpositum sustinendo. Quo enim per breviores lineas extensi fuerint, eò fortiores evadunt. Sic è contra. cum per longiores, debiliores fiunt, ac facilius in parte ab extremis remotissima disrumpuntur: longiores autem lineæ sunt diametrales in quadrangulari, ac rectangula figura de qua loquimur, ut per se patet.

Tertio denique id ipsum iccirco usui esse inquit, ut in ipsa lectulorum textura minus restium, seu funium absumatur. Quod licet implexè admodum videatur probare ob textus corruptionem; Satis tamen sensus probationis tenetur, atque optimè à Piccolomineo dilucidatur.

Summatim verò ad hoc, ut clarius probatio ipsa percipiat, supponimus primò cum ipso Aristotele, quod lectulus suis restibus per transversum intextus exempli gratia
sit




fit rectāgulū IGAO,
eiusq. lōgiores spō-
dā, nempe sex pedū
sint IG, & AO; bre-
uiiores verō triū pe-
dum IA, & GO; sin-
gulā in totidē pe-
des diuisā per sua
foramina, quibus re-
stes indantur, prout

hic litteris consignantur. Deinde supponimus ex eodem,
hoc pacto restes ipsos per transversum extendi. Sumitur ini-
tium restis, & obfirmatur in A, tunc restis ipsa ducitur ad B,
ex quo postea per C flectitur in D; hinc per E ad F; exinde
verō per G ad H; ex H autem rursus ducitur in I, & ex I per
K in L; unde per M ad N; & ex N per B, tandē peruenitur
in O; vbi similiter alterū restis caput desinendo obfirmatur.

Quibus positis ad comprehendendā huiusmodi restium
quantitatem sic ferē procedit Aristoteles, vel saltem obscu-
riusculē æquiualentia profert. Cum enim triangulus BGO
ex constructione sit rectāngulus, quadrata laterum BG, &
GO, per 47. primi, æqualia sunt quadrato lateris BO. Cum-
que latus BG, sicut & latus GO trium existant pedum, ac
ternarij quadratus numerus, sint nouem; hinc fit, vt ex vtro-
que quadrato, scilicet lateris BG, & lateris GO, consti-
tuatur numerus 18. totidem pedes contineat quadratum
lateris BO duobus illis æquale, proindeque vt latus ip-
sum BO sit radix quadrata numeri 18. nempe quatuor
pedum circiter cum quarta. At in lectulo non sunt nisi
octo restes æquales, eiusdemq. dimensionis, ac latus BO,
vt patet per 33. primi. Ergo omnes ipsi restes simul sum-
pti, ac per transversum intexti erunt quasi triginta quatuor
pedum: quibus si addantur (vt rectē notat Baldus) sex alij
pedes restium qui cadunt extra, nempe à B in C, & à D in
E, & sic in reliquis, erit restis totius longitudo pedum qua-
draginta cum dimidio, vel paulò amplius.

Quod si restes extendantur secundum diametrum, vt in descripto lectulo ABCD, plus restium absumi, inquit Phi-



losophus; & eadem qua supra ratiocinatione poterit demonstrari. Nā singulis quibusq. restibus, tanquam lateribus trianguli rectanguli consideratis per 47. prop.

primi, & per extractionem radicis quadratæ, inueniemus, eos omnes simul sumptos quadraginta pedum cum dimidio obtinere dimensionem, quibus si alios septem, qui extra cadunt adiciamus, erit tota longitudo restis pedum 47. cum dimidio. Quod sanè ad rei, de qua agitur intelligentiam sufficit indicasse, cum exactior supputatio frustra ac prolixius quàm par est, sermonem protraheret.

Quæstio Vigesima sexta.



VR difficilius est longa ligna ab extremo super humeros ferre, quàm secundum medium, aequali existente pondere? An quia vibrato ligno ipsum extremum prohibet ferre, vibratione magis retrahens lationem? An quoniam licet nihil inflectatur, neque multam habeat longitudinem, difficilius tamen ad ferendum est ab extremo, quoniam facilius ex medio eleuatur, quàm ab extremo, & ideo sic ferre est facilius. Causa autem quoniam secundum medium quidem eleuato ligno semper sese inuicem suspendunt extrema, & altera pars alteram bene subleuat. Medium enim veluti centrum fit, ubi habet is qui eleuat, aut fert. Extremorum igitur vtrumque deorsum vergens, sursum suspenditur. Quod si ab extremo eleuetur, aut feratur, non sanè facit: sed vniuersum pondus ad vnum vergit medium, quo eleuatur, aut fertur. Sit medium ubi A, extrema B, C. Eleuatur igitur aut portato secundum A. ipsum

Ipsum quidem B deorsum nutans, sursum eleuat C, ipsum autem C deorsum nutans, B sursum eleuat, ambo autem sursum eleuata hoc faciunt.

COMMENTARIUS.

DVplicem Aristoteles causam affert, ob quā difficilius procera ligna ab extremo super humerū gestantur, quā è medio, æquali existente pondere, à quo tota gestandi difficultas nasci videretur. Vna est, quia procera ligna, ut plurimum ex se flexibilia sunt, ac vibrationi, & fluctuationi magis obnoxia, quā breuiora. Quapropter si tota ferè longitudo ligni super humerum gestati, à tergo ponatur, parte tantum ante relicta qua manu sustineatur, crescit cum ipsa longitudine flexibilitas: unde magis agitatione ipsa portantis fluctuando vibratur: vibratio autem non parum gestationem impedit, retrahendo quodammodo lationem, dum frequentissimo motu sursum, ac deorsum vibrati ligni extremitas tendit, proindeque non ad partes anteriores, iuxta motum progressuum ferentis. De quo vibrationis effectū iterum redibit sermo quaestione sequenti ubi fusius, ac luculentius declarabitur. Interim concluditur ex Aristotele, propter maiorem huiusmodi fluctuationem, ac vibrationem difficilius procera ligna ab extremo super humerum gestari, quā si è medio sustinerentur, atque asportarentur, cum hoc pacto, minus ab humero, seu fulcramento producta, minus vibrationi essent obnoxia.

Quoniam verò causa hæc vniuersalis non est, nec adæquata, siquidem nec omnia ligna quantumuis procera flexibilia sunt, aut vibrari possunt; nec difficultas gestationis à sola vibratione intercedere procedit; hinc est, quod Aristoteles alteram propositæ difficultatis causam, tanquam vniuersaliorem in medium afferat. Ea autem est, quia quæcumque difficilius eleuantur, difficilius pariter postquam eleuata fuerint sustententur, aut gestantur, cum tam latio, quā sustentatio sit veluti continuata quædam eleuatio ob

longa autem ligna difficilius ab extremo eleuantur, quam ex medio, siquidem eleuato ligno ab eius medio semper sese inuicem sustentant extrema, & altera pars alteram subleuat, ait ipse philosophus. Medium enim quasi centrum constituitur, quod fulcitur in manu eleuantis, aut in humero deferentis. Quapropter ad depressionem alterius extremi, alterum eleuatur, & sic vicissim mutuo sustolluntur. At si ab extremo idem lignum eleuetur, vel deferatur, vniuerso pondere deorsum vergente, nulla esset pars, quæ ad grauitationem alterius eleuaretur, proindeque laboriosa magis esset gestatio.

Verum contra huiusmodi discursum, ac doctrinam Aristotelis illud obijci posset, quod tamen si extrema proceri ligni è puncto medio delati sese inuicem sustollant vtrumlibet alterum superando: nihilominus ipsa simul sumpta cum toto ligno semper eodem modo grauitant respectu deferentis, siue in æquilibrio, siue secus constituentur. Quandoquidem deferens tam excedens, quam excessum sustinet, ac deferit: proindeque pondus ipsius ligni, non minus grauitare concluditur cum lignum ipsum è medio sustollitur, ac cum ab extremo.

Huic tamen obiectioni occurritur distinguendo grauitationem procedentem ab ipso pondere ligni delati secundum se sumpto ab ea, quæ procedit ratione distantia à fulcramento quò sustinetur. Nulli namque dubium est grauitationem procedentem à naturali pondere ipsius ligni, eandem semper esse, siue lignum ex medio, siue ab extremo sustollatur. Nihilque conducere positionem extremorum in æquilibrio ad diminutionem ponderis naturalis. Vnde non minus grauitat lignum si è medio suspendatur tanquam iugum alicuius libræ, ac si ab extremo perpendiculariter ad horizontem erectum, sustineatur. At loquendo de grauitatione, quæ procedit ex distantia grauitatis à fulcramento predicto, non ita res se habet. Quandoquidem hæc augetur ad augmentum distantia, ac minuitur per approximationem; imò omnino deperditur per æquilibrationem. Porro brachia
libræ

libræ, siue magis siue minus protendantur, dummodo æqualia inter se sint, nihil ponderis, aut grauitationis augment, vel minuunt; secus autem si alterum sit potentius, licet æqualis ponderis naturalis. Nam libram vertet per excessum suæ distantia à fulcramento, vt supra quæst. prima explicuimus.

Rectè igitur argumentatur Philosophus, dum ex mutua victoria, ac subleuatione extremorum ligni in medio sulti, minorem difficultatem, seu grauitationem infert, quàm si ab extremo sustolleretur; ac in situ simili sustentaretur per lineam horizonti paralellam, seu quasi paralellam. Etenim in hac situatione lignum grauitaret tum iuxta pondus naturale, tum etiam iuxta distantiam alterius extremi à fulcramento; in illa verò non nisi iuxta grauitatem naturalem. Quo fit vt sarissa, aut lancea perpendiculariter ad planum horizontis erecta, facilè ab extremo sustineatur, difficilè verò per lineam horizonti paralellam constituta. Vnde ad facilius præstandum manubrium in lancea non quidem in ipso extremo, sed prope extremum constituitur, nec non extremum ipsum crassius, grauiusque propterea efficitur ad compensandam grauitatem ortam ex longitudine, quæ illa cuspidem versus protenditur. Imò ex hoc etiam ipsa productior pars lanceæ cum primò crassescit, striari consuevit vsque ad manubrium, vt ipsis excauata strijs, vel sulcis, leuior euadat, & ad planum horizontis vergens, facilius valeat manu gestari. Hinc pariter qui viribus pollent ad ostendendum robur brachij, atque lacerti, dum ad confrin-

gendam lanceam in destinatum locum procur-
runt, ab extremo subtus manubrium eam
procumbentem in ipso cursu susten-

tant. Quæ omnia satis con-

firmantur ex di-

ctis q. 3. ac

16.

Quæstio Vigesima septima.



*VR si valde procerum fuerit idem pondus, difficilius super humeros gestatur, etiamsi medium quispiam illud ferat, quàm si breuius sit. Quod enim dudum dictum est, causa non est, sed vibratio nunc est causa. Quando enim productius fuerit, vibrantur extrema, quam obrem contingit portantem difficilius gestare. Vibrationis autem causa est, quoniam ab eadem motione magis transferuntur extrema; quanto procerius fuerit lignum. Humerus quidem sit centrum ubi *A* manet enim is; ipsa autem *AB*, *AC*, que sunt ex centro, quando autem maius fuerit id, quod ex centro est, siue *AB*, seu *AC*, plus transferetur spatij. Demonstratum autem est hoc prius.*

C O M M E N T A R I V S.

Quamuis idemmet lignum, vel aliud graue corpus oblongum facilius ex medio sustineatur, ac deferatur, quam ab extremo, vt in præcedenti quæst. dictum est: nihilominus cum hoc etiam pacto delatum, quò procerius illud fuerit, eò difficilius gestetur, quærit hic Aristoteles vnde maior hæc difficultas oriatur. Concluditque, vibrationem huius rei causam esse. Nam quanto productius fuerit lignum, tantò imbecillius redditur, ac vibrationi obnoxius: magis enim inflectitur, vt quæst. 16. probatum est, magisque eius extrema iactantur tanquam à centro remotiora. Magis autem iactatis, ac vibratis extremis, difficilior euadit gestatio; Idque duplici ex capite, vt rectè Baldus obseruat. Tum scilicet quia motus vibrationis, vt præcedenti quæst. docuerat Aristoteles, motum progressionis, sursum, ac deorsum tendendo impedit, ac quodammodo prohibet, retrahendo ipsum delatum, quod in anteriora fertur: tum etiam quia impetum quandam producit quo ultra
pon-

podus grauaturs humerus deferētis. Etenim extrema ipsius ligni valde ab eius medio, seu centro remota, dum inferius, quantum ex se est, vibrando flectuntur ipsammet centrum, seu medium secum rapere, ac detrahēre conantur. Quamobrem humerus, qui medio supponitur, non modo totius ligni sustinet pondus, quod in ipso grauitatis centro coaceruatur, sed impetum quoque per eandem extremorum inflexionem ei illatum. Tametsi hoc totum intelligatur non, iugiter, sed per interualla tantum contingere, vt idem Baldus animaduertit; Quandoquidem impetus ex ipso motu vibrationis acquisitus quemadmodum deorsum tendendo deprimit, ita sursum attollens ipsa extrema, portantem alleuiat, humerumq. aliquantisper nonnihil exonerat, vt milites satissam in humero gestantes passim experiuntur.

Quæstio Vigesima octaua.



QUæritur iuxta puteos celonia faciunt eo, quod visuntur modo? Ligno enim plumbi adiungunt pondus, cum alioqui vas ipsum & plenum; & vacuum pondus habeat. An quoniam duobus temporibus hauriendi diuisa opere (intingere enim oportet, & id sursum


trahere) continget demittere quidem vacuum facilliter, trahere verò plenum difficulter. Commodum igitur est paulò tardius illud demittere, cum multò leuius effectum suscollatur pondus: id autem facit in extremo celonio adiunctum plumbum, aut lapis. Demittendi quidem maius sit pondus, quàm si solummodò vacuum oporteres demittere: cum verò plenum fuerit sursum id rapit plumbum, aut quicquid illi ponderis meritis. Quamobrem faciliora hoc modo ambo sunt, quàm illo.

COMMENTARIUS.

CElonium quod & Tellenon apud Latinos appellatur, machina quædam est ad commodius hauriendam aquam ex puteis, yt frequenter visitur in hortis. Constat autem ex tigno quodam prægrandi, quod iuxta puteos erigitur, ac valide obfirmatur, & ex transversario quodam alio ligno tenuiori, quod superiori parti illius tanquam furculæ per sui quasi medium incumbens, in altero extremo funem habet appensum cū aquario vase; in altero vero appposito pondere prægrauatur, yt sursum, ac deorsum facili negotio pro olitoris arbitrio valeat cominueri. Vfus namq; huius machinæ est, yt manu funis apprehensus unâ cū vase, quod sustinet, in puteum demittatur, quousque vas in aquâ immergatur, reclinato scilicet ligni extremo cui funis alligatur. Deinde pusilla vi adhibita ob præponderantiâ alterius extremi, quod onere pressum descendit, ac alterū cogit ascendere, ipsummet vas aqua plenum sustollatur, & extrahatur. Quamuis enim vas ipsum aqua repletū, descriptoq; ab extremo propendens ex se æquiponderare soleat oneri, quod alteri extremo adiungitur, vix tamen vel modicè manu adiuuante eleuatum statim ab onere prædicto vincitur, ac superatur: non secus ac lanx libræ in æquilibrio constitutæ ab æquali pondere alterius lancis, si vel tenuiter manu aliqua sustollatur.

His itaque non aliter se habentibus, quærit hic Aristoteles, cur ad huiusmodi machinam facilius promouendam, & & aquam eius motione exhauriendam, onus oneri adiungatur, plumbum nimirum, aut lapidem apponendo in altero extremo transversarii ligni, cum alioquin tota ipsa machina sit per se grauis, ac præsertim idemmet transversarium lignum, quod adhuc prægrauatur pondere vasis appensi, siue vacui, siue repleti. Difficilius namque est mouere machinam grauiorem, quàm leuiorem. Quamobrem sit in descripta Tellenonis figura A B C D tignum arre-

arectarium. superius. *transuersarium* ve-
rò CD; ac funis *propendens* DE, in
cuius ima extre-
mitate ybi E, *alligata* sit urna vel si-
mila; aut simile
aliud vas aquariu:
Puteusq; subiectus,
sit ybi F. Tunc in-
quam si in extremo
C. *transuersarij* li-
gni adiungatur po-
dus lapidis, aut plu-
bi, vt in figura refertur, manus funi admo-
ta ad demittendum
vas aquarium, difficilius deprimet extremum D,
vnde fa-
nis ipse propendet, icum ultra propriam grauitatem ligni
AC, superare; ac eleuare etiam debeat pondus illi adian-
tum. Quare ex huiusmodi ponderis additione, potius vi-
detur, motionem ipsam explicare machinam retardari, quam
facilius consequi, & expediri.



Nihilominus, respondet idem Philosophus, omnemque
dubitationem rationem exterminat, quoniam hauriendi opus
duobus distributum temporibus perficitur. Primo nimirum
vas demittendo vacuum; vt aquæ immergatur: deinde il-
lud extrahendo plenum. Nullo autem addito pondere,
in extremo C, facilius quidem vas vacuum demittendum
fore, quia nihil obstarat; difficilius tamen extrahi posset,
quia pondus aquæ, magnopere ascensui repugnaret, nec ha-
beret à quo sustolleretur simul cum parte transuersarij li-
gni AD, quæ tanquam productior, ac prægrauata ponde-
re vasis pleni, vinci non posset à parte eiusdem ligni AC,
breuiori, ac omni exonerata pondere. Quoniam verò ma-
gis expedit, vt tardius ac difficilius vas demittatur, dum-
modo

modò facilius extrahatur; plumbum vel simile aliud onus superimponitur ipsi extremo C, vt eo depresso, eleuetur alterum extremum D, per conuersionem ipsius ligni CD, tanquam vectis super fulcimentum A; & ad eleuationem ipsius extremi D, vas ex eo pendens, pariter euehatur, & è puteo extrahatur. Expedit autem facilitas potius in vasis extractione, quàm in demissione; idq. tam ex parte potentia, quàm ex parte ponderis. Ex parte quidem potentia, quia laboriosus est cum difficultate extrahere, quàm cum difficultate demittere. Nam corpus humanum dum extrahendo inclinatur, suo præpeditur pondere, ne expeditius erigatur, funemq. paulatim reducat, & per eam vas ipsum subleuet. Contra verò dum ad vas demittendum, & immergendum, funis cum ligni extremo D trahitur deorsum, illi naturali quodam nutu incumbit, commodiusque vires exerit, ac difficultatem omnem euincit; vt experiri etiam est, in vsu trachleæ ad exhauriendam aquam, vel sustollendum quodlibet aliud pondus per funis detractionem. Deinde ex parte ponderis, quia minor est difficultas demissionis, quàm extractionis prædictæ. Siquidem pondus lapidis, aut plumbi, quod superari debet in vasis demissione, æquale est ponderi solius aquæ hauriendæ ipso eodem vase, vt dictum est: pondus autem quod superandum est in extractione, non solum est pondus aquæ hauriendæ, sed etiam vasis, ac funis, ideoque maius constituitur, ac difficilius superatur. Consultius ergo hoc est, maiori difficultati succurrere ipso machinæ beneficio, ac pondere re adiecto in altero extremo, vt aiebat Philosophus.

Quæstio Vigesima nona.




VR quando super ligno, aut huiusmodi quopiam duo portauerint homines æquale pondus non similiter pramuntur, si ad unum non declinet pondus, sed magis quanti vicinior fuerit gestantibus? An quoniam vectis quidem lignum efficitur: pondus verò hypomochlion: qui autem propior est ponderi ex ijs, qui illud gestant, id quare mouetur: alter vero portantium, quod mouet? Quando igitur plus distat à pondere, tanto facilius mouet, & alterum premit magis inferius, velut contranitente pondere imposito quod hypomochlion factum est, si autem in medio inerit pondus, nihilo magis alter alteri fit pondus, aut mouet: sed eodem modo alteri alter fit pondus.

COMMENTARIUS.


CAUSAM hic inquit Aristoteles cur duo baiuli idem pondus super lignum, vel quidpiam aliud simile ferentes, nō æquè grauentur, atque præmiatur si in eorū medio nō extiterit ipsum pondus, sed magis præmatur is, cui ipsum proximius constituitur. Eamq. mox esse ait, quoniam huiusmodi lignum in ipsa asportatione efficitur vectis, cuius fulcimentum constituitur ipsummet pondus quod gestatur: Onus verò baiulus, qui ponderi est propinquior, ac veluti potentia mouens, baiulus, qui est ab illo remotior. Etenim cum onus quodlibet, vecte adhibito, tanto facilius moueatur, quanto proximius fuerit centro, seu fulcimentum locatum, ac motrix potentia remotius fuerit applicata, vt supra ostensum est quæst. 3. hinc fit, vt baiulus, qui oneris loco succedit, hoc ipso, quod propinquius centro constituitur, quàm alter qui potentiae vices obtinet, magis præmatur, contranitente pondere imposito, tanquam fulcimento validè obfirmato, cui vectis innititur in ipso motu.

Quod



Quod ut præ oculis habeatur esto lignum AB, pondus C appensum in D proximum ipsi A; baiulorum verò alter humerum, vel manum

supponat in A; alter in B. Dicimus ergo cum Aristotele, lignum ipsum AB, vectem constitui suffultum in D, tanquam fulcramento inuerso ad deprimentum humerum asportantis in A, per motum asportantis in B, qui baiulando, semper eleuare conatur extremitatem sibi incumbentem in B. Quandoquidem punctum D, quod constituitur centrum in motione ipsius vectis, ita à pendente pondere præmitur, & figitur, ac si immobile omnino esset ad fulciendum ipsum vectem. Quod uidentius fiet si eundem vectem inuerso modo considere-



mus, in sequenti figura; Nimirum ut si vectis AB suspendatur in C ex puncto intermedio ubi D, ad eleuandum onus impositum in extremo A

per depressionem alterius extremi B. His nanque positis ad primam figuram redeuntēs facillè intelligitur cur baiulus gestans in A magis grauetur à pondere C, quàm gestans in B. Quanto enim longior est pars vectis DB, ipsa DA, eo facilius gestans in B eleuat, vel sustinet ipsum extremum B respectu sustentantis in A tanquam in loco centro vectis propinquiore quàm sit ipsum B.


Quod autem cum Aristotele explicuimus per rationem unius vectis, Piccolomineus explicat per rationem duplicis vectis,

vectis, ita ut idem lignum AB rationem subeat utriusque vectis, unius nempe per quem gestans in A prematur ad motum gestantis in B: alterius verò per quem gestans in B, prematur ad motum gestantis in A, eodem semper existente fulcimento D. Siquidem ambo gestantes eleuare conantur sua extrema, & ambo deprimuntur adinuicem; ita ut alter alteri constituatur onus; ac mouens potentia; licet ille magis mouear, minusque grauetur, qui longius distat à fulcimento. Quae profectò explicatio à mente Aristotelis, tradita doctrina non abhorret, imò maximè congruit cum eo, quod ipsemet Philosophus tandem adiecit: Nimirum quòd si pondus in medio vectis constitueretur, non magis vnus, quam alter baiulus grauarietur; atque moueret; sed eodem pacto alter alteri esset onus, & potentia.

Baldus verò eandem Piccolomini expositiònem approbando doctrinam Aristotelis à qua illa desumpta est, & cui omnino congruit, reprobatur, rationem fulcimenti in ipso pondere consideratam, figmentum vocans Aristotelis. Quapropter gestatum pondus, ait verè esse pondus, lignum verò vectem, ac duos qui pondus sustinent in ipsius ligni extremi pro duplici fulcimento haberi. Non tamen apparet quo fundamento lignum praedictum, vectis dici possit, si duobus fulcimentis ponatur innixum; cum tota ratio vectis ad libram, ac circulum referatur, quibus non nisi vnum esse potest centrum ac fulcimentum circa quod conuertantur. Rectè autem subiungit posse alterum eorum, scilicet a portantium pro potentia mouente, alterum pro fulcimento haberi, & sic vicissim, ita ut pondus sit inter fulcimentum, & potentiam. Nam hoc pacto praefatum lignum constitueretur vectis eius generis, quod sulturam habet in altero extremo, ut i. par. tex. ultimo, Addit. r. explicuimus. Nihil enim prohibet idem lignum secundum diuersas considerationes adhuc in diuerso genere vectis constitui.

Ad hæc idem Baldus affines quasdam huic dubitationes, earumque solutiones subiecit, quarum illa praecipue ad rem facit: Num scilicet pondere in vectis medio constituto, idem.

idem prorsus contingat si alterum eorum, qui sustinent sit statura procerior, aliter verò humilior: Vel si statura quidem pares fuerint, per viam tamen accliuem, aut decliuem incedant. Etenim si pondus liberè pendeat optimè respondet, idem omnino contingere, quia semper eadem seruaretur æqualitas partium vectis, ac distantia baiulorum à loco vbi pondus deprimeret, vt clarè ipse demonstrat: Si autem pondus nequaquam liberè pendeat, sed firmiter sit infra vectem alligatum, tunc magis grauari eum, qui extremum vectis magis ab horizonte eleuatum sustinet. Quandoquidem pondus grauitat in parte vectis propinquiore ipsi extremo magis eleuato, quamuis in medio sit constitutum. Cuius oppositum contingeret si pondus supra vectem, licet pariter in medio collocaretur, quod non tetigit Baldus, & vtrumque faciliè erit simul probare.



Est enim vectis AB bifariam diuisa in C; cuius extremum B sit magis eleuatum ab horizonte, quàm extremum A; Pondus verò infra positum sit corpus DE, cuius grauitatis centrum F ad angulos rectos per lineam CF propendens

dens ex AB: gestantes itidem sint AG, & BH, statura quidem pares, sed per acclive GH ascendentes. Demittatur autem perpendicularis ad planum horizontis per ipsum centrum grauitatis F, quæ sit linea IFK secans in I ipsam AB. Grauitabit igitur centrum F in ipso puncto I, in eoq. vices fulcimenti exercebit, vt explicatum est. At punctum I propinquius est ipsi B, quàm ipsi A, cum sit inter C & B; proindeq. pars AI sit plusquam dimidium vectis IB verò minus. Ergo gestans in B, magis grauabitur, quàm qui in A. Modò supponamus idem pondus super eundem vectem collocari vbi LM; eiusq. grauitatis centrum in N, à quo demittatur perpendicularis horisonti NO; punctumq. in quo secuerit rectam AB, signetur P. His itaque sic stabilitis, centrum N grauitabit in P; eritq. AP minor quàm PB, ideoq. baiulus portans in A, tanquam fulcimento viciniore, grauabitur magis, quàm sustinens in ipso B, ratione superius explicata. Quod exactius demonstrasse molestum, ac in utile fore existimauimus.

Quæstio Trigesima.




VR surgentes omnes femori eius ad acutum constituentibus angulum, & thoraci similiter femur surgunt? quod si non, baudquaquam surgere poterunt. An quia id quod aequale est, quietis ubiq. est causa: rectus autem angulus aequalitatis est, stationemq. facit, quomobrem ad similes fertur angulos ipsi terra circumferentia,

non enim quod ad rectum est ipsi pavimento. An quoniam surgens sit rectus, stantem verò necesse est perpendiculum esse ad terram. Siquidem igitur ad rectum debet esse, hoc autem est caput secundum pedes habere, & fieri oportet cum surgit. Quandoquidem igitur fuerit sedens, secundum parallellam pedes habet & caput, & non inaequali. Caput sit A, thorax AB, femur BC, crura CD. Ad rectum autem sit & thorax ubi AB ipsi femori, & cruri femur, sic sedente. Quomobrem eo se habentem modo surgere est impossibile. Necesse autem est crura reclinare, pedesq. constituere sub capite, hoc autem erit, si
Q *CD fiet,*

CD fiet, ubi GF, & simul surgere continget, & in eadem equali habere caput, & pedes, ipsa autem GF acutum faciet angulum ad ipsam BC.

COMMENTARIUS.

Supponit Aristoteles, quod satis per se notum est, commodè, & appositè sedentes duos angulos rectos positione sui corporis constituere iuxta propriam sedis formam: Vnum quippe quem facit thorax cum femore, alterum verò quem efficit femur cum tibia. Ut exempli



gratia si linea AB rectitudinem humani corporis referat à capite vsque ad ventrem, BC verò femorum longitudinem vsque ad genua, tanquam duo latera recti anguli ABC; & CD crurium altitudinem designet, quæ pariter cum BC alterum angulum rectum constituat BCD. Quo supposito quæritur cur sedentes cum surgere voluerint, in ipso surgendi actu prædictos angulos rectos in acutos commutare soleant, nec aliter surgere valeant? Ut sistendo in eadem figura proposita, caput ab A declinando in E ad efficiendum angulum acutum

EBC, ac tibias retrahendo cum pedibus ex D in F ad constituendum acutum angulum BCF.

Cuius rei duplicem causam statim ipsemet Philosophus affert, docetq. primò id fieri ex eo, quod æqualitas ubique est causa quietis. Motus enim quilibet, ut alibi dixerat 1. de generat. tex. 48. debet esse ab inæquali proportionem. Angulus autem rectus, est angulus æqualitatis non modò quia cuilibet alteri recto semper est æqualis, sed quia æqui-

ponderantiam in corporibus causat, vel certè consequitur, vt patet in libra, quæ dum in æquilibrio constituitur duos vtrunque efficit angulos rectos cum trutina. Itemq. nam corpora perpendiculariter ad angulos rectos super planum horizontis constituta, dum terræ superficiei incumbunt, æqualiter omni ex parte distant à solo, stareq. propterea dicuntur, hoc est in sua propria mole consistere. Quare cubus eo quod non nisi ex rectis angulis constet, & vndique sit æqualis, maximè omnium corporum valet consistere, atque solo inhæredo quiescere: Ita vt Pythagorici ad tuendam terræ immobilitatem, eam dixerint esse cubicam. Quod autem dicitur de toto corpore stante, idem respectuè dici potest de partibus, quæ similiter ad angulos rectos supra planum horizontis erectæ quiescunt, vt thorax, vel tibiæ in homine sedente. Cum igitur à sessione surgentes, quietem qua sedendo ad angulos rectos potiebantur assurgendo relinquunt, ipsos angulos rectos in acutos commutare coguntur, hoc ipso quod moueantur, & acuti anguli, non autem obtusi ad ipsum surrectionis motum sint idonei, atque accommodati, vt mox infra constabit.

Secundò igitur id fieri docet Philosophus, nam qui surgit, ad hoc tendit, vt totus constituatur erectus, ac perpendicularis superficiei terræ secundum eandem rectitudinem vnus linear cadentis ad centrum, secus ac cum sederet. Quantumuis enim tunc caput & thorax, sicut & crura perpendiculariter haberet supra horizontem erecta, non tamen femora sic erant constituta, nec crura in eadem erant linea, ac thorax & caput, sed in alia paralella. Quare vt totus erigatur, & secundum eandem lineam perpendiculariter horizonti insistat, opus est, pedes retrahere, vt dicebamus, ex D in F, caputq. cum subiecto thorace reclinare ex A in E; quod est prædictos angulos rectos in acutos conuerrere, vt pedibus sub capite constitutis, per eandem perpendicularem EF totum corpus erigi possit, ac stare. Alioquin, eandem angulorum rectitudinem seruando, non fieret motus; atque rectos angulos in obtusos commutando, non mo-

do pedes sub thorace, vel capite perpendiculariter, vt opus est, constituerentur; sed magis à perpendiculo, in quo conuenire debent ad erectionem pedes, & caput, distarent, vt per se patet.

Caterum Baldus obijcit Aristoteli; sedentem non ideo quiescere quod rectus angulus quietis sit causa, sed propterea quod eius thoracis tum etiam femorum pondus ab ipsa sede sustineatur; crura verò & pedes ideo non laborent, quod partim suspensa sint, partim ipsi solo innitantur. Sed hoc nihil contra ipsius Philosophi doctrinam concludit. Non enim dixit Aristoteles, sedentem absolutè quiescere ex eo, quod rectus angulus quietis sit causa, nulla habitatione fulcimenti, cui sedens innititur, sed præsupsita sede, cui sedens incumbendo ad angulos rectos quiescit, ait illum ad hoc vt surgat, angulos rectos in acutos necessariò commutare. Quandoquidem seruata rectitudine angulorum moueri non posset, nec se totum erectum constituere super planum horizontis per angulos rectos. Quod si rursus obijciat Baldus, angulos acutos non esse causam surrectionis, sed causam causæ illius, hoc est, vt totum pondus corporis humani, vel centrum grauitatis illius simul cum pedibus, quibus fulcitur in eadem linea perpendiculari, vt diximus, collocetur; Nam ex hoc immediate procedit surrectio: Hoc inquam nihil, aut parum refert, dummodo concedatur, quod negari non potest, rectè scilicet Aristotelem quæstionem soluissè, dum quærenti cur surgentes, prædictos angulos acutos thorace, ac femore simul cum tibia efficiant, inter alia respondit,

vt pedes sub capite constituent
& sic possint assurgere.

Quaestio Trigesimaprima.



VR facilius mouetur commotum, quàm manens? Veluti currus citius commotos agitant, quàm moueri incipientes. An quia difficillimum est pondus mouere, quod in contrarium mouetur, aufert enim quiddam ex motoris potentia, licet multò sit velocior, necesse namque est tardioresse impulsione illius, quod repellitur. Secundo autem loco si quieuerit, resistit enim ipsum quiescens. Quod autem mouetur ad id ipsum ad quod impellitur, impellenti simile facit, ceu si quisptam mouentis potentiam, & celeritatem auget, quod enim ab illo pateretur, citius ipsum facit ex se commotum.

COMMENTARIUS.

Facilius deinceps moueri corpus, quod iam moueri coeperit, quàm cum primò ei moueri cōtingit, apertissima experientia comprobatur in pluribus, ac praesertim in curribus, vt hic supponit Aristoteles. Cuius rei causam indagando praemittit, difficillimum esse mouere pondus, quod ex se mouetur in contrarium. Quippe cum semper aliquid minuat de motoris virtute, & efficacia, quamuis motor ipso commoto sit longè potentior, atque in agendo velocior. Necesse enim est imbecilliores, ac tardiores reddi potentiam eiusque impulsione, quæ ab alio repellitur; nec potest potentia, vel conatus motoris, ipsa vi in contrarium commoti non repelli.

Ex quo tanquam à simili argumentando ipse Philosophus, causam propositi experimenti ait esse, tum resistentiam corporis quiescentis, quando primo incipit moueri; tum nutum, quem habet ad vltiorem motum idem corpus postquam reperitur in motu. Cum enim à quiete transit in motum, & aliquo transfertur, resistit non secus, vel paulò minus, ac si ex se in contrarium raperetur. Ex se

namque graue quodlibet quiescendo, corpori cui adiacet adhæret, ac perpetua quadam pressione deorsum mundi centrum iugiter petit. Quapropter dum aliò transferri contigerit, resistit quasi per contrarium motum. Vice autem, versa cum iam moueri coeperit per impulsum tunc acceptum, non modò adhuc refrænatur grauitas, minuiturq. effectus pressionis illius qua tendit deorsum, sed iam graue ipsum ad vltiorem motum progressiōis reperitur dispositum, vt adueniente nouo impetu quasi duplicato principio transferatur. Imo ipsa quoque grauitas in corpore agitato si ex parte illud tendat deorsum, vt in decliue vrget quo versum graue proijcitur, ita vt vis quæ merè deorsum tendebat, in vim quæ aliò transfert per accidens refundatur. Facilius ergo deinceps fertur graue proximè commotum, quàm cum primò quietem relinquit: quia mouetur ad nouum ipsum impulsus simul cum reliquijs impetus prius impressi, quo adhuc grauitas compescitur, ac moderatur ne progressiōi obsistat, sed potius ad illam quandoq. per accidens conferat, atque concurrat.

Quod autem dictum est de motione, & commotione violenta id ipsum, vel quid simile communiter obseruatur in motione naturali grauium deorsum, ac leuium sursum; vt scilicet hæc corpora facilius, ac velocius moueantur in progressu postquam commota iam fuerint, quàm in principio quando tunc se mouere incipiunt; imò tanto facilius ac velocius, quantò magis à principio motus discesserint. Sed qua ratione id eueniat, diuerso existente principio motus naturalis à principio motus violenti, non conuenit inter Philosophos, qui propterea in varias, ac discrepantes abierunt sententias. Inter quas ea videtur aliqua cum probabilitate percrebuisse, quæ totam hanc maiorem facilitatem, ac velocitatem, refert ad medium per quod mobile transit: non solum ob minorem eius resistantiam, quæ reperitur in progressu, ac prope finem, sed præcipuè propter accursum eiusdem post terga ipsius mobilis ad replendum vacuum, quod relinquit. Nam is cum celeritè fiat, impingere videtur in ipsum

ipsum mobile, proindeq. impetu incusso, motum eius accelerare; ex qua acceleratione velocior adhuc redditur novus accursus, quo rursus mobile magis impellitur, & sic deinceps. Citaturq. pro hac sententia Aristoteles 3. de cælo tex. 28. vbi loquendo de distinctione motus naturalis à violento, & acceleratione vtriusque inquit: Ad ambo autem tanquam instrumento vtitur aere: nempe ipsum principium à quo principaliter provenit motus. Rursumq. paulò inferius loquens adhuc de aere, subdit: Veluti enim imprimens tradit vtrique. Impulsum scilicet vtrique mobili ad proprium motum impertiendo. Verum ex hoc loco ad summum tantum colligitur de mente Aristotelis, aerem ad vtrunque motum perficiendum, videlicet tam naturalem, quam violentum deseruire, ac tanquam instrumentum concurrere. Alioquin præcisè loquendo de maiori celeritate motus naturalis deorsum quò proprius graue ad imum accesserit, potius ibidem docet Philosophus, eam ab adiuncta virtute præternaturali oriri; inquit, eum motum, qui est secundum naturam (vt in lapide dum fertur deorsum) velociorem fieri ab eo, qui est secundum potentiam: vocat autem potentiam ipsam virtutem motiuam, quæ per violentiam imprimitur, aut producitur in corporibus, vt patet ex contextu.

Quare dicendum est ex eo facilius, ac velocius graui, deorsum moueri in progressu, quanto magis à principio motus discefferint; quia nimirum per ipsum motum naturalem augetur in eis virtus motiua, qua feruntur in proprium locum. Producent enim in se impetum, cumque successiue semper magis ac magis intendunt per grauitatem tanquam per formam principaliter agendi. Ita vt post primam grauis motionem deorsum, non modo duplicetur deinceps principium ipsius motionis, seu virtus motiua, per productionem impetus in eundem locum tendentis; sed crescente distantia crescat pariter impetus, & cum eo velocitas in immensum. Quam sententiam expressè fuisse Aristotelis declarant tum eius verba proximè a nobis exposita, tum ea quæ

protulit supra quæst. 19. dum vim quam habet commota securis ad scindendum inquirens, dixit: An quia omnia cum motu fiunt, & graue ipsum magis assumit grauitatis dum mouetur, quàm dum quiescit? Vbi impetum superadditum grauitati ad descendendum, vocat grauitatem assumptam, quia mouet quo versum ipsa grauitas mouet: vnde ab alijs vocatur grauitas accidentalis, & adscititia. Sensus autem ipsorum verborum est. Nam etsi semper grauitas premat, & grauetur, siue moueatur, siue quiescat, quando tamen mouetur, multo magis conatur, ideoque impetum facit, eumq. successiuè intendit, quanto vterius mouetur. Præterea idem Philosophus lib. 1. de cœlo tex. 88. docet celeritatē motus naturalis in progressu augeri propter augmentū virtutis motiue grauitatis, aut leuitatis, quæ scilicet augētur in motu. Vnde infert, quod si motus pcederet in infinitū, etiā grauitas, aut leuitas, & velocitas ex illis orta cresceret in infinitū. Loquitur autē de augmento, & incremento grauitatis accidentalis, seu impetus acquisiti; cū satis cōstet, nec grauitatē, nec leuitatē naturalem formaliter in seipsa augeri.

Primum autem fundamentum huius assertionis, ac Peripateticæ doctrinæ sumendum est ex reiectione prioris, ac relatæ sententiæ (cum ceteræ satis reiectæ sint ab alijs, ac reijci possint ex dicendis) quia licet aer, qui à graui descendente truditur, ac deorsum pellitur ob suam tenuitatem partim scindatur, ac dissipetur, partimq. impetu accepto, vterius abire cogatur versus eundem locum, minusq. propterea resistat: atque hoc ex capite motus grauium deorsum non parum acceleretur: nullo tamen pacto is accelerari poterit accursu aeris subsequēntis, qui retro terga grauis impellat, tantaq. vi magis ac magis promoueat, vt relata sententia asserēbat. Quoniam & si partes aeris pulsæ, ac diuulsæ in spaciū ab eodē graue relictum subire conentur, nunquam ob suam tenuitatem tanta vi possunt confluere, vt vehementiam, quam in motu suscipit ingens aliquod graue descendens valeant causare, augereq. vsque in finem. Præsertim cum videamus, nec tenuissimam lanam, vel quid
finit.

simile, quod à quolibet vento agitari soleat, descendentem graui post terga alligatam, eas posse deprimere: nec cadentem candelam extinguere si flamma sit in parte superiori. Imò nec ipsam flammulã à rectitudine suæ pyramidis auertere, quamuis tali ex altitudine decidat, vt in motu accelerationis incrementa suscipiat. Quod cum sensu constet, & à grauissimis Philosophis acceperimus obseruatum, gratis à nonnullis negatur, qui parui quoque momenti faciunt vim aeris subsequenter cum per poros lanæ inquiunt illum insinuari, & sic graue depellere absque vlla lanæ depressione.

Cum igitur huiusmodi accursus aeris succedentis in eundem locum non suffragetur; nec sufficiat minor illa resistentia explicata; grauitas verò ipsa corporis augeri non possit à seipsa, sicut nec vlla qualitas per acquisitionem noui gradus eiusdem specificæ qualitatis, qui si daretur, perseveraret etiam post motum, quod experientia repugnat; aliaque non appareat probabilis causa ipsius maioris velocitatis, quam graue acquirit in motu; remanet vt illam non nisi ab impetu ab eodem graui in ipsa naturali motione producto oriri dicamus cum Aristotele, alijsq. magni nominis tum veteribus, tum neotericis Philosophis, qui hac de re fusè scripserunt.

Secundum verò fundamentum eiusdem veritatis, ac nostræ sententiæ sumendum est ab obseruationibus, & experientijs. Primò enim constat, grauiã quò ex altiori loco deciderint, non modò eo velocius ferri prope finem, quàm in principio; sed etiam validius obuiantia pellere fortiusq. impingere: quod non contingit quando ad latera, vel sursum feruntur, languescente impetu prope finem. Indiciumq. propterea est, non prouenire à sola grauitate, eodem semper modo se habente, sed etiam ab impetu acquisito, qui cum in motu naturali successiuè semper intendatur, in violento verò remittatur, magis praeualeat in illo, quàm in isto, quo longius ipsa grauiã à principio fuerint remota.

Deinde obseruamus ipsa grauiã quanto ex sublimiori situ demittantur, tantò altius resilire, quod euenire nequit

ex vi præcisæ gravitatis, quæ sanè ubi primò solum vel detinens quippiam attingeret, sisteret, nec sineret graue ipsum rursus attolli. Contra verò admissa productione impetus in descensu illorum, cum hic successiuè intendatur in progressu, facilè intelligitur magis ea resiliire iuxta maiorem impetum acquisitum in maiori via. Quod si dicas impetum ad resiliendum produci ab ipso plano, vel solo in pilâ lusoriam, vel decidens quodlibet corpus, quod resilit: hoc in primis expressè est contra Aristotelem 8. physic. tex. 32. Qui sphæram ait à proijciente, non à pariete virtutem accipere ad resiliendum: nec minus contra experientiam cum testa, impetu lata, & obliquè in aquarum superficiem incidens, longius inde resiliat, tamen si paruan, aut nullam in fluido corpore adinuerit resistantiam, nullumq. propterea proprii impetus acquisierit incrementum. Corpus enim quod feritur, aut percutitur à proiectis, repellere illa dicitur non, producendo, nec augendo, sed retorquendo in eis impetum incussum à proijciente. Item non satis intelligitur impulsus ad resiliendum effici absque motu locali impellentis sicut in reliquis omnibus impulsibus experimur. Probaturq. ex receptissimò illo Aristotelis axiomate, quod nullum moueat nisi commotum, vt quæst. 33. explicabitur.

Præterea videmus corpus fune appensum huc atque illuc circumferri, per vnum quippe arcum descendendo, ac per alium ascendendo: sed nequit ascendere virtute gravitatis, qua solum potest descendere: Ergo necessariò concedenda est alia virtus motiua, qua possit ascendere; & hanc vocamus impetum. Qui cum à nulla alia causa tunc possit oriri, remanet, vt producat ab eodem corpore agitato in ipso descensu virtute suæ gravitatis, quæ est illi ratio principaliter agendi, vt infra rursus patebit.

Neminem denique fugit celsis ex cacuminibus montium cadentia saxa discendi per aera, nullis alijs illisa corporibus; & aquam supernè cadentem in progressu magis ac magis diuelli, & in guttas resolui. Quod absque impetu ab eodem graui productò non potest intelligi; Cum aer nec saxa
dissum;

disrumpere magis quàm lana; nec aquæ partes discontinuare valeat potius in progressu, vel fine, quàm in principio casus quando non est adhuc ipse deorsum commotus. Hinc enim obseruare est, aquam per Epistomium fluentem, vel aliquod foramen, nullo pacto sub initio ab aere direlli, quò magis tamen descendit, magis extenuari, ita vt pyramidis figuram referat. Nam quantò magis à foramine elongatur tantò velocius cogitur moueri, quod est in eodem tempore maius spatium non solum percurrere, sed etiam occupare. Fieri, non posset seruando continuationem, eandemque crassitiem quam prius. Vnde successiue crescente velocitate, crescit extenuatio ad occupandam maiorem longitudinem spatij, quousque deperdita continuatione in guttas resoluatur. Itaque aquæ diuulsio, ac discontinuatio, sicut & ipsa maior velocitas casus, cum non proueniat ab aere intermedio, nec immediatè ab ipsa grauitate eodem pacto se habente, remanet vt proximè oriatur ex impetu iugiter aucto, quo partes aquæ successiue semper magis vrgentur.

Nec obstat qualitatem impetus esse præter naturam grauium ad hoc, vt dicamus ab ipsismet per motum naturalem deorsum tendendo produci. Quandoquidem multa per accidens producuntur à causis naturalibus, quæ illis conueniunt præter naturam. Vt cum per motum localem producit in se calor ab aqua, vel ferro, quibus conuenit præter naturam; sicut & præsentia localis in spatio à centro remotiori, quæ producit ab eisdem grauib; sursum tendentibus, atque promotis; & similia.

Nec tandem sequitur, quod si talis impetus à descendente graui produceretur, natura sua tenderet in eundem locum in quem tendit grauitas, à qua propterea non satis posset distingui. Porro determinatio qua impetus tendit in hunc potius quàm illum locum, pender à dirigente, vel imprimente, atque adeo non nisi per accidens ei conuenit, & ab extrinseco. Vnde sicut indifferens est ex natura sua, vt producat à proijciente, vel à graui descendente, aut leui ascendente: ita pariter est indifferens ad tendendum potius

istuc

istuc quàm illuc; determinatur autem à causa impellente per modum quo applicatur, ac iuxta positionem qua vrget, ac dirigit mobile in ipsa impulsione.

Cæterum ex dictis in hac quæstione colligitur, non esse eandem rationem de maiori facilitate motus violenti, ac naturalis post principium motus; cum maior facilitas, quæ reperitur in violenta motione corporis iam commoti, oriatur ex reduplicatione illa imperus explicata: maior autem facilitas, ac velocitas motus naturalis postquã corpus moueri cœperit in suum locũ, procedat ab impetu adueniente ultra grauitatem, aut leuitatem, qui adhuc successiue intenditur, promouetq. magis ac magis vsque in finẽ. Quamobrem absque fundamento, nonnulli oppositum putantes, aiunt eandem esse vtrique motui facilitatis, ac velocitatis rationem, eamq. consistere in dispositione prioris motus, quo disponatur subiectum ad motum posteriorem: cum, nec motus, nec alia actio per se disponere valeat subiectum absque formæ alicuius productione; nec vlla forma produci possit per motum localem præter præsentiam ipsam localem, quæ ad nihil disponit.

Quæstio Trigesima secunda.



*Q*Uæritur ea que proijciuntur, cessant à latione? An quia impellens desinit potentia, vel propter retractionem, vel propter rei proiectæ inclinationem, quando ea valentior fuerit, quàm proijcientis vires. Aut isthac ambigere, principium relinquentes, absurdum est.

COMMENTARIUS.

DE motu proiectorum sermonem instituens Aristoteles inuerso ordine videtur procedere dum prius hic quæritur cur illa cessent à latione, deinde verò in sequen;

sequenti quæstione de ipsa latione pertractat. Vnde post breuem solutionem huius quæstionis, addit: An potius absurdum esse videtur, nos isthæc quærere, ac in dubitationem vocare, principium relinquentes. Nempe causam huius cessationis consistentem in ipsa natura virtutis, qua proiecta feruntur, ac de qua acturus erat in sequenti quæstione. Verum totam huius rei doctrinam spectando non immeritò Aristotelem id egisse comperiemus, cum ad explicandam, tam occultæ qualitatis naturam non parum conducatur illam à proprio interitu explorare.

Reddè igitur primo loco hic quærit Aristoteles, cur ea, quæ projiciuntur cessent à latione. Et ratio dubitandi est; quia proiecta cessare non possunt à latione, nisi eius causa cessante, quæ est virtus impressa à projiciente, vt quæst. sequen. patebit: virtus autem hæc semel impressa non videtur posse cessare. Nam vel hoc contingeret per defectum causæ conseruantis, vel per aduentum alicuius formæ contrariæ: sed talis virtus existens in proiecto iam separato à projiciente, non potest desinere ob defectum causæ conseruantis: Siquidem iam perijisset vbi primo. seiunctum fuit fuit proiectum ipsum à projiciente; sicut lumen quando separatur illuminatum ab illuminante: nec per aduentum formæ contrariæ, cum nulla talis forma de nouo producat in proiecto quando cessat à motu: Ergo virtus prædicta non videtur posse desinere, ideoq. nec proiectum à latione cessare.

Nonnulli tamen respondent, virtutem illam impressam in proiectis paulatim remitti, ac tandem penitus corrumpi per reproductionem deperditæ grauitatis ad impressionem illius. Putant enim in ipso actu impressionis impetus, multum minui de grauitate naturali ipsius corporis proiecti; quod cum violenter fiat, ipsum & corpus cum primò separatur à projiciente paulatim se reducit in pristinam grauitatem, per quã sensim etiam expellitur virtus illa à projiciente impressa quæ vocatur impetus, siue impulsus, & sic proiectum cessat à latione. Quod explicant atque confirmando
exem.

exemplo caloris introducti in aquam, qui sanè ad remotiorem calefacientis paulatim extinguitur, dum aqua se reducit in pristinam frigiditatem.

Sed ratio est valde diuersa, vnde facilè hæc responsio impugnatur. Primò quia grauiora dum impetu feruntur, si in medio cursu sistantur, nihil suæ naturalis grauitatis perdidisse comperiuntur; vt manu experiri potest in paruis proiectis. Nec talis grauitas in instanti ad eandem mensuram potuisset reproduci, cum primo ipsa grauiora incipiunt detineri. Nam qualitates quæ habent contrarium non nisi in tempore intenduntur, ac remittuntur per proprium motum alterationis, vt patet in eadem calefactione aquæ, ac reproductione frigiditatis eiusdem. Secundò quia non est admittenda diminutio, ac reproductio *grauitatis* absque propria contrarietate, quam ipsa grauitas habeat cum virtute illa impressa. Nullam autem esse huiusmodi contrarietatem, argumento est, quia in motu violento quo deorsum aliqua corpora depelluntur, nec aufertur, nec minuitur grauitas per ipsam violentiam illatam, virtutemq. motiuam in illis impressam; nec virtus ipsa motiua deperditur, aut corrumpitur à grauitate, quia potius augetur, magisq. corroboratur. Imò ab ipso solo corpore graui operante per grauitatem in descensu producitur, vt quæstione præcedenti dicebamus: Quod certè non contingeret, si qualitas illa virtutis impressæ, quæ semper est eiusdem speciei, ex natura sua impossibilis esset cum grauitate, contrarietatemq. haberent ad inuicem.

Præterea tota contrarietas excogitabilis inter grauitatem, & impetum colligitur ex repugnantia, quam grauitas habet cum illo quando grauiora sursum proiiciuntur: Quæ tamen repugnantia non minus obseruatur inter eandem qualitatem imperus, & leuitatem, quando leuia proiiciuntur deorsum. At eadem qualitas ex genere suo non potest esse simul contraria duabus qualitibus inter se contrarijs: nam hoc ipso quod opponatur vni, non potest opponi alteri illi contrariæ: Ergo qualitas imperus ex genere suo nullam ha-

bet contrarietatem cum gravitate, aut leuitate, quæ sunt qualitates inter se contrariæ. Et confirmari adhuc potest, quia si gradus aliquis gravitatis expelleretur è proiecto, id fieret per introductionem similis gradus leuitatis, vt gradus frigoris per gradum caloris; atque adeò non per introductionem qualitatis impetus, quæ indifferens est ad coexistendum cum gravitate, aut leuitate. Licet quandoq. ex prædominio impediatur effectum, seu motum vtriusque vel alterutræ qualitatis oppositæ. Nam si dirigatur ad latera, per lineam horizonti parallelam, nec finit proiectum ascendere, nec descendere; ac sursum ferens pondera prohibet descensum, non minus ac ascensum leuium dum ea deorsum deprimit. Quod si pleraq. graua nimia gravitate proijci minimè valeant, nullamq. propterea impetus introductionem, aut productionem in se admittant: hoc certè non prouenit ex contrarietate, quam formaliter gravitas habeat cum impetu; sed ex repugnantia, quam dicit ad motum præternaturalem, ac requisitum tanquam conditionem ad hoc vt impetus producat, & incutiat. Etenim quod moueri nequit, nec potest impelli, & absque impulsu, nulla fieri valet projectio. Sicut contrà quantò plus, aut velociùs graue aliquod à proijciente agitur, tantò maiorem ab eo imperum recipit, longiusq. proijcitur.

Soluit igitur quæstionem Aristoteles dicens, projecta ex eo à latione cessare, quod virtus motiua impellens, quam vocat potentiam, & qua ipsa ferebantur, tandem desinat, atque marcescat. Quod profectò duplici ex causa euenire posse subiungit. Nimirum vel propter simplicem retractionem, vt cum projecta alterius corporis obiectu, siue repulsa retrahuntur à tali motu, ac sistere coguntur: (Nam quippe tunc cessante progressu, ac motu, cessat & impetus, qui sicut præuio motu producit, ita quamdiu durat conseruatur in motu tanquam cum propria dispositione;) vel propter inclinationem, quam potius ipsa projecta habeant ad alium motum, vt sursum, vel deorsum per naturalem gravitatem, aut leuitatem quando talis inclinatio rursus coeperit præualem.

ualere magis quàm virtus illa impressa à proijciente . Quod utique si attentè consideretur non potest verificari per propriam contrarietatem, & impossibilitatem ipsarum formarum grauitatis, aut leuitatis cum impetu in eodem subiecto; sed potius per quandam reluctantiã ex parte effectus, diuersorum scilicet motuum, quos causare consueverunt. Idque optimè intelligitur in tractione, qua graue aliquod hinc inde simul distrahitur . Quandoquidem virtutes trahentes non sunt contrariæ, sed motus ipsi, seu tractiones, quæ vel mutuò se impediunt, vel mixtum quendam motum componunt ab vtraque diuersum : vel post reluctantiã, altera tandem præualeat ob validiorem virtutem à qua procedit . Idemq. exemplificari poterit in motibus mixtis procedentibus à duobus impulsibus in diuersa tendentibus. Nam similiter nulla existente contrarietate inter ipsos impulsus, motus per eos producti aduersantur adinuicè, impediuntq. sese omnino, vel in tertium quendam motum degenerant, qui dicitur mixtus ex vtroque .

Alioquin si grauitas, aut leuitas proiecti, quod actu fertur per impetum acceprum ex se obstitisset introductioni, ac radicationi illius in subiecto, nec sineret proiectum moueri ad nutum illius . Quod si non à principio, sed postea in progressu naturalis ipsa inclinatio grauitatis, aut leuitatis incipiat præualere, indicium est, vel tunc augeri ipsam grauitatem, aut leuitatem, quod, vt diximus, est improbabile; vel tunc impetum languescere, aut remitti per naturalem, ac veluti spontaneam desitionem: qua semel admissa, iam optimè intelligitur, effectum grauitatis, aut leuitatis præualere contra lationem diuersam ac violentam . Nam tendentia grauis deorsum, aut leuis sursum, non potest impediri à quacunque latione impetus remissi, sed potius impetu languescente, grauitate autem, aut leuitate in suo robore persistente, paulatim motus degenerat à latione violenta, quousque absolute fiat iuxta inclinationem naturalem, cum scilicet impetus omnino desierit . Absoluta igitur causæ cessationis à latione in proiectis, est ipsa desitio imperus, qui

qui cum contrarium non habeat, sitq. semper eiusdem speciei quocunque tendat, ex se incipit languescere, & heberari post moram aliquam à sua productione ob defectum causæ conseruantis, & commune est pluribus qualitatibus in genere dispositionis facilè mobilis à subiecto, ac passibilis qualitatis, & passionis propriè dictæ; imò & in genere naturalis potentiæ, & impotentia. Nam & sonus, & odor, & sapor, postquam aliquantisper viguerint, ex se remittuntur, ac desinunt absque proprio contrario expellente in eodem subiecto. Sicut & rubedo, quæ procedit ex verecundia, & ab Aristotele inter passionem enumeratur. Itemque species intentionales expressæ, imò & impressæ post diurnam cessationem ab usu, ac renouatione illarum.

Nec obstat, quòd impetus lati corporis, vel proiecti in medio cursu detenti non vtrò ac sponte sua, sed vi detinentis corrumpi videatur; itemq. non successiuè, sed in instanti cum primò cessat à motu. Nam virtus detinentis non opponitur virtuti motiæ, siue naturali, siue violentæ; sed effectui illarum: Vnde sicut per detentionem corporis non corrumpitur grauitas, aut leuitas illius, sic neque impetus. Per accidens tamen acceleratur corruptio, ac desitio impetus in ipsa detentione, quia vt diximus, cessante motu, cessat dispositio, atque conditio, qua maximè impetus conseruatur. Nullumq. est inconueniens, effectum concurrere ad conseruationem causæ tanquam dispositionem, aut conditionem. Nec propterea talis desitio fit tota simul in instanti; Quandoquidem licet impetus post primum impulsu, ac repulsum amplius à detinente non sentiat, videlicet propter exuperantiam virtutis illius qua vincitur, & superatur: hoc tamen non arguit eum totum simul in primo instanti deperisse; sed tantum propter obstaculum ad cessationem motus breui morula remissum paulatim fuisse, ac tandem penitus desisse. Etenim nisi omni ex parte ipsum proiectum detineatur, adhuc post acceptum repulsum videmus illud resilire, ac paulisper impetum eius, quamuis retortum, ac languescens non nihil virgere.

Sed contra etiam est, quia si qualitas prædicta impetus impressi deficeret per meram desitionem ad remotionem impellentis, vel proijcientis, statim atque proiectum elabitur è manu proijcientis, inciperet ipsa impetus remissio, cresceretq. vsque ad totalem desitionem. At non ita contingit, cum potius proiecta è manibus proijcientium egressa, tardius moueantur à principio, quàm in progressu vsque ad certum terminum, ad quem virtus impulsua valet pertingere, validiusq. propterea feriant in proportionata quadam distantia, quàm prope nimis ipsum proijciens: Ergo indicium est ipsam impetus qualitatem, non deficere, nec remitti statim ad defectum causæ conseruantis, & impellentis, sed potius augeri per aliquod tempus, deinde paulatim remitti. ac tandem discedere ad expulsionem ortam ex qualitate contraria.

Verùm huic obiectioni facilè occurritur dicendo, impetum post remotionem impellentis, nullum ex se incrementum posse suscipere, siue habeat, siue non habeat qualitatem contrariam; causamque tarditatis, seu minoris. velocitatis. prædictæ in principio, esse maiorem resistantiam, quam sub ipso initio proiectum reperit in intermedio. Nam aer, verbi gratia, vel aqua quiescens, cum primo à proiecto impellitur magis valet resistere, quàm cum paulatim dimota per nouum semper impulsu vltius abire cogitur, vt locum relinquat ipsi proiecto. Imperus enim in eodem aere, vel aqua impressus crescit semper cum motu, quia proiectum dum fertur semper impellit, ac impellendo successiuè intendit effectum: magis autem intensus impetus in ipso medio, magis ac magis diffunditur in vltiores partes eiusdem medii, quod propterea velocius discedit, ac locum, quem habet relinquendo, minus resistit. Quod idem in causa est saltem ex parte, vt motus grauium è superno aliquo loco decidendum velocior sit in progressu, quàm in principio, vt supra inuimus. Etenim inter motum grauium naturalem, quo illa tendunt deorsum, ac motum violentum, quo tendunt sursum, vel ad latera, hoc solum interest in propo-

to, quod motus naturalis successiue semper fiat velocior, atque velocior in partibus posterioribus vsque in finem cum semper grauitas perseueret in eadem intentione, minusq. resistat intermedium, nec non & maiori semper ferantur impulsu ab eisdem grauib. in eodem motu produ-cto: motus autem violentus licet in progressu vsque ad certum terminum similiter fiat velocior, tandem languescente impetu rursus incipiat retardari quousque desinat in quietem, vel degeneret in motum naturalem corrupta penitus virtute motiua ipsius impetus à proijciente impressa.

Cæterum hic etiam determinandum videtur, qua ratione, vel causa corpus pendens à fune postquam aliquandiu fuerit ex se huc atque illuc circulariter agitaturn, seu per portionem peripheriæ circumlatũ, tandẽ cesset à latione, ac per lineam tendentem ad mundi centrum quiescat. Supponimus enim id sæpẽ contingere, nulla adhibita violentia per solam remotionem prohibentis. Nam si per funem alicubi religatum corpus aliquod inde propendens detineatur, non quidem perpendiculariter ad horizontem, sed aliquantulum ex latere, ac liberẽ postea relinquatur statim ex se circulariter illud descendere, ac rursus ascendere conspiciemus, huc atque illuc arcus describendo, eosq; successiue diminuendo quousque tandem quiescat in puncto per quod à loco detentionis funis ad mundi centrum rectà deducitur. Difficultas autem in eo consistit, quod cum huiusmodi motus ex parte sit obliquus quidã ascensus, & ex parte descensus, nec à grauitate dũtaxat videtur posse procedere, nec ab alia simul virtute impressa, quæ moueat in cõtrariũ: præsertim cũ nulla appareat causa effectiua talis virtutis; nisi dicatur ab eodem graui manare (vt præcedenti quæstione probatum est) quod cum operetur per grauitatem intrinsicam, quæ iugiter perseuerat in ipso, iugiter etiam talem virtutem in se conseruaret, quæ propterea nunquam cessaret à motu alterno iam explicato, sicq. corpus per funem propendens, semel promotum, alternatim ac semper, seu pe-

renniter moueretur ; partim scilicet à grauitate, ac partim à virtute impressa, perseuerante semper grauitate cum tali virtute impulsua.

Dicendū tamen est, corpus prædictū statimatq. relinquitur in sua libertate descēdere ex vi propriæ grauitatis ea via qua potest, nempe obliquè per arcum, describēdo portionē circumferentiæ circa punctum, in quo funis est religatus tanquam circa centrum : Per hunc autem descensum impetum quendam in se ab eodem corpore produci, quod cum ulterius deorsum tendere nequeat ob funis detentionem, quasi resilire cogitur, ac denuò sursum attolli per oppositum arcum seu viam, ita vt corpus postquam à dextris descendit per grauitatem ; ascendit ad læuam per impetum, quo languescēte, ac desinente rursus per eandem viam corpus ipsum grauitate vrgente descendat : Per quem descensum, nouus impetus producit ad nouum ascensum perficiendum, & sic deinceps . Quoniam verò corpus ipsum per impetum in se media grauitate productum, nunquam potest tantum ascendere, quantum per ipsam grauitatem descendit ob resistantiam, quam reperit in ascensu secus ac in descensu : hinc est, vt secundus descensus per minorem arcum etiam fiat, per eumq. minor impetus producat, quàm per primum ; ex quo minori impetu adhuc minor constituitur alius ascensus, ac descensus, & sic paulatim per minores, ac minores arcus corpus ipsum dimoueat, quousque penitus quiescat in puncto explicato. .

Quæstio Trigesimatertia .



VR quippiam non peculiarem sibi fertur lationem, impulsore alioquin non consequente? An videlicet quoniam primum id efficit, vt alterum impellat: illudq. rursus vt alterum? Cessat autem quando non potest amplius facere primum impellens, id quod fertur.

fertur, ut impellat: & quoniam ipſus lati grauitas nutu ſuo declinat magis, quàm impellentis in ante ſit potentia.

COM M E N T A R I V S.

CUm frequentiffimè de impetu, ſiue impulſu, quo graua in diuerſa loca feruntur ſermo in his quaſtionibus incidiffet, nunquam quod ille ſit, hucuſque determinauerat Ariſtoteles. Quod licet obſcuriuſculè, opportunè tamen hic præſtat agendo de motu proiectorum poſt proximam quaſtionem, qua de ceſſatione illorum à motu, ac deſitione eiufdem impulſus, ut vidimus pertranſiuit.

Quærit igitur cur proiecta moueantur, quamuis impellens, ea impellendo, non conſequatur; ſed ab eis remaneat ſeiunctum, cum certè ſibi naturalis ac propria non ſit ea latio vel motus. Aitque id fieri quoniam proijciens, quod eſt primum impellens efficit, ut proiectum quoque ipſum impellat alterum (nempe aerem, vel aliud intermedium) quouſque eò deueniat, ut nequeat amplius illud impellere, languefcente nimirum, ac tandem deficiente virtute à primo impulſore accepta. Nam tunc ipſius lati grauitas nutu ſuo declinat magis, ſeu deorſum mouere magis præualeat, quàm virtus illa deficiens impellentis in ante. Implicitè igitur docet Ariſtoteles, formam intrinſecam à qua efficienter, & immediatè prouenit motus proiectorum poſtquam è manibus proijcientium ea fuerint egreſſa, eſſe virtutem quandam motiuam ab impulſore productâ, & in illis receptâ, ex natura ſua defectibilem, qua tamen perdurante, dum ea informantur, ipſa quoque proiecta valent alia corpora impellere, ac præſertim aerem, vel aquam, aut aliud intermedium, ut ſibi locum cedant, ac procedant ulterius, tendendo ſecundum eandem directionem. Non ſecus ac per inhærentem grauitatem, aut leuitatem ſimilia corpora ſurſum, aut deorſum mouentur, aliaq. ſibi occurrentia promouent verſus eundem locum. Quamobrem idem Ari-

stoteles 1. de Cælo tex. 89. & 8. Physic. tex. 27. docuit per violentiam mota, fieri quasi per se mobilia: hoc est simili quadam intrinseca virtute inhaerente, atque à projiciente recepta. Alioqui projiciens efficere non posset, ut proiectum etiam postquam ab ipso seiunctum fuerit, alterum impellat, ut hic ipse aiebat, nisi in actu projectionis, talem in eo virtutem impulsuam imprimeret.

Contra tamen huiusmodi expositionem est, quòd sæpè Aristoteles alibi docuerit, projecta ab aère, vel aqua, aut alio non absimili medio deferri, ut 4. Physic. tex. 68. & lib. 8. tex. 82. & lib. 3. de cælo tex. 28. Quod idem supponit lib. de Somnijs, ac de Diuinatione per somn. & 1. lect. problem. quæst. 6. Ex quo aliqui Peripatetici sumserunt, nullam in projectis dari virtutem motiuam à projiciente impressam. Sequeretur enim post remotionem projicientis, ipsa projecta per illam, tanquam à se per proprium principium intrinsecum moueri præter naturam, quod impossibile esse statuit ipsemet Aristoteles 8. Physicor. tex. 19. Vitale namque (hoc est animatorum) ait esse proprium. Cum pariter tex. 27. dixisset. Quorumcunque motus principium in se ipsis est, hæc natura dicimus moueri, non autem violentia.

Verum si Aristotelis doctrina in locis citatis attentius expendatur, nihil omnino illam contra explicatam virtutem impressam continere comperietur. Tantum enim per eam intendit Philosophus projecta non modo prius à projiciente, sed etiam à medio postea semper impelli; nec ob remotionem, aut cessationem projicientis à seipsis moueri, sed adhuc ab alio extrinseco, nempe à contiguo ambiente. Alioqui non negat virtutem aliquam à projiciente cum in ipsis projectis, tum etiam in aère, vel alio medio imprimi. Nam ut docet 8. Physicor. tex. 82. ubi hac de re fusiùs ac magis ex professo pertractat: Necessè est (inquit) dicere, quod primum mouens facit, ut medium possit mouere, nempe contiguus aer vel aqua. Quod verificari non posset absque impressione, ac diffusionè alicuius virtutis motiue, qua

qua in absentia primi motoris moueat. Ideoq. concludit: Cessat autem cum in ipso contiguo minor fuerit virtus, quàm vt moueat. Quæ sanè virtus cum naturaliter aeri, vel aquæ non insit, satis conuincitur, eam ab alio, scilicet à primo motore mutuari debere. Nec oppositum Aristotelem sensisse, quippe qui paulò inferius tex. 85. loquens adhuc de medio tanquam instrumento continuè mouente ait: Aut ipsum oportet pellere, aut trahere, vel vtrumque aliquid aliud excipiens ab alio (videlicet virtutem impressam à primo motore) sicut dudum dictum est in ijs, quæ proijciuntur. Quibus consentanea protulit 11. sect. problem. quæst. 6. vbi perpetuè motum mouere docet, ac motum aerem motori succedere, donec omnis conatus mouendi emarcescat cum aer non amplius impellere, vel telum, vel aerem potest. Concedit igitur proprium conatum in aere, tanquam in instrumento separato motoris, tandem marcescere ob defitionem potentia, seu virtutis impulsuæ, qua eliciebatur in absentia ipsius primi motoris. Item 3. de Cælo tex. 28. loquendo de motione naturali, ac violenta, ait, vtrique aerem, tanquam instrumentum extrinsecum, deferuire. Sicut 8. Physicor. tex. 33. etiam dixerat, afferens illud exemplum: *Vt baculus* (inquit) mouet lapidem, & mouetur à manu mota ab homine. Vnde colligit vtraque mouere, & primum, & vltimum.

Illud autem his in locis magnopere obseruandum est, Aristotelem semper loqui de motore extrinseco, quem in motibus quoque naturalibus grauium, & leuium ibidem admittit, ne concedere cogatur corpora inanimata moueri à seipsis, huiusmodi motus referens ad generantem grauitatem, aut leuitatem, vel ad remouentem impedimenta. Quamobrem sicut ipse Philosophus non per hoc negat, grauia, & leuia habere formam quādam inhaerentem, atque intrinsecam, quæ natura sua tendunt sursum, aut deorsum, vt apertè concesserat tex. præcedenti nempe 8. Physic. tex. 32. ita nec potest negare, proiecta præter causam extrinsecam suæ motionis, præternaturalis, videlicet primum

motorem, aut aërem impellentem, habere propriam virtutem motiuam intrinsecam, ipsis à proijciente, vel ambiente impressam, per quam proximè feruntur quò diriguntur, sicut per leuitatem sursum, ac per grauitatem deorsum. Quam quidem virtutem, vt vidimus, sæpè ipse insinuat, & à neotericis rem distinctius pertractantibus vocatur impetus, seu impulsus. Qui cum diu non perseveret in subiecto, nec ei competat ex natura sua: Cumq. determinatè tantum valeat mouere iuxta proijcientis directionem, non sequitur illud inconueniens, quod Aristoteles pro ratione dubitandi proposuerat, nimirum fore, vt proiecta mouerètur à seipsis, & ab intrinseco, non secus ac animalia, vel saltem corpora, quæ natura mouentur, non violentia. Non sufficit enim moueri à principio intrinseco ad *constituendum* motum naturalem, sed amplius requiritur, vt ipsum principium sit stabile, ac naturæ debitum, cuiusmodi non est virtus impressa, projectis.

Iam verò quàm necessariò admittenda sit talis qualitas, seu virtus impressa, quidquid senserit Aristoteles, ex eo vel maximè intelligitur, quòd absque illa insufficiens sit solus aer concitatus ad perficiendum motum projectorum, etsi ad ipsum quandoq. concurrat. Sensu enim constat, nullæ ventorum irruentium vi quiescentem lapidem, aut plumbeam pilam posse sustolli, & in longinqua transferri, sicut nec ligneam, aut ferream rotam conuolui, & alia eiusmodi corpora promoueri; quæ tamen impetu incusso, facile præstantur à manu, etiam contra omnem ventorum conatum, vehementissimè ex aduerso perflantium. Imò & ferreas pilas contra eundem flatum videmus è tormentis explodi, ac non minus mania quatere; & ingentia saxa eminus ac summa celeritate per aera ferri, ipso aere in contrarium nite, ac repellente. Vanumque videtur illud effugium, flante vento, quamuis totus aer commoueatur, pars tamen aeris, quæ tangit projectum, cum vnità magis moueatur à proijciente, maiorem vim obtinere ad promouendum, quàm vllum ventum in contrarium. Siquidem veluti per follem,

aut fistulam aer emittendus esset, ac pellendus à proijciēte post terga proiecti, posterioremque partem, qua neruo aptari solet sagitta ex directo feriret, tanquam ventus nauem in puppi: tantaq. demum esset virtus ipsius aeris in tam paruum quantitatem incidentis, vt totum corpus minus impellere contra quamcunque reliqui aeris vniuersi vehementiam præualeret, quod est absurdum.

Accedit quia nec aquam comitari, atque impellere videmus nauiculas, ac triremes quemcunque cursum in mari tenentes, quippe quæ sæpius contra fluxum, ac fluctus illius solo remorum pulsū feruntur: Nec aerem circumobstantem constat, rotam figuli, vel similem, quæ in gyrum velocissimè ducitur promouere, cum accensum lumen prope illam extinguere, aut inflectere quamuis concitatus ipse minimè valeat. Præterea si solus aer ad proiectorum lationem valeret, facilius, ac longius transferre deberet leuiora proiecta, quàm grauiora; at si quis proijciat plumam, vel paleam, minus illam promouere valebit, quam plumbeum quippiam, vel æneum, quod non excedat vires proijcientis: Ergo non solo aere proiecta ipsa feruntur: Neque vim huius argumenti effugiunt nonnulli dum aiunt, ob nimiam leuitatem minus proijci corpora posse, à quocunque proijciantur, aut ferantur, eo quod proportio quædam requiratur inter proijciens, & proiectum, ac sicut nimia resistentia, ita imbecillitas nimia ipsius proiecti, motum proiectionis impediat, vt sequenti quæst. optimè docet Aristoteles. Quandoquidem si latio proiectorum perficeretur ab aere nulla esset imbecillitas leuium ad talem motum, quæ sanè tota consistit in eo, quod superare, & expellere nequeant aerem, in cuius locum vltèrius tendendo deberent succedere, vt ipsemet Aristoteles ibidem aduertit. Si enim aer deferret proiecta, non vtiq. illis obstaret, ac sine obstaculo nulla haberetur ratio imbecillitatis eorum. Quare non modò leuia nimis, æquè ac moderatè grauia proijci possent, sed multò longius, ac facilius propter minorem
resist.

resistentiam ex parte grauitatis, vt dicebamus; quod est contra experientiam.

Demum ratio à priori videtur, quoniam aer ex se quietus est, nec potest aliud mouere, nisi ipse ab alio moueatur, & impellatur: dum autem impellitur, vel accipit virtutem aliquam ab impellente, vel nullam: si aliquam accipit, eam potius, vel similem dicemus accipere proiectum inmediate: si nullam accipit; ergo tamdiu poterit impellere quamdiu actu impellitur (vt baculus, vel aliud instrumentum manu dimotum ad aliud impellendum) cessante verò impulsore, ipse quoque ab impulsu desistet. Quod idem concluditur de pluribus, ac pluribus intermedijs, quando alterum ab altero nullam accipit virtutem inhærentem, sed pendent ab actuali influxu, ac motione prioris. At sensu constat cessante primo motore, seu proijciente, adhuc proiecta perferri vteriusque propelli: Ergo vel non propelluntur ab aere, vel aer propellens non absque virtute à proijciente recepta propellit. Semel autem admissa huiusmodi virtute impulsiva in aere, multo magis ac potiori iure admittenda erit in ipsis proiectis.

Quod si dicatur proiectum semper impelli ab aere succedente à tergo ad replendum vacuum, quod ab ipso proiecto relinquitur, nulla vi ab alio recepta, vel in vteriores partes aeris transfusa; tunc concluderetur, huiusmodi motum necessariò esse perennem. Quandoquidem sicut nunquam cessat naturalis illa propensio, qua corpora feruntur ad replendum vacuum, ita nunquam cessare posset effectus manans ab illa; quod cum sit falsum, remanet, & falsum esse illud, ex quo sequitur.

Cum igitur aer commotus, vel aliud medium, tanquam instrumentum proijcientis, non sufficiat ad perficiendum motum proiectorum, postquam ea ab ipso proijciente recesserint, nec aliud ad id præstandum appareat, remanet causam proximam, ac principalem motus prædicti esse ipsamet corpora proiecta, prout informata qualitate imperus, quem
hæte-

hactenus à proijciente in actu projectionis acceperunt. Ita, vt corpora proiecta præcisè vt corpora sunt, sint causa materialis huius motus, quem recipiunt; ipse verò impetus sit ratio formalis principaliter agendi, & influendi, hoc est, localiter se mouendi, producendo in eisdem corporibus nouas, ac nouas præsentias locales, quousque vigerit, ac perdurauerit: Cum natura sua, vt diximus, paulatim remittatur, ac tandem penitus desinat.

Dicimus autem præfatum impetum, seu virtutem motiuam impressam, esse propriam qualitatem de secunda specie, quæ dicitur potentia in prædicamento qualitatis, diuersam tamen essentialiter à virtute motiuâ naturali, vt est grauitas, aut leuitas. Quatenus nimirum est principium formale intrinsecum quo producitur motus localis, non debitus naturæ, sed præter vel contra inclinationem illius secus ac motus, qui producitur à grauitate, aut leuitate, qui semper est determinatus ad vnum locum, iuxta inclinationem propriæ naturæ. Motus enim productus ab impetu indifferens est ad quamcunque positionem, vel locum, ita vt quoquo uersum ab eo proiecta ferantur: Imò & pila, vt Aristoteles aduertit. 8. Physicor. tex. 22. per eundem impetum à proijciente receptum in parietem illidit, ac inde resilit, qui motus sunt inter se contrarij. Et crocæ, vel testulæ eodem impetu, quo in superficiem aquæ proijciuntur, vix ad contactum peruenientes, per aliam lineam inde resiliunt, iterumque vltius, tanquam per saltus pluries in eandem superficiem incidunt, quousque impetu extincto immergantur.

Vnde colligitur ipsam qualitatem impetus eiusdem esse infinxæ speciei in omnibus proiectis, ac motibus violentis. Tum quia quodlibet proiectum per eam in infinitas loci partes posset moueri, vt à centro ad circumferentiam; impossibile autem est dari infinitas qualitates specie diuersas: tum etiam quia omnis impetus ordinatur, ac tendit ad producendam præsentiam localem eiusdem speciei, abstrahendo à distantia, vel propinquitate cæli, à qua differentia non
abstra-

abstrahunt grauitas, & leuitas, quæ proinde specie differunt inter se, & ab ipso impetu. Præterquam quod impetus differt à grauitate, & leuitate ratione principij extrinseci, à quo per accidēs procedit absque exigentia naturæ, nec non ratione desitionis absque introductione qualitatis contrariæ. Quare diximus non esse virtutem innatam, ac permanentem in subiecto, sicut est grauitas, & leuitas, quæ unicuique corpori debentur à propria natura.

Denique dicimus, hanc virtutem motiuam impetus à proijciente in ipso actu projectionis produci, non quidem formaliter per motum localem, qui solum est productiuus præsentiae localis sed concomitanter ad illum per actionem distinctam, quæ prout tendit ad qualitatem dici potest alteratio latè sumpta; tum vel maximè qualitatis productio non fit in instanti, sed in tempore, attamen breuissimo. Etenim licet impetus propriè non habeat contrarium, nihilominus cum eius productio necessariò sequatur motum localem, tanquam conditionem requisitam ad exerendas, & applicandas vires proijcientis, necessariò etiam ipsa proportiando se illi, fit successiuè, atque in tempore. Quare impetus paulatim intenditur ab eodem proijciente magis, ac magis se applicante in parua illa morula, paulatimq. nec statim per omnes proiecti partes secundum eandem intentionem, vt in lumine, quod pariter non in qualibet distantia diffunditur secundum eandem intentionem, sed successiuè, quamuis absolute in instanti producat. Post emissionem verò proiecti, nullam fieri intensionem, nec diffusionem explicatæ qualitatis in eodem subiecto consentaneum est; sed tantum in aerem quem offendit, quemque commotum facilius valet vltèrius pellere. Vnde prouenit, vt velocior sit motus proiecti in posterioribus partibus, quàm in prioribus, quousque talis virtus hebetata languescat, vt præcedenti quæst. explicatum est.

Ex quo pariter intelligitur, cur proiecta in vacuo non mouerentur proprio motu, vt docet Aristoteles 4. Physic. tex. 68. Nam præcipua ratio successiōis in motu locali

proue-

prouenit à resistentia mediij locum non statim cedentis, ut ipsemet Philosophus postea docet tex. 70. quod cum non esset in vacuo, non posset resistere; proindeq. confestim de loco ad locum cuncta proiecta transferri contingeret per vnicum mutatum esse. Quod satis est insinuasse ad euadendas difficultates, quæ contra explicatam virtutem congregere plerique conantur.

Quaestio Trigesimaquarta.



VR. neque parua valde, neque magna longè proijci queunt, sed commensurationem quandam illa habere oportet ad id quod proijcit? An quia necesse est, quod proijcitur, & impellitur, contraniti ei vnde impellitur? quod autem magnitudine sua nihil cedit, aut imbecillitate nihil contranitur, non efficit projectionem neque impulsione. Quod enim multò impellentis excedit vires, haudquaquam cedit: quod verò multò est imbecillius, nihil contranitur. An quia tantum fertur id quod fertur, quantum aëris mouerit ad profundum: quod autem non mouetur, neque mouebit quippiam, accidit autem illis ambo isthac habere. Valde enim magnam, & valde paruum, ceterum non mota existant: alterum namque nihil mouet, alterum verò nihil mouetur.

COMMENTARIUS.

Quid in causa sit quaerit hic Aristoteles, ut neque parua valde, neq; magna nimis longè proijci queant, sed proportionem quandam habere debeant ipsa, proiecta cum proijciente. Docetque primò id esse, quòd in projectione semper ac necessariò intercedat aliqua proiecti resistentia, quæ tamen à proijciente vincitur, ac superatur. Vnde quod magnitudine sua, ac ponderositate ita resistit, ut nihil cedat, nec eius renitentia valeat superari; aut ex opposito paruitate, & imbecillitate propria, nihil omni-

no re-

no resistit, nequit aliquo pacto projici, aut ab alio moveri.

Qua in solutione illud non parvam continet difficultatem, quod quæ nihil contrahuntur, siue resistunt, projici minimè posse Philosophus velit. Cum potius ab experientia inferri videatur contrarium. Nam si quæ minus resistunt facilius moventur, multò magis, longèq. facilius quæ nihil resistunt absolute poterunt projici, ac moveri.

Pro huius autem difficultatis explicatione, atque intelligentia duo hic animadvertere oportet: Vnum est totam rationem successionis in motu, quæ constituitur propriè motus, ac distinguitur à mutatione instantanea, quæ fit tota simul, provenire ex resistantia corporis moti, quæ non nisi in tempore superatur. Alterum verò est resistantiam projectorum in motu locali partim provenire ab effectu gravitatis, aut leuitatis quo ipsa projecta diuersas in positiones tendunt, atque inclinantur: partim quoque ab aere expellendo, ut ipsa dum feruntur, in eius locum succedant, ita ut resistant motioni projicientis, eò quod moveri nequeant nisi mouendo aerem circumfusum, quem debent expellere, & in cuius locum debent succedere.

His ergo præmonitis, liquidò constat, quod ab Aristotele dictum est, nimirum projici non posse, quæ nihil resistunt. Tum quia projectio, seu projecti latio non esset propriè motus, nec fieret in tempore, sed in instanti, quod est contra experientiam: tum etiam quia ubi non adest resistantia, nec eius causa potest adesse, quæ in projectis est circumobstantia medij expellendi, & inclinatio gravitatis, aut leuitatis eorum. Quæ autem nec gravitatem, nec leuitatem habent, nullamq. medij circumobstantis repugnantiam, nullam pati possunt violentiam qualis est ea, quæ infertur per imperum in ipsa projecta graua, aut leuia. Licet itaque defectus resistantiæ per se, & abstractè loquendo, non impediat, sed potius iuuat actionem agentis: nihilominus tamen in proposito, cum arguat incapacitatem quandam subiecti ad recipiendum impulsu projicientis per vim illatam, & superandam aliquam intermedij contrarietatem, sufficit ut

ex co

ex eo nulla fieri possit proiectio, vt Aristoteles asserbat. Vnde colligitur in orbium caelestium circumuolutione nullam ab intelligentijs impetus qualitatem in illis produci; cum nec illi sint alterabiles, nec grauitatem, aut leuitatē habeant, siue inclinationem aliquam ad resistendum impulsui, patientiamq. formam contrariam, aut violentiam ab impulsore.


Sed contrā adhuc vrgeri potest, quia ex praefato discursu tantum concluditur, iuxta rerum ordinem fieri non posse grauium aut leuium proiectionem absque aliqua resistentia, qua data non sequitur vt quod minor illa fuerit, eò minus corpora proijci valeant; sed potius oppositum. Nam quæ minus contranitantur, facilius superantur, longiusq. propterea proijci possunt. Cumq. parua valde, sua imbecillitate minus contranitantur, restat vt facilius superari debeant, longiusq. à proijciente emittantur.

Respondendum tamen est iuxta praedicta, corpora valde parua minus quidem resistere imbecillitate sua, eo quod minorem habeant grauitatem, aut leuitatem; ex eadem autem magnitudinis paruitate nasci minorem capacitatem illorum ad recipiendum impulsu, quo pellere possint circumobstantem aerem, vel aquam, & in eius locū successiuè abeundo succedere. Impulsus enim, sicut omnis alia similis qualitas, minus ex natura sua imprimi valet in parua quantitate, quàm in maiori, minusq. in leuiori, ac rariori, quàm in grauiori, ac densiori. Siquidem multiplicantur partes qualitatis ad multitudinem partium quantitatis, quæ sanè plures sunt in maiori, ac densiori materia, quæ propterea etiam fit grauior. Ad agendum verò non tantum valet, ac requiritur proportionata quædam intensio qualitatis actiuae, sed etiam extensio; vt patet in paruo, aut magno lumine vel calore, qui licet sit semper æquè intensus in igne, minus tamen, aut magis operatur iuxta maiorem, aut minorem extensionem, quam habet in magno, vel paruo igne. Quare huiusmodi minuscula corpora, de quibus loquebamur, post acceptum impulsu adhuc imbecilliora remanent, quàm alia grandiora ad superandam reluctantiam intermedij per quod.

quod debent transire . Vnde optimè intulit Aristoteles, ipsa proiecta commensurationem, ac proportionem quandam cum proiiciente requirere, vt e minus proiciantur . Nam in magnis valde deficit virtus motiua ipsius proiicientis ad superandam inclinationem, ac pressionem grauitatis : in admodum verò paruis deficit capacitas ad recipiendam tantam virtutem motiuam, qua pellere possint intermedium, ac per illud vltèrius transilire .

Ex quibus perquam facillè patebit, quod Aristoteles addit post explicatam solutionem, inquiring, id ipsum fortasse, ex eo adhuc contingere, quia tantum fertur id quod proicitur, quantum aeris mouerit in profundum, videlicet versus eam partem, in quam tendit . Siquidem in eius locum, transeundo debet succedere; nec posset, nisi dimouendo illum à proprio loco . At valde parua, vel magna nimis, dimouere nequeunt ipsum aerem, eo quod nihil mouet immotum; ipsa autem se habeant tanquam immota: parua quidem propter imbecillitatem impetus recepti, qui non sufficit ad motum: magna verò propter exuperantiam grauitatis cuius pressione non sinuntur ab impellente moueri: Ergo ipsa valde parua, ac nimis magna proijci nullo modo possunt, quod erat probandum.

Quæstio Trigesimaquinta.



VR ea qua in vorticosis feruntur aquis, ad medium tandem aguntur omnia? An quia magnitudinem habet quodcunque fertur, quamobrem illius extrema in duobus sunt circulis, hoc quidem minori, illo verò maiori: quare maior distabit: quoniam celerius fertur, & transuersum impellit illud ad minorem: quoniam autem id quod fertur, latitudinem habet, & ille rursus idem efficit, & ad interiorē propellit, donec ad mediam perueniat. An quia quod fertur, simili se habet modo ad omnes circulos propter medium, medium enim in vnoquoque circulo aequaliter distat. An quia quorum quidem circumacta aqua latius non superior propter

pter magnitudinem, sed gravitate sua circuli celeritatem excellunt, ea necesse est relinqui, & tardius ferri, tardius autem minor circulus fertur; non idem enim in tempore aequali magnus cum paruo reuoluitur circulus, quando circa idem fuerint medium, quamobrem in minori circulo relinqui necesse est, donec ad medium perueniant. Quorumcumque autem superior à principio fuerit latio, & finiens idem efficiet; oportet enim hunc quidem statim, alterum verò celeritate superare gravitatem, quamobrem ad interiorem semper circulum relinquetur quodcumque. Necesse enim est quod non superatur, aut in exteriori, aut in interiori moueri, in illo autem in quo est, impossibile est ferri, quod non superatur: adhuc verò minus in exteriori, celerior enim exterioris circuli est latio, restat igitur, ut id quod non superatur, ad interiorem transferatur, semper autem unumquodque proficit, ut non superetur. Quoniam verò peruenire ad medium, finem quidem efficit, ut quippiam non moueatur, stat autem solummodò ipsum centrum, ad hoc sanè omnia congregari necesse est.

C O M M E N T A R I V S.

VLtima tãdem hac in quaestione causam perscrutatur Aristoteles cur ea, quæ in aquarum vorticibus, ac reuolutionibus ferri cernuntur, ad medium postremo ferantur. Primumq. id ex eo fortasse euenire docet, quod lata corporis magnitudo dum circumagitur vortice, inter duos veluti circulos circa idem centrum ductos conuoluitur, quorum exterior, ac maior, cum velocius feratur, quàm minor, atque interior, velocius, ac facilius pariter defert, vehitq. correspondens sibi extremum magnitudinis intermediæ. Quo fit ut altero extremo minus, ac tardius commoto, tota ipsa magnitudo quasi in-transuersum dimota, ab exteriori in interiorem circulum vergendo transferatur: Ex quo similiter in alium, atque alium minorem perueniat, quousque ad centrum agatur: Etenim quod fertur simili se habet modo ad omnes circulos circa idem centrum per quos conuoluitur, ut ipsemet Philosophus quasi nouo medio argumentando subiungit.

Secundò verò idipsum confirmat ex eo, nam delati corporis magnitudo diuersimodè secundum diuersas sui partes se habet ad circulos à quibus mouetur; Quandoquidem secundum partes à centro vorticis remotiores, velocius mouetur à circulis maioribus, quàm secundum partes viciniores à circulis minoribus. Ex quo fit, vt magnitudo ipsa non æqualiter superetur, ac secundum se totam deferri possit ad motum circuli maioris, proindeq. vel extra, vel intra illum eam transmitti debere: sed nequit extra, cum adhuc celerior ibi fiat latio cui non posset correspondere secundum omnes suas partes; ergo restat, vt ab ipsa exuperantia circuli maioris in extimam eius partem incidentis, magnitudo ipsa transmittatur intra, nempe ad interiores circulos, & sic deinceps ad alios interiores vsque ad centrum illis commune in quo tandem omnia congregantur, atque quiescunt.

Quod sanè non ita concipiendum est, vt ipsis portionibus circuli, quibus agitata magnitudo conuoluitur, circulum absoluentibus, ac perfectum motum circularem complentibus, diuersum ea cursum teneat, ac aliter quàm aqua ipsa deferens moueatur. Siquidem tam aqua, quàm corpus in ea latum, ac supematans, cum primò circularem motum inchoauerit ob causam prædictam, circumferentias quas describere cæperat, in spiras commutat, & à perfecto motu circulari sensim degenerat. Eodem enim est vtriusque ratio, vt partes exteriores in gyrum ductæ, tanquam à centro remotiores, velocius ferantur, præualeantq. interioribus, quas propterea cum secum rapere nequeant pari passu per lineas æquales, nec ab eis disiungi permittantur, se illis agglomerando interius magis, circummiendo contorqueant, quousque simul in centrum perueniant. Quod est per spiras tam aquam, quàm corpus in ea latum deferri, vt sensu manifestissimè constat, ac perspicuè videre est in magnis vorticibus fluminum, quæ rapidè fluunt, amplosq. non habent sinus. Nam incidens aqua in sinus ipsos, angustos, turbinatim quidem ac per spiras, non autem per absolutos

circu.

circulos cogitur circumuolui. Id quod nec Aristoteles negauit, aut tantus vir potuit ignorare; nec alienum est à tradita eius doctrina, vt Baldus contendit, quasi Philosophus dixisset, aquam in vorticibus circumferri per circulos perfectos, atque distinctos, & corpus in ea latum ab vno in alium circulum pertransire; hoc est ab exterioribus in interiores appropinquando se magis ad centrum. Quod proculdubio falsum esset, cum sensu, vt diximus constet, aquam non moueri per circulos, sed per spiras: ac minimè consentaneum sit rationi, corpus delatum, diuersum à deferente iter tenere. Præsertim cum latio corporis supernatantis in aqua, sit vicio, & non impulsio.

Ad faciliorem tamen captum eorum, quæ de mente Aristotelis à nobis relata sunt, sit aqua primò rectà decurrens AB, quæ incidat in curuam ripam BC, vnde repulsa vergere cogatur in gyrum describendo quasi portionem



quandam circuli iuxta figuram eiusdem ripæ, cui aquæ moles necessariò adaptatur, vt BCD. Sitque corpus latum in aqua vbi E. Licimus ergo quod aqua ceptum iter, seu motum circularem secundans nequit circulum absolutum perficere, quem punctis BCDF hic expressimus, eodemque circulo iniectam, ac supernatantem magnitudinem E secum

abripiens, circumagere: Quia postquam aqua è loco ripæ continentis discesserit, & vtrò se in gyrum mouere cæperit per impetum repulsionis inde acceptum, partes eius exteriores, seu maioris circumferentiæ, ob maiorem velocitatem propriam, maioremq. impetum ex incidentia receptum, efficacius agunt quàm interiores, quæ per minorem circumferentiam commouentur, ac nullum immediatè repulsum acceperunt à consistenti ripa prædicta. Ideoq. non tantum correspondentem sibi partem exteriorē lati corporis E, nempe quæ remotior est à centro vorticis magis valent vltèrius promouere, quàm illæ partem eiusdem corporis interiorem; sed ipsasmet partes aquæ interiores, quæ per minores ambitus circumuoluuntur magis compellere, ac in minores circuitus restringere, quibus sese adaptando simul in spiras degenerant. Et sic lata corporis magnitudo vnà cum aqua tandem ad vorticis centrum reducitur.

Quod si abstractè loquendo qualibet maior, ac exterior circumferentia velocius moueatur, quàm minor, & interior circa idem centrum, validiusq. propterea corpora impellere, aut secum rapere posse intelligatur, absque eo, quod ad hoc præstandum circularem motum relinquat, ac in spiras conuertatur, compellendo etiam circumferentias interiores ad secum degenerandum simili modo. Id tamen in proposito locum non habet, tum quia aquæ fluenti, & ob incidentiam aliquam se retorquenti, nullus in rigore præscribitur circulus, quem debeat perficere, nec partibus eius exterioribus interdicitur accessus ad interiores, sicut circumferentiæ exteriori solidi corporis ad interiorem, à qua profectò æquè distat in circulo: tum quia non est eadem proportio excessus in velocitate, & efficacitate inter circumferentiam exteriorē, & interiorem in circulo consistentis materiæ dum rotatur, atque inter partes exteriores, & interiores aquæ per incidentiam quandam circumuolutas. Quandoquidem semper est maior excessus in istis, quàm in illis. Ut qui duplici ex causa proficiscatur; tam scilicet ex maiori ambitu, quem perficiunt in æquali tempore, quàm ex maio-

ri repulſu , quem immediatè per incidentiam acceperunt à ripa . Admiſſo autem hoc exceſſu maiori , conſequens eſt admittere adhuc maiorem circuitum , qui cum reperiri non poſſit in figura perfectè circulari , concedendum eſt , circum- lum in ſpiras conuerti , in quibus extima linea longè maior eſt reſpectu interioris , quàm æqualis extima peripheria re- ſpectu circumferentiæ interioris , vt obſeruare quiſque po- terit ; Quod ſuperuacaneum eſſet hic ſermonem vltèrius protrahendo probare , cum ſatis dictum ſit ad textus Aristo- telis expoſitionem , veritatisq. dilucidationem quantum no- bis aſſequi datum eſt in hac cæterisq. explicatis quæſtionib- us , quibus veluti in profundo Peripateticæ doctrinæ pela- go , poſt tot ſpeculationum circuitus , variarumq. diſputatio- num anfractus , ac vortices , vtinam tandem ad centrum il- lud ageretur mens noſtra , ad quod omnia referuntur , & in- quo ſolo poſt huius vitæ multiplices flexus , ac ſpiras tan- quam ſummo bono immobiliter adhærendo poteſt quie- ſcere .

F I N I S .

INDEX TEXTVVM

ATQVE ADDITIONVM

Primæ partis huius Mechanicæ Tra- ctationis.



P ERIS argumen- tum. pag. 1	De prima circuli admiranda proprietate. <i>Tex.</i> 3. 34
Quæ sit artis Me- chanicæ facul- tai. <i>Textus</i> pri- mus. pag. 4	De secunda circuli proprietate. <i>Textus</i> 4. 35
De nomine, & origine faculta- tis Mechan. <i>Addit.</i> prima. pag. 6	De tertia circuli proprietate. <i>Textus</i> 5. 36
De obiecto circa quod Mechan- ica facultas versatur. <i>Addi- tio</i> 2. pag. 9	De quarta circuli proprietate. <i>Tex.</i> 6. 39
Qua ratione facultas Mechan- ica constituitur ars & scien- tia. <i>Additio</i> 3. 12	Quo pacto linea circulum <i>descri- bens</i> duabus feratur lationi- bus. <i>Tex.</i> 7. 46
Mechanicam facultatem verè, ac propriè esse scientiam Ma- thematicam. <i>Addit.</i> 4. 17	Qua ratione partes diametri à centro remotiores magis parti- cipient de motu naturali, pro- pinquiores verò magis de præ- ternaturali. <i>Tex.</i> 8. 49
Quenam descriptio quidditatiua huius facultatis colligatur ex disctis, & quo pacto ab alijs scientijs distinguatur. <i>Addi- tio</i> 5. 25	De instrumentis, ac machinis naturam circuli in motione participantibus. <i>Addit.</i> 1. 53
<i>De</i> unitate scientiæ Mechanicæ, eiusque partibus. <i>Additio</i> 6. pag. 26	De Libra. 55
Quem gradum perfectionis, aut dignitatis facultas Mechan- ica obtineat. inter scientias. <i>Addit.</i> 7. pag. 30	De Vecte. 56
De dignitatibus, admirandisque circuli proprietatibus. <i>Tex.</i> 2. pag. 33	De Trocblea. 58
	De Axe in Peritrocchio. 60
	De Cuneo. 61
	De Choclea. 63
	De Centro-grauitatis, naturaliq. mobilitate grauium, & leuium. <i>Additio</i> 2. 64
	De præternaturali, & artificiosa grauium, & leuium. <i>Additio</i> 3. pag. 68

I N D E X

Q V A E S T I O N V M

S E C V N D A E P A R T I S.

- Q**VESTIO prima. Cur maiores librae exaltiores sint minoribus. pag. [73](#)
- Quaestio 2. Cur si spartum locetur supra iugum librae, ipsaeque ab altero extremo deprimatur, rursus illud ascendat, secus ac si spartum locetur infra. [77](#)
- Quaestio 3. Cur exiguae vires adhibito veste magna moueant pondera. [83](#)
- Quaestio 4. Cur ij, qui in naui medio sunt remiges, magis nauem moueant quam qui in alio situ. [91](#)
- Quaestio 5. Cur paruum existens gubernaculum tantas habeat vires ad circumferenda nauigia. [98](#)
- Quaestio 6. Cur quanto antenna sublimior fuerit iisdem velis, eodem vento, celerius ferantur nauigia. [118](#)
- Quaestio 7. Cur nauta vento extransuerso perstante, veli partem quae ad puppim vergit costringunt, quae vero ad pro-
ra relaxant. [124](#)
- Quaestio 8. Cux ex figurarum genere, quaecunque rotunda sunt facilius moueantur. [129](#)
- Quaestio 9. Cur ea quae per maiores circulos tolluntur citius ac facilius moueantur. [132](#)
- Quaestio 10. Cur facilius quando sine pondere est mouetur libra. [143](#)
- Quaestio 11. Cur super scytalas facilius portentur onera quam super currus. [147](#)
- Quaestio 12. Cur longius ferantur missilia funda, quam manu missa. [149](#)
- Quaestio 13. Cur si longiores fuerint collopes circa idem iugum, facilius circumagatur. Itemque cur graciliores succula facilius pariter ab eadem potentia circumuoluantur. pagina [154](#)
- Quaestio 14. Cur lignum facilius genu frangitur, cum ab extremis apprehenditur, quam cum prope genu. [157](#)
- Quaestio 15. Cur ea quae circa litora appellantur Croce, rotunda sint figura. [160](#)
- Quaestio 16. Cur quanto longiora sunt ligna, tanto imbecilliora fiant, magisque inflectantur. [163](#)
- Quaestio 17. Cur paruo existente

Index Quæstionum secundæ Partis.

- te cuneo eius adminiculo magna scindantur corpora. 167
- Quæstio 18. Cur duabus trochleis adinuicem ex opposito compositis, ac fune circumducto, magna trahantur pondera, quamuis imbecilla sit virtus trahentis. 171
- Quæstio 19. Cur securis, percussione potius quam superadictio pondere, lignum scindere valeat. 177
- Quæstio 20. Cur statera paruo appendiculo magna trutinet onera. 184
- Quæstio 21. Cur dentes facilius extrahantur dentiforcipis adhibito instrumento, quam sola manu. 189
- Quæstio 22. Cur nuces absque ictu facile confringantur instrumento ad eum usum instituto. 193
- Quæstio 23. Cur si duo puncta extrema vnius lateris in Rombo duabus simul ferantur lationibus cum eadem velocitate, vnum maius, alterum minus spacium percurrat. Item cur quod super latus fertur minus pertrahatur, quam ipsum latus. 200
- Quæstio 24. Cur ex duobus circulis circa idem centrum coaptati, ac reuoluti secundum absidem, maior minori aquale spacium percurrat. Scorsum verò conuoluti, maior maius, minor verò minus iuxta proportionem circumferentia vnius ad circumferentiam alterius. 205
- Quæstio 25. Cur lectulorum spondeæ secundum duplam proportionem longitudinis ad latitudinem efficiantur. Cur varè in illis muniendis, rectes per transversum, non autem per diametrum extendantur. pag. 225
- Quæstio 26. Cur difficilior proceræ ligna ab extremo super humerum gestentur, quam è medio, aquali existente pondere. 228
- Quæstio 27. Cur si valde procerum fuerit lignum, quamuis eiusdem sit ponderis, è medio sustineatur, difficilior tamen super humerum gestetur. 232
- Quæstio 28. Cur iuxta puteos constituta Colonia ad aquam hauriendam facilius mouentur, onus in altero extremo transversarii ligni apponendo. pag. 233
- Quæstio 29. Cur duo super lignum aliquod pondus ferentes non aequè grauentur si in eorum medio non extiterit ipsum pondus, sed magis is cui ipsum proximius fuerit. pagina 237
- Quæstio 30. Cur à sessione surgentes angulos rectos, quos efficiebat thorax cum femore, ac femur cum tibia, in acutos commutant. 241
- Quæstio 31. Cur facilius mouetur commotum, quam manens. pag. 245
- Quæstio 32. Cur ea quæ proficiuntur cessent à latione. 252

Quæ-

Index Quæstionum secundæ Partis.

Quæstio 33. Cur proiecta *mo-*
ueantur quamuis impellens
ea non consequatur. 260


Quæstio 34. Cur neque parua
valde, neque magna nimis lon-

gè projei queant. 269

Quæstio 35. Cur ea quæ in
aquarum vorticibus ferun-
tur, ad medium tandem agan-
tur. 272



INDEX RERVM.



A



ABSIDEM secundum quam per se cōuoluitur circulus commēsurari plano super quod rotatur.

pag. 216

Abisdem verò circuli delati ad rotationem alterius, non ita. ibidem, & sequente.

Motum circuli secundum Absidem esse motum quendam mixtum ex duplici latione. 215

Secundum Absidem dimotis circulis, dimouetur & centrum illorem. 130

Accidentia nonnulla à causis naturalibus producta conueniunt illis præter naturam. pag. 70. & 251

Actio debet esse ab inæquali proportionē. 70

Actio qua producit impetus non est motus localis, sed alteratio. 268

Admiranda omnia ad duo rerum genera posse reuocari. 5

Admiranda esse naturam circuli. pag. 33

Aequalitas cur dicatur causa quietis. 242

Aequilibrium quid. 55

In Aequilibrijs tam vectis, quam libræ ita se habet pōdus ad pondus, vt brachium ad brachium

ex commutata proportionē. pag. 88

Aëre incluso uarij emittuntur sonitus ad motum, vel percussionem aquæ. 29

Aëris resistentia, & accursus in motu grauium. 146. & 148

Aër quid valeat ad motum naturalem grauium, & proieciorū. ibid. & 265

Aër quomodo feriret sagittam si eam ipse pelleret in destinatum locum. 265

Angulus cōtingentiæ minoris circumferentiæ maior est quàm circumferentiæ maioris. 137

Angulus rectus quo sensu dicatur angulus æqualitatis. 242

Angulus circuli apud Aristotelem quinam sit. 134. & 136. & 168

Antenna altius sublimata, cur celerius feratur nauigium. pag. 1119

Antenna absque velo quò altius sublimatur, fluctuante mare, minus iactatur nauigium. 122

Antennæ cornua non minus quàm malus vrgent antroorsum; nauemque trahunt per funes opiferos, ac propedes. 106

Aquæ cadentes cur diuellantur. pag. 250

Aqua supernè cadens per aliquod foramen cur pyramidalem figurem referat. 251

Ar.

Index Rerum.

Archimedē opera post Aristotelem facultas Mechanica incrementa suscepit. 8
 Archimēdem diuerſa ab Aristotele principia non tradidiſſe. 71
 Archita ligneam columbam volantem exhibuit. 8
 Aristoteles poſt Architam Mechanicæ artis modo ſciētifico fundamenta iecit. 8
 Ars quomodo & quādo diſtinguitur à ſcientia. 12
 Arte nos ſuperare ea à quibus natura vincimur. 5
 Artis naturā verè ac propriè participari à facultate Mechanica. 13
 Authores Mechanicæ facultatis. 8. & 9
 Axis in Libra. Vide Libram. 55.
74
 Axis in Peritrochio quid. 60
 Axiculus Trochleæ. 58. & 72

B

Baculi extrema permutantur in aëre quando in eius proiectione anteponitur quod eſt leuius. 105
 Baculus nullo accepto impetu tantum poteſt impellere, quantum actu mouetur à manu. 66
 Baiuli idem pondus ſuper lignum ſimul geſtantes cur non ſemper æquè grauentur.
 Baiulorum ſi alter fuerit ſtatura, procerior, alter verò humilior, num æquè grauentur. 40
 Item ſi ſtatura quidē pares fuerint, per viam tamen acliuè in-

cedant, nū idem contingat. *ibid.*
 Bellica inſtrumenta, vel machinas conſiderare pertinet ad Poliorceticam. 18
 Bilancis iugum, axis, ac trutina. 74. Vide Libram.
 Bipennis vnde vim habeat ad feriendum. 182
 Brachia libræ inæqualia quo pacto decipiant. 76. Vide Libram.
 Brachia dentiſcorpis. 90
 Brachia inſtrumenti ad confringendas nuces quo amplius dilatatur, eò velocius comprimunt. 196

C

Candelæ recta decidētis ſtimula non exſtinguitur, nec inſtegitur. 49
 Item nec prope rotam agitaram poſita. 165
 Cardo in culpide puppis fulcrum gubernaculi, ac temonis. 102
 Catapulta quid. 28
 Cathectus in motione libræ. 83
 Celonium quid. 134
 Ad Celonium promouendum cur onus oneri adiungatur. *ibid.*
 Centrobarica ſcientia quæ. 28
 Centrum grauitatis quid. 64
 In Centro grauitatis omnis grauitas corporis colligitur, & coaceruatur. 67
 Centro grauitatis corpora recta feruntur deorſum. 67
 Centrū grauitatis ſtatim corpus aliud ſuſpenſum cōuertit. *ibid.*
 Circuli proprietates quatuor, & quæ. 34. & ſequentibus.
 In Circulo quæ plus à centro diſtat linea eadem vi commota, citius fertur. 40

Index Rerum.

- Circulos maiores mobiliore esse minoribus.** pag. [131](#)
- Circuli contrarium nixum non habent quo resistent motui, aut motori, sicut corpora manentia.** [133](#)
- Ex duobus circulis circa idem centrum reuolutis secundum absidē, cur maior minori æquale spatium pertransit.** [207](#)
- Circulum maiorem seorsum reuolutum, maius spatium pertransire.** [208](#)
- Circuli motum secundum absidem esse motum quendam mixtum ex duabus lationibus,** [215](#)
- Circulum minorem delatum ad motum alterius maioris magis participare de latione recta, quam circulari.** [216](#)
- Circulum maiorem delatum ad motum minoris magis participare de latione circulari, quam recta.** [217](#)
- Circulum quemlibet per se seorsum rotatum semper æquē de utraq; latione participare.** [217](#)
- Circumferentia idem quod ambitus circuli.** [208](#)
- Circumferentiā cōmensuratur linea descripta per circumuolutionem circuli super planū.** [209](#)
- Cur aliqua puncta circumferentiæ maioris secundum propriā absidem latæ minus progrediātur, quam puncta sibi cōrespōdentia circumferentiæ minoris secū delatæ, alia verō magis.** [220](#)
- Claua cur maximē valeat ad percutiendum.** [182](#)
- Clcopatræ nauigium, & remi.** [29](#)
- Cochlea quid.** [63](#)
- Cochleæ vsus ad mouenda pondera.** [ibid.](#)
- Concauum, & convexum se habent sicut magnum, & paruum.** [33](#)
- Constipatio, & laxatio partium necessaria ad inflexionem continui.** [165](#)
- Crocæ quid, idemque quod vmbilici.** [160](#)
- Crocæ cur rotūda sint figura.** [ibid.](#)
- Crocæ, vel testulæ quomodo per saltus in aqua resiliant.** [267.](#)
- De Testa.**
- Cuneus quid.** [61](#)
- Cuncus vnde vim habeat ad scindendum.** [168](#)
- Cuneum duos continere vestes sibi inuicem aduersos.** [168.](#)

D

- D Edali statua motus veluti animatos præstabat.** [29](#)
- Democritus Milesius antequam Eudoxius, & Archita opus ferē mecha. adiderat.** [8.](#)
- Dentes, cur facilius extrahantur dentiforcipis adhibito instrumento, quam sola manu.** [189](#)
- Dentiforcipem duos cōtinere vestes sibi inuicē contrarios.** [190](#)
- Dentem dentiforcepe cōstrictum vnā cum ipso instrumento, aliū quendā constituere vestē.** [191](#)
- Dentem commotū facilius manu sola quā instrumento simul auferri, quo pacto verificetur.** [192](#)
- Descensus, & deorsum. Vide Motus.**
- Descriptio quidditatiua Mechanicæ facultatis.** [35](#)
- Desicionē impetus impressi nō fieri in instāti, sed in tēpore.** [257](#)

Index Rerum.

Differentia inter Mechanicam,
Architectonicam, & Nauticam
facultatem. 29
Dignitas Mechanicæ facultatis.
30. & sequen.
Distantia potentix à fulcimento
vectis, mouendi facilitatem au-
geat. 88
Diuisio scientiæ Mechanicæ in
suas partes. 27
Doctrina Aristotelis, in priori par-
te huius libri tradita, applica-
tur in secunda. 1. & 73
Duplicari virtutem motiua quan-
do mouetur commotum. 246
Duplicari deinceps principium,
motus in descensu grauis deor-
sum. 247

E

Effectum quandoq. concurre-
re ad conseruationem causæ
tanquã dispositionem, aut con-
ditionem. 257
Efficiens causa impetus in motu
naturali est ipsum graue, aut
leue. 247
Efficiens causa impetus in motu
violento est ipsum proiciens,
vel impellens. 268
Eus istum validiorem esse in cû-
spide quam in medio. 183
Eus istus facilius diuertitur cû
quis ensi obuiat versus cuspi-
dem. 183
Ensem non cedere secundum pro-
priam contrarietatem, sed cum
ex latere eius cuspis dimouetur
ad latus. ibid.
Eruptores ignitos lapides moue-
ri motu præternaturali. 70

Eudoxius Cnidius, & Archita Ta-
rentinus primò Geometrica
principia ad vsum Mechanicum
transulerunt. 8
Exercitus mechanicis artibus pro-
strati. 7
Expulsio, quid. 70
Extractio difficilior quàm demis-
sio. 216

F

Faber est opifex eorum, quæ
ingenio simul, & manibus
fiunt. 7
Femur sedentis simul cum tibia,
ac thorace duos constituit an-
gulos rectos, quos ille surgen-
do commutat. 242
Finis ad quem ars Mechanica or-
dinatur. 9
Finis cuiusque practicæ scientiæ
est opus. 15
Foramen libræ cum axe triplici in
situ collocari potest. 78. & 81
Foramen vrde malus emergit in
navi excipit impulsus ipsius
mali. 120
Fractio ligni genu, ac manibus
vtrinq. adhibitis dupliciter
potest contingere. 157
Et cur facilius contingat longè
quàm prope genu admotis ma-
nibus. 158
Fractio ligni per eius complica-
tionem cur sequatur prius ex
parte exteriori, quàm interiori-
pag. 158
Fulcimentum græcè hypomochlion
appellatur. 56
Fulcimentum axis vicem gerit,
habetq. se tanquam centrum
immutum. 86

Ful-

Index Rerum.

Fulcimentum dentiforcepis in ex-
tractione dentis ubi constitua-
tur. pag. 191
Fulcimentum libræ trutina, seu
spartum. 55
Fulcimentum vectis quanto pro-
pinquius oneri locatur, tantò
facilius onus ipsum leuatur. 11
pag. 56. & 87
Fulcimentum vectis, quandoque est
in altera eius extremitate, ut
plurimum tamen inter onus, &
potentiam. 56
Funda cur longius ferantur missi-
lia quam manussa. 150
Fundatores cur tardius potius
quàm cito fundâ irrotare con-
sueverunt. 151
Fundæ motus circularis quo pa-
cto ad motum rectum proie-
ctionis vim possit adijcere. 153
Funis ductarius ubi sit alligandus
in trochleis. 172
Fune corpus appensum qua virtu-
te huc, atque illuc circumfere-
tur. 250
Item qua ratione tandem quie-
scat. 259. & 260
Funes opiferi, ac propedes. 106

G

G eodesia quo pacto distin-
guatur à Mechanica. 16
Geometria item in quo differat à
Mechanica. ibid.
Geometrica, & non alteri scientiæ
subalternatur Mechanica. 20
Geometricis conclusionibus uti-
tur Mechanica tanquam pro-
prijis principiis. 20
Grauia, & leuia quomodo apud

Mechanicos vsurpentur. 10
Grauia, & leuia cum virtute qua
moueri debent constituunt sub-
iectum materiale adæquatum
Mechan. 11
Grauia quibus præcipuè instru-
mentis à Mechanicis mouean-
tur. 54
Graue librândū tanto magis gra-
uitat, quanto plus distauerit à
catactu. 82
Grane cadens ex alto in se impe-
tum producit. 247
Gravitas corporis tanquam pro-
prium operandi principium, est
illi ratio, ut moueatur deorsum.
pag. 67
Gravitas quo sensu augeri dica-
tur in motu. 179
Gubernaculum quo pacto à temo-
ne distinguatur. 100
Et quomodo vnum cum illo con-
stituatur instrumentum. 100
Gubernaculū cum temone, quan-
doque se habet sicut remus in
cuspide puppis. 100
Gubernaculi virtus ad circumfe-
renda nauigia. Vide Temonem.
Gubernator quandoque non minus
constituitur mouens quam re-
miger. 102
Gubernator quo pacto obitare so-
let naui demersioni cum nimis
ad latus illa vergerit ventorum
impulsu. 129

H

H auriendi opus duobus di-
stributum temporibus per-
fici, & quo pacto. 135
Helices in Cochlea quomodo pô-
dera subleuent. 63

Hero

Index Rerum.

- Hero Alexandrinus Philosophus multa monumenta Mechan. protulit. 9
 Hero Mechanicus de Geodesia, ac de machinis bellicis scripsit. 9
 Hominem statura proceriorem magis gravari à pondere infra vestem alligatum, quod cum alio statura humiliori sustinet. pag. 240
 Quod si onus supra vestem sit alligatum magis gravari hominem statura humiliorē. ibid.
 Si autem onus liberè pendeat, utrumque hominem æquè gravari. ibid.
 Hominem scytalis, ac trochleis, axeq. in peritrochio, ore tantum perslando dimoueri posse. pag. 177
 Homo dum commodè sedet, duos angulos rectos positione sui corporis efficit: cum verò surgit, eos in acutos commutat. pag. 242
 Humeri iunctura constituitur centrum motionis qua securis ad scindendum adhibetur. 180
 Humeri iunctura cōstituitur centrum motionis qua circumagitur funda. 151
 Hydraulicas machinas à Cresibo primò inuentas fuisse. 29
 Hypomochlion idem quod fulcrum. 86
 I
 Iacula quomodo manu emittantur. 150
 Iaculationem fieri non posse absq. præiio motu iaculantis. 151
 Ictus securis sicut & mallei, ac similium vade validus constituitur. 179
 Ictus ensis. Vide Ensem.
 Ignēs missiles cur huc, atque illuc interdum discurrant. 153
 Impetus seu impulsus quid. 267
 Impetum non produci formaliter per motum localem, sed per aliam actionem. 268
 Impetum non produci in instanti. ibid.
 Impetum minus imprimi in parua quantitate quam in maiori: minusque in leuiori, & rariori, quàm in grauiori, ac densiori. pag. 271
 Impetum per se ordinari ad motum rectum, ad ceteros verò per accidens. 153
 Impetus ad resiliendū à quo producat. 150
 Impetus velis exceptus in quam nauis partem refundatur. 119
 Impetum non corrumpi in instanti, sed in tempore. 257. Vide Qualitas impetus.
 Inflexio continui ab altero extremo eleuati quomodo fiat. 164
 Inflexio proceris ligni ex medio suspensi, vel ambabus extremitatibus quo etiam pacto procedat. 166
 Instrumenta naturam circuli in motione participantia quæ. 53
 Instrumenta præcipua Mechanicorum sex. ibid.
 Iugum Libræ. Vide Libram.
 Iugum in machina textoria cur facilius volutetur maioribus, quàm minoribus collopibus. pag. 115
 Iun-

Index Rerum .

Iunctura humeri, vel brachij. Vide
Humeri.

L

L Ana quamvis tenuissima de-
scendenti graui post terga
alligata ab aëre non deprimi-
tur. pag. [349](#)

Lancea cur facilius sustineatur
erecta, quàm inclinata. [231](#)

Lancea inclinata cur facilius è
manubrio, quàm ab extremo
gestetur. [231](#)

In lancea cur manubrium prope
extremum, & non in ipso extre-
mo constituitur. [ibid.](#)

Lancea cur striari consuevit. [ibid.](#)
Ad lanceam confringendam in-
cursu quomodo robur brachij
ostentatur. [ibid.](#)

Lances libræ non pertinent essen-
tialiter ad constitutionem li-
bræ. [55](#)

Lapillus complanatus quomodo
eminus projiciatur. Vide Testa.
pag. [152](#)

Latio duplex, naturalis, ac præter-
naturalis. [41. & 47](#)

Lati continui in fine imbecillissi-
mam esse lationem, quando ve-
rificetur. [105](#)

Lectulorum spondæ cur secundum
duplam proportionem efficiantur.
[225](#)

In lectulis muniendis cur rectes
per transversum, non per dia-
metrum extendantur. [226](#)

Libra quid & quomodo in sui mo-
tione naturam circuli partici-
pet. [55](#)

Libra cur facilius moueatur quàm
do est vacua. [344](#)

Libræ maiores cur exactiores sint
minoribus. [74](#)

Libræ inæqualibus brachijs de-
fraudantur mercium emptores. [26](#)

Ad libræ motionem excessus pon-
deris proportionem quandam
requirit cum parte opposita
quam excedit. [145](#) & sequen.

Libræ iugum suspenditur sparto,
vel trutina. [55](#)

Libræ spartum locari potest in
medio, supra vel infra lineam
iugum diuidentem per longum.
pag. [78. & 84](#)

Cur quando ponitur supra si al-
terum extremum demittatur,
libra ex se reducitur in pristi-
num statum. [79](#)

Cur quando constituitur infra
non item. [80](#)

Cur quando constituitur in pun-
cto medio maneat quomodo-
cunque relinquatur. [84](#)

Ligna oblonga cur difficilior ab
extremo super humerum gesten-
tur, quàm ex medio. [229](#)

Cur item difficilior ab extremo
eleuentur. [230](#)

Ligna cur eo difficilior quò pro-
ceriora sunt etiam ex medio
asportentur. [231](#)

Lignum cur facilius genu franga-
tur si ab extremis apprehenda-
tur. [152](#)

Ligna graciliora cur facilius fran-
gantur, quàm crassiora. [158](#)

Ligna cur prius frangantur in
parte exteriori, quàm interiori
respectu frangentes. [158](#)

Ligna cur quanto longiora sunt
tanto imbecilliora fiant. [163](#)

Ligna ab aliquo extremo eleuata
si lon-

Index Rerum.

- si longiora sint, cur magis inflectantur. 163
 Locus antennæ. 119
 Locus ubi fulcitur malus in naui. pag. 120
 Locus proprius temonis. 105
 Locus ubi applicatur gubernaculum est veluti scalmus. 111
 Longitudo vectis vtrinque ex fulcimento protensa iugum refert libræ in partes inæquales diuisum. 86
 Longitudo patitur ad longitudinem, quod motum pondus ad mouens in vecte. 98
 Lorati stipites vnde vim tantam habeant ad percutiendum. 182
 Lumen accensum prope rotam, agitatum, ab aëre non inflecti, nec extinguï. 265
 Lumen candelæ rectâ decidētis similiter, nec inflecti, nec extinguï. 249
 Lusoriam pilam non resilire per nouum impetum acceptum a solo vel pariete. 250

M

- M** Achinaria scientia quænam sit. 128
 Malleus dum clauos, repellit constituitur vectis. 121
 Malleus vnde vim habeat ad percutiendum. 182
 Malus in ventorum impulsione constituitur vectis. 119
 Malum duplicem habere posse rationem vectis. 119 & 120
 Mali sedes, ac fulcimentum. 119
 Mali pars qua ipse vrget, ac promouet nauem. 119
 Malus quo versus vrgeat flante vento ex transuerso. 128
 Manganaria scientia quæ. 28
 Mare in remigatione constituitur onus, quod per remum tanquā per vectem repellitur. 91
 Mare se habet tanquam onus respectu vectis in motione gubernaculi. 101. & 102
 Mechanopetica scientia quæ. 28
 Mechanicæ facultatis nomen a quo deriuetur. 6
 Mechanica facultas in rationalē, & manualet distinguitur. 17
 Mechanicæ facultatis origo. 17
 Mechanicæ facultatis obiectum, atque subiectum. 111
 Mechan. finis ad quem ordinatur. pag. 9. & 71
 Mechan. facult. verè esse artem simul & scientiam. 131
 Nō subalternari Philosophiæ naturali, sed Mathematicæ. 20
 Quam habeat vnitatem, & partes. 27. & 28
 Mechan. facultat. descriptio. 25
 Mechan. facultat. dignitas, atque perfectio. 30
 Mechan. facultat. vtilitas. 32
 Mechanica problemata quomodo a Phisicis differant. 5
 Miraculo habentur quæ naturalia, sed præter consuetudinem contingunt; & quæ præter naturam arte patrantur. 5
 Miraculorum omnium causas in hac materia Arist. refert ad naturam circuli. 33
 Mobilitas naturalis granium quæ. pag. 66
 Mobilitas verò præternaturalis. pag. 68

Index Rerum.

Mobilitas artificiosa . 70
 Motus præternaturales, qui à cau-
 sis naturalibus oriuntur . 70
 Motum corpus facilius deinceps
 moueri . 143
 Idq. verificari tam in motione
 violenta, quam in naturali. 146
 Motus naturalis cur in progressu,
 & in fine velocior. 147. & se-
 quen.
 Motus violentus cur velocior sit
 in medio, quam in principio, vel
 fine . 158
 Motus productus ab impetu indif-
 ferens est ad quamcunque posi-
 tionem . 167
 Motus acceleratio in proiectis nõ
 prouenire ab aëris subsequētis
 accursu . 148
 Motus quomodo ponderi addat
 pondus, & grauitas augeatur
 in motu . 178
 Motus resiliēdi quomodo fiat. 150
 Motus circularis corporis fune,
 appensi qua virtute perficiatur.
 pag. 250
 Mutatio appendiculi, vel eius trāf-
 latio de loco ad locum, mutat
 etiam stateram . 188
 Multiplicare trutinas in statera
 ad ponderum differentias, labo-
 riosum, & inutile . 188

N

Nauis progressus per velifi-
 cationem quomodo fiat.
 pag. 119. & 120
 Nauis progressus in anteriora nõ
 flante ex puppi vento. 125
 Nauis progressus per remigatio-
 nem quo pacto procedat . 108.

& sequentib. Vide Remus .
 Nauis recta incedendo cur quan-
 doque non pertingat ad desti-
 natum locum . 114
 Nauis absque velo cur minus ia-
 ctetur fluctibus si altius subli-
 metur antenna . 122
 Nauigia qua ratione paruo cir-
 cūferantur gubernaculo. 101.
 Vide Temonem.
 Nauis æquabiliter à dextris, & à
 sinistris recipiendo maris im-
 pulsus, se habet tanquam libra
 in æquilibrio . 117
 Nauis constituitur etiam onus,
 quod per malum tanquam per
 vectem mouetur . 119
 Nauis quo pacto absque remis so-
 lo temone conuertatur in por-
 tu . 101
 Nixum non habet periphēria quo
 retardetur à proprio motu. 133
 Nixus corporum quiescentium .
 ibid.
 Nuces cur absque ictu facile in-
 strumento ad id opus fabrefa-
 cto confringantur . 194
 Nuces facilius confringi quo lon-
 giora fuerint brachia huius in-
 strumenti à connexionē ipso-
 rum . 195
 Nutus quem habent corpora ro-
 tunda ad motum . 131. & se-
 quentibus .

Nutu suo celerrime deorsum ro-
 tando feruntur indecliuē cor-
 pora orbiculata .

O

Objectum totale adæquatum
 Mechanicæ facultatis. 11
T 2 Obie-

Index Rerum .

- Obiectum formale eiusdem. *ibid.* quid . pag. 124. & 127
- Obliqua temonis constitutio quomodo nauem inclinet. 101 Pedes retrahere, ac perpendiculariter sub capite constituere debet is, qui à sessione vult surgere. 243
- Obliqua, ac magna declinatio prora per paruam temonis conuersionem. 106. & 107 Pila per eundem impetum à proiiciente receptū in parietem illidit, ac inde resilit. 267
- Odor ex se remittitur, ac definit absq; contrario expellente. 257 Poliorcetica scientia quæ. 28
- Offensant minus corpora rotunda quàm alia super planum. 131 Proiectorum latio non perficitur ab aëre. 248. & sequent. & 265.
- Onus, vel potentiam augeri, ac minui iuxta maiorem, aut minorem distantiam à sulcimento vectis. 88 & sequent.
- Onus proportionem quandam requirere cum potentia. 269 Proiecta qua ratione è minus ferantur. 261
- Onus oneri cur adiungatur ad celonium facilius promouendum. pag. 235 Proiecta cur cessent à latione. 253
- Onus antennæ aliquando resistit naui inclinationi. 123 Proiecta cur velocius ferantur in progressu, quàm in principio, vel fine. 258
- Aliquando verò nihil obstat, sed potius vicem gerit potentia inclinantis. *ibid.* In proiectis virtutem aliquam à proiiciente imprimi, ac produci. 262
- Opifex eorum, quæ ingenio simul & manibus fiunt, dicitur etiam Mechanicus. 7 Proiectorum resistentia in motu locali à quo proueniat. 270
- Opiferi funes quodnam in naui munus exerceant. 106 Proiecta commensurationē quandam cum proiiciente requirere. 272
- Oppugnationum astutias in bello ad Mechanicam pertinere. 6 Propedes veli inferiora retrorsum tendere, nauemque secum abripere. 106
- Organopetica scientia quæ. 28 Propedes repentino superueniente turbine relaxantur. *ibid.*
- Orbiculis multiplicatis in trochlea, augetur virtus motiua. 123 Prora in eodem existente, totum transferri nauigium, quomodo intelligatur. 115
- pag. 123 Proræ multa sit transpositio temone paululum quid transposito. pag. 107. & 117
- P
- P** Almula . Vide Remi palmula. Parua nimis sicut & magna valde cur proijci minimè valeant, 269
- Pedem facere in velificatione, in nauigatione quā puppis. 106

Index Rerum.

Proram versus pauciores remiges
adhibentur in triremibus. 106

Proram versus totus impetus in
velo collectus etiam ex trans-
uerso perflante vento refundi-
tur. 128

Puppis an maneat omnino dum
ad motum remonis circumfer-
tur longitudo nauigij. 113

Puppi parum dimota, multa fit
proræ transpositio. 106. & 113

Puppis qua ratione feratur quo
gubernaculum vergit. 114

Puppius versus ad latus tenditur
velum flante vento ex transuer-
so. 134

Puppis aliquando se habet tanquā
onus in veste anguloso. 122

Q

Qualitates quæ habent con-
trarium non nisi in tempore
intenduntur, ac remittuntur.
pag. 254

Qualitates nonnullæ deficientes
per propriam desitionē absque
contrario. 257

Qualitatem impetus esse præter
naturam grauium. 251

Qualitatem impetus semper esse
eiusdem speciei. 267

Qualitatem impetus non habere
qualitatem contrariam. 254. &
256. Vide Impetum.

Quantitas ponderis, & quantitas
virtutis motiue simul à Mecha-
nico consideranda. 10

Quantitas ponderis tum grauitas
tum leuitas respectu diuerso-
rum apud Mechanicos nuncu-
patur. 10

Quæstiones Mechanicæ quomodo
à naturalibus distinguantur. 6

R

Rami amputatio, quæ sursum
fit ab unico tantum impulsu
procedit. 179

Remi longiores in medio naui,
quàm in puppi, vel prora. 91

Remi argentei Cleopatrz Reginz.
pag. 29

Remi palmula, quandoq. in pro-
gressu nauigij non retrocedit.
pag. 109. & 111

Remi palmula tantum quandoq.
retrocedit quantum progredi-
tur nauigium. 111

Remi palmula, vt plurimum minus
retrocedit, quàm naui progre-
diatur. ibid.

Remigantes in naui medio, ma-
gis nauem mouere. 91

Remum in remigatione, vectis ra-
tionem habere. 91

In remigatione scalmum esse ful-
cimentum, maro onus. ibid.

Remigationem fieri per modum
circuli circa scalmum. 97

In remigatione ex duplici motu
circulari contrario resultare
vnum rectum quo progreditur
naui. 97

Resiliendo proiectum nullus in eo
producitur impetus nouus, sed
retorquetur idem à proiiciente
incussus. 250

Resiliendi motus. Vide Motus.

Rimulæ spondarū causa scissionis
earum cum restes in leculis ex-
tenduntur per diametrum. 216

Ripa quomodo per repulsum con-
cur-

Index Rerum.

currat ad circulationem aquarum in vorticibus. [275](#) & sequen.

Romanos ad remigium in arena aliquando se exercuisse. [93](#)

Rombi puncta extrema vnius lateris si duabus simul ferantur lationibus cum eadem velocitate, cur vnum maius, alterum minus spatium percurrat. [200](#)

In Rombo cur quod super eius latus fertur, minus spatium pertransit, quàm ipsum latus. [204](#)

Rotas tripliciter in orbem posse conuerti. [130](#)

Rota leuior cur facilius moueatur quàm grauior. [144](#)

Quæ per maiores rotas trahuntur, facilius ac citius moueri. pag. [140](#). & [142](#). Vide Circulû.

Rotunda corpora cur facilius moueantur. [130](#) & [137](#)

Runca vnde efficaciam fortiatur ad scindendum. [138](#)

S

Sarissam ab extremo eleuatam magis inclinari, quàm furcolum. [164](#)

Sarissa perpendiculariter ad planum horizontis erecta, cur facile ab extremo sustineatur. [231](#)

Cur non item per lineam horizonti parallelam constituta. ibid.

Sarissam in humero gestantes, effectum vibrationis experiuntur. [233](#)

Saxa decidètia cur interdum scindantur per aère. [250](#)

Scalmus quomodo se habeat in

remigatione. [291](#)

Scalmus per remigationem illuc transfertur vbi remi est principium, seu manubrium. [311](#)

Scalmus constituitur medium manens inter duos motus contrarios. [368](#)

Scytala quid, & quotuplex. [141](#). [147](#)

Super Scytalas cur facilius portentur onera. [318](#)

Securis cur iacta, lignum facile scindat, secus autem super illud imposita etiâ ingenti superadiecto pondere. [317](#)

Securis percussio ex circulatione vim maximam adipiscitur. [179](#)

Securis manubrium quomodo vectis vicem subeat. [181](#)

Securis in scissione constituitur veluti cuneus. [182](#)

Securis est malleus cuneatus, vel cuneus malleatus. ibid.

Semidiametrum in descriptione circuli moueri motu quoddam misto ex duabus lationibus. [41](#). & [47](#).

Semidiameter ex quo puncto incipit circumduci ad idem postremo reuertitur. [38](#)

Semidiametri puncta quo remotiora erunt à centro eò velocius mouebuntur. [41](#)

Semidiametri puncta à centro remotiora, cur magis participent de motu naturali; propinquiora de præternaturali. [294](#)

Spheropeia quæ nā scientia sit. [38](#)

Statera quomodo paruo appendiculo magna leuet onera. [184](#)

Statera, libræ simul, ac vectis rationem obtinet. [185](#)

Index Rerum.

Stateram esse veluti libram in qua plures sint libræ, quomodo intelligendum. [187](#)

Statera tanto maius onus valet leuare quanto propinquius illi constituitur spatium. [188](#)

Stipites lorati vnde tantam vim obtineant ad percutiendum. [182](#)

Stipites lorati adhiberi solent ad enucleandum triticum. [ibid.](#)

Succula quænam machina sit. [115](#)

Succulæ graciliores cur facilius ab eadem potentia circumuoluantur. [115](#)

Surgentes à sessione angulos re-ctos in acutos commutant. [242](#)

T

Temo quid; & quomodo constituat vnum instrumentum simul cum gubernaculo. [100](#)

Temonis motu dupliciter nauem posse circumferri. [100](#)

Temo vnde tantas vires habeat. [101](#)

Temonem constitui vestem, gubernatorem potentiam, ac mare, onus. [102](#)

Temo cur in extremo nauigij collocetur. [104](#)

Temonē nihil nauigio ad id quod in ante progredi est, conferre. [113](#)

Temonis motio explicatur per eius reductionē ad libram. [117](#)

Per temonem nauæ cum vento contendunt. [125](#)

Testa obliquè in aquarum superficiem incidens cur longius inde resiliat. [150](#)

Et cur pluries tanquam per sal-

tus in eandem superficiem incidat. [267](#)

Testa quomodo inter digitos collocetur ad hoc, vt eminus proijciatur. [152](#)

Taumaturgica scientia quæ. [28](#)

Et in quas partes diuidatur. [29](#)

Tollenon idem quod Celoniū. [134](#)

Traçtio quid. [70](#)

Triremes cur prope puppim plures remiges in singulis remis habere consueuerint. [106](#)

Trochlea quid. [58](#)

Trochleis duabus adinuicem oppositis cur facile magna leuentur onera. [172](#)

Trochleæ orbiculum, vestis vicem obtinere. [ibid.](#)

Trochlearum beneficio tanto maius pondus leuari, quantò plures extiterint in eis rotulæ. [173](#)

Trochleam superiorem non tam auxilium, quàm commoditatem ad leuandum præstare. [174](#)

Ex inferiori trochlea totam vim quæ potentia adiungitur esse petendam. [175](#)

Tylum quid. [63](#)

Tympanus quid. [60](#)

V

Vestio quid & quotuplex. [70](#)

Vestis quid & quotuplex [56](#)

Veste adhibito cur exigua virtute magna leuentur pondera. [86](#)

Vestis quomodo habeat rationem libræ. [ibid.](#)

Vestis longitudo, atque proportio ad potentiam, & pondus. [88](#)


Velis antrorsum pergere quomodo valeat nauis. [119. & 124](#)

Veli-

Index Rerum.

- Velificando ubi totus ventorum
impetus refundatur. 106
- Vento ex transuerso perflante, ac
directè nihilominus nauigia in-
cedendo, cur tandem non per-
tingant quò præcisè tendebant.
pag. 114
- Vento ex latere flante, veloq. ad
oppositum inclinante, cur non
sequatur naui submersio. 128
- Imo cur sic securius ipsa naui
incedat. ibid.
- Verticilla ex papiro quomodo ab
aëre circumuoluantur. 101
- Vertigo quid. 70
- Vibratio quid. 229
- Vibrationis motus, gestationem
ligni retardat. 229 & 232
- Violentia quot modis possit in-
ferri. 69
- Per violentiam mota, fieri quasi
per se mobilia. 262
- Virtus impressa cur necessario ad
motum violentum sit cōceden-
da, 264. Vide Impetum.
- Vortex per lineas spirales, non
autem per proprias circūse-
rentias perfici. 274
- Vortice circumlata, cur ad me-
dium tandem agantur. 273. &
sequentibus,

F I N I S.



E R R A T A.

Pag. Lin. Errata.	Correctio.	Pag. Lin. Errata.	Correctio.
13 8 pro	per	81 17 quam eleua-	quam extremum
14 24 ineffabiliter	infallibiliter	12	partis eleuatæ
38 35 non est incō-	non est incōueniens cir-	82 33 aliena	à linea
ueniēs ex	culum ex ipsa	105 21 ipfis	ipfius
ipfa		108 24 imposito	in proposito
51 2 parallellam	parallelam, Sic lege	109 13 procedi	procedere
	pag. 52 80. 231. 243.	188 29 diuersum	diuifum
	255.	194 32 Philofophus	philofophatus
72 16 enumera-	enumeratas pertineat	200 5 confert	conferat
ras		228 18 uidentius	euidentiùs

R E G E S T V M.

1 A B C D E F G H I K L M N O P Q R S T.

Omnes sunt Quaterniones, præter a, & T, Duerniones.







